

Niu Testeman

Gospel Doktrin Lesenbuk blong Tija



Niu Testeman

Gospel Doktrin Lesenbuk blong Tija

Jos blong Jisas Kraes blong Ol Lata-dei Sent
I pablisim
Sol Lek Siti, Yuta

Kova: *Toktok antap long Hil*, i kam long Carl Bloch. Oli yusum wetem raet blong National Historic Museum blong Frederiksborg.

© 2006 i kam long Intellectual Reserve, Inc.

Oli holem evri raet

Oli printim long Yunaeted Stet blong Amerika.

Oli letem long Inglis: 1/98

Oli letem translesen: 1/98

Translesen blong *New Testament Gospel Doctrine Teacher's Manual*
Bislama

Ol Samting we i Stap Insaed

Lesen Namba mo Taetol	Pej
Ol Help blong Tija	
1 “Blong Yufala i Save Bilif Se Jisas Hem i Mesaea” (Aesea 61:1–3; Joseph Smith Translation, Luke 3:4–11; John 1:1–14; 20:31)	1
2 “Long Olgeta Laef Blong Mi, Mi Mi Stap Leftemap Nem Blong Hae God” (Luk 1; Matiu 1)	6
3 “I Gat Wan Pikinini We i Jes Bon, We Hem Bae i Sevem Man” (Luk 2; Matiu 2)	10
4 “Yufala i Mekemrere Rod blong Hae God” (Matiu 3–4; Jon 1:35–51)	15
5 “Bon Bakegen” (Jon 3–4)	20
6 “Wantaem Nomo, Tufala i Livim Ol Net blong Tufala” (Luk 4:14–32; 5; 6:12–16; Matiu 10)	24
7 “Hem i Tekem Ol Sik Blong Yumi, Mo i Karem Ol Sobodi Blong Yumi” (Mak 1–2; 4:35–41; 5; Luk 7:11–17)	29
8 Toktok Antap long Hil: “Wan Fasin We i Winim Narafala Fasin” (Matiu 5)	33
9 “Fastaem Yufala i Mas Lukaot Gud Blong Obei Long God We i King Long Yufala” (Matiu 6–7)	39
10 “Yufala i Mas Putum Yok Blong Mi Long Solda Blong Yufala. . .mo Yufala i Mas Lan Long Mi” (Matiu 11:28–30; 12:1–13; Luk 7:36–50; 13:10–17)	45
11 “Hem i Stap Talem Plante Samting long Olgeta long Parabol” (Matiu 13)	50
12 “Mi Nao Mi Olsem Kakae We i Save Givim Laef” (Jon 5–6; Mak 6:30–44; Matiu 14:22–33)	55
13 “Bambae i Givim long Yu, Ol Ki blong Niufala Wol Ya we God i King long Hem” (Matiu 15:21–17:9)	60
14 “Be Hu ol Man ya we Oli Stap Raonabaot long Mi?” (Matiu 18; Luk 10)	65
15 “Mi Olsem Laet blong Ol Man long Wol” (Jon 7–8)	70
16 “Fastaem Mi Mi Blaen, Be Naoia Mi Save Lukluk” (Jon 9–10)	74
17 “Bambae Mi Mas Mekem Olsem Wanem blong Kasem Laef Ya We I No Save Finis?” (Mak 10:17–30; 12:41–44; Luk 12:13–21; 14; 16)	79
18 “Hem i Lus, Be Naoia Mi Faenem Hem Bakegen” (Luk 15; 17)	84
19 “Bilif Blong Yu i Mekem Yu Yu Gud Finis” (Luk 18:1–8, 35–43; 19:1–10; Jon 11)	89
20 “Sore Long Yufala. Yufala i Gat Tu Fes” (Matiu 21–23; Jon 12:1–8)	94
21 “Wanem Saen we Bambae i Soemaot we Yu Bambae Yu Kambak Bakegen?” (Joseph Smith—Matthew [Matiu 24])	100
22 “Yufala i Kam Tekem Ples blong Yufala, Ale long Sem Fasin long Niufala Wol ia” (Matiu 25)	105

23	“Olsem we Mi Mi Lavem Yufala, Ale Long Sem Fasin, Yufala i Mas Lavlavem Yufala” (Luk 22:1–38; Jon 13–15)	110
24	“Hemia I Laef Ya We I No Save Finis” (Jon 16–17)	115
25	“Be Yu No Mekem Olsem We Mi Mi Wantem, Yu Mekem Olsem We Yu Nomo Yu Wantem” (Matiu 26:36–46; Mak 14:32–42; Luk 22:39–46)	120
26	“Blong Samting Ia Nao, Mi Mi Bon” (Matiu 26:47–27:66; Mak 14:43–15:39; Luk 22:47–23:56; Jon 18–19)	125
27	“Be Hem i No Stap Long Ples Ya. Hem i Laef Bakegen Finis” (Matiu 28; Luk 24; Jon 20–21)	131
28	“Mifala I Ol Witnes” (Ol Wok 1–5)	136
29	“Namba blong Ol Disaepol i Kam Antap” (Ol Wok 6–9)	142
30	“God i Stap Mekem I Semmak Nomo Long Olgeta Man” (Ol Wok 10–14; 15:1–35)	147
31	“Nao Long Fasin Ya, Olgeta Jos Oli Kam Strong Moa Long Bilif Blong Olgeta” (Ol Wok 15:36–18:22; Fas mo Seken Tesalonaeka)	152
32	“Tabu Spirit, Hem i Givim Laef Long Yumi” (Ol Wok 18:23–20:38; Galesia)	157
33	“Yufala i Olsem Haos Blong God” (Fas Korin 1–6)	162
34	“Olsem ol Odinens, Stret Olsem We Mi Tijim Yufala long Hem Fastaem” (Fas Korin 11–16)	168
35	“Plis, Yufala i Letem God i Kam Fren Blong Yufala” (Seken Korin)	173
36	“God i Lavem Yufala, mo Hem i Singaot Yufala Finis blong Yufala i Kam Man blong Hem” (Rom)	178
37	Jisas Kraes: “Hem Nomo i Stamba Blong Bilif blong Yumi, Long Stat Gogo i Kasem En blong Hem” (Hibrus)	183
38	“Yu Yu Talemaot Mi Finis” (Ol Wok 21–28)	188
39	“Blong Olgeta Man Blong Hem Bambae Oli Rere blong Mekem Wok blong Hem” (Efesas)	193
40	“Mi Save Mekem Evri Samting long Paoa blong Kraes” (Filipae; Kolosi; Filimon)	198
41	“Mi Mi Kamtru Finis long En blong Hem” (Fas mo Seken Timoti; Taetas)	203
42	“Wan Klin Rilijen” (Jemes)	208
43	“God i Jusumaot Yufala blong Yufala i Laen blong Hem” (Fas mo Seken Pita; Jud)	213
44	“God I Stamba blong Fasin Ya blong Lavem Man” (Fas, Seken mo Nambatri Jon)	218
45	“Man We i Winim Faet blong Hem, I gat Promes blong Mi i Stap long Hem” (Revelesen 1–3; 12)	222
46	“Hem Bambae I Stap Oltaem Wetem Olgeta, mo Olgeta Bambae Oli Man blong Hem” (Revelesen 5–6; 19–22)	229

Ol Help blong Tija

Afta we Lod we i laef bakegen long ded i bin soemaot Hemwan long Ol Aposol blong Hem, Hem i kamaot bakegen long wan grup blong olgeta long Lagun blong Galili. Taem Hem i bin stap wetem olgeta, Hem i bin askem Pita wan kwestin tri taem: “Yu yu lavem mi?” Mo evri taem Pita i ansa long Lod i talem se: “Yes Masta, yu save we mi mi lavem yu.” Mo Lod i ansa long Pita: “Ale, yu givim kakae long ol smol sipsip blong mi. . . . Ale yu lukaot gud long ol smol sipsip blong mi. . . . Ale yu givim kakae long ol smol sipsip blong mi” (Jon 21:15–17).

Olsem wan Gospel Doktrin Tija, yu save soem lav blong yu long Lod taem yu givim kakae long ol smol sipsip blong hem, taem yu mekem sua se “oli save tingbaot . . . mo fidim” wanwan memba blong klas “wetem toktok blong God” (Moronae 6:4). Wan impoten stamba tingting blong tok blong God i blong helpem yumi “save bilif we Jisas ya, hem i Mesaea . . . blong [yumi] save kasem laef long nem blong hem, from we [yumi] bilif long hem.” (Jon 20:31). Taem Spirit i gaedem yu, bae yu save helpem ol memba blong klas blong mekem testemoni blong olgeta long Sevyu, fet blong olgeta long Hem, mo strong tingting blong laef folem gospel blong Hem, i kam strong. Bae yu save helpem olgeta tu blong kasem ol nara blesing we i kamaot long tru stadi blong Niu Testeman, olsem we Presiden Thomas S. Monson i bin talemaot.

“Ful mesej blong Niu Testeman i tekem win blong spirit blong man i girap. Ol taem blong tingting i lus oli lus mo i kam saen blong hop, harem nogud i kam glad, mo filing ia se yu lus long laef i gowe mo yu kasem tru save se Papa long Heven i gat tingting long wanwan long yumi” (“The Spirit Giveth Life,” *Ensign*, Jun 1997, 2).

Stap Tij Wetem Spirit

Taem yu stap rere long wan Gospel Doktrin klas, hem i impoten blong yu letem Tabu Spirit i givim insperesen long yu mo i gaedem yu. Lod i bin talem se bae Hem i givim Spirit long yu tru long prea blong fet, mo sapos yu no kasem Spirit, bae yu no tij (luk long D&C 42:14). Tingbaot se Tabu Spirit i tija long klas blong yu.

Yu save lukaotem Spirit ia taem yu prea, livim kakae, stadi long ol skripja, mo stap biae long ol komanmen. Taem yu stap rere long klas blong yu, prea blong Spirit i helpem yu blong yu andastanem ol skripja mo ol nid blong ol memba blong klas. Spirit i save helpem yu blong yu planem wan rod we i gat mining blong yu toktok raon long ol skripja mo blong oli yusum long laef blong olgeta naoia (luk long 1 Nifae 19:23). Wetem Spirit we i gaedem yu, bae yu save kam wan tul long ol han blong God, we i wok, blong tijim toktok blong Hem long ol pikinini blong Hem.

Daon ia, i gat sam tingting we i talem long yu olsem wanem blong invaetem Spirit long klas blong yu:

1. Invaetem ol memba blong klas blong givim ol prea bifo mo afta long lesen. Long taem blong klas, prea long hat blong yu blong Spirit i gaedem yu, blong i openem ol hat blong ol memba long klas, mo blong i Testefae mo i givim insperesen.

2. Yusum ol skripja (luk long “Lukluk Nomo long Ol Skripja” long pej 00 (vi)).
3. Serem testimoni blong yu taem Spirit i talem long yu, be i no long en blong lesen nomo. Testefae abaot Jisas Kraes. Plante taem, invaetem ol memba blong klas blong serem testimoni blong olgeta.
4. Yusum ol hym, ol singsing blong Praemeri, mo ol nara tabu singsing blong mekem hat blong ol memba oli rere blong filim Spirit.
5. Talemaot long ol memba blong klas abaot lav we yu gat long olgeta, long ol narawan, long Papa long Heven mo Jisas Kraes.
6. Serem wanem we yu luk se i tru, ol filing, mo ol eksperiens we i go wetem lesen. Invaetem ol memba blong klas blong mekem sem samting. Ol memba blong klas oli save talem tu olsem wanem oli bin yusum mo folem ol prinsipol we oli bin toktok raon long olgeta long ol lesen we i bin pas.

Lukluk Nomo long Ol Skripja

Elda Boyd K. Packer i bin tijim, “Tru doktrin, taem oli andastanem, i jenisim ol tingting mo ol fasin” (insaed long Conference Report, Okt. 1986, 20; o *Ensign*, Nov. 1986, 17). Long taem we yu stap rere mo long taem blong klas, lukluk nomo long ol doktrin blong gospel we i sevem man, olsem we oli presentem olgeta long ol skripja mo long ol tijing blong ol profet blong ol las dei. Hemia i minim se bae yu mas stadi gud long ol skripja, mo tu, wetem prea. Lod i bin givim komanmen ia se yu no mas lukaot blong talemaot toktok blong Hem, be fastaem yu mas lukaot blong kasem toktok blong Hem. Taem yu kasem toktok blong Hem tru long skripja stadi, Lod i bin promes se bae tang blong yu bae i fri; afta, sapos yu wantem, bae yu gat Spirit mo toktok blong Hem, paoa blong God bae i mekem man i bilivim ol toktok ia (luk long D&C 11:21).

Leftemap tingting blong ol memba blong klas blong oli tekem ol skripja blong olgeta evri wik long klas. Ridim tugeta ol skripja we yu bin jusum mo toktok raon long ol. Long ol ples we i posibol, yusum ol edisen blong skripja blong Lata-dei Sent.

Oli mas givim wanwan memba blong klas wan kopi blong *Niu Testeman Stadi Gaed blong Memba blong Klas* (35682 852). Buklet ia bae i helpem ol memba blong klas blong mekem ol stadi skil blong olgeta i kam antap mo blong oli go long ol skripja blong oli faenem ol ansa long ol kwestin blong olgeta. Bae i helpem olgeta blong andastanem ol skripja, yusum olgeta, rere blong toktok raon long olgeta insaed long klas, mo yusum olgeta blong toktok raon long olgeta wetem famle.

Olsem Wanem blong Yusum Lesenbuk ia

Lesenbuk ia i wan tul blong helpem yu blong tijim ol doktrin blong gospel aot long ol skripja. Oli bin raetem blong ol Gospel Doktrin klas blong ol yut mo ol adalt mo oli blong yusum blong evri fo (4) yia. I no nid blong yusum sam narafala refrens mo toktok blong tijim ol lesen ia.

Ol lesen long lesenbuk ia oli gat moa infomesen bitim hemia we bae yu yusum blong tij long wan taem long klas. Lukaotem Spirit blong Lod taem yu jusum ol stori blong ol skripja, ol kwestin, mo ol nara tul blong lesen we bae i gud moa blong i stret wetem ol nid blong ol memba blong klas.

Wanwan lesen i tekem ol seksen ia:

1. *Taetol*. I gat tu (2) samting insaed long taetol: wan sot sentens o toktok we i talem wan samting, mo ol skripja we yu mas ridim bifo yu stap Rere long Lesen.
2. *Stamba Tingting blong Lesen*. Toktok blong stamba tingting i givim men aedia we bae yu lukluk long hem taem yu stap rere mo tijim lesen.
3. *Rere long Lesen*. Seksen ia i talem smol abaot ol skripja stori we i stap long aotlaen blong lesen mo i givim sam tingting blong helpem yu blong tij moa gud. I save gat tu sam moa riding o tingting blong yu Rere long Lesen, olsem ol tul we yu save tekem i kam long klas.
4. *Aktiviti blong pulum tingting*. Seksen ia i gat wan simpol aktiviti, wan lesen we yu yusum ol samting, o kwestin blong helpem ol memba blong klas blong rere blong lan, tekem pat, mo filim tingting blong Spirit. Nating yu yusum aktiviti blong pulum tingting we i stap long lesenbuk o yu yusum wan blong yuwan, hem i impoten blong lukluk nomo blong pulum tingting blong ol memba blong klas taem lesen i stat. Aktiviti ia i mas sot nomo.
5. *Yusum mo toktok raon long ol skripja*. Hemia men pat blong lesen. Wetem prea stadi long ol stori blong skripja blong yu save tij mo toktok raon long olgeta long wan gudfala wei. Yusum ol tingting we i stap long “Leftemap Tingting blong Klas blong Toktok” mo “Yusum Plante Wei blong Tijim Ol Skripja” (ol pej 00–00 (vii–viii)) blong jenisim wei we yu tij mo kipim ol memba oli intres.
6. *Las toktok*. Seksen ia i helpem yu blong talem smol abaot lesen mo leftemap tingting blong ol memba blong klas blong laef wetem ol prinsipol we yu bin toktok raon long olgeta. Hem i stap mekem yu tingbaot tu blong serem testimoni blong yu. Mekemsua se yu lego inaf taem blong endem lesen.
7. *Sam moa tingting blong tij*. Seksen ia i stap long kolosap evri lesen insaed long lesenbuk ia. I save tekem sam moa trutok we i kam long ol skripja stori, i jenisim ol wei blong tij, ol aktiviti, o sam nara tingting we i go wetem lesen aotlaen. Yu save yusum sam long ol aedia ia olsem pat blong lesen ia.

Luklukbak long wanwan lesen, wan wik bifo lesen. Taem yu stap stadi long wok blong ridim skripja eli, bae yu kasem ol tingting mo filing long wik we bae i helpem yu blong tijim lesen. Taem yu tingting hevi long lesen long taem blong wik, prea blong Spirit i lidim yu. Gat fet se bae Lod i blesem yu.

Leftemap Tingting blong Klas blong Toktok

Yu no mas givim toktok long taem blong lesen. Be, yu mas helpem ol memba blong klas blong tekem pat long wan wei we i gat mining blong toktok raon long ol skripja. Taem ol memba blong klas oli tekem pat, i helpem olgeta blong:

1. Lanem moa abaot ol skripja.
2. Lanem olsem wanem blong laef folem ol gospel prinsipol.
3. Oli putum olgeta fulwan blong laef folem gospel.
4. Invaetem Spirit insaed long klas.
5. Tijim mo mekem wanwan i kam antap (luk long D&C 88:122) blong oli save tekem samting long ol presen, save, eksperiens, mo ol testimoni blong wanwan long olgeta.

Taem blong toktok raon long klas i mas helpem ol memba blong kam long Kraes mo laef olsem ol disaepol blong Hem. Stretem ol toktok we i no folem ol stamba tingting ia.

Lukaotem blong Spirit i gaedem yu taem yu stadi long ol kwestin insaed long lesenbuk ia mo mekem tingting long wijwan bae yu askem. Lesenbuk i givim ol skripja refrens blong helpem yu mo ol memba blong klas blong faenem ol ansa long ol kwestin ia. Ansa long ol nara kwestin bae i kam long ol eksperiens blong ol memba.

Hem i moa impoten blong helpem ol memba blong klas blong oli andastanem mo laef folem ol skripja bitim hemia blong tokbaot evri samting we yu bin rere long hem blong tijim long lesen. Sapos ol memba oli stap lanem wan samting aot long wan gudfala samting we oli stap toktok raon long hem, samtaem i help blong letem ol toktok ia oli gohed be i no blong traem blong finisim ful lesen.

Yusum ol gaedlaen ia blong leftemap tingting blong klas blong toktok:

1. Askem ol kwestin we i nidim olgeta blong oli tingting mo blong oli toktok raon long hem, be i no ol kwestin we bae oli ansa long “yes” o “no”. Ol kwestin we i stat wetem *from wanem, olsem wanem, huiia, wanem, wetaem mo weaples* oli moa gud blong leftemap tingting blong toktok.
2. Leftemap tingting blong ol memba blong klas blong oli serem ol eksperiens blong olgeta we i soem we oli save laef folem ol prinsipol blong skripja mo ol doktrin. Leftemap tingting blong olgeta tu, blong oli serem filing blong olgeta abaot wanem samting we oli bin lanem aot long ol skripja. Mekem ol komen we oli gud abaot ol toktok we oli stap givim.
3. Lukaot gud long ol nid blong wanwan memba blong klas. I tru se yumi mas leftemap tingting blong ol memba blong klas blong tekem pat insaed long klas, sam bae oli fraet blong ansa. Yu save toktok wetem wanwan long olgeta blong faenemaot olsem wanem bae oli fil blong rid strong long klas mo tekem pat long klas. Lukaot blong no askem wan memba blong klas sapos bae i mekem olgeta i sem.
4. Givim ol skripja refrens blong helpem ol memba blong klas blong faenem ol ansa blong sam long ol kwestin.
5. Leftemap tingting blong ol memba blong klas blong tingting hevi long ol kwestin insaed long *Niu Testeman Stadi Gaed blong Memba* taem oli stap stadi long ol riding wok blong olgeta blong wanwan wik. Taem yu stap rere long wanwan lesen, tingting long olsem wanem bae i gud moa blong toktok raon long ol kwestin ia long klas. Ol memba blong klas bae oli save tekem pat moa gud long klas sapos yu askem ol kwestin we oli rere blong ansa.

Yusum Plante Wei blong Tijim Ol Skripja

Yusum ol tingting ia blong tijim ol skripja stori long wan wei we i moa gud mo wetem plante fasin:

1. Helpem ol memba blong klas blong andastanem wanem ol skripja i stap tijim abaot Jisas Kraes. Askem olgeta blong tingting long olsem wanem sam skripja i stap mekem fet blong olgeta long Sevyia i kam antap mo i stap helpem olgeta blong filim lav blong hem.

2. Askem ol memba blong klas blong tingting long sam spesel wei we oli save folem wan toktok long skripja insaed long laef blong olgeta, mo serem tingting ia wetem klas. Mekem olgeta oli mekem ol skripja i gobak long olgetawan taem, long maen blong olgeta, oli putum nem blong olgeta long ples blong ol nem long ol skripja.
3. Taem yu stap tijim doktrin, antap long hem, talemaot gud abaot ol stori insaed long Niu Testamen we i promotem fet, mo mekemsua se ol memba blong klas oli andastanem olgeta mo toktok raon long sam wei blong laef folem olgeta.
4. Mekem ol memba blong klas oli lukaotem ol toktok, sentens, o aedia we oli ripitim plante taem long wan skripja o i gat spesel mining long olgeta.
5. Leftemap tingting blong ol memba blong klas blong yusum “appendix” insaed long King James vesen blong Baebol insaed long ol edisen blong ol Lata-dei Sent. Olgeta ia tu “Topical Guide” mo “Bible Dictionary” oli save help long stadi blong yuwan mo blong toktok long klas.
6. Raetem long blakbod ol sentens, ol ki toktok, o ol kwestin we i go wetem skripja stori ia. Afta, ridim mo mekem sot stori ia. Taem ol memba blong klas oli harem ol sentens, ol ki toktok, o ol ansa blong ol kwestin, stop mo toktok raon long ol wetem olgeta.
7. Insaed long Buk blong Momon, sentens ia, “olsem ia nao yumi luk” oli yusum blong tokbaot wan lis blong ol prinsipol we oli tijim (eksampol, luk long, Hileman 3:28). Afta we yu tokbaot wan toktok long skripja, askem ol memba blong klas blong eksplenem prinsipol ia mo oli yusum toktok ia “olsem ia nao yumi luk.”
8. Lukaotem mo toktok raon long ol saen we oli stap yusum long Niu Testeman. Eksampol, Man we bae i mared mo maredwoman we i representem Sevyia mo ol pipol blong Hem.
9. Notem olsem wanem ol pipol o ol samting we i hapen long ol skripja i save go agensem olgetawan.
10. Mekem wan memba blong klas i mekem drama blong ol skripja stori taem hem i ridim bigwan ol toktok blong ol defren pipol insaed long ol stori ia. Mekemsua se ol drama ia oli soem stret respek long ol skripja.
11. Divaedem klas long tu o moa smolsmol grup. Afta we yu luklukbak long wan skripja, mekem wanwan grup i raetem daon ol prinsipol mo ol doktrin we oli stap tijim olgeta insaed long stori ia. Nao mekem wanwan grup i tekem taem blong tokbaot olsem wanem oli save yusum ol tijing ia long laef blong olgeta.
12. Invaetem ol memba blong klas blong tekem wan pensel blong makem ol impoten ves taem yufala i stap toktok raon long olgeta.

Stap Helpem Ol Niu Memba

Olsem wan Gospel Doktrin tija, yu save gat janis ia blong tijim ol memba we oli niu insaed long Jos. Tijing blong yu i save helpem ol niu memba blong kam strong insaed long fet.

Fas Presidensi i bin talem: “Evri memba blong Jos i nid blong oli lavem mo givim kakae long olgeta, speseli long ol fas manis afta long baptaes blong olgeta. Taem

ol niu memba oli kasem stret fren, janis blong sev, mo kakae blong spirit we i kam long stadi long toktok blong God, oli gat eksperiens blong kam konvet mo yufala ‘i gat raet insaed long ples blong God, olsem ol narafala man blong God nomo. Yufala i insaed long famle blong God finis’ (Efesas 2:19)” (First Presidency letter, 15 Mei 1997).

Stap Tijim Gospel long Ol Yut

Sapos yu stap tijim ol yut, tingbaot se oli nidim blong tekem pat plante mo oli nidim samting blong lukluk we i representem ol doktrin we yufala bae i toktok raon long ol. Sapos yu yusum o vidio presentesen, ol pikja, mo ol aktiviti we oli givim long lesenbuk, bae i save helpem ol yut blong gat intres oltaem long ol lesen. Blong ol nara aedia blong helpem yu blong tijim gospel long ol yut, lukluk long *Teaching, No Greater Call* (36123); *Kaetbuk blong Tij* (34595 852).

“Blong Yufala i Save Bilif Se Jisas Hem i Mesaea”

Lesen
1

Aesea 61:1–3; Joseph Smith Translation, Luke 3:4–11; John 1:1–14; 20:31

Stamba Tingting blong Lesen

Blong leftemap tingting blong ol memba blong klas blong mekem testemoni blong olgeta abaot Jisas Kraes i kam strong moa taem oli stap stadi long Niu Testeman.

Rere long Lesen

1. Ridim, tingting hevi, mo prea abaot olgeta skripja ia:
 - a. Aesea 61:1–3; Joseph Smith Translation, Luke 3:4–11. Profesi blong Aesea mo Jon Baptaes abaot misin blong Sevyia.
 - b. Jon 1:1–14; 20:31. Aposol Jon i Testefae se Jisas Kraes i “prapa laet.” Hem i talemaot se stamba tingting blong raetem testemoni blong hem i blong helpem ol narawan blong “bilif se Jisas Hem i Mesaea.”
 2. Kasem wan kopi blong *Niu Testeman Stadi Gaed blong Klas Memba* (35682 852) blong wanwan man mo woman insaed long klas blong yu. (Wod i sud oda finis ol stadi gaed ia olsem pat blong kurikulum oda blong olgeta blong yia. Wan memba blong bisoprik i sud givim olgeta long Sandei Skul Presidensi.)
 3. Sapos yu yusum aktiviti blong pulum tingting, askem sam memba blong klas blong rere blong ridim o talem long sot toktok wan spesel skripja long Niu Testeman mo blong eksplenem smol from wanem skripja ia i givim insperesen o i helpem olgeta.
 4. Sapos ol pikja ia oli stap, yusum olgeta long taem blong lesen: Aesea i Raet abaot Taem Kraes i Bon (62339; Gospel Art Pikja Kit 113) mo Jon i Stap Prij long Ples we i No Gat Man long Hem (62132; Gospel Art Pikja Kit 207). Sapos yu yusum aktiviti blong pulum tingting, tekem tu sam pikja we i tokbaot sam taem blong Niu Testeman olsem, Kraes i Stap Hilim Blaen Man (62145; Gospel Art Pikja Kit 213) mo Meri mo Lod we i Laef Bakegen long Ded (62186; Gospel Art Pikja Kit 233).
 5. Wan tingting blong tij: Leftemap tingting blong ol memba blong klas blong oli finisim riding we yu givimaot long olgeta evri wik mo blong kam long klas mo rere blong toktok raon long wanem we oli bin ridim. Taem bae oli stap rere, bae i helpem olgeta blong fulfilim promes blong Lod se hem we i prij mo hem we i kasem, tru long Spirit blong trutok, bae oli andastanem tufala wanwan, mo tufala tugeta i kam antap mo oli stap glad tugeta (luk long D&C 50:22).
-

Wan Tingting blong Lesen

Aktiviti blong
Pulum Tingting

Olsem we i stret, yusum aktiviti ia o wan aktiviti blong yuwan blong statem lesen. Soem ol pikja we i soem ol taem blong Niu Testeman.

Askem ol memba blong klas blong tingabaot kwestin ia:

- Wanem stori o tijing insaed long Niu Testeman i bin givim insperesen o i bin helpem yu?

Givim wan smol taem long ol memba blong klas blong tingting, mo afta, invaetem ol memba blong klas we yu bin jusum olgeta blong ridim o talem sot spesel skripja long Niu Testeman. Sapos ol nara memba blong klas oli wantem serem wan spesel skripja blong olgeta, letem olgeta oli mekem.

Talemaot olsem wanem yu stap filim blong save tijim mo stadi long Niu Testeman long yia ia. Eksplenem se stamba tingting blong stadi long yia ia i blong helpem ol memba blong klas blong mekem fet blong olgeta long Jisas Kraes i kam strong moa mo blong kam blong save gud laef mo misin blong Hem.

Yusum mo Toktok
Raon long Skripja

Taem yu stap tijim olgeta skripja ia, tokbaot olsem wanem blong yusum olgeta long evri dei. Leftemap tingting blong ol memba blong klas blong serem ol eksperiens we i go wetem ol prinsipol blong skripja.

1. Profesi blong Aesea mo Jon Baptaes abaot misin blong Sevyia.

Ridim mo toktok raon long Aesea 61:1–3 mo Joseph Smith Translation, Luke 3:4–11. (Joseph Smith Translation blong Luke 3:4–11 i stap long ol pej 805–6 insaed long “appendix” blong LDS edisen blong King James Bible.)

Soem pikja blong Aesea we i stap raet abaot taem we Sevyia i bon. Eksplenem se yumi save mekem ol testemoni blong yumi abaot Jisas Kraes i kam moa strong mo soem tangkyu blong yumi long Niu Testeman taem yumi stap stadi long ol toktok blong Aesea mo ol narawan we oli bin talem profesi abaot misin blong Sevyia.

- Wanem saed blong misin blong Sevyia oli talemaot long Aesea 61:1–2? (Listim ol ansa blong ol memba blong klas long blakbod. Ol ansa i save tekem sam we oli stap daon ia.)
 - a. “Talemaot gud nius long ol puaman” (ves 1).
 - b. “Mekem ol man we tingting blong olgeta i foldaon, olgeta, oli harem gud bakegen” (ves 1).
 - c. “Blong talemaot long olgeta we oli stap wok slef long narafala kantri, se oli save gohom” (ves 1).
 - d. “Leftemap tingting blong olgeta we oli harem nogud, oli stap krae” (ves 2).
- Olsem wanem Jisas i bin fulfilim ol profesi ia? (Leftemap tingting blong ol memba blong klas blong givim ol eksampol long ol skripja mo blong serem sam eksperiens blong olgetawan.)

Poenemaot se Jisas i talemaot ol toktok ia long stat blong ministri blong Hem blong talemaot se Hem i Mesaea (Luk 4:16–21; luk long lesen 6).

Soem pikja blong Jon Baptaes i stap prij long ples we i no gat man long hem. Eksplenem se Jon Baptaes i profesae long saed blong misin blong Sevyia jes bifo Jisas i statem ministri blong Hem long wol ia.

- Olsem wanem Jon Baptaes i tokbaot misin blong Sevyia? (Luk long Joseph Smith Translation, Luke 3:4–9. Raetem ol ansa blong ol memba blong klas long blakbod. Sapos yufala i no gat Joseph Smith Translation blong ol ves ia, listim ol profesi olsem we i stap daon ia.)
 - a. Tekemaot ol sin blong wol ia (luk long ves 5).
 - b. Blong sevem man long ol pat blong ol nesen (luk long ves 5).
 - c. Karem i kam wanples, olgeta we oli bin lus (luk long ves 5).

- d. Mekem prijing blong gospel long ol Jentael i posibol (luk long ves 6).
 - e. Stap wan laet long olgeta we oli stap sidaon long tudak (luk long ves 7).
 - f. Mekem laef bakegen long ded i kam tru (luk long ves 7).
 - g. Mekem jastis long evriwan (luk long ves 9).
 - h. Talemaot gud long olgeta we i no blong God abaot wok blong olgeta we i no blong God (luk long ves 9).
- Olsem wanem Jisas i bin fulfilim ol profesi ia? (Leftemap tingting blong ol memba blong klas blong givim ol eksampol long ol skripja mo ol eksperiens blong olgeta.)
 - Yu filim olsem wanem taem yu stap tingabaot ol samting we Jisas i bin mekem blong yumi? Bae ol laef blong yumi i olsem wanem sapos Jisas i no bin mekem ol samting ia blong yumi?

2. Aposol Jon i testefae se Jisas Kraes i “prapa laet.”

Ridim mo toktok raon long Jon 1:1–14; 20:31. (Yusum Joseph Smith Translation blong John 1:1–14 sapos hem i stap. Oli faenem long ol pej 807–8 insaed long “appendix” blong LDS edisen blong King James Bible.)

- Wanem yumi save lanem abaot Jisas Kraes long Jon 1:1–3, 14? (Luk long lis daon ia. Lukluk gud se “Tok blong God” long Jon 1:1, 14 i stap minim Sevya.)
 - a. Hem “i stap” wetem God, Papa, “long taem ya we wol ya i no stap yet” (Jon 1:1–2). Lukluk gud se misin blong Sevya i stat finis long laef bifo laef long wol ia, longtaem bifo Hem i bon long Betlehem.
 - b. Hem i God (Jon 1:1). Eksplenem se taem yumi stap tokbaot God, yumi stap tokbaot Papa long Heven. Be, “man ia we yumi save Hem olsem Jehova long Ol Testeman . . . i Pikinini blong God, we yumi save Hem olsem Jisas Kraes, . . . we Hem tu i wan God. Jisas i wok folem daereksen blong Papa. . . . Plante long ol samting we ol skripja i stap talem se God i mekem, Jisas nao i bin mekem . . . olgeta” (Bible Dictionary, “God,” 681).
 - c. Oli bin prijim gospel tru long Hem long laef bifo laef long wol ia. (Joseph Smith Translation, John 1:1).
 - d. Hem i mekem evri samting (Jon 1:3).
 - e. Hem i Wan Pikinini ia Nomo blong God long Mit mo Bun (Jon 1:14; Luk tu long 1 Nifae 11:14–21). Oli tokbaot doktrin ia long lesen 2.
- Aposol Jon i bin talem se “long [Jisas] i gat laef i stap” (Jon 1:4). Hem i bin testefae tu se Jisas i “prapa laet we i save givim laet long olgeta man” (Jon 1:9). Olsem wanem Sevya i bin givim laef mo laet long yu? (Olsem ol memba blong klas, toktok raon long kwestin ia, yu save lukluk i go long Jon 8:12; Fas Korin 15:20–22; Moronae 7:15–18, 41; D&C 88:6–14; mo Bible Dictionary, “Light of Christ,” 725.)
- Wanem stamba tingting blong Jon taem hem i bin raetem testimoni blong hem? (Luk long Jon 20:31.) Hem i minim wanem blong “bilif se Jisas i Mesaea”? (Eksplenem se Mesaea hem i wan Hibru toktok we i minim Hem we oli anaotem hem. Taem yumi gat wan testimoni se Jisas Hem i Kraes, yumi save se Hem i Pikinini blong God mo oli anoetem mo oli odenem Hem bifo blong Hem i Sevya blong yumi.) Olsem wanem blong stap stadi long Niu Testeman long Sandei Skul long yia ia bae i save help blong mekem testimoni blong yufala se Jisas Hem i Kraes, i save kam strong?

- Wanem nao wanwan long yumi i save mekem long wanwan mo olsem wan klas blong Spirit i save gaedem yumi taem yumi stap stadi long Niu Testeman? (Luk long Jemes 1:5–6; D&C 50:17–22; 88:118.)
- Olsem wanem ol toktok we i stap long Jon 1:10–14 i save stret long yumi, nating yumi no bin stap long wol ia long taem blong ministri blong Sevyia long wol ia.

Elda Thomas S. Monson i bin tijim:

“Yumi no nid blong visitim Tabu Graon blong filim se Hem i stap kolosap long yumi. Yumi no nid blong wokbaot long so blong Galili o long ol hil blong Judia blong wokbaot long ol ples we Jisas i bin wokbaot long hem.

“Long wan wei, yumi evriwan i save wokbaot long ples we Jisas i bin wokbaot taem, wetem toktok blong Hem long ol lip blong yumi, spirit blong Hem long ol hat blong yumi, mo ol tijing blong Hem long ol laef blong yumi, yumi wokbaot long rod blong laef long wol ia” (insaed long Conference Report, Epr. 1974, 70; o *Ensign*, Mei 1974, 48).

Las Toktok

Testefae abaot Jisas Kraes mo talemaot ol filing blong yu abaot wei blong lanem abaot Hem taem yu stap stadi long Niu Testeman.

Mekem ol memba blong klas oli mas save se ol testimoni blong olgeta abaot Sevyia bae i kam antap taem oli stap lukaotem Spirit blong gaedem olgeta long ol stadi blong olgeta long Niu Testeman mo taem oli stap tekem pat long ol toktok insaed long klas. Leftemap tingting blong olgeta blong yusum *Niu Testeman Stadi Gaed blong Memba* taem oli stap stadi long ol skripja blong rere long wanwan klas.

**Sam Nara Aedia
blong Tij**

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Bigfala Tingting blong Niu Testeman

Invaetem ol memba blong klas blong lukluk i go bak long pej we i gat ol samting we i stap insaed long Baebol mo luklukbak long ol nem blong olgeta 27 buk blong Niu Testeman. Eksplenem se oli save seremaot Niu Testeman long fo pat (yu save raetem olgeta long blakbod):

- a. Ol Gospel (Matiu, Mak, Luk, mo Jon), we oli ol rekod mo witnes blong laef, misin mo ol tijing blong Jisas Kraes.
- b. Buk blong Ol Wok, we i stori blong ministri blong ol Aposol afta we Jisas i ded mo Taem we Hem i Laef Bakegen long Ded. Buk ia i lukluk moa long wok blong Pita long ol man Jiu mo wok blong Pol long ol Jentael.
- c. Ol Leta blong Pol mo ol nara lida blong Jos, we oli bin raetem blong tijim mo leftemap ol Sent long taem blong olgeta.
- d. Revelesen blong Lod long Aposol Jon long aelan blong Patmos.

2. Ol vidio presentesen

Sapos vidio ia *Family Home Evening Video Supplement 2* (53277) i stap, yu save soem faef minit pat ia we taetol blong hem i “What Think Ye of Christ?” Yusum presentesen ia blong stat tokbaot Niu Testeman mo blong talemaot strong se i impoten blong gat wan testimoni se Jisas Hem i Kraes.

Sapos *New Testament Video Presentations* (53914) i stap, yu save soem tu (2) minit pat ia we taetol blong hem i “The Message of the New Testament”.

3. “Hem . . . i kam blong tokbaot Laet ya” (Jon 1:8)

Mekem wan memba blong klas i ridim Jon 1:6–8.

- Huia man ia we oli tokbaot long ol ves ia? (Jon Baptaes.) Wanem nao misin blong hem? (Luk long Jon 1:8.) Semmak olsem Jon, olsem wanem yumi save “kam tokbaot Laet ya”?

Lesen
2

“Long Olgeta Laef blong Mi, Mi Mi Stap Leftemap Nem blong Hae God”

Luk 1; Matiu 1

Stamba Tingting Blong helpem ol memba blong klas blong developem moa fet long Jisas Kraes tru long wan stadi blong ol laef blong Elisabet, Sekaraea, Jon Baptaes, Meri mo Josef.

- Rere long Lesen**
1. Ridim, tingting hevi, mo prea abaot ol skripja ia:
 - a. Luk 1:5–25, 57–80. Enjel Gabriel i kamaot long Sekaraea mo talem se, long ansa blong prea blong hem, waef blong Sekaraea, Elisabet, bae i bonem wan boe. Boe ia, bae nem blong hem Jon, bae i mekem ol pipol oli rere long Lod. Sekaraea i kwestinem ol toktok blong Gabriel mo tang blong hem i bin fas. Elisabet i bonem bebi nating hem i olfala, mo Jon i bon. Sekaraea i bin soem fet taem hem i stap talem profesi abaot misin blong Jon.
 - b. Luk 1:26–56; Matiu 1:18–25. Enjel Gabriel i talem long Meri se bae hem, bae hem i mama blong Pikinini blong God. Meri mo kasin sista blong hem Elisabet, tufala i stap glad long nius se bae Sevyia bae i kam. Josef i lanem se Meri bae i bonem Sevyia.
 2. Sapos ol pikja ia oli stap, yusum olgeta long taem blong lesen: Jon i stap Prij long Ples we i No Gat Man long Hem (62132; Gospel Art Pikja Kit 207) mo Taem Oli Talemaot Gudnyus: Enjel Gabriel i Kamaot long Meri (Gospel Art Pikja Kit 241).
 3. Wan tingting blong tij: Taem wan i tij wetem paoa blong Tabu Spirit, “paoa blong Tabu Spirit i karem toktok ia i go long ol hat blong ol pikinini blong ol man” (2 Nifae 33:1). Blong filim paoa blong Spirit i mekem ol testemoni blong ol memba blong klas, lav blong olgeta long Lod mo ol narawan, strong tingting blong olgeta blong laef long stret mo gud fasin i kam strong moa. Wetem prea, tingting long wanem yu save mekem blong invaetem Spirit long taem blong wanwan lesen. (Luk long ol pej “00–00” (v–vi) long lesenbuk ia mo long nara buk ia *Teaching—No Greater Call*, long ol pej 13, 76–77.)

**Wan Tingting
blong Lesen**

Aktiviti blong
Pulum Tingting

Olsem we i stret, yusum aktiviti ia o wan aktiviti blong yu blong statem lesen.

Askem ol kwestin ia long ol memba blong klas:

- Sapos yu save luk wan we i stap insaed long Niu Testeman be i no Jisas, huia bae yu wantem luk hem? From wanem bae yu wantem luk hem?

Afta we sam memba blong klas oli givim ansa long ol kwestin ia, eksplenem se plante taem yumi wantem go kolosap long ol pipol we oli stret mo gud from se oli stap folem Sevyia mo oli testefae abaot Hem. Taem yumi kam blong save gud moa ol pipol ia, yumi stap kam kolosap moa long Jisas Kraes. Lesen ia i tokbaot plante pipol we eksampol blong olgeta, we i bin stret mo gud, i bin mekem yumi kam kolosap moa long Jisas Kraes.

Taem yu stap tijim ol skripja ia, tokbaot olsem wanem blong yusum olgeta long laef evri dei. Leftemap tingting blong ol memba blong serem eksperiens we i go wetem prinsipol blong skripja ia. From se bae i had blong askem evri kwestin o blong lukluk long evri poen long lesen, wetem prea, jusum olgeta we i stret long ol nid blong ol memba blong klas blong yu.

1. Jon Baptaes i bon long Elisabet mo Sekaraea.

Toktok raon long Luk 1:5–25, 57–80. Invaetem ol memba blong klas blong ridim bigwan ol ves we yu bin jusum.

- Olsem wanem oli tokbaot Elisabet mo Sekaraea long ol skripja? (Luk long Luk 1:6–9.)
- Wanem blesing Sekaraea mo Elisabet i bin prea from? (Luk long Luk 1:7, 13.) Olsem wanem prea ia, oli bin ansa long hem? (Luk long Luk 1:11–13, 24–25. Poenemaot se ating Sekaraea mo Elisabet, tufala i bin prea blong plante yia we bae oli gat blesing blong gat wan pikinini. Be, Papa long Heven i no bin givim blesing ia gogo kasem taem we i stret taem blong mekem ol stamba tingting ia oli kam tru.) Olsem wanem yumi save stap fetful mo stap longwe long ol toktok o fasin blong tingting i no strong taem ol ansa long ol prea blong yumi i no kam long stret wei we yumi wantem?
- Wanem profesi Gabriel i bin talem abaot misin blong Jon? (Luk long Luk 1:14–17. Soem pikja blong Jon we i stap Prij long Ples we i No Gat Man long Hem, mo raetem sot ol profesi blong Gabriel long blakbod. Toktok raon long wanem profesi i minim, olsem wanem Jon i fulfilim olgeta, mo olsem wanem yumi save folem eksampol blong Jon long ol samting ia.)
 - a. Jon bae i “pulum plante man long ol laen blong Isrel, oli kambak long Hae God we i God blong [olgeta]” (Luk 1:16).
 - b. Bae hem i “tanem tingting blong ol papa, blong oli tingbaot ol pikinini blong olgeta bakegen” (Luk 1:17).
 - c. Bae hem i “tanem tingting blong ol man we oli no save obei long God blong oli folem tingting blong ol stret man” (Luk 1:17).
 - d. Bae hem i “mekem ol man oli rere blong Hae God i kam long olgeta.” (Luk 1:17).

Not: Jon Baptaes i “man we i gud bitim evri narawan long histri we i bin holem Aronik Prishud” (Bible Dictionary, “John the Baptist,” 714). Yu save toktok raon long olsem wanem ol memba blong klas we oli holem Aronik Prishud oli save folem ol defren saed blong taem bifo misin blong Jon.

- Wanem i bin hapen long Sekaraea taem hem i bin gat tu (2) tingting long ol toktok blong enjel? (Luk long Luk 1:18–20.) Olsem wanem ol fasin blong Sekaraea afta taem we Jon i bon i mekem fet blong hem i kam niu bakegen? (Luk long Luk 1:59–63. Hem mo Elisabet i bin putum nem blong boe blong tufala Jon, mo long fasin ia, tufala i bin obei long ol komanmen blong God be i no blong folem ol fasin blong lokol kastom.)
- Taem Sekaraea i bin talem profesi abaot misin blong boe blong hem, hem i tokbaot tu fasin blong pemaot yumi, mekem yumi fri, fasin blong sevem man, ol sore, mo laet (Luk 1:68–79). Huia hem i stap tokbaot taem hem i stap tokbaot ol samting ia? (Jisas Kraes.) Invaetem wan memba blong klas blong ridim Jon 1:6–9. Testefae se olsem Jon Baptaes, yumi sud mekem ol seves blong yumi oli blong helpem nomo ol naraman blong kam long Kraes.

- Afta we Jon i bon, hem i gruap mo “tingting blong hem i kam strong long wok blong God” (Luk 1:80). Yu ting se from wanem Jon i mas gat strong tingting long wok blong God blong hem i save mekem misin blong hem i kam tru? Wanem samting yumi save mekem blong mekem tingting blong yumi i kam strong long wok blong God?

2. Meri mo Josef i lanem se Meri bae i mama blong Pikinini blong God.

Ridim mo toktok raon long ol ves we oli jusum long Luk 1:26–56 mo Matiu 1:18–25. Soem pikja blong Taem we Oli Talemaot we Jisas i Bon.

- Wanem Meri i lanem long enjel Gabriel? (Luk long Luk 1:26–33.) From wanem Sevyia i nid blong Hem i mas wan pikinini blong wan mama mo wan papa blong wol ia?

Taem hem i bin stap tokbaot Jisas Kraes, Elda Bruce R. McConkie i bin tijim:

“God i Papa blong Hem, we aot long Hem olsem Wan We i No Save Ded. . . . Hem i bon wetem paoa ia blong no save ded, we hem i paoa blong laef blong oltaem; o from se Hem i bin jusum blong save ded, hem i paoa blong raesap bakegen long ples we i no save finis, mo afta, laef blong oltaem mo nomo save ded bakegen. . . .

“. . . Meri i mama blong Hem, mo long woman ia we i blong wol . . . Hem i bin gat paoa ia blong wol ia, we i paoa blong save ded. . . .

“Hem i from . . . miks blong wanem we hem i Hae mo wanem we i blong wol ia long wan man, we i mekem Lod i save mekem atonmen we i no save finis mo i no gat en, i kam tru. From se God i Papa blong Hem mo Meri i mama blong Hem, Hem i bin gat paoa blong laef o blong ded, olsem we bae Hem i save jusum, mo from se Hem i bin givimaot laef blong Hemwan, Hem i bin gat paoa blong Hem i laef bakegen, mo afta, long wan wei we man i no save andastanem, Hem i bin pasem laef ia bakegen long ded long evri man blong mekem se evriwan bae i save laef bakegen” (*The Promised Messiah* [1978], 470–71).

- Wanem yumi save lanem abaot Meri long ol storian we hem i bin gat wetem enjel mo wetem Elisabet? (Luk long Luk 1:26–38, 45–49; luk tu long Alma 7:10. Raetem sot ol ansa blong ol memba long blakbod. Sapos yu stap tijim ol yut, ating bae yu save givim tingting se oli save luk long Meri olsem wan eksampol blong wan woman we i stret mo gud.)
 - a. God i mekem i gud tumas long Meri (Luk 1:28, 30). Wanem i minim blong God i mekem i gud wan man? Long wanem o wea moa ol man oli stap lukluk long hem blong oli mekem gud olgeta? Olsem wanem taem yumi stap lukaotem blong ol nara samting ia oli stap mekem gud yumi, i stap mekem tu i had blong God i mekem gud yumi?
 - b. Meri i klin inaf blong gat Lod wetem hem (Luk 1:28). Wanem bae yumi save mekem blong save kam klin inaf long blesing ia?
 - c. Meri i gat tingting we i stap daon mo hem i stap folem gud tingting blong Lod (Luk 1:38, 48). From wanem hem i impoten blong yumi mas putum evri tingting blong yumi blong i folem nomo tingting blong Lod? Olsem bae yumi save putum tingting blong yumi i stap daon mo save putum evri tingting blong yumi i folem hemia blong Lod?
 - d. Meri i glad tumas long Sevyia blong Hem (Luk 1:47). Olsem wanem yumi save glad long Sevyia?

- From wanem Elisabet mo boe blong hem we i no bon yet, tufala i stap glad taem Meri i visitim tufala? (Luk long Luk 1:39–44; luk tu long Luk 1:15. Poenemaot se wan bigfala pat blong Tabu Spirit i blong testefae abaot Jisas Kraes.) Olsem we i stret, talem abaot olsem wanem Tabu Spirit i bin helpem yu blong kasem wan testemoni blong Jisas Kraes, mo invaetem ol narawan blong mekem sem samting.
- Olsem wanem God i testem lav blong Josef we hem i gat long Meri (Luk long Matiu 1:18.) Olsem wanem Josef i mekem taem hem i lanem se Meri i gat bel? (Luk long Matiu 1:19. Poenemaot se folem loa, Josef i save talemaot se Meri i rong evriwan from se hem i brekem kavenan blong mared mo mekem hem i stanap long pablik kot. Ol kot olsem i save mekem se bae oli jajem hem blong oli kilim ded hem. Be hem i no bin mekem hemia, hem i mekem tingting blong hem blong lego hem nomo aot long kontrak blong mared long wan kwaet fasin.)
- Olsem wanem Papa long Heven i bin helpem Josef blong akseptem kondisen blong Meri mo stap rere long ol responsibiliti blong hemwan? (Luk long Matiu 1:20–23.) Wanem Josef i bin mekem long ansa blong drim blong hem? (Luk long Matiu 1:24–25.) Ansa ia i soemaot wanem abaot fasin blong Josef?

Las Toktok

Invaetem wan memba blong klas blong ridim Luk 1:46. Eksplenem se, long ves ia, toktok ia *leftemap* i tokbaot se Meri i wok blong presem Lod mo blong helpem ol narawan blong luk olsem wanem Hem i hae tumas.

- Olsem wanem ol eksampol blong Elisabet, Sekaraea, Jon Baptaes, Meri, mo Josef i helpem yu blong luk olsem wanem Sevyia i Hae tumas mo i stap leftemap fet blong yu long Hem? Olsem wanem yumi save helpem ol narawan blong leftemap fet blong olgeta long Jisas Kraes?

Talemaot tangkyu blong yu long stret mo gud fasin blong Elisabet, Sekaraea, Jon Baptaes, Meri mo Josef. Testefae abaot ol trutok we yufala i bin toktok raon long ol.

Sam Nara Aedia blong Tij

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. “Mi mi wantem blong yu yu save gud we ol samting ya we oli tijim yu finis long hem, oli tru tumas.” (Luk 1:4)

- Luk i adresem testemoni blong hem long wan man we nem blong hem Teofilas (Luk 1:3). Wanem stamba tingting blong Luk i raetem testemoni blong hem? (Luk long Luk 1:3–4. Blong helpem Teofilas blong save se ol samting ia we oli bin tijim finis oli tru.) Olsem wanem i bin mekem yu yu kam strong moa taem yu bin harem ol narawan oli stap testefae abaot ol doktrin mo ol stori blong skripja we yu save gud long olgeta?

2. Vidio presentesen

Sapos vidiokaset ia, *The Savior: Early Years* (53163) i stap, yu save yusum wan smol pat long Pat 1, “The Annunciations.”

Lesen
3

“I Gat Wan Pikinini We i Jes Bon, We Hem Bae i Sevem Man”

Luk 2; Matiu 2

Stamba Tingting

Blong leftemap tingting blong ol memba blong klas blong stap glad long taem we Jisas Kraes i bon, mo folem eksampol we Hem i bin putum long yangfala laef blong hem, “mo i stap grup long bodi blong hem mo long waes blong hem tu. Mo oltaem God i glad tumas long hem, mo ol man tu oli glad tumas long hem” (Luk 2:52).

Rere long Lesen

1. Ridim, tingting hevi, mo prea abaot ol skripja ia:
 - a. Luk 2:1–7. Jisas Kraes i bon.
 - b. Luk 2:8–39. Ol enjel mo plante narawan oli bin glad tumas we Jisas i bin bon.
 - c. Matiu 2. Ol Waes Man long is oli bin visit mo oli bin givim Hem ol presen. Herod, i filim se hemia, we King blong ol man Jiu i bon, bae i spolem nogud hem, mo hem i givim oda se bae oli kilim ded evri pikinini we i bebi kasem tu (2) yia we i stap laef long Betlehem mo ol eria we i stap raon long hem. Wan enjel blong Lod i bin lidim Josef blong hem i ronwe long Ijip wetem Meri mo Jisas mo afta blong kambak long Isrel wetem tufala.
 - d. Luk 2:40–52. Wetem Papa i stap lidim Hem, Jisas i grup mo i stap rere, taem Hem i yangfala, long ministri blong Hem.
2. Sam moa riding: Joseph Smith Translation, Matthew 3:24–26; 1 Nifae 11:1–23; Hileman 14:1–8; 3 Nifae 1:4–21; 27:13–16; Doctrine and Covenants 93:11–20.
3. Sapos ol tul ia oli stap, yusum olgeta long taem blong lesen:
 - a. “Luk II,” wan sot muvi blong sikis minit we i stap long *New Testament Video Presentations* (53914).
 - b. Ol Pikja, I No Gat Rum long Hotel (62115); Taem Jisas i Bon (62116; Gospel Art Pikja Kit 200); The Nativity (62495; Gospel Art Pikja Kit 201); Taem oli Talemaot long Ol Man blong Lukaotem Sipsip se Kraes i Bon (62117; Gospel Art Pikja Kit 202); Ol Waes Man (62120; Gospel Art Pikja Kit 203); Oli Ronwe I Go Long Ijip (62119; Gospel Art Pikja Kit 204); Boe Jisas Insaed long Tempol (62500; Gospel Art Pikja Kit 205); Taem Jisas Kraes i Wan Smol Boe (62124; Gospel Art Pikja Kit 206); mo Jisas mo Mama blong Hem (Gospel Art Pikja Kit 242).
4. Wan tingting blong tij: Yusum ol stret pikja mo vidio presentesen blong invaetem Spirit, blong mekem plante defren samting long ol lesen, mo helpem klas blong tingbaot ol stori blong skripja we oli stap toktok raon long ol (luk long *Teaching—No Greater Call*, unit G).

**Wan Tingting
blong Lesen**

Aktiviti blong
Pulum Tingting

Olsem we i stret, yusum aktiviti ia o wan aktiviti blong yuwan blong statem lesen.

Raetem nem blong pipol ia long blakbod: *wan man blong lukaotem sipsip, Simeon, wan waes man we i kam long is, Herod, wan man insaed long hotel, Anna, wan enjel, Meri.*

Ridim ol ansa ia we i kam folem taem Jisas Kraes i bon. Askem ol memba blong klas blong putum wanwan ansa i go long stret man we nem blong hem i stap long blakbod:

1. Mi wokbaot longwe i kam blong faenem Hem, blong givim ol presen long Hem, mo blong wosipim Hem. (Wan waes man we i kam long is; Matiu 2:1–2, 9–11.)
2. Mi no mekem eni rum blong Hem. (Wan man long hotel; Luk 2:7.)
3. Taem we mi kasem witnes we i kam long Tabu Spirit, mi bin tekem pikinini ia long ol han blong mi mo mi bin save se mi save ded long pis. (Simeon; Luk 2:25–32.)
4. Mi bin talem, “Long heven antap we antap, olgeta oli stap leftemap nem blong God. Mo long wol ya, pis i stap wetem ol man we God i glad long olgeta.” (Wan enjel; Luk 2:13–14.)
5. Hem i hariap i go luk Hem. (Wan man blong lukaotem sipsip; Luk 2:15–16.)
6. Mi wari tumas mo mi traem blong kilim Hem i ded. (Herod; Matiu 2:3–4, 16.)
7. Afta we mi bin luk Hem insaed long tempol, mi talemaot tangkyu blong mi mo talemaot nius blong Hem se Hem i bon. (Anna; Luk 2:36–38.)
8. Mi tingting hevi long taem ia long hat blong mi. (Meri; Luk 2:19.)

Askem ol memba blong klas blong tingting hevi long ol kwestin ia long taem blong lesen:

- Olsem wanem tingting blong yu long stori blong taem se Sevyia i bon? Olsem wanem ansa blong yu long laef, atonmen blong Hem mo long taem we Hem i laef bakegen long ded?

Yusum mo Toktok
Raon long Skripja

Taem yu stap tijim olgeta skripja ia, helpem ol memba blong klas blong andastanem from wanem yumi mas glad long taem we Sevyia i bon. Toktok raon long ol wei we yumi save folem blong folem eksampol we Hem i bin soem long taem we Hem i yangfala.

1. Jisas Kraes i bon.

Ridim mo toktok raon long Luk 2:1–7. Soem sam long ol pikja we oli putum i stap long seksen ia “Rere long Lesen”.

- Jisas i bin gat glori wetem Papa long Heven “taem we wol ya i no stap yet” (Jon 17:5). Hem i krietem ol heven mo wol (Mosaea 3:8). Olsem Jehova, Hem i stap talemaot ol komanmen mo ol trutok blong gospel long ol profet blong Ol Testeman (3 Nifae 15:2–5). From wanem Jisas i kam long wol? (Luk long 3 Nifae 27:13–16.)
- Wanem kaen situesen i bin stap long taem we Jisas i bon? (Luk long Luk 2:7.) Olsem wanem ol situesen ia oli stap wonem yumi abaot ministri blong Hem long wol ia mo abaot sakrefaes blong Hem we i pemaot ol sin blong yumi? Long wanem wei ol pipol tedei oli no wantem mekem rum blong Sevyia i stap long ol laef blong olgeta? Wanem yumi, yumi save mekem blong mekem sam rum blong Hem long ol laef blong yumi?

2. Ol enjel mo plante narawan oli stap glad long taem we Jisas i bon.

Toktok raon long Luk 2:8–39. Invaetem ol memba blong klas blong ridim bigwan sam ves we yu jusum. Soem sam long ol pikja we oli putum i stap long seksen ia “Rere long Lesen”.

Sapos yu yusum vidio presentesen ia “Luk II,” soem naoia.

- Wanem ol enjel oli bin talem taem oli stap anaonsem taem we Jisas i bon? (Luk long Luk 2:13–14.) Olsem wanem Jisas i bin givim glori long Papa? Olsem wanem Hem i bin tekem pis mo gud tingting long evri pipol mo long yuwan? Olsem wanem yumi save soem tangkyu blong yumi long God from presen blong Hem we i Pikinini blong Hem?
- Wanem ol man blong lukaotem sipsip oli bin mekem afta we oli bin luk niufala bebi ia we i Sevyia? (Luk long Luk 2:17–18.) Wanem yumi save mekem blong folem eksampol blong olgeta? Invaetem ol memba blong klas blong tingbaot wan we oli save serem testimoni blong olgeta abaot Sevyia.
- Wanem Meri i bin mekem afta we Jisas i bon mo ol man blong lukaot long ol sipsip oli kam visitim Hem? (Luk long Luk 2:19.) Wanem nao samting ia i save soem long yumi abaot Meri? From wanem hem i impoten blong tekem sam taem blong stap glad mo stap tingting hevi long ol tabu eksperiens we yumi gat?
- Olsem wanem Simeon mo Anna i bin rere blong luk pikinini ia, Jisas? (Luk long Luk 2:25–26, 37.) Olsem wanem oli bin ansa long olgeta taem oli bin luk Hem? (Luk long Luk 2:27–35, 38.) Wanem yumi save lanem abaot Sevyia mo ol profesi blong olgeta?

3. Ol waes man oli kam blong wosipim pikinini ia, Jisas. Herod i lukaot blong kilim Hem i ded.

Ridim mo toktok raon long ol ves we oli jusum long Matiu 2. Soem sam long ol pikja we oli putum i stap long seksen ia “Rere long Lesen”.

- From wanem ol waes man we oli kam long is oli stap lukaotem Jisas? (Luk long Matiu 2:1–2.) Oli bin mekem wanem taem oli faenem Hem? (Luk long Matiu 2:11. Tingting se taem oli faenem Jisas, Hem i wan “yangfala pikinini”, i no wan niufala bebi we i jes bon.) Wanem presen yumi save givim long Lod?
- From wanem Herod i wantem blong faenem Jisas? (Luk long Matiu 2:3–6, 13. Hem i bin wari tumas, mo hem i bin wantem blong kilim ded Jisas.) From wanem taem Jisas Kraes i bon i mekem king ia i wari tumas? (Luk long Matiu 2:2, 6. Folem profesi, bae Jisas bae i rulum Isrel.)
- Olsem wanem Jisas i kasem proteksen agensem Herod? (Luk long Matiu 2:13–15.) Olsem wanem Josef i bin save wanem taem blong gobak long Ijip? (Luk long Matiu 2:19–23.) Yu ting se from wanem Josef i save kasem toktok i kam long God? Wanem ol papa mo mama blong tedei oli save mekem blong kasem revelesen long saed blong ol famle blong olgeta? Olsem wanem God i bin helpem yu blong yu save lukaotem daereksen long Hem blong famle blong yu?

4. Wetem help blong Papa blong Hem, Jisas i rere long ministri blong Hem long yangfala laef blong Hem.

Ridim mo toktok raon long Luk 2:40–52. Soem sam long ol pikja we oli putum i stap long seksen ia “Rere long Lesen”. Eksplenem se evri yia, Josef mo Meri mo ol

nara man Jiu we oli fetful, oli stap mekem Lafet blong Pasova long Jerusalem. Folem kastom, Jisas i bin go wetem tufala taem hem i kasem 12 yia (Luk 2:41–42).

- Afta we oli mekem lafet blong Pasova long Jerusalem, Meri mo Josef i statem wokbaot blong tufala blong gobak long Nasaret taem tufala i luk se Jisas, we i gat 12 yia, i no stap wetem tufala (Luk 2:43–45). Wea ples tufala i faenem Hem? (Luk long Luk 2:46.) Sapos papa mo mama o eni narawan we oli lavem yu oli no save se yu stap wea, yu ting se bae oli save tru se yu yu stap mekem ol samting we i stret long ae blong Papa long Heven?
- Translesen blong Josef Smit blong Luk 2:46 i stap talem se ol man insaed long tempol oli bin stap lisin long Jisas, mo oli bin stap askem Hem ol kwestin. Samting ia, i stap talem wanem abaot yangfala laef blong Jisas mo trening blong Hem?
- Taem Meri mo Josef i faenem Jisas, Meri i bin talem long Hem se, “Mi wetem papa blong yu, mitufala i stap lukaot yu we mitufala i stap harem nogud tumas” (Luk 2:48). Huia nao Meri i stap tokbaot taem hem i talem “papa blong yu”? (Josef.) Olsem wanem Jisas i ansa long wari blong Meri? (Luk long Luk 2:49.) Jisas i stap tokabaot huia taem Hem i talem se “mi mi mas stap long haos blong Papa blong mi”? (Papa long Heven.) Samting ia i stap talem wanem long yumi abaot andastaning blong Jisas long saed blong misin blong Hem we oli odenem finis bifo i kam?
- Olsem wan yangfala, olsem wanem Jisas i bin tritim Meri mo Josef? (Luk long Luk 2:51. Nating Hem i bin Pikinini blong God, Hem i mas obei long mama blong Hem mo long Josef.) Wanem yumi save lanem aot long eksampol ia?
- Olsem wan yangfala, Jisas “i grup moa long bodi blong hem mo long waes blong hem tu. Mo oltaem God i glad tumas long hem, mo ol man tu oli glad tumas long hem” (Luk 2:52). Long nara toktok, Hem i kam antap long waes, long bodi, long spirit, mo tu Hem i kam blong save gud ol man. Wanem sam spesel samting yumi save mekem blong save gru long saed blong waes, bodi, spirit mo kam blong save gud ol man?
- Eksplenem se long taem we Hem i bin stap mekem Hemwan i rere blong kam olsem Ridima, Jisas i no bin kasem evri save, paoa, waes, mo glori long wan taem nomo. Hem i bin kasem ol samting ia wan afta wan, wan smol samting afta wan narawan (Luk long D&C 93:11-17). Olsem wanem yu save yusum trutok ia long yumi? (Luk long D&C 93:18-20.)

Las Toktok

Testefae abaot ol trutok ia we yufala i bin toktok raon long ol long lesen ia. Leftemap tingting blong ol memba blong klas blong stap glad long taem ia we Sevyia i bon mo folem eksampol we Hem i bin soem long yangfala laef blong Hem.

Sam Nara Aedia blong Tij

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. “Be Meri, hem i no fogetem ol samting ya, hem i stap tingbaot olgeta oltaem nomo” (Luk 2:19)

Taem yu stap toktok raon long ansa blong Meri abaot taem ia we Jisas i bon, invaetem wan mama blong talemaot ol filing blong hem afta we wan long ol pikinini blong hem i bon.

2. Aktiviti blong Ol Yut

Jusum faef impoten skripja aot long lesen, mo mekem ol memba blong klas oli kam blong save gud wanem i stap insaed long wanwan long ol skripja ia. Nao mekem ol memba blong klas oli sarem Baebol blong olgeta. Givim sam tingting we bae i lidim ol memba blong klas i gobak long ol skripja ia we yufala i bin lukluk long ol, mo taem yu givim ol tingting ia yusum ol stret toktok blong mekem se oli save stret wanem skripja yu stap tokabaot. (Eksampol, yu save talem, “Ves ia i gat ol toktok blong wosip blong ol enjel i go long God taem Jisas i bon.” Wan ansa nomo hem i Luk 2:14.) Afta we yu talemaot wan tingting, mekem ol memba blong klas oli openem ol Baebol blong olgeta mo lukaot long ol stret skripja. Yusum aktiviti ia olsem wan wei blong oli kam blong save gud, wetem skripja ia be i no olsem wan kompetisen. No spenem tumas taem long hem be smol minit nomo.

“Yufala i Mekemrere Rod blong Hae God”

Lesen

4

Matiu 3–4; Jon 1:35–51


Stamba Tingting Blong givim insperesen long ol memba blong klas blong go kolosap long Sevyia long fasin blong sakem ol sin blong olgeta, kipim ol kavenan blong olgeta blong baptaes, mo stanap strong agensem temtesen.

- Rere long Lesen**
1. Ridim, tingting hevi, mo prea abaot ol skripja ia:
 - a. Matiu 3:1–12. Jon Baptaes i stap prijim fasin blong sakem sin mo baptaes, mo stap mekemrere rod blong Lod Jisas Kraes.
 - b. Matiu 3:13–17. Jon Baptaes i mekem baptaes blong Jisas.
 - c. Matiu 4:1–11. Jisas i stanap agensem ol temtesen blong Setan long ples we i no gat man long hem.
 - d. Jon 1:35–51. Sam long ol disaepol blong Jon Baptaes oli mekem tingting blong folem Jisas.
 2. Sam moa riding: Mak 1:1–13; Luk 3:1–22; 4:1–14; Jon 1:19–34; 2:1–25; 2 Nifae 31; Bible Dictionary, “Baptism,” 618–19; “John the Baptist,” 714–15; “Repentance,” 760–61.
 3. Sapos ol pikja ia oli stap, yusum olgeta long taem blong lesen: Jon i Stap Prij long Ples we i No Gat Man long Hem (62132; Gospel Art Pikja Kit 207) mo Jon Baptaes i Mekem Baptaes blong Jisas (62133; Gospel Art Pikja Kit 208).
 4. Wan tingting blong tij: Yusum taem blong klas wetem waes. Planem gud wanem we bae yufala i toktok raon long hem mo hamas taem bae yu spenem blong toktok raon long wanwan pat blong lesen, be afta yu mas letem Spirit i lidim yu. No endem wan toktok taem we i gat mining long hem, blong yu save tijim ful lesen. Hem i moa impoten blong ol memba blong klas oli lanem mo filim Spirit bitim blong yu stap toktok raon long evri poen insaed long lesen.
-

Wan Tingting blong Lesen

Aktiviti blong Pulum Tingting

Olsem we i stret, yusum aktiviti ia o wan aktiviti blong yuwan blong statem lesen. Raetem ol samting ia long blakbod, mo askem klas sapos oli save wanem samting ia i stap talem:



Eksplenem se hemia hem i toktok long lanwis blong ol man Hibru we i talem *Mesaea*, we i minim, Hem we oli anoentem Hem. Ol man Jiu oli bin wet longtaem blong Mesaea i kam, we folem profesi, Hem bae i stap olsem King mo Sevyia blong olgeta we oli anoentem Hem finis. Toktok long lanwis blong ol man Gris blong toktok ia *Mesaea* hem i *Kraes*. Jisas Kraes Hem i Mesaea we oli bin wet long Hem longtaem tumas, mo Jon Baptaes i profet we oli sendem hem i kam blong mekemrere rod blong Hem.

Yusum mo Toktok
Raon long Skripja

Toktok raon long olsem wanem ol tijing long ol skripja ia oli save helpem yumi blong kam kolosap moa long Sevyia. From se bae i had blong askem evri kwestin o blong tokbaot evri poen insaed long lesen, wetem prea, jusum olgeta we bae i moa stret long ol nid blong ol memba blong klas.

1. Jon Baptaes i stap mekemrere rod blong Lod Jisas Kraes.

Ridim mo toktok raon long Matiu 3:1–12. Soem pikja blong Jon i Stap Prij, mo serem smol bakgraon infomesen long toktok blong yuwan:

Plante handred yia bifo Jon i bon, plante profet oli bin luk finis ministri blong hem mo oli bin testefae se hem i wan bigfala man mo hem nao bae i mekemrere rod blong Mesaea (Aesea 40:3; 1 Nifae 10:7–10). Blong mekem Jon i rere long ministri blong hem, enjel Gabriel i talemaot taem we Jon bae i bon (Luk 1:13–19), Sekaraea i bin talem profesi blong dei we Jon bae i kasem wan nem mo bae i sakomsaes (Luk 1:67–79), mo we wan enjel i odenem Jon, we i gat eit dei nomo, long misin blong hem (D&C 84:27–28). Bigfala toktok we i kamaot blong talemaot olsem wanem Jon i hae, i kam long Sevyia Hemwan we i bin talem se, “long olgeta we oli bon long wol, i no gat wan we i hae moa, i winim Jon” (Luk 7:28).

Jon i bon sikis manis bifo Jisas. I no longtaem afta we Jisas i bon, Herod, from se hem i fraet long toktok se wan niu king blong ol man Jiu i bin bon, hem i “lukaot olgeta pikinini . . . we yia blong olgeta i no bitim tu yia yet, blong . . . kilim olgeta evriwan i ded” (Matiu 2:16). Blong protektem Jisas, wan enjel i kamaot long Josef long wan drim mo i talemaot long hem blong hem i tekem Jisas mo Meri i go long Ijip (Matiu 2:13–15). Blong protektem Jon, “Sekaraea i mekem [Elisabet] i tekem hem i go long ol maonten, mo long ples ia oli stap fidim hem long lokis mo sugabag blong bus.” (*Teachings of the Prophet Joseph Smith*, sel. Joseph Fielding Smith [1976], 261). Jon i statem pablik ministri blong hem plante yia afta, mo fastaem hem i bin stap prij long ples we i no gat man long hem mo afta long Jerusalem mo long “ol ples kolosap long Jodan reva” (Matiu 3:5).

- Wanem misin blong Jon Baptaes? (Luk long Luk 1:76–79; 3:3–4.) From wanem yu ting se i impoten blong wan i mekemrere rod blong Lod?
- Wanem mesej Jon i prijim blong mekemrere ol pipol blong taem we Sevyia i kam? (Luk long Matiu 3:1–2.) Wanem hem i minim blong sakem sin? (Taem ol memba blong klas oli stap toktok raon long ol ansa long kwestin ia, raetem long blakbod sam long ol defren saed blong fasin blong sakem sin olsem we i stap daon ia. Yu save invaetem ol memba blong klas blong ridim ol skripja we i go wetem.)
 - a. Harem nogud mo tanem tingting from sin (Seken Korin 7:9–10).
 - b. Konfes mo lego gud ol sin (D&C 58:42–43).
 - c. Putumbak ol samting, taem i posibol, from ol rong samting (Luk 19:8).
 - d. Stap obei long ol komanmen (D&C 1:31–32).
 - e. Tanem tingting i go long Lod mo sevem Hem (Mosaea 7:33).

- Olsem wanem fasin blong sakem sin i stap helpem yumi blong yumi rere blong stap wetem Papa long Heven mo Jisas Kraes? (Luk long 3 Nifae 27:19.) Olsem wanem fasin blong sakem sin i mekem yumi go kolosap moa long Tufala long evri dei?
- Ol Farisi mo ol Sadusi oli bin witnesem ol baptaes we Jon i bin mekem be oli bin jusum blong oli no baptaes (Matiu 3:7; Luk 7:29–30). Jon i tok strong long olgeta mo i singaotem strong olgeta blong oli sakem sin mo blong oli mekem ol stret samting blong oli soem se oli sakem sin (Luk long Joseph Smith Translation, Matthew 3:35). Wanem nao ol frut blong fasin blong sakem sin? (Luk long Moronae 8:25–26.)
- Jon i bin mekem baptaes “wetem wota from [oli] tanem tingting blong [olgeta] from ol sin blong [olgeta]” mo i bin promes se bae Jisas bae i baptaes olgeta “long Tabu Spirit mo long faea” (Matiu 3:11). Hem i minim wanem blong kasem baptaes “long Tabu Spirit mo long faea”? Yumi kasem baptaes long Tabu Spirit mo long faea taem yumi kasem presen we i Tabu Spirit long fasin blong putum han antap long hed (D&C 20:41). “Presen we i Tabu Spirit hem i raet blong gat, taem wan i stret mo gud, Tabu Spirit i stap wetem hem . . . Hem i stap olsem wan we i mekem wan man i kam klin long ol sin mo i mekem hem i tabu. Nao, plante taem oli tokbaot hem olsem wan ‘faea’ ” (Bible Dictionary, “Holy Ghost,” 704).

2. Jon Baptaes i baptaesem Jisas.

Ridim mo toktok raon long Mati 3:13–17. Soem pikja blong Jon i Stap Baptaesem Jisas.

- From wanem Jon i fraet blong baptaesem Jisas? (Luk long Mati 3:14.) From wanem i nid blong Jisas i kasem baptaes? (Luk long Mati 3:15; 2 Nifae 31:6–7, 9–11.) From wanem yumi mas kasem baptaes? (Luk long 2 Nifae 31:5, 12–13, 17–18; D&C 20:71; 49:13–14.)
- Wanem kavenan yumi stap mekem taem yumi baptaes? (Luk long D&C 20:37.) Olsem wanem ol kavenan ia oli mas jenisim ol aksen blong yumi blong evri dei? (Luk long Mosaea 18:8–10.)

3. Jisas i stanap agensem ol temtesen blong Setan long ples we i no gat man long hem.

Ridim mo toktok raon long Mati 4:1–11 (luk tu ol futnot long Mati 4:1–2, 5–6, 8–9, mo 11, we i tekem tu Joseph Smith Translation blong ol ves ia).

- I no longtaem afta we Jisas i bin baptaes, Spirit i bin lidim Hem i go long ples we i no gat man long hem blong Hem i save stap wetem God (Joseph Smith Translation, Matthew 4:1). Olsem wanem yu ting se taem ia i bin mekem Jisas i rere blong stanap agensem ol temtesen blong Setan? Olsem wanem fasin blong lego kakae, prea, mo taem Spirit i stap lid, i mekem yumi kam strong blong stanap agensem temtesen?
- Long wanem samting Setan i bin traem blong temtem Jisas, we i bin lego kakae, blong Hem i tanem ol ston ia oli kam bred? (Luk long Mati 4:2–3. Hem i bin traem blong mekem Jisas i lukluk long wanem bodi blong Hem i wantem.) Olsem wanem Setan i stap temtem yumi blong yumi stap lukluk long wanem we bodi blong yumi i wantem? Olsem wanem yumi save luksave mo stanap agensem ol temtesen ia?

- Setan i bin traem blong lukluk long fasin blong stap flas taem hem i temtem Jisas blong Hem i go long wan hae ples long wan haos mo jiam i go daon blong pruvum se Hem i gat paoa blong ol enjel oli sevem Hem (Matiu 4:5–6). Olsem wanem Setan i stap traem blong mekem se yumi stap lukluk long fasin blong stap flas? Olsem wanem yumi save luksave mo stanap agensem ol temtesen ia blong stap leftemap ol flas tingting mo filing blong yumi?
- Wanem Setan i bin wantem givim sapos Jisas bae i wosipim hem? (Luk long Matiu 4:8–9.) Olsem wanem Setan i stap temtem yumi wetem ol rij samting blong wol ia mo paoa blong wol ia? Olsem wanem yumi save luksave ol temtesen ia mo stanap strong agensem olgeta? (Luk long Matiu 4:10.)
- Wanem i no tru long toktok blong Setan we i talem se bae hem i givim Jisas ol kingdom blong wol ia? (Luk long D&C 104:14.) Wanem sam toktok blong Setan we i no tru tedei we i stap mekem se bae yumi sin?
- Jisas i ansa long wanwan long ol temtesen blong Setan taem hem i talemaot ol toktok blong ol skripja (Matiu 4:3–4, 6–7, 8–10). Olsem wanem ol skripja oli givim paoa long yumi blong yumi stanap agensem ol temtesen? (Luk long Hileman 3:29–30.)
- Setan i askem Jisas tu taem sapos Hem i Pikinini blong God (Matiu 4:3, 6). Yu ting se from wanem Setan i askem kwestin ia? Olsem wanem hem i stap askem kwestin ia long wol tedei? Taem yumi fesem ol temtesen, olsem wanem i help blong save se yumi ol pikinini blong God? (Luk long Moses 1:12–22.)
- Olsem wanem i save helpem yumi blong save se Jisas, Pikinini blong God, i bin fesem ol temtesen i semmak olsem olgeta we yumi stap fesem tedei? (Taem ol memba blong klas oli stap toktok raon long kwestin ia, yu save mekem olgeta oli ridim Hibrus 4:14–15.)

Elda Joseph B. Wirthlin i bin talem: “Lod i save gud abaot yumi ol man. Hem i save gud wanem yumi no strong long hem. Hem i andastanem ol jalenj long ol laef blong yumi evri dei. Hem i gat bigfala wari mo sore long ol temtesen blong wol ia mo wanem ol bodi blong yumi i stap wantem” (insaed long Conference Report, Epr. 1996, 46; o *Ensign*, Mei 1996, 34).

4. Sam long ol disaepol blong Jon Baptaes oli folem Jisas.

Ridim mo toktok raon long ol ves we oli jusum long Jon 1:35–51.

- Taem Jisas i statem ministri blong Hem long wol ia, wanem nao Jon i bin talem long ol disaepol blong hem blong mekem? (Luk long Jon 1:35–37.) Taem Jisas i bin luk we tu long ol disaepol blong Jon Baptaes oli stap folem Hem, wanem nao Hem i bin mekem? (Luk long Jon 1:38–39.)
- Taem Andru i harem mo i luksave Sevyia, wanem nao hem i mekem? (Luk long Jon 1:40–42.) Afta we hem i kasem wan witnes se Jisas Hem i Mesaea, olsem wanem Filip i ansarem ol tingting blong Nataniel? (Luk long Jon 1:43–46.) Wanem yumi save mekem blong invaetem ol narawan blong “kam traem luk” Sevyia?

Sam Nara Aedia blong Tij

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Lukluk gud long baptaes blong Sevyia

Luklukbak long Matiu 3:16–17.

- Olsem wanem stori blong baptaes blong Sevyia i stap soem se oli mas mekem baptaes andanit long wota? (Luk long Matiu 3:16; luk tu long Jon 3:23; Rom 6:3–6; 3 Nifae 11:23–26; Bible Dictionary, “Baptism,” 618, we i stap eksplenem se toktok ia *baptaes* i “wan toktok blong ol man Gris we i stap minim blong *putum insaed long wota o draonem.*”)
- Jon i bin luk wanem afta long baptaes blong Jisas? (Luk long Matiu 3:16.) Hem i bin harem voes blong huia? (Luk long Matiu 3:17.) Stori blong baptaes blong Sevyia i stap tijim wanem long yumi long saed blong Godhed? (Papa long Heven, Jisas Kraes, mo Tabu Spirit oli ol defren man.)

2. Vidio presentesen

Sapos vidiokaset ia *The Savior: Early Years* (53163) i stap, yu save soem wan sot pat we i stap long pat 3, “Baptism, Temptation, and Rejection.”

3. Jisas i soem respek mo lav long mama blong Hem.

Eksplenem se afta we Jisas i baptaes, Hem mo ol disaepol blong Hem oli bin go long wan lafet blong wan mared long Kena (Jon 2:1–11). Taem mama blong Hem i talemaot long Hem se i nomo gat waen blong lafet, Hem i askem mama blong Hem se Hem i wantem se bae Hem i mekem wanem blong hem mo bae Hem i mekem (luk long Joseph Smith Translation, John 2:4).

- Wanem toktok blong Jisas we i go long mama blong Hem i soemaot ol filing blong Hem long mama blong Hem? Wanem nao Hem i bin mekem blong helpem Hem? (Luk long Jon 2:6–11. Poenemaot se hemia i fas merikol blong Jisas we oli rekodem long Niu Testeman.)

4. Jisas i soem fasin blong stap reveren taem Hem i klinim tempol

Mekem ol memba blong klas oli ridim Jon 2:13–17, we i tekem wan stori blong Jisas we i faenen ol bisnis man mo ol man blong jenisim mane we oli stap spolem tempol. Sapos pikja ia, Jisas i Stap Ronemaot ol Man long Tempol (62163; Gospel Art Pikja Kit 224) i stap, plis soem naoia. Poenemaot se Jisas i soem respek mo fasin blong stap reveren taem Hem i “ronemaot ol man ya oli go aot long haos blong God, . . . mo hem i kafaedem ol tebol blong ol man ya we oli stap jenisim mane, mo i sakem ol mane blong olgeta i go olbaot” (Jon 2:15). Eksplenem se fasin blong stap reveren long Papa blong yumi long Heven i minim moa bitim hemia blong sidaon kwaet long Jos. Hem i minim tu blong yumi mas soem tru long ol aksen blong yumi se yumi lavem Hem mo yumi stap luksave mo talemaot paoa blong Hem.


Stamba Tingting Blong helpem ol memba blong klas blong andastanem se blong kasem laef we i no save finis, yumi mas “bon bakegen” mo gohed blong folem Jisas Kraes.

- Rere long Lesen**
1. Ridim, tingting hevi, mo prea abaot ol skripja ia:
 - a. Jon 3:1–22. Jisas i stap tijiim Nikodimas se evriwan i mas bon long wota mo long Spirit blong go insaed long kingdom blong God. Jisas i stap tijiim se Hem i Wan Pikinini ia Nomo blong God, we oli sendem Hem i kam blong i sevem ol man.
 - b. Jon 4:1–42. Jisas i stap tijiim woman Sameria long Wel blong Jakob. Plante man Sameria i bin konvet.
 2. Sam moa riding: Topical Guide, “Living Water,” 294.
 3. Sapos yu stap yusum aktiviti blong pulum tingting, tekem i kam long klas:
 - a. Wan plan (o flaoa) we i gud i stap, we oli stap wotarem gud mo wan plan we i hafded from se oli no stap wotarem (o droem long blakbod wan plan we i helti gud i stap mo wan we i hafded, olsem we oli stap soem long aktiviti blong pulum tingting.)
 - b. Wan jag blong wota.
 4. Sapos ol tul ia oli stap, yusum olgeta long taem blong lesen:
 - a. Pikja blong Woman long Wel (62169; Gospel Art Pikja Kit 217).
 - b. “The Woman at the Well,” wan sot muvi blong eit minit we i kamaot long *New Testament Video Presentations* (53914).
 - c. Wan map blong Palestaen long taem blong Niu Testeman (map 14 insaed long LDS edisen blong King James Bible).
 5. Wan tingting blong tij: “Wan stamba tingting blong wok from blong save tij insaed long Jos hem i blong mekem ol pipol oli save mekem sam gudfala jenis insaed long laef blong olgeta. Stamba tingting i blong givim insperesen long wanwan man blong hem i tingting abaot, blong hem i filim abaot, mo afta hem i mekem wan samting abaot ol trutok mo ol prinsipol blong gospel” (Rex A. Skidmore, we oli tekem toktok blong hem long *Teaching—No Greater Call*, 83; luk tu long 84).
-

**Wan Tingting
blong Lesen**

Aktiviti blong
Pulum Tingting

Olsem we i stret, yusum aktiviti ia o wan aktiviti blong yuwan blong statem lesen. Soemaot helti plan o flaoa ia mo hemia we i hafded (luk long seksen we oli singaotem “Rere long Lesen”), o droem olgeta long blakbod olsem we oli soem long nekis pej. Mo tu soemaot jag blong wota.



- Wanem i hapen long wan plan o flaoa we oli no stap givim wota long hem? Wanem i hapen long yumi sapos yumi no kasem wota?

Eksplenem se, i semmak olsem we bae yumi ded long bodi, sapos yumi no kasem wota insaed long bodi, bae yumi save ded long spirit sapos yumi no stap kasem wota blong Spirit. Lesen ia i stap talemaot abaot ol tijing blong Jisas abaot blong bon long wota mo long spirit we Hem i givim.

Yusum mo Toktok
Raon long Skripja

Taem yu stap tijim ol skripja ia, tokbaot olsem wanem blong yusum olgeta long laef evri dei. Leftemap tingting blong ol memba blong klas blong serem ol eksperiens we i go wetem ol prinsipol blong skripja ia.

1. Jisas i stap tijim Nikodimas se yumi evriwan i mas bon long wota mo long Spirit blong go insaed long kingdom blong God.

Toktok raon long Jon 3:1–22. Invaetem ol memba blong klas blong ridim bigwan sam long ol ves we oli jusum. Eksplenem se Nikodimas i wan lida long komiuniti blong ol man Jiu. Hem i bin kam long Jisas mo hem i bin save se Jisas i wan “tija we God i sanem Hem i kam” (Jon 3:2).

- Wanem nao Jisas i bin tijim Nikodimas long hem blong bae hem i mas mekem blong go insaed long kingdom blong God? (Luk long Jon 3:5.) Wanem i minim blong “bon long wota”? (Jon 3:5; blong kasem baptaes). Olsem wanem baptaes i wan saen blong yu bon bakegen? (Taem oli putum yumi andanit long wota i saen se ol sin blong yumi blong bifo oli ded o yumi berem olgeta; taem yumi kamaot long wota, yumi statem wan niu laef.) Hem i minim wanem blong “bon long faea”? (Jon 3:5; blong kasem presen we i Tabu Spirit).
- Elda Bruce R. McConkie i bin tijim se “mema blong Jos oli no bon bakegen from nomo se oli bin baptaes” (*Doctrinal New Testament Commentary*, 3 ol buk. [1966–73], 1:142). Andap long baptaes mo kasem presen we i Tabu Spirit, wanem moa yumi nidim blong yumi bon bakegen? (Luk long Jon 3:16, 18; Mosaea 5:1–7; 27:25–26; Alma 5:14–35; 22:15–18. Yu save mekem ol memba blong klas oli makem ol sentens long ol ves ia we i tokbaot blong bon bakegen. Wan lis i stap daon ia olsem eksampol. Poenemaot se ol ves ia i kam long Buk blong Momon mo oli talemaot klia wanem hem i minim blong bon bakegen.)
 - a. Stap bilif long Jisas Kraes (Jon 3:16, 18).
 - b. Stap go tru long “wan bigfala jenis . . . insaed long ol hat blong [yumi], mekem se [yumi] nomo wantem blong mekem nogud fasin, be blong gohed blong mekem gudfala fasin oltaem.” (Mosaea 5:2; luk tu long Alma 5:12–14, 26).
 - c. Stap “jenis long fasin blong wol mo fasin blong foldaon blong olgeta we oli stap long hem, i go long wan fasin blong stret fasin” (Mosaea 27:25).

- d. Stap kam “ol boe . . . mo ol gel blong [God]” (Mosaea 5:7; 27:25).
 - e. Stap kam “ol niu man” (Mosaea 27:26).
 - f. Stap gat “pikja blong God we i stap long fes blong [yumi]” (Alma 5:19; luk tu long ves 14).
 - g. Stap sakem sin blong mekem se “ol klos blong [yumi] oli mas kam klin kasem taem we evri mak i kamaot, tru long blad blong [Kraes]” (Alma 5:21; luk tu long Alma 5:19, 33–34; 22:18).
- Elda McConkie i bin tijim tu se blong bon bakegen “i no hapen nomo naoia. Hem i wan longfala rod” (“Jesus Christ and Him Crucified,” insaed long *1976 Devotional Speeches of the Year*, 399). Wanem yumi save mekem blong gohed long rod ia truaot long ol laef blong yumi? (Luk long 2 Nifae 31:19–20.) Olsem wanem yumi save winim fasin blong givap long progres blong yumi long saed blong spirit? Wanem jenis yu bin luk long yuwan o long wan narawan long rod ia blong stap bon bakegen?
 - Invaetem wan memba blong klas blong ridim i laod, Jon 3:14–18. Olsem wanem ol trutok ia oli go wetem komanmen blong Hem se yumi mas bon bakegen?
 - Jisas i yusum ol aedia olsem laet mo tudak blong tijim Nikodimas (Jon 3:19–21). From wanem sam oli jusum tudak be i no laet? Olsem wanem yumi save gohed blong holem taet paoa we yumi gat blong lavem laet mo stap longwe long tudak? Wanem promes Lod i bin mekem long olgeta we oli stap kam long laet? (Luk long D&C 50:24; 88:67.)

2. Jisas i stap tijim wan woman Sameria long Wel blong Jakob.

Ridim mo toktok raon long ol skripja we yu jusum long Jon 4:1–42. Soem map blong Palestaen. Eksplenem se taem Jisas mo ol disaepol blong Hem oli bin stap wokbaot long Judia go kasem Galili (yu save soem ol ples ia long map), oli bin stop long Wel blong Jakob long Sameria. Taem Jisas i stap sidaon long wel, wan woman Sameria i kam blong kasem wota.

Soem pikja blong woman long wel. Sapos yu stap yusum vidio presentesen ia “The Woman at the Well,” soem naoia.

- Ol Jiu “wetem ol man Sameria tufala i no save yusum sem panikin” (Jon 4:9) mo plante taem oli stap stap longwe long ol man Sameria long ol wokbaot blong olgeta. Yet, Jisas i minim blong go tru long Sameria. Hemia i talemaot wanem abaot Hem? Huia ol “man Sameria” long wol tedei? (Oli save ansa olsem, eni man o grup we man i ting se oli no naf.) Olsem wanem bae yumi mas mekem long olgeta?
- Olsem wanem woman Sameria ia i mekem i isi moa blong Jisas i tijim hem? (Luk long Jon 4:9, 11–12, 15, 19, 25. Ol ansa i save talem se hem i bin gat tingting i stap daon, hem i bin wantem blong save moa, hem i bin bilivim ol toktok blong Hem.) Wanem yumi save mekem blong yumi save kasem moa ol tijing blong Sevyia?
- Olsem wanem woman Sameria ia i jenis taem Jisas i bin stap toktok long hem? Olsem wanem Jisas i bin help blong mekem se i gat jenis ia? (Ol ansa i save talem se Hem i bin tijim woman ia long wan level we woman ia bae i andastanem, Hem i bin testefae abaot Hemwan, Hem i bin yusum saen blong wota wetem paoa, mo Hem i bin soem lav mo sore.) Olsem wanem yumi save folem eksampol blong Hem taem yumi stap tijim ol narawan?
- Jisas i bin talem long woman Sameria ia se Hem i save givim hem “wota we i gat laef long hem” (Jon 4:10). Long tingting blong yu, “wota we i gat laef long

hem", i minim wanem? (Luk long 1 Nifae 11:25; D&C 63:23. Olsem ansa i save gat, ol doktrin blong gospel, lav blong God, mo Atonmen.) Olsem wanem yumi save kasem wota we i gat laef long hem? Olsem wanem wota ia we i gat laef long hem, i bin blesem yu?

- Woman Sameria i bin kam long wel blong kasem wota (Jon 4:7). Be, afta we hem i bin toktok wetem Jisas, hem i bin lego botel wota blong hem long wel mo i bin go blong talemaot long ol narawan abaot wanem hem i bin go tru long hem (Jon 4:28–29). Wanem yumi save lanem aot long eksampol blong hem?
- Olsem wanem ol nara pipol oli bin kasem blesing from fet blong woman Sameria ia? (Luk long Jon 4:39–42.) Olsem wanem yu yu bin kasem blesing o yu bin luk ol narawan oli bin kasem blesing from se oli bin bilif long Lod? Olsem wanem fet blong yumi i save kasem olgeta we oli stap raon long yumi?

Las Toktok

Sapos yu bin yusum aktiviti blong pulum tingting, soemaot ol flaoa mo botel wota bakegen. Eksplenem se i semmak we ol flaoa oli nidim wota blong laef, yumi nid blong folem Sevyia mo ol tijing blong Hem blong yumi save bon bakegen mo gat laef we i no save finis.

Testefae abaot ol trutok we yufala i bin toktok raon long ol long taem blong lesen. Givim jalenj long ol memba blong klas blong oli lukaotem Jisas Kraes, blong oli folem Hem, mo oli gohed long rod ia blong bon bakegen.

Sam Nara Aedia Blong Tij

Ol nara tul ia oli kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. "Mi mi no Mesaea. God i sanem mi blong mi mi kam fastaem" (Jon 3:28)

- Long Jon 3:25–36, wanem nao hem i fasin blong Jon long saed blong pat blong hem we hem i gat wetem Sevyia? Olsem wanem fasin blong Jon i stap olsem eksampol blong wan tru disaepol? Olsem wanem yumi save yusum fasin ia long ol seves blong yumi insaed long Jos?

2. "Yufala i traem lukluk long ol kakae blong garen . . . i taem blong go tekem kakae nao" (Jon 4:35)

- Wanem Jisas i tijim ol disaepol blong Hem long saed blong misinari wok long Jon 4:35–38? Hem i minim wanem taem Hem i talem se i taem blong go tekem kakae long garen? Olsem wanem Sevyia i bin yusum sem saen ia long Doctrine and Covenants 4:1–4 mo 75:3–5? Askem ol memba blong klas blong serem ol eksperiens we oli bin gat taem oli bin serem gospel wetem ol narawan.

3. Jisas i mekem pikinini blong wan haeman blong king i gud bakegen

Ridim mo toktok raon long Jon 4:46–54.

- Haeman blong King i wantem wanem long Jisas? (Luk long Jon 4:46–47.) Wanem hem i fas ansa blong Jisas i go long hem? (Luk long Jon 4:48.) Olsem wanem haeman ia blong king i ansa? (Luk long Jon 4:49.)
- Wanem nambatu ansa blong Jisas i go long haeman blong king? (Luk long Jon 4:50.) Wanem nao haeman blong king i mekem? (Luk long Jon 4:50.) Wanem nao i kamaot folem fet blong haeman blong king? (Luk long Jon 4:51–54.) Wanem yumi save lanem aot long stori ia abaot paoa blong fet?

“Wantaem Nomo, Tufala i Livim Ol Net blong Tufala”

Luk 4:14–32; 5; 6:12–16; Matiu 10

Stamba Tingting Blong helpem ol memba blong klas blong andastanem se oli singaotem Ol Aposol blong stap olsem ol spesel witnes blong Jisas Kraes mo yumi gat blesing taem yumi sastenem mo folem olgeta.

- Rere long Lesen**
- Ridim, tingting hevi mo prea abaot ol skripja ia:
 - Luk 4:14–32. Jisas i stap tij insaed long haos blong prea long Nasaret mo i stap testefae se Hem i Mesaea we Aesea i bin profesae abaot. Ol pipol oli kros mo oli ronemaot Hem.
 - Luk 5:1–11, 27–28; 6:12–16. Jisas i singaotem Ol Twelef Aposol blong Hem.
 - Matiu 10. Jisas i odenem mo i tijim Olgeta Twelef Aposol mo i sendem olgeta blong prijim gospel.
 - Sam moa riding: Aesea 61:1–2; Matiu 4:18–22; Mak 1:16–20; 3:13–19; 6:7–13; Luk 9:1–6; 12:1–12; Doctrine and Covenants 107:23–24, 33–35, 39, 58; Bible Dictionary, “Apostle,” 612.
 - Sapos ol pikja ia oli stap, yusum olgeta long taem blong lesen: Taem Hem i Singaotem Ol Fisaman (62496; Gospel Art Pikja Kit 209) o Jisas mo Ol Fisaman (62138; Gospel Art Pikja Kit 210); Kraes i Stap Odenem Ol Aposol (62557; Gospel Art Pikja Kit 211); mo wan pikja blong Kworom blong Ol Twelef Aposol blong tedei (i kamaot long las *Ensign* o ol nara intanasonal magasin).
 - Wan tingting blong tij: Lanem mo yusum ol nem blong ol memba blong klas. Taem yu stap mekem olsem, ol memba blong klas bae oli luk se yu tingting hevi long olgeta olsem wanwan man. Taem yu save ol nem blong ol memba blong klas blong yu i save helpem yu blong leftemap tingting blong olgeta blong oli tekem pat insaed long klas mo yu save askem kwestin i go stret long wanwan man o woman.

Wan Tingting blong Lesen

Aktiviti blong Pulum Tingting

Olsem we i stret, yusum aktiviti ia o wan aktiviti blong yuwan blong statem lesen.

Mekem wan memba blong klas i ridim fas pat blong Mosaea 27:31 (kasem “talemaot se hem i God”). Eksplenem se long taem we Jisas Kraes bae i kambak bakegen, evri man bae i luksave Hem olsem Sevyu. Hemia i no bin tru long fastaem we Hem i bin kam. Ol man Jiu oli bin stadi long ol profesi long saed blong taem we bae Jisas i kam blong plante hundred yia, be plante long olgeta we oli bin harem Jisas oli no bin save luksave Hem olsem Sevyu. Hemia from se Jisas i no mekem ol man Jiu oli fri long kontrol blong ol man Rom olsem we oli gat tingting long Hem, mekem se plante oli no wantem Hem mo mesej blong Hem.

Poenemaot se fas pat blong lesen ia bae i tokbaot wanem i bin hapen taem Jisas i anaonsem fastaem se Hem nao i Mesaea we oli wet long Hem longtaem finis i kam. Ol nara pat blong lesen bae i tokbaot taem Jisas i singaotem Ol Aposol blong help blong spredem mesej blong Hem.

1. Jisas i talemaot se Hem i Mesaea.

Toktok raon long Luk 4:14–32. Invaetem ol memba blong klas blong ridim ol ves we yu jusum. Eksplenem se oli invaetem Jisas blong ridim wan pat blong skripja mo givim tingting long hem long taem blong seves insaed long haos blong prea long Nasaret.

- Mekem wan memba blong klas i ridim Luk 4:16–19. (Poenemaot se ol ves 18–19 oli ol toktok we i kamaot long Aesea 61:1–2.) Ol ves ia oli tokbaot wanem? (Oli tokbaot long wan profesi ol samting we Mesaea bae i mekem: luk long lesen 1.)
- Taem Jisas i finis blong ridim skripja ia long Aesea, wanem testemoni nao Hem i serem? (Luk long Luk 4:21. Hem i bin talemaot se Hem i Mesaea we Aesea i profesae long Hem mo Hem nao ol man Jiu oli bin wet long Hem longtaem finis blong plante handred yia.) Olsem wanem ol pipol insaed long haos blong prea oli ansa long toktok blong Jisas? (Luk long Luk 4:22–29.)
- From wanem yu ting se ol pipol insaed long haos blong prea oli gat hadtaem blong akseptem Jisas olsem Mesaea? (Luk long Luk 4:22. Ol ansa i save tekem se ol man Jiu oli bin save Hem mo oli bin lukluk Hem i grup, mekem se oli no bin stap luksave olsem wanem nao Hem, Hem i save stap olsem Mesaea we oli bin stap wet long Hem.) Yu ting se from wanem i gat sam pipol we oli faenem i had blong save akseptem Jisas Kraes? Olsem wanem yumi save mekem ol testemoni blong yumi i kam strong moa se Jisas i Sevya.?

2. Jisas i singaotem Ol Twelef Aposol blong Hem.

Ridim mo toktok raon long ol skripja we yu jusum long Luk 5:1–11, 27–28; 6:12–16. Soem pikja blong Jisas mo ol fisaman mo pikja blong Ol Twelef Aposol blong tedei. Taem yu stap toktok raon long ol skripja, helpem ol memba blong klas blong andastanem se oli singaotem Ol Aposol blong mekem wanem we Jisas Hemwan i bin mekem insaed long haos blong prea long Nasaret—talemaot se Hem i Mesaea, Sevya ia.

- Saemon Pita, Jemes mo Jon oli stap mekem wanem taem Jisas i kam kamaot long olgeta? (Luk long Luk 5:1–2.) Wanem Jisas i bin talemaot long olgeta abaot olsem wanem bae laef blong olgeta bae i jenis sapos oli folem Hem? (Luk long Luk 5:10.) Olsem wanem laef blong yu i jenis from se yu bin mekem tingting blong yu blong folem Jisas Kraes?
- Olsem wanem merikol wetem ol fising net i talemaot finis ol eksperiens we Pita, Jemes, mo Jon bae i gat olsem “ol man blong pulum man”? (Mak 1:17). Mekem ol memba blong klas oli tingting long tufala sentens ia:
 - a. Luk 5:5: “Be from yu yu talem olsem, mi save go sakem net bakegen.” (Bae oli go wok long ples we Jisas bae i talem long olgeta blong go wok long hem.)
 - b. Luk 5:6: “Mo from we i gat plante fis tumas, net blong olgeta i brok.” (Bae oli faenem plante pipol we bae oli akseptem gospel.)
 - c. Luk 5:7: “Nao olgeta oli singaot long . . . tufala we i stap wok wanples wetem . . . blong tufala i kam givhan long olgeta.” (Bae oli singaotem ol narawan blong oli help long wok ia.)

- Poenemaot se long Luk 5:1–11, Jisas i bin singaotem Pita, Jemes, mo Jon blong oli stap olsem ol disaepol blong Hem. Afta, Hem i singaotem olgeta Ol Aposol. Raetem *Disaepol* mo *Aposol* long blakbod. Wanem i defren bitwin wan disaepol mo wan Aposol?

Eksplenem se wan disaepol hem i eni man we i folem Jisas Kraes (Bible Dictionary, “Disciple,” 657). Wan Aposol hem i wan disaepol we oli singaotem hem blong i kam wan spesel witnes blong Kraes (D&C 107:23). Toktok ia *Aposol* i minim “wan [we] oli sendem hem i kam” (Bible Dictionary, “Apostle,” 612). Ol memba blong Kworom blong Olgeta Twelef Aposol, oli sendem olgeta blong oli testefae long wol se Jisas i Sevyia mo Ridima blong ol man.

- From wanem hem i impoten blong Jisas i singaotem ol Aposol? (Luk long Matiu 9:36–38; 16:19; Mak 3:14–15; Jon 20:19–21, 23; Efesas 4:11–15. Bae oli helpem Jisas blong prijim gospel mo bae oli lidim Jos mo tekem i go prishud atoriti ia afta we Jisas i go.) From wanem hem i impoten blong Lod i singaotem Ol Aposol tedei?
- Olsem wanem Jisas i bin jusum ol fas Twelef Aposol? (Luk long Luk 6:12–13.) Olsem wanem Jisas i bin mekem Hemwan i rere blong singaotem olgeta? Olsem wanem yumi save komperem hemia long fasin we oli stap jusum ol pipol tedei blong stap olsem Ol Aposol mo blong oli stap long ol nara koling blong Jos? (Ol lida blong Jos oli prea mo oli lukaotem insperesen blong save huia Lod i wantem se bae oli sev insaed long wanwan koling.)
- Wanem nao ol skripja oli stap talem yumi abaot histri mo fasin blong ol man we Jisas i bin singaotem olgeta olsem Ol Aposol? (Luk long Luk 5:5, 8, 11, 27–28. Oli save ansa olsem se oli no bin gat eni trening long ministri ia, be oli bin gat tingting i stap daon, oli bin obei, oli ol man we oli wok had mo oli glad blong sakrifae long evri samting blong folem Lod.) Hemia i talem wanem abaot olsem wanem wan i kwalifae blong sevem Lod? (Luk tu long D&C 4:3, 5–6; Ol Toktok blong Bilif 1:5.)

3. Jisas i odenem mo i tijim Ol Twelef Aposol.

Ridim mo toktok raon long ol skripja we yu jusum long Matiu 10. Soem pikja blong Kraes we i stap odenem Ol Aposol.

- Afta we Jisas i singaotem Ol Twelef Aposol, Hem i bin givim prishud paoa long olgeta mo i tijim olgeta long ol wok blong olgeta. Wanem nao yumi lanem abaot ol paoa mo ol wok blong Ol Aposol insaed long toktok blong Jisas long Matiu 10? (Raetem daon ol ansa blong ol memba blong klas long blakbod. I save gat ol ansa we oli stap daon ia.)
 - a. Oli gat paoa blong ronemaot devel long ol man mo mekem olgeta we oli sik oli kam gud bakegen (ves 1).
 - b. Oli sendem olgeta i go long olgeta sipsip blong Isrel we oli lus, blong prijim se kingdom blong heven i stap kam (ol ves 6–7).
 - c. Oli mas yusum prishud paoa blong olgeta blong blesem mo mekem ol pipol oli kam gud bakegen (ves 8).
 - d. Oli mas lukaotem olgeta we oli rere blong harem gospel (ol ves 11–14).
 - e. Oli mas tij olsem we Spirit i lidim olgeta (ol ves 19–20).
 - f. Oli mas givim laef blong olgeta i go evriwan long wok blong Sevyia (ves 39).

- Olsem wanem nao yu save komperem ol paoa mo ol wok we oli bin givim i go long olgeta fas Aposol wetem olgeta we oli stap givim naoia long Ol Aposol blong ol lata-dei? (Luk long D&C 107:23, 33, 35; 112:14, 19–22, 30–31.) Olsem wanem nao yu bin luk Ol Aposol blong ol lata-dei oli fulfilim wok blong olgeta?
- Wanem blesing oli promesem long olgeta we oli stap folem Ol Aposol? (Luk long Matiu 10:40–42; luk tu long D&C 124:45–46.)

Elda Spencer W. Kimball i bin talem: “I no gat wan insaed long Jos ia bae i go lus sapos hem i fasem hemwan long ol Jos Atoriti we Lod i putum insaed long Jos blong Hem. Jos ia bae i neva go lus; Kworom blong Olgeta Aposol bae oli neva lidim yu i go long ol denja rod; hem i neva mekem olsem mo bae i neva mekem” (insaed long Conference Report, Epr. 1951, 104).

Las Toktok

Testefae se Jisas Kraes i tru Mesaea mo olgeta Twelef Aposol oli ol spesel witnes blong Hem. Bae yu save serem wan eksperiens blong yu we taem yu bin folem gudfala toktok blong wan Aposol i bin blesem laef blong yu.

Sam Nara Aedia Blong Tij

Ol nara tul ia oli kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Olgeta Twelef Aposol we oli stap naoia

Soem ol pikja blong Olgeta Twelef Aposol we oli stap naoia mo helpem ol memba blong klas blong lanem ol nem blong olgeta. Bae yu save yusum smol gem ia:

Givim wan pensel mo wan pis pepa long wanwan memba blong klas, mo askem olgeta blong raetem ol namba 1 kasem 12 long pepa blong olgeta. Soem wan pikja blong wanwan long Ol Aposol ia mo yu no mas talemaot nem blong hem, mo askem ol memba blong klas blong raetem nem blong Aposol ia long pepa blong olgeta long narasaed blong namba. Afta we yu soem evri pikja, luklukbak long ol stret ansa.

2. Ol fas Twelef Aposol

Helpem ol memba blong klas blong lanem ol nem blong ol fas Twelef Aposol (Matiu 10:2–4). Presentem ol infomesen ia long toktok blong yuwan nomo blong helpem ol memba blong klas blong andastanem olsem wanem oli stap tokbaot ol defren Aposol insaed long ol skripja:

I gat tu (2) Aposol we nem blong tufala Jemes: Jemes, boe blong Sebede mo Jemes, boe blong Alfeas. Tu (2) oli tekem nem blong Saemon: Saemon Pita mo Saemon, man Kana we oli singaotem hem tu se hem i Saemon man blong pati we i wantem sakemaot ol man Rom. Tu (2) long olgeta i tekem nem blong Judas: Judas (we oli singaotem hem tu Lebeas Tadeas) mo Judas Iskariot, we i salem Kraes. Matiu, oli singaotem hem tu Livae insaed long Luk 5:27–28. Tomas, oli save hem tu olsem “Twin”. Aposol we oli singaotem hem Batelemeu insaed long ol gospel blong Matiu, Mak, mo Luk, oli ting se hem i sem man we oli singaotem hem Natanael insaed long gospel blong Jon.

3. “Man we i lavem papa mo mama blong hem moa, i winim we hem i lavem mi, hem i no stret blong i kam man blong mi” (Matiu 10:37)

Mekem ol memba blong klas oli ridim Matiu 10:35–38.

- Olsem wanem ol ves 35 mo 36 oli fulfil samtaem taem wan i joenem Jos? Yumi save se Lod i wantem ol famle blong yumi oli stap long pis mo oli stap wan, from wanem nao yu ting se Hem i mekem ol toktok ia olsem? Long huia nao yumi mas putum tingting mo hat blong yumi i go long hem? (Luk long ol ves 37–38; luk tu long Luk 14:33.)

4. Vidio presentesen

Fas pat blong “New Testament Customs,” we i wan seleksen blong vidiokaset ia *New Testament Video Presentations* (53914), bae i gud blong yusum long lesen ia. Pat ia i tekem infomesen long wanem nao i minim long Jisas se Hem i Hemia we oli anoentem Hem, o Mesaea (Luk 4:18); long saed tu long wosip long haos blong prea; mo tu se i bin minim wanem blong prijim gospel mo no kasem mane from, olsem we Jisas i bin tijim Ol Aposol blong Hem blong mekem (Matiu 10:9–10).

“Hem i Tekem Ol Sik Blong Yumi, Mo i Karem Ol Sobodi Blong Yumi”

Lesen
7

Mak 1–2; 4:35–41; 5; Luk 7:11–17

Stamba Tingting Blong helpem ol memba blong klas blong oli andastanem from wanem Sevyia i bin mekem ol merikol ia.

- Rere long Lesen**
1. Ridim, tingting hevi mo prea abaot ol skripja ia:
 - a. Mak 1:14–15, 21–45. Jisas i wokbaot tru long Galili mo i stap tijim gospel, i sakemaot ol devel, mo i mekem ol sikman oli harem gud bakegen. Hem i ronemaot wan rabis spirit i kamaot long wan man, i mekem mama blong waef blong Saemon Pita i kam gud bakegen, mo i klinim wan man we i gat leprosi.
 - b. Mak 2:1–12. Jisas i fogivim sin blong wan man mo i mekem man ia i kam gud long sik blong hem.
 - c. Mak 4:35–41; 5:1–20; Luk 7:11–17. Jisas i mekem solwota we i raf i kam kwaet, i sakemaot plante devel, mo i mekem boe blong wido blong Naen i laef bakegen long ded.
 - d. Mak 5:21–43. Jisas i mekem wan woman we i sik bigwan i kam gud bakegen mo i mekem gel blong Jaeras i laef bakegen long ded.
 2. Sam moa riding: Matiu 8–9; Luk 4:33–44; 5:12–32; 8:22–56; Alma 7:11–12; Momon 9:7–20; Moronae 7:27–29, 33–37; Bible Dictionary, “Miracles,” 732–33.
 3. Sapos ol pikja ia, Stap Mekem Solwota i Kwaet (62139; Gospel Art Pikja Kit 214) mo Jisas i Stap Blesem Gel blong Jaeras (62231; Gospel Art Pikja Kit 215) oli stap, yusum olgeta long taem blong lesen.
 4. Wan tingting blong tij: Ol memba blong klas oli nidim blong save from wanem ol tijing insaed long ol skripja oli impoten long yumi tedei. Taem yu stap rere long wanwan lesen, wetem prea, tingting gud long wanem nao yu save mekem blong leftemap tingting blong ol memba blong klas blong yusum ol gospel prinsipol long ol laef blong olgeta. (Luk long *Teaching—No Greater Call*, 111, 116–17.)
-

Wan Tingting blong Lesen

Aktiviti blong
Pulum Tingting

Olsem we i stret yusum aktiviti ia o wan aktiviti blong yuwan blong statem lesen.

- Wanem hem i wan merikol? (Wan bigfala samting we i tekem ples we wan paoa we i kam antap o wan paoa blong spirit i mekem i tekem ples; luk long Bible Dictionary, “Miracles,” 732–33.)
- Wijwan long ol merikol we Jisas i bin mekem, bae yu laekem blong yu witnesem? From wanem? (Bae yu save listim sam long ol merikol blong Kraes long blakbod blong helpem ol memba blong klas oli ansa long kwestin ia.)

Eksplenem se lesen ia i blong toktok raon long sam long ol merikol blong Sevyia mo from wanem nao Hem i bin mekem olgeta.

Taem yu stap tijim ol skripja ia, tokbaot olsem wanem blong yusum olgeta long laef evri dei. Talemaot gud se Jisas i gohed blong mekem ol merikol long ol laef blong yumi. Leftemap tingting blong ol memba blong klas blong serem, sapos hem i stret, ol merikol we oli bin go tru long hem. (Bae yu save mekem ol memba blong klas se sam long ol eksperiens ia bae oli tabu tumas blong save serem. Tabu Spirit bae i save helpem olgeta blong save wanem we i stret blong serem olsem wan eksperiens.)

1. Jisas i stap wokbaot tru long Galili mo i stap tijim gospel mo mekem ol merikol.

Toktok raon long Mak 1:14–15, 21–45. Invaetem ol memba blong klas blong ridim laod ol ves we yu bin jusum.

- Taem Jisas i stap wokbaot tru long Galili mo i stap tijim gospel, Hem i bin mekem plante merikol, mo tu Hem i bin mekem ol sikman oli kam gud bakegen mo Hem i bin sakemaot ol devel (Mak 1:34, 39). From wanem Jisas i bin mekem olgeta merikol ia mo sam narawan long taem blong ministri blong Hem? (Sam ansa we i stret oli raetem daon ia.)
 - a. Blong soem lav mo tu lav mo sore (Luk long Mak 5:19; luk tu long 3 Nifae 17:6–7).
 - b. Blong bildim mo konfemem fet (luk long Matiu 9:27–30).
 - c. Blong pruvum se Hem i Hae tumas mo paoa blong Hem (luk long Mak 1:27; 2:10–11).

Listim ol ansa blong ol memba blong klas long blakbod, mo lego list ia i stap long blakbod long fultaem blong lesen. Taem yufala i stap toktok raon long ol merikol we Jisas i bin mekem, toktok raon long sam long ol stamba tingting we i bin kam tru long wanwan merikol. Ademap ol stamba tingting ia we oli tokbaot long taem blong lesen i go long list ia long blakbod.

- From wanem ol pipol insaed long haos blong prea long Kapenaum oli sapraes tumas long ol tijing blong Jisas mo paoa blong Hem blong save sakemaot ol spirit we oli no klin? (Luk long Mak 1:22, 27.) Tru long wanem atoriti nao Jisas i bin tijim mo mekem ol merikol ia? (Tru long paoa blong prishud, we ol tija blong Loa oli no bin gat.) Olsem wanem yumi save yusum paoa mo atoriti ia tedei?
- Folem Mak 1:41, givim wan tingting from wanem Jisas i bin mekem ol man blong leprosi oli bin kam gud bakegen? Poenemaot se Jisas i bin mekem plante plante merikol we i stap blesem wan man nomo. Olsem wanem ol merikol ia oli stap soem olsem wanem Jisas i stap filim abaot wanwan long yumi? Olsem wanem Hem i bin soem lav mo bigfala lav mo sore long yu?
- Olsem wanem yumi save soem lav mo bigfala lav mo sore long olgeta raon long yumi, olsem we Jisas i bin mekem? Olsem wanem ol nara pipol oli bin soem lav mo bigfala lav mo sore long yu, olsem we Jisas i bin mekem?

2. Jisas i fogivim sin blong wan man mo i mekem wan man we haf bodi blong hem i ded, i kam gud bakegen.

Ridim mo toktok raon long Mak 2:1–12.

- Fet blong huia i help blong mekem man ia we haf bodi blong hem i ded i kam gud bakegen? (Luk long Mak 2:3, 5.) Olsem wanem ol pipol ia oli bin soem fet blong olgeta? (Luk long Mak 2:1–4.) Olsem wanem yumi save yusum fet blong

yumi long bihaf blong ol narawan? Olsem wanem fet blong ol narawan oli bin helpem yu o wan narawan we yu save long hem?

- Wanem sam long ol tija blong Loa ia oli bin tingting long hem taem Jisas i bin talem long man we haf blodi blong hem i ded se Hem i fogivim ol sin blong hem? (Luk long Mak 2:5–7.) Olsem wanem Jisas i bin ansa long olgeta? (Luk long Mak 2:8–11.) Poenemaot se, long man ia we haf bodi blong hem i ded, hem i wan merikol we hem i kam gud, be tu, hem i wan merikol we Jisas i fogivim ol sin blong hem. Talemaot gud se merikol ia i stap nomo long wanwan long yumi taem yumi sakem sin.
- Wijwan paoa blong hiling we i moa bigwan we bae i save stap olsem saen blong ol hiling blong bodi we Jisas i bin mekem? (Luk long Aesea 53:5; 2 Nifae 25:13; 3 Nifae 9:13.) Olsem wanem paoa blong Jisas blong mekem man i kam gud i bin blesem yu long spirit? Olsem wanem yumi save lukaotem blong kam gud long spirit?

3. Jisas i mekem solwota i kwaet, i sakemaot ol devel, mo i mekem boe blong wido blong Naen i laef bakegen long ded.

Ridim mo toktok raon long ol skripja we yu jusum long Mak 4:35–41; 5:1–20 mo Luk 7:11–17. Soem pikja blong Jisas i stap mekem solwota i kwaet.

- Ol merikol we Sevya i mekem long saed blong bodi, plante taem oli stap representem ol trutok blong spirit. Wanem trutok blong spirit yumi save lanem long ol merikol ia? (Sam long ol ansa ia oli stap long braket.)
 - a. Mak 4:35–41. Jisas i mekem solwaota i kwaet. (Hem i save givim yumi pis.)
 - b. Mak 5:1–20. Jisas i sakemaot ol devel. (Hem i save sakemaot Setan mo fasin blong Setan long ol laef blong yumi.)
 - c. Luk 7:11–17. Jisas i mekem wan yang boe i laef bakegen long ded. (From Atonmen blong Hem, bae yumi laef bakegen long Taem blong Laef Bakegen long Ded.)

Invaetem ol memba blong klas blong talemaot ol nara merikol we Sevya i bin mekem mo ol trutok blong spirit we yumi save lanem aot long ol merikol ia.

- Wanem ol samting we yu bin kasem taem yu bin stadi long ol tri merikol ia?

4. Jisas i mekem wan woman we i sik bigwan i kam gud bakegen mo i mekem gel blong Jaeras i laef bakegen long ded.

Ridim mo toktok raon long ol skripja we yu jusum long Mak 5:21–43.

- Olsem wanem woman ia we i sik bigwan i bin soem fet blong hem? (Luk long Mak 5:25–29.) Wanem nao i mekem hem i kam gud bakegen? (Luk long Mak 5:34. Talemaot gud we hem i fet blong hem long paoa blong Jisas, be i no fasin blong tajem klos blong Jisas, we i mekem hem i kam gud bakegen.)
- Soem pikja blong Jisas we i stap blesem gel blong Jaeras. Olsem wanem Jaeras i bin soem fet blong hem long Sevya? (Luk long Mak 5:22–23.) Wanem Jisas i bin talem blong mekem fet blong Jaeras i kam strong moa afta we hem i harem se gel blong hem i ded? (Luk long Mak 5:36.) Olsem wanem yu save yusum ol toktok ia insaed long laef blong yu?
- From wanem yu ting se fet i mas kam fastaem long merikol? (Luk long Ita 12:12, 18; Moronae 7:37; mo toktok ia we i folem.) From wanem, merikol nomo, hem i no save stap olsem wan strong stamba blong fet?

Brigham Young i bin talem: “Ol merikol, o ol bigfala samting we i tekem ples from paoa blong God, oli no blong olgeta we oli no bilif; oli stap blong mekem ol Sent oli harem gud, blong mekem olgeta oli kam strong mo konfemem long olgeta fet blong olgeta we oli lavem, oli fraet, mo oli stap sevem God” (*Discourses of Brigham Young*, sel. John A. Widtsoe [1941], 341).

- From wanem ol merikol we Jisas i bin mekem long taem we Hem i bin laef long wol ia oli impoten long yu? From wanem hem i impoten blong save se Hem i stap gohed blong mekem ol merikol tedei? Givim sam eksampol blong ol merikol blong tedei?

Las Toktok

Testefae se Sevyia i save mekem ol soa blong bodi mo spirit i kam gud bakegen. Talemaot tangkyu blong yu long wanem we Hem i bin mekem long yumi. Sapos hem i stret, yu save talem abaot wan merikol we i bin blesem laef blong yu.

Askem ol memba blong klas blong tingting hevi long tingting blong olgeta nomo abaot ol merikol we oli bin go tru long ol. Leftemap tingting blong olgeta blong luksave mo talem tangkyu long ol merikol insaed long ol laef blong olgeta.

**Sam Nara Aedia
Blong Tij**

Ol nara tul ia oli kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Ol merikol blong Olfala Testamen

Eksplenem se ol merikol oli no niu long ol man Jiu. Ol profet blong Olfala Testamen, we ol man Jiu oli bin stap givim ona long olgeta, oli bin mekem ol merikol. Long sot taem luklukbak long ol eksampol ia:

- a. Profet Elaeja i mekem wan boe i laef bakegen long ded (Fas King 17:17–24).
- b. Profet Elisa i fidim wan bigfala grup blong man wetem smol kakae nomo (Seken King 4:42–44).
- c. Profet Elisa i mekem Neman, we i kasem leprosi, i kam gud bakegen (Seken King 5:1–19).

- Wetem wanem paoa ol profet ia oli bin mekem ol merikol ia? (Prishud, hae paoa we Papa long Heven mo Jisas Kraes, Tufala i bin givim long olgeta.)

2. “Man we hem i no sik, hem i no nidim dokta” (Mak 2:17)

- Olsem wanem ol tija blong Loa mo ol Farisi oli mekem taem oli luk we Jisas i stap kakae wetem ol pipol we olgeta oli ting se oli ol man blong sin? (Luk long Mak 2:15–16.) Wanem nao Jisas i bin talem long olgeta? (Luk long Mak 2:17.) Hemia i minim wanem? Long wanem wei nao, yumi evriwan “i . . . nidim dokta”?

Toktok Antap Long Hil: “Wan Fasin we i Winim Narafala Fasin”

Lesen
8

Matiu 5

Stamba Tingting Blong leftemap tingting blong ol memba blong klas blong kam long Kraes taem oli yusum ol prinsipol we Hem i bin tijim long Toktok Antap long Hil.

- Rere long Lesen**
1. Ridim, tingting hevi mo prea abaot ol skripja ia:
 - a. Matiu 5:1–12. Long wan hil long Galili, Jisas i tijim ol disaepol blong Hem Ol Samting we Man i Save Harem Gud From.
 - b. Matiu 5:13–16. Jisas i talemaot se ol disaepol blong Hem oli “sol long man long wol” mo “laet long ol man long wol.”
 - c. Matiu 5:17–48. Jisas i talemaot se Hem i kam blong fulfilim loa blong Moses, mo Hem i stap tijim wan loa we i moa hae.
 2. Sam moa riding: Luk 6:17–36; Joseph Smith Translation, Luke 14:35–37; Mosaea 13:28–35; Alma 34:13–16; 3 Nifae 12; Ita 12:11; Bible Dictionary, “Beatitudes,” 620; mo “Sermon on the Mount,” 771–72.
 3. Sapos yu yusum aktiviti blong pulum tingting, givim wan pen o pensel mo wan pepa long wanwan memba blong klas.
 4. Sapos ol tul ia oli stap, yusum olgeta long taem blong lesen:
 - a. Pikja blong, Toktok Antap long Hil (62166; Gospel Art Pikja Kit 212).
 - b. Wan kontena blong sol mo wan laet.
 5. Wan tingting blong tij: Jisas Kraes i Masta Tija. Taem yu stap stadi long Toktok Antap long Hil, tekem not long ol fasin blong tij blong Hem mo faenem sam wei we yu save mekem semmak long Hem olsem wan tija. (Luk long *Teaching—No Greater Call*, pej 14, blong kasem sam moa tingting long olsem wanem blong folem eksampol blong Sevyia olsem wan tija.)

Wan Tingting blong Lesen

Aktiviti blong Pulum Tingting

Olsem we i stret yusum aktiviti ia o wan aktiviti blong yuwan blong statem lesen. Givim wan pis pepa mo wan pen o pensel long wanwan memba blong klas. Eksplenem se ol skripja i tekem ol invitesen we i kam long Sevyia. Bae yu save mekem ol memba blong klas oli ridim ol invitesen we i stap long Matiu 11:28–29 mo 3 Nifae 27:27. Askem ol memba blong klas blong raetem *Sevyia i invaetem mi blong*: antap long pepa. Nao eksplenem long olgeta se lesen ia i blong lukluk nomo long Toktok Antap long Hil, we i tekem plante invitesen we i kam long Sevyia. Leftemap tingting blong ol memba blong klas blong lukaotem ol invitesen ia long taem blong lesen mo oli raetem long pepa ia.

Yusum mo Toktok Raon long Skripja

Taem yu stap tijim ol skripja ia, tokbaot olsem wanem blong yusum olgeta long laef evri dei. Leftemap tingting blong ol memba blong klas blong serem eksperiens

we i go wetem ol prinsipol blong skripja. From se bae i had blong askem evri kwestin o kavremap evri poen insaed long lesen, wetem prea, jusum olgeta kwestin we bae i lukluk long ol stret nid blong ol memba blong klas.

1. Jisas i stap tijim long ol disaepol blong Hem Ol Samting we Ol Man Oli Save Harem Gud From.

Eksplenem se plante handred yia afta long Kraes we i stap long wol bifo wol ia i bin givim loa long Moses long Maonten blong Sinae, mo Mesaea we i kam long wol ia i bin go tu antap long wan maonten blong talemaot loa ia we i moa hae long wan toktok we oli save olsem Toktok Antap long Hil. Soem pikja blong Toktok Antap long Hil.

Ol fas tijing long toktok ia oli save olgeta olsem Ol Samting we Man i Save Harem Gud From (Matiu 5:1–12). Toktok ia long inglis *beatitude* i kam long Latin lanwis *beatus*, we i minim, we i gud tumas, hapi o i gat blesing (Matiu 5:3, futnot 3a). Ridim Ol Samting we Man i Save Harem Gud From, mo toktok raon long olgeta olsem we oli putum i stap daon ia.

- *Matiu 5:3.* Hem i minim wanem blong “no gat paoa blong hem long laef”? (Gat tingting i stap daon; luk futnot 3b. Luk tu long 3 Nifae 12:3.) From wanem hem i impoten blong yumi gat tingting i stap daon? Olsem wanem yumi save gat tingting i stap daon?
- *Matiu 5:4.* Wanem sam long ol wei we Lod i givim blong yumi save harem gud? (Luk long Jon 14:26–27 mo Mosaea 18:8–9 blong kasem sam eksampol.) Olsem wanem yu bin harem gud long taem blong wan famle i lus?
- *Matiu 5:5.* Hem i minim wanem blong gat tingting i stap daon evriwan? (blong stap kaen, stap fogiv, o save givim samting; luk long futnot 5a.) Olsem wanem yumi save divelopem fasin blong gat tingting i stap daon evriwan? (Luk long Mosaea 3:19; Alma 7:23; 13:28.)
- *Matiu 5:6.* Wanem nao Jisas i bin promes long olgeta we “oli wantem tumas blong mekem samting we God i wantem”? (Luk long Matiu 5:6; 3 Nifae 12:6.) Wanem yumi save mekem blong yumi tekemaot fasin blong yumi blong wantem ol samting blong wol, i go blong yumi wantem ol samting we i stret mo gud?
- *Matiu 5:7.* Olsem wanem yumi save soem sore long ol man? From wanem yumi nidim sore we i kam long Lod? (Luk long Alma 42:13–15.)
- *Matiu 5:8.* Long tingting blong yu, i minim wanem blong gat wan hat we i klin evriwan? Olsem wanem yumi save mekem hat blong yumi i kam klin evriwan? (Luk long Hileman 3:35.) From wanem yumi mas gat ol hat we i klin evriwan sapos yumi wantem luk God mo stap stap wetem Hem? (Luk long Moses 6:57.)
- *Matiu 5:9.* Olsem wanem yumi save stap olsem ol man blong mekem pis insaed long ol hom mo komiuniti blong yumi?
- *Matiu 5:10–12.* From wanem ol pipol we oli stret mo gud oli stap fesem plante hadtaem? Olsem wanem nao yumi mas mekem taem yumi fesem ol hadtaem? (Luk long Matiu 5:44; Luk 6:35.)

Sapos yu bin yusum aktiviti blong pulum tingting, askem ol memba blong klas blong listem ol invitesen we i stap long Ol Samting we Man i Save Harem Gud From, we oli stap filim se i helpem olgeta gud.

2. Jisas i talemaot long ol disaepol blong Hem se oli “sol long ol man long wol” mo “laet long ol man long wol.”

Ridim mo toktok raon long Matiu 5:13–16. Taem yufala i stap toktok raon long ol ves ia, yu save soemaot kontena blong sol mo laet.

- Jisas i bin talem se ol disaepol blong Hem oli “sol long ol man long wol” (Matiu 5:13; D&C 101:39). Wanem nao yumi yusum sol long hem? (I save gat ol ansa olsem, sol oli yusum blong putum long kakae o blong kipim kakae i stap longtaem.) Olsem wanem ol Lata-dei Sent oli save stap olsem “sol long ol man long wol”?
- Invaetem wan memba blong klas blong ridim Doctrine and Covenants 103:9–10. Wanem sam samting moa we ol ves ia oli ademap abaot mining ia blong stap olsem “sol long ol man long wol”? Olsem wanem yumi save stap olsem “ol sevyia blong ol man”? (I save gat olsem ansa blong stap serem gospel mo mekem ol tempol wok.)
- Olsem wanem ol Lata-dei Sent oli save stap olsem “laet long ol man long wol”? (Matiu 5:14; luk tu long ves 16). Wanem i hapen taem oli stap putum wan kandel “andanit long wan baket”? (Matiu 5:15). Olsem wanem yumi, olsem ol memba blong Jos, yumi stap putum laet blong yumi andanit long wan baket? Olsem wanem yumi save letem laet blong yumi i saen long wan wei we bae i lidim ol narawan i “leftemap nem blong Papa blong [yumi] . . . long Heven”? (Luk long Matiu 5:16; 3 Nifae 18:24.)

3. Jisas i stap tijim wan loa we i moa hae bitim loa blong Moses.

Toktok raon long Matiu 5:17–48. Invaetem ol memba blong klas blong ridim laod ol ves we yu jusum.

- Jisas i talem se Hem i kam blong fulfilim loa blong Moses, be i no blong spolem loa ia evriwan (Matiu 5:17–18). Olsem wanem nao Hem i kam blong fulfilim loa ia?

Eksplenem se loa blong Moses, oli bin “givim long ol pikinini blong Isrel, . . . from oli bin wan stronghed pipol, oli kwik blong mekem rabis fasin, mo slo blong tingbaot Lod God blong olgeta.” Hem i bin “wan loa blong mekem ol wok mo ol odinens, wan loa we oli bin nidim blong folem gud long wan dei i go long narafala dei blong kipim olgeta blong tingbaot God mo ol wok blong olgeta i go long hem” (Mosaea 13:29–30). Olgeta we oli bin andastanem loa ia, oli bin “lukluk long fored wetem strong bilif long Kraes, kasem taem we loa ia bae i hapen. From en ia oli bin givim loa” (2 Nifae 25:24–25).

Sevyia i bin fulfilim loa blong Moses taem Hem i bin pemaot ol sin blong yumi (Alma 34:13–16). Afta long Atonmen, ol pipol oli nomo bin gat komanmen blong mekem sakrifaes blong ol animol, we hemia i pat blong loa blong Moses blong lukluk long sakrifaes blong Jisas Kraes blong pemaot sin blong yumi. Be ol pipol oli bin gat komanmen blong “wan hat we i fulap wetem sore mo wan spirit we i wantem blong sakem sin” (3 Nifae 9:20; luk tu long ves 19).

- Jisas i bin talem se stret mo gud fasin blong ol disaepol blong Hem bae hem i “winim hemia blong ol tija blong Loa mo ol Farisi” (Matiu 5:20). Long stret mo gud fasin blong ol tija blong Loa mo ol Farisi, wanem nao i no bin gat? (Oli bin lukluk tumas long olsem wanem nao loa i stap be oli bin sakemaot mo no

wanem save wanem strong fet we i bin stap insaed long hem. Sapos oli bin luksave loa ia olsem we hem i stap, bae oli bin luksave Jisas olsem Mesaea.)

Long lef kona blong blakbod, antap, raetem *Yufala i bin harem finis we ol tija oli talem bifo se*. Eksplenem se long Toktok Antap long Hil, Jisas i yusum ol toktok ia taem Hem i tokbaot ol komanmen we oli pat blong loa blong Moses. Long raet kona blong blakbod, antap, raetem *Be Mi Mi talem long yufala*. Poenemaot se Jisas i bin yusum ol toktok ia taem Hem i bin tijim ol disaepol blong Hem long loa we i moa hae.

- Long Matiu 5:21, wanem loa blong bifo Jisas i stap tokbaot? (Raetem *Bambae yufala i no mas kilim man i ded* andanit long toktok ia *Yufala i bin harem finis we ol tija oli talem bifo se*.) Wanem loa we i moa hae Jisas i bin givim long saed blong komanmen ia? (Luk long Matiu 5:22. Raetem *Yufala i no kros* andanit long toktok ia *Be Mi Mi talem long yufala*.) Olsem wanem nao loa ia blong ronwe long fasin blong kros i wan loa we i moa hae bitim komanmen ia agensem fasin blong kilim man i ded? Olsem wanem ol filing blong kros i save spolem rilesensip blong yumi wetem God? Wanem yumi save mekem blong kontrolem ol filing blong yumi blong stap kros mo olsem wanem yumi stap lukaotem blong ol fasin blong kros ia oli kamaot evriwan long laef blong yumi?
- Sevyia i bin tokbaot blong tekem wan “presen i go long Olta,” long sem fasin olsem ol man bifo oli stap mekem (Matiu 5:23). Wanem Jisas i bin talemaot long ol disaepol blong Hem se bae oli mas mekem sapos oli kros taem oli stap rere blong tekem wan presen i go long Olta? (Luk long Matiu 5:23–24.) Olsem wanem samting ia bae i stret long yumi tedei?
- Wanem bae yumi mekem taem wan man i mekem nogud long yumi? (Luk long Matiu 5:24; 18:15; D&C 64:8–11.) Wanem nao ol denja we i stap blong stap wet long wan man we i mekem nogud long yumi blong hem i askem sore long yumi?
- Long Matiu 5:27, wanem loa blong bifo Jisas i stap tokbaot? (Raetem *Yufala we i mared, bambae yufala i no mas go slip wetem narafala woman* andanit long toktok ia *Yufala i bin harem finis we ol tija oli talem bifo se*.) Wanem loa Jisas i bin givim we i tekem ples blong komanmen ia? (Luk long Matiu 5:28. Raetem *Ronwe long ol doti tingting* andanit long toktok ia *Be Mi Mi talem long yufala*.) Wanem i kamaot taem yumi gat ol tingting we i no klin? (Luk long Mosaea 4:30; Alma 12:14; D&C 63:16.) Wanem yumi save mekem blong kipim ol tingting blong yumi oli klin evriwan?
- Long Joseph Smith Translation, toktok i stap se ae mo han we oli tokbaot long Matthew 5:29–30 i representem ol sin (Matiu 5:30, futnot 30a). Wanem nao ol ves ia oli stap tijim yumi long fasin we bae yumi gat blong yumi stretem ol sin blong yumi?
- Olsem we oli rekodem long Matiu 5:33, olsem wanem ol pipol insaed long Olfala Testeman oli stap talem se oli stap talem trutok? (Raetem *Sipos yu talem nem blong God, yu mekem olsem we yu talem* andanit long toktok ia *Yufala i bin harem finis we ol tija oli talem bifo se*.) Wanem loa Jisas i putum blong i tekem ples long fasin ia? (Luk long Matiu 5:34–37. Ridim toktok ia we i kam long Elda Bruce R. McConkie. Nao raetem *Holem toktok blong yu* andanit long toktok ia *Be Mi Mi talem long yufala*.)

Elda Bruce R. McConkie i bin talem: “Anda long loa blong Moses, fasin blong talem nem blong God i wan samting we oli mekem oltaem mo oli mekem long eni kaen samting nomo, mekem se sam toktok nomo oli talem be oli no talem nem blong God long hem o oli talem be i gat tingting se i no tru. . . . Anda long loa blong Kraes, evri toktok we man i talem, hem i mas holem toktok blong hem, mo evri toktok we hem i talem, oli stap olsem ol tru toktok” (*The Mortal Messiah*, ol buk 4. [1979–81], 2:140).

- Long Matiu 5:38, wanem loa blong bifo Jisas i stap tokbaot? (Raetem *Sapos oli spolem wan ae blong yu, yu spolem wan ae blong hem* andanit long toktok ia *Yufala i bin harem finis we ol tija oli talem bifo se*. Eksplenem se toktok ia i minim nomo se sapos wan man i mekem nogud yu, yu save mekem nogud long hem i semmak olsem panismen blong hem; luk long Levitikas 24:17–21.) Wanem komanmen i tekem ples blong loa ia? (Luk long Matiu 5:39–40. Raetem *Givim narasaed blong fes blong yu* andanit long toktok ia *Be Mi Mi talem long yufala*.) Wanem prinsipol Jisas i bin tijim taem Hem i talem se bae yumi mas letem narawan i slapem narasaed fes blong yumi mo yumi mas givim singlet blong yumi long hem we i tekem kot blong yumi?
- Long Matiu 5:43, wanem fasin blong bifo Jisas i stap tokbaot? (Raetem *Lavem ol man we i stap raonabaot long yu mo mas agensem ol enemi blong yu* andanit long toktok ia *Yufala i bin harem finis we ol tija oli talem bifo se*.) Wanem komanmen i tekem ples blong fasin ia? (Luk long Matiu 5:44–47. Raetem *Lavem ol enemi blong yu* andanit long *Be Mi Mi talem long yufala*.) Olsem wanem yumi save kam antap blong lavem ol enemi blong yumi? (Luk long Moronae 7:47–48 blong gat wan eksampol.) Olsem wanem ol laef blong yumi i save jenis sapos yumi lavem ol enemi blong yumi? Olsem wanem laef blong olgeta tu i save jenis?

Sapos yu bin yusum aktiviti blong pulum tingting, askem ol memba blong klas blong lukluk long blakbod mo listim daon ol invitesen we i stap long Matiu 5:17–47 we i save helpem olgeta wanwan.

- Olsem wanem bae yumi save andastanem komanmen blong Sevyia blong yumi mas kam stret evriwan? (Luk long Matiu 5:48, futnot 48*b*, we i stap talem se wan nara toktok blong lanwis blong ol man Gris blong toktok ia *stret evriwan* hem i “finis, fulwan, finis evriwan.”) Olsem wanem komanmen ia blong yumi kam stret evriwan i save leftemap tingting blong yumi be i no mekem yumi stap harem nogud?

Presiden Joseph Fielding Smith i bin talem:

“Mi bilif se Lod i minim wanem we Hem i talem stret taem Hem i talem: se bae yumi mas stret evriwan, semmak olsem we Papa blong yumi long Heven i stret evriwan. Hemia bae i no kam wantaem nomo, be tijing folem tijing, rul folem rul, eksampol folem eksampol, mo iven bae i no stop long taem we bae yu laef long wol ia nomo, from se bae yumi mas ded bifo yumi kam stret evriwan mo kam olsem God.

“Be long wol ia, yumi stap putum fandesen i stap. Long wol ia oli tijim yumi long ol simpol trutok blong gospel blong Jisas Kraes, long ples ia blong tes, blong mekem yumi rere blong kam stret evriwan. Hem i wok blong yumi blong kam gud moa tedei bitim yestedei, mo moa gud tumoro bitim tedei. . . . Sapos yumi stap biae long ol komanmen blong Lod, yumi stap long rod

blong kam stret evriwan" (*Doctrines of Salvation*, komp. Bruce R. McConkie, ol buk 3. [1954–56], 2:18–19; luk tu long D&C 93:11–14, 19–20).

- Olsem wanem Atonmen blong Sevyia i helpem yumi blong kasem fasin ia blong yumi kam stret evriwan? (Luk long Moronae 10:32–33; D&C 76:68–70.) Olsem wanem ol tijing we i stap long Toktok Antap Long Hil i stap helpem yumi blong "kam long Kraes, mo stap stret gud long Hem"?

Las Toktok

Testefae se ol tijing long ol Toktok Antap Long Hil oli stap helpem yumi blong "kam long Kraes mo stap stret gud long Hem" (Moronae 10:32). Leftemap tingting blong ol memba blong klas blong folem ol tijing long ol laef blong olgeta. Sapos yu bin yusum aktiviti blong pulum tingting, askem ol memba blong klas blong lukluk long ol invitesen we oli bin listim i stap mo jusum wan o tu we bae oli wok long olgeta long wik ia we i kam.

Sam Nara Aedia Blong Tij

Ol nara tul ia oli kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. "Wan rod we i moa gud tumas" (Ita 12:11)

Invaetem sam memba blong klas blong oli rere blong kam long klas blong serem sam tingting long olsem wanem ol tijing insaed long Matiu 5 i save helpem olgeta insaed long ol hom, skul o wokples blong olgeta.

2. Tijing blong Sevyia abaot divos

Sapos yu o wan memba blong klas i gat wan kwestin abaot Matiu 5:31–32, lukluk long nambafaef tingting blong lesen we i stap long lesen 14 (luk long pej 00(60)).

3. Vidio presentesen

Nambatu pat blong "New Testament Customs," wan pat blong *New Testament Video Presentations* (53914), i stap eksplenem toktok ia *schoolmaster*, we oli yusum long Galesia 3:24–25 blong tokbaot loa blong Moses. Sapos yu soem pat ia, toktok raon long olsem wanem loa blong Moses i bin stap olsem wan man we i lukaot long pikinini, blong mekem ol pipol oli kam long Kraes.

“Fastaem Yufala i Mas Lukaot Gud Blong Obei Long God We i King Long Yufala”

Lesen
9

Matiu 6–7

Stamba Tingting Blong leftemap tingting blong ol memba blong klas blong wok moa had blong kam ol disaepol blong Jisas Kraes.

- Rere long Lesen**
1. Ridim, tingting hevi mo prea abaot ol skripja ia, we oli folem Toktok Antap long Hil:
 - a. Matiu 6:1–6, 16–21. Jisas i stap tijim ol disaepol blong Hem long prapa fasin blong givhan long ol puaman, blong prea, blong livim kakae mo mekem wosip mo blong kam rijman long heven be i no long wol.
 - b. Matiu 6:7–13; 7:7–11. Hem i soem long ol disaepol blong Hem olsem wanem blong prea mo i stap tijim se Papa long Heven bae i blesem olgeta we oli askem Hem ol samting we oli nidim.
 - c. Matiu 6:14–15; 7:1–6, 12. Jisas i stap tijim ol disaepol blong Hem blong oli mas fogivim ol narawan, blong jajem man long stret fasin, mo blong mekem ol narawan olsem se oli wantem ol narawan blong mekem long olgeta.
 - d. Matiu 6:22–34; 7:13–29. Hem i tijim ol disaepol se bae oli kasem blesing blong stap sevem Papa long Heven mo blong mekem wanem we Papa long Heven i wantem.
 2. Sam moa riding: Luk 6:37–49; 11:1–13, 34–36; 12:22–34; 16:13; 3 Nifae 13–14.
 3. Sapos ol tul ia oli stap, yusum olgeta long taem blong lesen:
 - a. Pikja blong Toktok Antap long Hil (62166; Gospel Art Pikja Kit 212).
 - b. Wan smol pat nomo blong (i no bitim sikis o seven minit) blong “The Sermon on the Plain,” pat 4 blong vidiokaset ia *The Savior: Early Years* (53163). Jusum pat ia we i tokbaot gud moa ol prinsipol we yu stap tijim.
 4. Bae yu save rere blong singsing “The Wise Man and the Foolish Man” (*Children’s Songbook*, 281) wetem ol memba blong klas.
 5. Wan tingting blong tij: Ol stori oli save givim pikja blong ol gospel prinsipol mo mekem ol memba blong klas oli lisin, semmak olsem sam nara wei blong tij. Jisas, plante taem, i yusum ol stori blong tijim ol impoten lesen o blong mekem sam samting we i no klia oli kam klia. Taem yu stap rere long ol lesen blong yu, lukluk olsem wanem yu save yusum sam stori we bae i helpem ol memba blong klas blong andastanem ol gospel prinsipol. Taem yu talem wan stori, mekem sua se ol memba blong klas oli andastanem wanem hem i wan tru stori o wan stori we yu mekemap blong mekem olgeta oli kasem poen we yu stap tokbaot. (Luk long *Teaching—No Greater Call*, 98–100, 127.)

Wan Tingting blong Lesen

Aktiviti blong
Pulum Tingting

Olsem we i stret, yusum aktiviti ia o wan aktiviti blong yuwan blong statem lesen.

Talem stori ia long ol toktok blong yuwan:

Elda William R. Bradford blong olgeta Seventi, i bin toktok wantaem wetem wan bisop blong wan wod; mo ol yut blong wod ia we oli bin wok blong winim sam mane blong wan aktiviti. Bisop i bin askem Elda Bradford blong helpem hem blong mekem wan samting long ol yut blong luksave hadwok blong olgeta. Bisop i sapraes tumas taem Elda Bradford i bin talem se bae hem i no mekem. Hem i talem se hem i glad se ol yangfala pipol ia oli bin wokhad, be i no nid o impoten tumas blong oli luksave wok blong olgeta long pablik.

Taem ol yut oli mekem tingting blong olgeta blong givim mane ia i go long mane blong ol misinari blong Jos, be i no blong aktiviti, oli bin wantem blong gat wan foto wetem Elda Bradford taem oli stap mekem donesen ia, mo oli bin wantem se bae oli putum long niuspepa wetem wan toktok we i go wetem. Bakegen Elda Bradford i mekem olgeta i sek taem hem i talem “no” long olgeta. Hem i talem long bisop: “Ating bae i gud yu tijim ol yangfala pipol blong yu blong oli lanem wan loa we i moa hae we bae man i luksave olgeta. Taem oli luksave olgeta long Antap, hem i saelen nomo. Oli rekodem long antap long wan kwaet fasin. Letem olgeta oli filim glad mo winim ol rij samting we i kamaot long seves ia we i saelen mo tu we oli mekem long fasin blong no gat tingting long olgeta nating, i kam insaed long hat mo sol blong olgeta.” (insaed long Conference Report, Okt. 1987, 90–91; o *Ensign*, Nov. 1987, 75).

- Wanem lesen yumi stap lanem long ol ansa blong Elda Bradford i go long ol yut?

Poenemaot se wan lesen we yumi save lanem, hem i we yumi mas mekem ol gud samting from se yumi lavem God mo yumi wantem blong mekem gud long Hem, be i no from se yumi wantem blong man i luksave yumi long ol samting ia. Hem ia i wan long ol kwaliti blong wan tru disaepol blong Jisas Kraes.

Raetem *Tru Disaepol* antap long blakbod. Taem yufala i stap toktok raon long Toktok Antap long Hil, listim ol kwaliti blong wan tru disaepol we Sevyia i bin tijim insaed long toktok blong Hem ia.

Yusum mo Toktok
Raon long Skripja

Taem yu stap tijim ol skripja ia, leftemap tingting blong wanwan memba blong klas blong tingting strong long wanem we hem i nidim blong kam wan tru disaepol blong Kraes. Leftemap tingting blong ol memba blong klas blong serem ol eksperiens blong olgeta long saed blong ol prinsipol blong stap olsem wan tru disaepol.

1. Ol tru disaepol oli mekem ol stret samting from ol stret tingting.

Ridim mo toktok raon long Matiu 6:1–6, 16–21.

- From wanem Jisas i bin toktok agensem sam pipol we oli stap mekem ol gud samting blong ol pipol olsem helpem ol puaman, prea mo livim kakae? (Luk long Matiu 6:1–2, 5, 16. Oli bin stap mekem ol samting ia from ol rong tingting.) Jisas i tokbaot ol man ia olsem ol man we i gat tu fes. Wanem hem i wan man we i gat tu fes? (Wan man we i ting se hem i gat sam kwaliti be hem i no gat olgeta; wan man we i traem blong mekem olsem se hem i wan gud man be hem i no wan gud man. Futnot 2a i talem se long lanwis blong ol man Gris toktok ia i save minim tu “man we i stap giaman long hemwan” Luk long Matiu 15:8; Luk 11:39.)

- Wanem bae hem i praes blong ol pipol we oli mekem gud samting we oli wantem se man i luk olgeta from? (Luk long Matiu 6:2, 5, 16.) Wanem sam samting we yumi stap mekem blong ol narawan oli stap luk yumi from be yumi no stap lukaot blong mekem gud long God? Olsem wanem yumi save mekem ol tingting blong yumi i kam klin blong yumi sevem mo mekem ol narafala gudfala wok?
- Long toktok ia, wanem Jisas i bin tijim abaot samting we yumi mas lukaot gud long hem? (Luk long Matiu 6:19–21.) Hem i minim wanem blong “hivimap ol gudgudfala samting . . . long heven”? Wanem sam long ol gudgudfala samting blong heven we yumi save lukaotem? (Luk long D&C 18:14–16 mo 130:18–19 blong kasem tu eksampol.)
- Hem i minim wanem “long weples we ol gudgudfala samting blong yufala i stap long hem, be oltaem tingting blong yufala tu i stap long ples ya”? (Wan nara wei i blong skelem hamas taem, mane, mo tingting yumi stap putum long wan samting.) Wanem samting ol pipol blong tedei oli laekem tumas? Askem ol memba blong klas blong tingbaot ol samting we oli laekem tumas mo tingbaot wanem nao ol rij samting ia oli stap talem abaot ples we hat blong olgeta i stap long hem.

2. Ol tru disaepol oli folem eksampol blong prea blong Sevyas.

Ridim mo toktok raon long Matiu 6:7–13; 7:7–11. Poenemaot se Matiu 6:9–13 oli save tu olsem Prea blong Lod.

- Wanem Prea blong Lod i stap tijim yumi long saed blong fasin blong mekem prea? (Luk long Matiu 6:9–13.)
- Olsem wanem Prea blong Lod i soem reverens mo respek blong Jisas long Papa blong Heven? Olsem wanem yumi save soem reverens mo respek long Papa long Heven taem yumi stap prea?

Elda Dallin H. Oaks i bin toktok long kaen lanwis we yumi mas yusum taem yumi stap prea: “Spesel lanwis blong prea i folem defren fasin long ol defren lanwis, be prinsipol ia i semmak nomo. Yumi mas toktok long Papa long Heven long ol toktok we yumi mas givim wetem lav mo respek mo reverens mo fasin blong stap kolosap. . . . Ol man mo woman we oli wantem soem respek bae oli tekem taem blong lanem spesel lanwis ia blong prea” (insaed long Conference Report, Epr. 1993, 17, 20; o *Ensign*, Mei 1993, 16, 18).

- Olsem wanem yumi save stap long longwe long fasin blong stap talemaot plante samting taem yumi stap prea? (Luk long Matiu 6:7.)
- From se Papa long Heven i save ol samting we yumi nidim bifo yumi stap prea (Matiu 6:8), from wanem nao yumi nid blong prea? From wanem fasin blong askem, lukaotem mo noknok (Matiu 7:7) i nid blong gat blong yumi go fored long laef long spirit? Olsem wanem yumi save lukaotem gud moa help we i kam long Papa long Heven?
- Olsem wanem bae yumi andastanem promes blong Sevyas se “Man we i stap askem samting, oltaem hem i faenem samting ya”? (Matiu 7:8). From wanem, samtaem, taem yumi askem wan samting, yumi no stap kasem long stret taem we yumi askem o long wan wei we yumi laekem? (Luk long 3 Nifae 18:20.) Olsem wanem yu bin lanem se God i save wanem i moa gud long yu?

3. Ol tru disaepol oli stap mekem gud long ol narawan.

Ridim mo toktok raon long Matiu 6:14–15; 7:1–6, 12.

- From wanem yu ting se Sevyia i bin givim komanmen long yumi blong yumi mas fogivim ol narawan? Olsem wanem bae yumi save kam blong fogivim moa?
- Joseph Smith Translation i stretem toktok long Matiu 7:1 blong yumi ridim se yumi no mas jajem man long nogud fasin blong mekem se bae oli no jajem yumi; be yumi mas jajem ol stret jajmen, (luk long Joseph Smith Translation, Matthew 7:2). Wanem hem i wan stret jajmen? Wanem bae i nogud long yumi sapos yumi jajem long nogud fasin? Olsem wanem yumi save mekem sua se yumi mekem ol stret jajmen? (Luk long Matiu 7:3–5; Moronae 7:14–18.)
- Jisas i bin talem se wan man we i traem blong stretem ol narawan long wan rabis fasin, hem i wan man we i gat tu fes (Matiu 7:4–5). Olsem wanem nao fasin blong jajem long nogud fasin i wan saen blong fasin blong gat tu fes?
- Tijing we i stap long Matiu 7:12, oli stap singaotem Golden Rul. Wanem eksperiens i bin soem yu olsem wanem prinsipol ia i impoten tumas? Olsem wanem taem yumi folem Golden Rul i mekem yumi kam ol disaepol blong Jisas Kraes we i moa gud?

Elda Marvin J. Ashton i tokabaot wan miting, we long miting ia i gat wan grup blong ol memba blong Jos oli stap lukluk long kwestin ia “Olsem wanem yu save talem sapos wan man i kam konvet long Jisas Kraes?”:

“Blong fotifaef minit, olgeta man we oli bin stap long miting ia oli givim plante tingting blong olgeta long kwestin ia, mo lida i stap raetem gud wanwan ansa blong olgeta long wan bigfala blakbod. Evri ansa i gat gud tingting mo i stret. Be afta smol taem, bigfala tija ia i waepemaot evri samting we hem i bin raetem. Nao, hem i talem se evri ansa ia oli gud mo i tijim wan bigfala prinsipol: ‘samting we bae i talemaot klia se yumi stap go fored long saed blong spirit mo stap kam long Kraes, hem i olsem wanem yumi stap mekem gud ol nara pipol.’ “

Elda Ashton i bin ademap: “Fasin we yumi stap mekem long ol memba blong famle blong yumi, ol fren blong yumi, mo olgeta we yumi stap wok wetem olgeta long evri dei, oli ol gospel prinsipol we yumi stap tokbaot plante” (insaed long Conference Report, Epr. 1992, 25; o *Ensign*, Mei 1992, 20).

4. Ol tru disaepol oli sevem God mo mekem wil blong Hem.

Ridim mo toktok raon long ol skripja we yu jusum long Matiu 6:22–34; 7:13–29.

- From wanem hem i no posibol blong sevem tufala tugeta God mo mamon, o wol? (Luk long Matiu 6:24.) Wanem blesing God i promesem long olgeta we oli stap sevem Hem? (Luk long Matiu 6:25–33; D&C 11:7.)
- Jisas i bin promes se sapos yumi “lukaot gud blong obei long God we i King,” bae hem i givim evri nara samting we yumi nidim (Matiu 6:33). Wanem eksperiens i bin helpem yu blong yu kasem wan testemoni long saed blong promes ia?
- Olsem wanem ol samting blong wol ia i stap tanem gud hat mo wok mo seves blong yumi i go longwe long God? Wanem wei bae yumi gat temtesen blong folem blong lukaotem ol samting blong wol bifo ol samting blong God? (Olsem ansa i save gat, wet blong pem wan ful taeting, olsem pem ol samting we yumi nidim o wantem fastaem mo afta pem taeting o mekem tingting blong no go long wan misin from se yumi laekem tumas ol samting blong wol ia.)

- Taem Jisas i kam kolosap long en blong toktok blong Hem, wanem nao Hem i bin tijim long saed blong fasin blong go insaed long kingdom blong heven? (Luk long Matiu 7:13–14, 21–23.) Olsem wanem nao yumi save luk gud se rod we i go long laef we i no save finis i smol nomo, be rod i go long ples we i rabis evriwan i bigwan?
- Long en blong Toktok blong Hem Antap long Hil, Jisas i bin talemaot parabol blong waes man mo man we i no gat hed (Matiu 7:24–27). Olsem wanem yumi save yusum parabol ia long yumi? Wanem hem i “ston” we yumi mas bildim yumi long hem? (Luk long Hileman 5:12.) Wanem sam samting we ol pipol oli stap bildim laef blong olgeta long hem we yumi save komperem wetem sanbij?
Bae yu save mekem ol memba blong klas oli singsing long “The Wise Man and the Foolish Man” (*Children’s Songbook*, 281).

Las Toktok

Testefae long olsem wanem hem i impoten tumas blong folem Jisas Kraes. Leftemap tingting blong ol memba blong klas blong lukluk long wanem samting we oli nidim blong mekem blong oli kam ol moa gud disaepol blong Kraes.

Sam Nara Aedia Blong Tij

Ol nara tul ia oli kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. “From samting ya, bambae yufala i save makem ol man ya long frut blong laef blong olgeta” (Matiu 7:20)

- Jisas i bin wonem ol man blong Hem long ol giaman profet—ol pipol we oli tijim ol giaman doktrin o oli stap traem blong lidim ol pipol i go longwe long Kraes (Matiu 7:15). Olsem wanem yumi save faenem huia wan tru o giaman profet? (Luk long Matiu 7:16–20; luk tu long Moronae 7:5, 10–11.) Olsem wanem yumi save yusum Matiu 7:20 long yumiwan i semmak olsem ol profet?

2. Vidio presentesen

Nambatu pat blong “New Testament Customs,” wan seleksen blong *New Testament Video Presentations* (53914), i stap eksplenem olsem wanem ol man Jiu oli bin stap yusum ol smol paos mo ol tassel. Sapos yu soem pat ia, tokbaot olsem wanem ol samting ia, we oli yusum fastaem blong soem respek long God, i kam olsem sam blong ol samting we ol Farisi oli wantem blong “man i save luk olgeta” taem oli stap wosip (Matiu 6:5).

3. Faenem doti long ae blong yuwan

Serem stori ia abaot olsem wanem Profet Josef Smit i bin tijim wan sista blong lukluk long doti insaed long ae blong hemwan taem hem i stap lukluk long ol rong blong wanwan man:

Wan woman i harem nogud nao i go luk Profet Josef Smit. Hem i harem nogud long sam samting we wan nara memba blong Jos i bin talemaot abaot hem. Profet i bin talem long hem se sapos wanem we man ia i talem i no tru nao, hem i mas lego toktok ia, from se trutok bae i laef be ol giaman toktok bae i go lus. Woman ia i tingting se ol toktok ia oli no tru, be hem i no glad blong lego toktok ia i go olsem. Nao Profet i bin talemaot wei blong hem blong lukluk long ol toktok olsem:

“Taem wan enemi i tokbaot plante rabis stori abaot mi, we plante taem i bin hapen, bifo hem i jajem man ia, hem i stop smol mo i mekem tingting blong hem i go bak long taem mo ples we stori ia i stap tokbaot blong luk sapos i no gat wan toktok o fasin we i putum ston i stap blong stori i kam antap long hem. Sapos hem i faenem se hem i bin mekem olsem, hem i talem se long hat blong hem, hem i bin fogivim enemi blong hem, mo hem i talem tangkyu long wan woning we i kam long hem, long wan ples we hem i no strong long hem be hem i no bin save.”

Profet i bin talem long sista se bae hem i tingting gud se hem i bin givim man ia wan tingting blong hem i sakem ol toktok olsem, be yet hem i no save o no gat. Afta we hem i tingting plante, woman ia i mekem tingting blong hem se yes, ating hem i bin givim sam toktok, mo hem i talem tangkyu long profet mo hem i go. (Luk long Jesse W. Crosby, we i stap long Hyrum L. Andrus and Helen Mae Andrus, comps., *They Knew the Prophet* [1974], 144.)

4. Aktiviti blong ol yut

Raetem wanwan blong ol sentens long Matiu 6 mo 7 long wan speret kad:

Yu mas mekem, olsem we lef han blong yu We raet han blong yu i mekem (6:3)	i no save samting (6:3)
Nao Papa ya blong yu we i save luk ol samting we yu mekem we man i no save luk (6:6)	Hem bambae i givim pei long yu from (6:6)
I no gud yufala i stap talem (6:7) Fogivim ol man (6:14)	Plante toktok (6:7) We oli stap mekem nogud long yufala (6:14)
Yufala i mas hivimap blong yufala (6:20)	Ol gudgudfala samting long heven (6:20)
I no gat man i save wok blong (6:24) Fastaem yufala i mas lukaot gud blong obei (6:33)	God mo mane (6:24) God we i King (6:33)
Fastaem yu mas tekemaot bigfala wud ia (7:5)	We i stap long ae blong yu (7:5)
Askem (7:7) Lukaot (7:7)	Nao bambae yufala i save kasem (7:7) Nao bambae yufala i save faenem (7:7)
Yufala i mas lukaot (7:15) Yufala i save makem ol man ya (7:20)	Long ol giaman profet (7:15) Long ol frut blong laef blong olgeta (7:20)

Putum ol kad antap long tebol mo tanem olgeta. Serem ol memba blong klas long tu tim, mo mekem olgeta oli tekem wanwan taem blong jusum tu kad. Sapos tufala kad i go tugeta, tim i karemaot olgeta long tebol mo i plei bakegen. Sapos tufala kad i no go tugeta, putum olgeta olsem we oli bin stap fastaem, mo nara tim i plei. Gohed olsem kasem taem oli faenem evri kad we oli go tugeta.

“Yufala i Mas Putum Yok Blong Mi Long Solda Blong Yufala. . . . Mo Yufala i Mas Lan Long Mi”

Lesen
10

Matiu 11:28–30; 12:1–13; Luk 7:36–50; 13:10–17

Stamba Tingting Blong helpem ol memba blong klas blong andastanem se taem yumi tekem yok blong Sevya long solda blong yumi mo mekem wanem we Hem i wantem, bae yumi save faenem pis mo glad we Hem i bin promesem long yumi.

- Rere long Lesen**
1. Ridim, tingting hevi mo prea abaot ol skripja ia:
 - a. Matiu 11:28–30. Jisas i invaetem yumi evriwan we i stap hadwok mo karem ol hevi samting, blong yumi putum yok blong Hem long solda blong yumi, mo lan long Hem.
 - b. Matiu 12:1–13; Luk 13:10–17. Jisas i talemaot we Hem i Lod blong Sabat mo oli tokbaot nogud Hem from toktok ia.
 - c. Luk 7:36–50. Wan woman we i wantem Lod blong i fogivim hem, i wasem ol leg blong Lod; Saemon man Farisi ia i toktok agensem Jisas from Hem i letem woman ia we i gat sin i tajem Hem. Jisas i tijim Saemon long parabol blong tufala man we i gat kaon mo i fogivim woman ia.
 2. Sam moa riding: Aesea 58:13–14; Matiu 11:16–19; 12:14–50; 26:6–13; Mak 2:23–3:12; 14:3–9; Luk 6:1–11; Doctrine and Covenants 59:9–19.
 3. Sapos ol tul ia oli stap, yusum olgeta long taem blong lesen:
 - a. “Come unto Me,” wan smol pat blong seven minit we i kamaot long *New Testament Video Presentations* (53914).
 - b. Pikja ia Mary Fielding mo Joseph F. Smith i Wokbaot Krosem ol Hil (62608; Gospel Art Pikja Kit 412), we i stap soem tufala buluk we oli putum samting long solda blong olgeta.
 4. Wan tingting blong tij: Taem yu stap rere long wanwan lesen, wetem prea, lukluk gud olsem wanem blong leftemap tingting blong wanwan memba blong klas blong tekem pat long lesen. Fasin blong yusum samting long lesen, ol smol grup blong toktok raon long wan topik, mekem rol plei, mo ol nara aktiviti we oli stret i save helpem klas blong oli tekem pat moa long klas. (Luk long *Teaching—No Greater Call*, 133, 135, 141–42, 143–44.)
-

Wan Tingting blong Lesen

**Aktiviti blong
Pulum Tingting**

Olsem we i stret, yusum aktiviti ia o wan aktiviti blong yuwan blong statem lesen. Askem wan memba blong klas blong kam long fored blong klas mo putum ol han blong hem i stret long fored blong hem. Putum sam buk o sam nara hevi samting long ol han blong hem. Gohed blong putum ol samting antap long ol han blong memba ia kasem taem hem i harem ol samting ia oli hevi tumas long hem. Nao askem:

- Hamas taem moa yu save tekem ol hevi samting ia bifo yu save stop blong spel? Wanem samting bae yu mas mekem blong yu save tekem ol hevi samting ia i go longtaem o longwe moa?

Eksplenem se i gat plante kaen hevi samting. Sam long saed blong bodi, be tu i gat ol narawan long saed blong spirit o long saed blong filing we i no isi blong man i luk. Plante hevi samting we man i no save luk i save bitim paoa blong yumi blong yumi tekem ol samting ia yumiwan, mo afta yumi taed tumas. Lesen ia i tokbaot olsem wanem Lod i save mekem ol hevi samting ia oli kam laet mo i mekem yumi save spel.

Yusum mo Toktok
Raon long Skripja

Taem yu stap tijim ol skripja ia, tokbaot olsem wanem blong yusum olgeta long laef evri dei. Leftemap tingting blong ol memba blong klas blong serem ol eksperiens we i go wetem ol prinsipol blong skripja.

1. Jisas i stap invaetem yumi blong yumi putum yok blong Hem long solda blong yumi mo yumi lan long Hem.

Ridim mo toktok raon long Matiu 11:28–30.

- Hem i minim wanem blong “yumi hadwok mo yumi tekem ol hevi samting”? (Matiu 11:28). Wanem sam long ol eksampol blong hevi samting we yumi stap tekem long laef ia? Olsem wanem Lod i save “mekem [yumi] spel gud” long ol hevi samting ia?
- Wanem hem i wan yok? (Soem pikja blong Mary Fielding mo Joseph F. Smith mo poenemaot ol buluk ia wetem yok antap long olgeta. Eksplenem se wan yok i wan frem o aean we oli save putum long wan o tu animol we oli stap pulum ol hevi samting. Yok ia i stap skelem ol hevi samting ia mo i mekem i isi moa blong pulum. Mo tu mining blong hem i stret nomo; tingting ia blong yok i stap kamaot long plante skripja olsem wan pikja blong tokbaot taem man i fas o i stap olsem slev; luk long Jeremaea 28:2; Alma 44:2.) Hem i minim wanem blong tekem yok blong Kraes antap long solda blong yumi? (Wetem tingting we i stap daon, blong yumi mekem wanem we Hem i wantem mo letem Hem i lidim o stiarem laef blong yumi.)

Sapos yu stap yusum vidio presentesen ia “Come unto Me,” soem fas pat blong hem naoia. Stopem vidio taem Presiden Howard W. Hunter i finis blong toktok.

- Lod i talemaot, “Yok ya we mi bambae mi putum long yufala, wok blong hem i isi nomo, mo ol samting we bambae mi givim long yufala blong yufala i karem, oli no hevi” (Matiu 11:30). Long wanem wei nao yok blong Sevyia i no hevi? From wanem sam pipol oli ting se tijing blong Lod oli strong tumas? Olsem wanem taem yumi stap obei mo stap sevem Lod i mekem ol hevi samting oli nomo hevi?

2. Jisas i talemaot se Hem i Masta blong Sabat dei.

Toktok raon long Matiu 12:1–13 mo Luk 13:10–17. Invaetem ol memba blong klas blong ridim laod ol ves we oli jusum.

- Wanem ol Farisi oli mekem taem oli luk ol disaepol blong Jisas oli pikimap kon long Sabat dei? (Luk long Matiu 12:1–2. Eksplenem se olsem wanem ol Farisi oli lukluk long loa blong Moses i mekem se oli no bin wantem save long tru spirit mo stamba tingting blong Sabat be oli stap lukluk long ol kastom we i

stap stopem ol aktiviti blong Sabat dei.) Wanem nao Lod i bin tijim taem Hem i ansa long ol toktok blong olgeta? (Luk long Matiu 12:3–8.)

- Wanem nao Jisas i minim taem Hem i bin talem, “Mi mi no wantem fasin ya we man i stap kilim ol animol blong mekem sakrifas long mi, mi mi wantem we oltaem man i gat sore long man”? (Matiu 12:7. Hem i bin wantem ol pipol blong oli lukluk moa blong oli lavem ol naraman, be i no blong oli mekem ol pablik seremoni blong rilijen nomo.) Olsem wanem yumi save yusum prinsipol ia blong lidim ol aktiviti blong yumi long Sabat?
- Wanem Jisas i stap tijim abaot stamba tingting blong Sabat dei taem Hem i bin hilim man ia we han blong hem i nogud mo woman ia we baksaed blong hem i kruked i kam gud bakegen? (Luk long Matiu 12:10–13; Luk 13:10–17.) Wanem Hem i tijim abaot Sabat long Mak 2:27–28? (Poenemaot se Joseph Smith Translation blong Mark 2:26 i eksplenem se Sabat oli bin givim olsem wan “dei blong spel” mo wan dei blong “givim glori long God.”) Wanem yumi save mekem long Sabat dei blong yumi givim glori long God? Olsem wanem taem yumi stap kipim Sabat dei i tabu i stap mekem ol hevi samting i kam laet mo i givim gud spel long yumi?

3. Jisas i stap fogivim wan woman insaed long haos blong Saemon, man Farisi.

Sapos yu stap yusum vidio presentesen ia “Come unto Me,” soem haf blong hem naoia. Afta ridim mo toktok raon long ol ves we oli jusum long Luk 7:36–50.

- Woman ia we i go insaed long haos blong Saemon, man Farisi i bin tekem wetem hem wan hevi wari blong sin (Luk 7:37). Wanem woman ia i mekem we i mekem se Jisas i tekemaot hevi wari ia long hem? (Luk long Luk 7:38, 44–50.) Wanem samting bae yumi save mekem blong Sevyia i save tekemaot hevi wari blong sin long ol laef blong yumi?
- Olsem wanem woman ia we i sin mo Saemon, man Farisi oli gat ol defren fasin long Jisas? (Soemaot gud fasin blong sakem sin, respek, tingting we i stap daon mo lav blong woman, long wan saed, mo hae tingting, fasin blong no gat respek mo fasin blong jajem man we Saemon i gat, long narasaed. Luk tu long toktok ia we i stap daon.) From wanem ol kwaliti we woman ia i gat i impoten tumas taem yumi stap sakem sin o lukaot blong kasem fogivnes? Olsem wanem ol kwaliti we Saemon i gat i stap holem taet yumi blong yumi sakem sin?

Elda James E. Talmage i bin tijim: “Hem i wan kastom long taem ia blong lukaotem gud wan spesel ges wetem spesel fasin; blong welkamem hem wetem wan kis blong welkam, blong givim wota blong hem i wasem das long leg blong hem, mo oel blong anoentem hea blong hed mo mustas. Evri samting ia, Saemon i no bin mekem” (*Jesus the Christ*, 3rd ed. [1916], 261).

- Olsem wanem fasin blong Saemon long woman ia i mekem wari we woman ia i stap tekem i moa hevi? Olsem wanem, yumi, yumi stap mekem wari blong sin blong wan narawan i kam hevi moa? Wanem yumi save lanem long ansa blong Sevyia long woman ia?
- Nating oli no bin invaetem hem mo hem i save se bae Saemon i save mekem nogud hem long haos blong hem, woman ia i kam stret long Kraes stret long taem we hem i save weaples blong faenem Hem (Luk 7:37). Wanem yumi save lanem aot long eksampol blong Hem? Wanem samting i save blokem yumi blong yumi sakem sin mo kam long Kraes? Olsem wanem yumi save winim ol samting ia we i stap blokem yumi?

- Wanem yumi save lanem long parabol blong tufala man we i gat kaon? (Luk long Luk 7:41–50.) Olsem wanem sin i kolosap semmak long kaon? (Luk long Luk 7:44–50.) Olsem wanem taem yumi stap gat kaon long Kraes i mekem ol hevi samting i nomo hevi tumas?

Las Toktok

Testefae se yumi save jusum blong yumi tekem ol hevi samting blong wol o yok blong Jisas long solda blong yumi. Testefae se ol tijing blong Kraes oli tru mo bae yumi save spel gud taem yumi stap folem Hem. Leftemap tingting blong ol memba blong klas blong lanem abaot Kraes mo obei ol tijing blong Hem blong yumi save gat spel mo pis.

Sam Nara Aedia Blong Tij

Ol nara tul ia oli kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Olsem wanem i impoten blong stap wan

Ridim mo toktok raon long Matiu 12:22–30.

- Olsem wanem, samtaem, yumi seraot insaed long ol famle, ol hom, mo ol wod blong yumi? Wanem yumi save mekem blong yumi kam wan?
- Jisas i bin talem long ol Farisi, “Man we i no biae long mi, hem i agens long mi” (Matiu 12:30). From wanem i olsem?

2. “Ol toktok olbaot” (Matiu 12:36)

Ridim mo toktok raon long Matiu 12:33–37.

- Ol toktok we yumi stap talemaot oli stap talem wanem abaot yumi? From wanem Jisas i talem se ol toktok we yumi talem oli impoten tumas? Wanem sam toktok we oli “ol toktok olbaot”? (Ol ansa i save tekem ol ansa olsem toktok nogud, gosip, giaman toktok, toktok strong.) Olsem wanem yumi save mekem tingting blong yumi i strong blong yumi toktok long ol gudfala fasin nomo?

3. Aktiviti blong ol yut

Mekem rere wan pis pepa wetem pazol ia i stap long hem blong wanwan memba blong klas. Afta we yu ridim mo toktok raon long ol riding we yu bin givim, seremaot ol kopi blong pazol ia. Askem ol memba blong klas blong lukaotem ol toktok we i go wetem lesen we oli haed i stap long pazol ia. Ol toktok ia oli save ridim olgeta antap i kam daon, o long sem laen o i slip long saed. Sapos sam memba blong klas oli nidim help afta sam minit, mekem olgeta oli ridim bakegen ol ves we i gat ol toktok ia we oli haed i stap. (Matiu 11:28--30: hadwok, hevi samting, yok; Matiu 12:1--13: Sabat, kam gud; Luk 7:36--50: parabol, man we i gat kaon, fogivim).

H A P R A F O G I V S
M E R A D Y O K J F A
A A V A P A R A B O L
K H N I B K R O N Q H
M A V A S A B A T E A
I D M B O A E A K I O
V W G G R K M D V M Y
I O A M U U D T X O R
G K R Y O D M N I E J
O A M A N W E I P N L
F A G A T K A O N F G

“Hem i Stap Talem Plante Samting long Olgeta long Parabol”

Matiu 13

Stamba Tingting Blong helpem ol memba blong klas blong divelopem “ol sora blong lisiin” blong mekem se oli andastanem olsem wanem oli save yusum ol parabol blong Jisas (Matiu 13:9).

-
- Rere long Lesen**
1. Ridim, tingting hevi mo prea abaot ol skripja ia:
 - a. Matiu 13:1–17. Jisas i presentem parabol blong man blong planem sid mo i eksplenem olsem wanem Hem i stap yusum ol parabol.
 - b. Matiu 13:18–23. Jisas i eksplenem parabol blong man blong planem sid.
 - c. Matiu 13:24–53. Jisas i stap tij abaot kingdom blong heven long wol (Jos blong Jisas Kraes) tru long ol parabol blong wit mo rabis gras, sid we i smol tumas, blong is, blong bokis mane we i stap long wan pis graon, blong ston ia perel, mo blong net.
 2. Sam moa riding: Mak 4:1–34; Luk 8:4–18; 13:18–21; Doctrine and Covenants 86:1–7; Bible Dictionary, “Gospels, Harmony of,” 689; “Parables,”; mo “Kingdom of Heaven or Kingdom of God,” 721.
 3. Wan tingting blong tij: Elda Boyd K. Packer i bin talem: “I no gat ol tul blong help blong tij we i bitim o i semmak long blakbod. . . . Yu save yusum blakbod blong mekem ol ae blong ol studen blong yu oli lukluk nomo long hem taem yu stap tijim lesen long ol toktok. Taem yu stap toktok, yu save putum inaf toktok long blakbod blong pulum tingting blong olgeta mo mekem tingting blong olgeta i lukluk long wan ples nomo mo givim olgeta sam aedia, be i no semmak olsem pikja we bae oli lukluk mo tekemaot tingting blong olgeta mo pikja ia bae i pulum moa intres bitim lesen blong yu.” (*Teach Ye Diligently* [1975], 224–25; luk tu long *Teaching—No Greater Call*, [36123], pages 151–53).

Wan Tingting blong Lesen

Aktiviti blong Pulum Tingting

Olsem we i stret yusum aktiviti ia o wan aktiviti blong yuwan blong statem lesen. Invaetem ol memba blong klas blong oli tingting we oli stap ron long wan bas. Taem oli stap ron i go, oli stap lukluk tru long ol windo blong bas mo lukluk ples.

- Afta we oli stap ron olsem long sem bas, bae oli luk ol sem samting olsem ol nara pasenja? From wanem yes mo from wanem no?

Poenemaot se ol pipol we oli stap long wan sem ples, oli no stap lukluk ol sem samting. Mo i semmak, i no evri pipol we oli bin harem Jisas i tij long ol parabol oli andastanem olsem wanem bae oli yusum ol parabol ia. Lesen ia bae i tokbaot olsem wanem yumi save andastanem mo yusum ol parabol blong Jisas.

Taem yufala i stap toktok raon long ol parabol ia, mekem sua se ol memba blong klas oli save ol huia ol defren samting mo aksen oli representem. Hemia bae i helpem olgeta blong oli andastanem ol parabol mo yusum olgeta long laef blong olgeta.

1. Jisas i presentem parabol blong man blong planem sid mo i eksplenem olsem wanem Hem i yusum parabol.

Ridim mo toktok raon long Matiu 13:1–17.

- Taem ol grup blong pipol oli kam wanples long so, Jisas “i stap talem plante samting long olgeta long parabol” (Matiu 13:3). Wanem hem i wan parabol? (Wan stori we oli yusum ol saen we oli stap tijim ol trutok blong gospel mo komperem olgeta long ol samting blong wol.) Wanem Jisas i talem olsem stamba tingting blong Hem blong tij wetem ol parabol? (Blong tij wantaem long mesej blong Hem long ol disaepol mo semtaem haedem mesej ia long olgeta we oli no bilif. Luk long Matiu 13:10–13; lukluk tu long Joseph Smith Translation blong Matthew 13:12 long futnot 12a.)

Askem wan memba blong klas blong ridim laod parabol blong man blong planem sid. (Matiu 13:3–8). Invaetem ol nara memba blong klas blong ridim folem, mo tingbaot ol samting mo ol aksen insaed long parabol we i representem ol trutok blong gospel.

- Wanem i stap mekem sid we i foldaon long saed blong rod blong hem i no gro? (Luk long Matiu 13:4. Raetem long blakbod *Ol sid long saed rod—pijin i kakae.*)
- From wanem ol sid we oli foldaon long graon we i gat ston oli go drae? (Luk long Matiu 13:5–6; Luk 8:6. Raetem long blakbod *Ol sid long graon we i gat ston—mo gat rus.*)
- Wanem i hapen taem sam sid oli foldaon long ol ropnil? (Luk long Matiu 13:7. Raetem long blakbod *Ol sid long ropnil—ropnil i kavremap olgeta.*)
- Wanem i hapen long ol sid we oli bin foldaon long gudfala graon? (Luk long Matiu 13:8. Raetem long blakbod *Ol sid long gudfala graon—oli gat frut blong olgeta.*)

Lego ol toktok we yu bin raetem long blakbod, mo eksplenem se long smol taem bae yu toktok raon long ol trutok we oli stap representem.

- Olsem wanem ol pipol oli save mekem taem oli harem parabol ia be oli no eksplenem mining blong hem? (Sam pipol oli save kam kros from se oli no andastanem. Ol narawan, ating oli andastanem be oli ting se i no blong olgeta oli yusum. Ol narawan bakegen, oli save tingting hevi long hem mo askem ol kwestin kasem taem oli andastanem mo oli save olsem wanem blong yusum long laef blong olgeta.)
- Wanem invitesen Jisas i stap sendem afta we Hem i presentem parabol blong man we i planem sid? (Luk long Matiu 13:9.) Long tingting blong yu, yu ting se toktok ia *lisin* i minim wanem long invitesen blong hem? Hem i minim wanem blong lukluk be no luksave mo blong lisin be no harem mo haremsave? (Luk long Matiu 13:13–15.)

Profet Josef Smit i bin talem: “ol pipol . . . oli no bin kasem toktok blong Hem . . . from se oli no bin wantem blong luk wetem ol ae blong olgeta, mo harem wetem ol sora blong olgeta; i no from se oli no bin save mekem olsem, mo oli no bin gat janis blong luk mo harem, be from se hat blong olgeta i fulap long rabis tingting mo rabis filing. . . . Stret tingting from wanem ol pipol . . . oli no bin kasem wan eksplenesen long ol parabol blong Hem, i from se oli no bin bilif” (*Teachings of the Prophet Joseph Smith*, sel. Joseph Fielding Smith [1976], 96–97).

2. Jisas i stap eksplenem parabol blong man we i planem sid.

Ridim Matiu 13:18–23, mo toktok raon long mining blong ol samting mo ol aksen insaed long parabol blong man blong planem sid.

Sid

- Insaed long parabol blong man blong planem sid, wanem nao sid i representem? (Luk long Matiu 13:19; Luk 8:11. Raetem long blakbod *Sid = toktok blong God.*)

Saedrod

- Saedrod i representem wanem? (Luk long Matiu 13:19.) Raetem long blakbod *Saedrod = pipol we oli harem toktok blong God be oli no andastanem* (yu save katem sot toktok ia sapos yu wantem).
- Wanem sam long ol samting we yumi save mekem we i save mekem se yumi no save andastanem ol toktok blong God? (Luk long Mosaea 26:1–3 blong gat wan ansa we i save stret.) Wanem yumi mas mekem blong save andastanem toktok blong God? (Luk long Alma 32:27.) Olsem wanem taem man i no andastanem gud wan toktok i mekem i isi moa long Setan blong tekemaot toktok blong God long ol hat blong yumi? (Luk long Matiu 13:19.)

Ol Ples we i Gat Ston

- Wanem ol ples we i gat ston i stap representem? (Luk long Matiu 13:20–21.) Raetem long blakbod *Ol ples we i gat stong = pipol we oli harem mo kasem toktok blong God be oli no letem blong rus blong hem i stap strong long hat blong olgeta* (katem sot toktok sapos yu wantem).
- From wanem sam pipol oli no stap letem toktok blong God i tekem rus insaed long hat blong olgeta? (Luk long Matiu 13:21; Mak 4:5.) Olsem wanem yumi save letem toktok blong God i gat ol strong rus insaed long ol hat blong yumi? (Luk long Alma 32:41–43.) Olsem wanem samting ia bae i helpem yumi blong yumi stanap strong agensem ol hadtaem, ol toktok agensem yumi, mo ol rabis toktok?

Ol Ples blong Ston

- Wanem nao ol ples blong ston i representem? (Luk long Matiu 13:22; Mak 4:19; Luk 8:14.) Raetem long blakbod *Ol ples blong ston = pipol we oli harem toktok blong God be ol samting blong wol i pulum tingting blong olgeta.* (katem sot toktok ia sapos yu wantem).
- Hem i minim wanem blong wan man i no tekem frut? Wanem “ropnil” i mekem ol pipol oli no tekem frut? (Luk long Matiu 13:22; Mak 4:19; Luk 8:14.) Olsem wanem ol samting ia oli mekem man i luksave samting ia? Wanem yumi save mekem blong blokem ol ropnil ia blong kavremap toktok blong God, long dei blong yumi tedei?

Gudfala Graon

- Gudfala graon i representem wanem? (Luk long Matiu 13:23.) Raetem *Gudfala graon* = *pipol we oli harem tok blong God, oli andastanem mo mekem ol stret mo gud wok* (katem sot toktok ia sapos yu wantem) long blakbod.
- Wanem oli save mekem blong helpem ol eria we i no tekem frut blong hem? (Oli save tanem mo givim sam moa gud samting long graon ia, oli tekemaot ol ston long hem, mo oli rutumaot ol ropnil.) Olsem wanem yumi save yusum hemia long ol hadwok blong yumi blong save kasem moa ol tok blong God?
- From wanem parabol ia i lukluk moa long graon bitim man we i planem sid?

3. Jisas i yusum ol parabol blong tij abaot kingdom blong heven long wol ia (Jos blong Jisas Kraes).

Ridim mo toktok raon long ol skripja we yu jusum long Matiu 13:24–53. Eksplenem se long ol ves ia toktok ia “niufala wol ya we hem i king long hem” i stap tokbaot Jos blong Jisas Kraes, we hem i kingdom blong heven long wol ia (Bible Dictionary, “Kingdom of Heaven or Kingdom of God,” 721).

- Wanem hem i mining blong parabol blong gudfala sid mo rabis gras? (Luk long Matiu 13:24–30, 36–43; D&C 86:1–7. Bae yu save mekem wan list long blakbod i semmak olsem we yu bin mekem wetem parabol blong man blong planem sid. Listim huia o wanem i representem man blong planem sid, graon, gudfala sid, rabis gras, enemi, taem blong tekem kakae mo ol man blong tekem kakae.)
- Long parabol blong gudfala sid mo rabis gras, from wanem man blong planem sid i no wantem letem ol wokman blong hem i putum tugeta ol rabis gras kwiktaem? (Luk long Matiu 13:27–30; luk tu long D&C 86:5–7, we i kliarem Matiu 13:30.)
- Profet Josef Smit i bin tijim se ol parabol blong smol sid mo is, i stap tokbaot Jos blong Jisas Kraes blong Ol Lata-dei Sent (*Teachings of the Prophet Joseph Smith*, sel. Joseph Fielding Smith [1976], 98–100). Wanem yumi save lanem abaot Jos ia we Sevyia i putumbak komperem long smol sid ia? (Luk long Matiu 13:31–32.) Mo komperem long is ia? (Luk long Matiu 13:33. Eksplenem se *is* hem i wan samting we i stap mekem bred i swolap.) Olsem wanem yu bin luk wok blong God i kam antap moa olsem we ol parabol ia oli stap tokbaot?
- Wanem yumi save lanem long parabol blong bokis mane mo ston ya perel? (Luk long Matiu 13:44–46.) Wanem sakrifas bae yumi i mas wantem mekem blong yumi save kasem bokis mane blong gospel? Wanem sakrifas yu bin mekem o sam we yu save long olgeta oli bin mekem from gospel? Wanem blessing i bin kamaot long ol sakrifas ia?
- Wanem nao net i representem long parabol blong net we oli sakem i go long solwota? (Luk long Matiu 13:47.) Hem i minim wanem blong kam wanples insaed long net? Wanem aksen ia, blong putum ol gudfala fis long wan ples mo sakemaot ol nogud fis, i stap minim? (Luk long Matiu 13:48–50. Bae yu save yusum Joseph Smith—Mathew 1:4 blong eksplenem se “en blong wol” long ves 49 i stap tokbaot taem bae oli prapa spolem ol rabis man.) Wanem yumi save mekem blong yumi stap fetful insaed long Jos mo helpem ol narawan blong mekem sem samting?

Poenemaot se Jisas i eksplenem ol parabol blong Hem long olgeta we oli stap lukaot blong andastanem olgeta. Testefae se taem yumi stadi long ol parabol blong Jisas wetem wan stret tingting blong wantem andastanem, bae yumi luk olsem wanem yumi save yusum olgeta long dei blong yumi tedei.

**Sam Nara Aedia
Blong Tij**

Ol nara tul ia oli kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Vidio presentesen

Sapos vidiokaset ia *The Savior: His Ministry* (53164) i stap, bae yu save soem wan smol pat blong pat 3, "The Mustard Seed."

2. Ol lesen we yu yusum wan samting

Blong helpem ol memba blong klas blong andastanem mo tingbaot ol parabol insaed long lesen, soemaot sam long ol samting we oli stap tokbaot insaed. Eksampol, yu save soem olsem wanem is i stap mekem wok blong hem taem yu miksim wetem wota mo suga. Yu save bekem wan bred wetem is mo wan we i no gat is long hem, mo letem ol memba blong klas oli lukluk mo oli testem wanem i defren. Yu save soem tu wan smol sid (o pepa we oli no graonem yet, we i luk olsem wan blak smol sid). Luk long *Teaching—No Greater Call*, ol pej 94–95, blong kasem sam tingting blong tij wetem ol samting.

“Mi Nao Mi Olsem Kakae we i Save Givim Laef”

Lesen
12

Jon 5–6; Mak 6:30–44; Matiu 14:22–33


Stamba Tingting Blong helpem ol memba blong klas blong lukluk long Jisas Kraes olsem “kakae we i save givim laef,” stamba blong laef we i no save finis (Jon 6:47–48).

- Rere long Lesen**
1. Ridim, tingting hevi mo prea abaot ol skripja ia:
 - a. Jon 5. Jisas i hilim wan man long Sabat. Ol Jiu lida oli stap lukaot blong kilim Jisas from se Hem i talemaot we Hem i Pikinini blong God.
 - b. Jon 6:1–14; Mak 6:30–44. Jisas i fidim bitim 5,000 pipol long wan merikol.
 - c. Jon 6:15–21; Matiu 14:22–33. Jisas i wokbaot antap long solwota, i invaetem Pita blong go long hem, mo i mekem ol win i go daon.
 - d. Jon 6:22–71. Jisas i talemaot se Hem i “kakae we i save givim laef” mo olgeta we oli bilif long Hem bae oli gat laef we i no save finis. Plante oli sakemaot toktok blong Hem, be Pita mo ol nara Aposol oli stap nomo wetem Jisas.
 2. Sam moa riding: Matiu 14:1–21; Mak 6:1–29, 45–52; Luk 9:10–17.
 3. Askem wan memba blong klas blong hem i rere blong kam long klas mo serem long sot toktok nomo stori blong Jisas we i hilim wan man long pul blong wota long Betsata (Jon 5:1–9).
 4. Sapos ol pikja ia, Stap Fidim Ol Faef Taosen Man (62143) mo Kraes i stap Wokbaot Antap long Wota (Gospel Art Pikja Kit 243) oli stap, yusum olgeta long taem blong lesen.
 5. Wan tingting blong tij: Sevyta, plante taem, i yusum ol tul blong evri dei, olsem bred o sid, blong tijim ol gospel prinsipol. Taem yu stap rere long wanwan lesen, lukluk olsem wanem yu save yusum ol samting ia blong pulum tingting blong ol memba blong klas o blong soem wan impoten poen long wan pikja. (Luk long *Teaching—No Greater Call*, 94–95.)

Wan Tingting blong Lesen

Aktiviti blong Pulum Tingting

Olsem we i stret, yusum aktiviti ia o wan aktiviti blong yuwan blong statem lesen. Droem ol pikja ia long blakbod:



- Wanem samting i semmak long ol samting ia?

Letem ol memba blong klas blong toktok raon smol long sam ansa long kwestin blong yu. Nao mekem olgeta oli ridim Hileman 5:12, we long ples ia, Hileman i tokbaot Jisas Kraes olsem “ston,” mo Jon 8:12, we Jisas i talemaot se Hem i “laet blong ol man long wol.” Eksplenem se samtaem long taem blong lesen, bae yu tokbaot olsem wanem Jisas i “kaka we i save givim laef” (Jon 6:35).

Yusum mo Toktok
Raon long Skripja

Taem yu stap tijim lesen ia, helpem ol memba blong klas blong “lukluk gud long ol tok blong Baebol” (Jon 5:39). Leftemap tingting blong olgeta blong oli serem ol eksperiens blong olgeta long saed blong ol prinsipol we oli toktok raon long olgeta.

1. Jisas i hilim wan man long Sabat mo i talemaot se Hem i Pikinini blong God.

Toktok raon long Jon 5. Invaetem ol memba blong klas blong ridim laod ol ves we yu bin jusum.

- Invaetem memba blong klas we yu bin jusum hem blong talem long sot toktok stori blong Jisas we i hilim wan man long pul blong Betsata (Jon 5:1–9). Wanem toksave Jisas i bin givim long man ia taem Hem i luk hem insaed long tempol long dei ia? (Luk long Jon 5:14.) From wanem ol samting we sin i mekem i “nogud moa” bitim taem wan pat blong bodi i nogud?
- From wanem ol lida blong Jiu oli stap lukaot blong kilim ded Jisas? (Luk long Jon 5:16–18.) Taem Jisas i stap ansa long ol man Jiu we oli kros tumas, wanem nao Hem i talemaot abaot rilesensip blong Hem wetem Papa blong Hem? (Luk long Jon 5:19–23, 30.)
- Jisas i bin talemaot long ol man se i no longtaem bae Hem i mekem “ol samting we i bigwan moa” bitim hemia blong hilim ol sikman (Jon 5:20). Wanem samting Hem i talem se bae Hem i mekem i bigwan moa? (Luk long Jon 5:21–29. Bae Hem i mekem i posibol blong man i Laef Bakegen long Ded, bae Hem i jajem ol man, mo bae Hem i givim laef we i no save finis long olgeta we oli stap tru oltaem.)
- Huia ol witness we Jisas i talem se oli bin testefae abaot Hem? (Luk long Jon 5:32–39, 45–47.) From wanem hem i impoten blong gat ol witnes ia? (Luk long Jekob 4:6.) Olsem wanem bae yumi save stap olsem ol witness blong Sevyas?
- Jisas i bin givim jalenj long ol lida blong ol Jiu blong “lukluk gud long ol tok blong Baebol” (Jon 5:39). Wanem i defren taem wan i luklukgud long ol tok blong Baebol mo taem wan i ridim ol tok ia? (Bae yu save yusum fas tingting blong tij we oli ademap long en blong lesen taem yufala i stap toktok raon long kwestin ia.) Olsem wanem yu bin mekem skripja stadi blong yuwan mo wetem famle i gat moa mining? Olsem wanem, taem yu bin lukluk gud long ol skripja i bin blesem yu?
- Folem Jon 5:39, wanem nao bae ol lida blong Jiu bae oli save sapos oli bin luklukgud mo bilif long ol skripja? (Bae oli save se ol skripja oli stap testefae abaot Jisas Kraes. Luk tu long Jon 5:40, 46–47.) Olsem wanem ol skripja i bin mekem fet blong yu long Kraes i kam strong moa?

2. Jisas i fidim bitim 5,000 pipol long wan merikol.

Ridim mo toktok raon long ol skripja we yu jusum long Jon 6:1–14 mo Mak 6:30–44. Soem pikja blong Jisas we i stap fidim ol man.

- From wanem Jisas mo ol disaepol blong Hem oli bin go antap long wan hil? (Luk long Jon 6:1–3; lukluk tu long Joseph Smith Translation blong Mark 6:31 long futnot 31a, we i talem se Jisas mo ol disaepol blong Hem oli bin go long wan ples we oli save stap olgetawan.) Olsem wanem Jisas i ansa long bigfala grup blong ol man we oli stap kam long Hem? (Luk long Mak 6:33–34; Matiu 14:14.) Olsem wanem yumi save folem eksampol blong Hem blong lav mo sore?
- Olsem wanem Jisas i fidim bigfala grup blong ol man ia? (Luk long Jon 6:5–13; luk tu long Matiu 14:21.) Olsem wanem yumi save folem eksampol blong boe ia we i bin givim ol bred mo fis blong hem long Jisas? Olsem wanem Lod i blesem yumi taem yumi, semmak olsem smol boe ia, yumi givim wanem we yumi gat long seves blong Hem?

Elda James E. Faust i bin talem:

“Plante pipol we oli gat ol presen oli semmak nomo long ol faef bred mo tu smol fis, we oli leftemap koling blong olgeta mo oli sev mo tingting nating long wanem oli mekem mo oli no wet se bae man i luksave olgeta, mo oli stap fidim plante taosen man. . . . Olgeta ia oli ol hundred blong taosen lida mo tija insaed long ol okseleri mo prishud kworom, ol hom tija, ol Rilif Sosaeti visiting tija. Olgeta ia oli ol bisop insaed long Jos we oli gat tingting i stap daon, sam long olgeta oli no skul gud be oli kam antap, oli stap lan oltaem, mo oli gat tingting i stap daon mo strong tingting blong sevem Lod mo ol pipol insaed long ol wod blong olgeta. . . .

“Wan bigfala stamba tingting from wanem Jos i gru stat long ol smol stat blong hem kasem paoa blong hem naoia i from olsem wanem milien pipol we oli gat tingting i stap daon mo gat strong tingting, oli gat fet mo oli gat faef bred mo tu fis nomo blong givim long seves blong Masta. Oli lego bigwan ol intres blong olgeta mo taem oli bin mekem olsem, oli bin faenem ‘pis we Hem i givim, we i bigfala moa, i bitim save blong yumi’ (Filipae 4:7)” (insaed long Conference Report, Epr. 1994, 4–5; o *Ensign*, Mei 1994, 5–6).

- Givim sam eksampol blong ol pipol we yu bin luk we Lod i bin leftemap olgeta i kam antap, taem oli bin stap sevem Hem?
- Olsem wanem bigfala merikol kakae ia we i kamaot long faef bred mo tu fis i stap olsem saen blong bigfala kakae blong spirit we Jisas i stap givim long yumi?

3. Jisas i wokbaot antap long solwota, i invaetem Pita blong go long Hem mo i mekem ol win oli go daon.

Ridim mo toktok raon long Jon 6:15–21 mo Matiu 14:22–33. Eksplenem se afta we Jisas i fidim ol grup blong ol man, Hem i givim toktok long ol disaepol blong Hem blong oli go insaed long wan bot mo go long narasaed blong solwota. Afta, Hem i sendem ol man oli gobak mo Hem i go antap long hil blong prea. Taem ol disaepol oli stap krosem solwota, ol strong win i kasem olgeta.

- Olsem wanem ol disaepol oli mekem taem oli luk we Jisas i stap wokbaot antap long wota i go luk olgeta? (Luk long Matiu 14:26; Jon 6:19.) Olsem wanem Jisas i ansa long ol fraet blong olgeta? (Luk long Matiu 14:27; Jon 6:20.)

Soem pikja blong Kraes i stap wokbaot antap long wota.

- Wanem Pita i askem taem hem i harem voes blong Sevya? (Luk long Matiu 14:28–29.) From wanem fet blong Pita i go daon taem hem i stap wokbaot

antap long wota? (Luk long Matiu 14:30.) Olsem wanem yumi stap mekem ol sem mistek nomo taem ol hadtaem i stap kasem yumi?

- Wanem Pita i mekem taem hem i stap stat blong draon? (Luk long Matiu 14:30.) Wanem Jisas i bin mekem? (Luk long Matiu 14:31–32.) Wanem hemia i stap talemaot abaot rilesensip blong yumi wetem Lod? Olsem wanem yu bin filim Sevya i bin mekem yu yu strong mo i bin mekem ol fraet blong yu i bin go daon?

4. Jisas i talemaot se Hem i “kakaē ia we i save givim laef.”

Ridim mo toktok raon long ol skripja we yu jusum long Jon 6:22–71.

- Dei ia afta merikol blong Jisas wetem ol bred mo fis, ol pipol oli bin folem Hem i go long Kapenaum. From wanem oli bin folem Hem? (Luk long Jon 6:26.) Olsem wanem Jisas i yusum intres blong ol pipol long saed blong merikol we i tekem ples long dei bifo, blong testefae abaot misin blong Hem? (Luk long Jon 6:27–35.)

Elda Jeffrey R. Holland i bin lukluk se: “Long taem blong ministri blong Sevya long Galili, Hem i tok strong long olgeta we oli bin harem abaot Hem mo Hem i fidim 5 000 man wetem faef bred mo tu fis, mo naoia oli bin stap ron i kam long Hem blong oli gat wan fri kakaē. Kakaē ia, nating hem i bin impoten, i wan smol samting nomo be i no stret kakaē we Hem i bin stap traem blong givim long olgeta. (Insaed long Conference Report, Okt. 1997, 87; o *Ensign*, Nov. 1997, 65).

- Olsem wanem nao “kakaē we i save givim laef” i wan stret fasin blong tokabaot Sevya mo ol blesing we Hem i wantem givim long yumi? (Luk long Jon 6:35, 47–51.) Hem i minim wanem blong “i no save hanggri bakegen” mo “i no save tosta bakegen”? Olsem wanem yumi save tekem “kakaē we i save givim laef”? (Luk long Jon 6:47, 51–54; Matiu 26:26–28; Alma 5:33–35; D&C 20:77.)

Presiden Howard W. Hunter i bin givim kaonsel ia: “Yumi mas save Kraes bitim we yumi save Hem naoia; yumi mas rimemba Hem bitim we yumi stap rimemba Hem naoia; yumi mas sevem Hem i strong moa bitim we yumi stap sevem Hem naoia. Nao bae yumi save dring long wota ia we i tekem laef we i no save finis mo bae yumi save kakaē long kakaē we i save givim laef” (insaed long Conference Report, Epr. 1994, 84; o *Ensign*, Mei 1994, 64).

Poenemaot se sam pipol oli no bin bilif long Jisas from se oli bin stap luk Hem nomo olsem “pikinini blong Josef” (Jon 6:42). Sam we oli bin klemem se oli ol disaepol blong Jisas oli toktok agensem Hem mo oli tanem bak long Hem, mo oli talem se oli no bin andastanem ol mining blong spirit blong ol toktok blong Hem se Hem i kakaē we i save givim laef mo tijing blong Hem abaot nid blong kakaē long mit blong bodi blong Hem mo blong dring long blad blong Hem (Jon 6:51–66).

- Taem sam pipol i bin sakemaot toktok blong Jisas, wanem Jisas i bin askem long Olgeta Twelef Aposol? (Luk long Jon 6:67.) Wanem hem i ansa blong Pita? (Luk long Jon 6:68.) Wanem Pita mo ol nara Aposol oli andastanem abaot Jisas we olgeta we oli go oli no bin andastanem? (Luk long Jon 6:69.)

Las Toktok

Testefae se Jisas Kraes i “kakaē we i save givim laef” mo Hem i gat “ol tok blong laef ya we i no save finis” (Jon 6:35, 68). Leftemap tingting blong ol memba blong klas blong yusum ol promes blong Hem we Hem i bin givim long Toktok blong Hem long saed blong Kakaē we i Save Givim Laef: “Man we i kam long mi, hem bambae i no save hanggri bakegen. Mo man we i bilif long mi i no save tosta bakegen. . . . Olgeta man ya we oli bilif long mi, oli gat laef ya we i no save finis” (Jon 6:35, 47).

Sam Nara Aedia Blong Tij

Ol nara tul ia oli kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. “Luklukgud long ol Tok blong Baebol” (Jon 5:39)

Invaetem ol memba blong klas blong ridim Jon 5:20–30 olgetawan taem yu yu stap ridim bigwan.

Ridim ves ia kwik nomo, mo no stop blong eksplenem o toktok raon long eni long ol ves ia.

Eksplenem se yu bin *ridim* nomo Jon 5:20–30 be naoia bae yufala i *luklukgud* long ol ves ia tugeta. Serem ol memba blong klas long tri o fo grup. Givim wanwan long ol seksen ia blong ol ves ia Jon 5:20–30 long wanwan grup long fasin ia: ol ves 20–22, 23–24, 25–27, mo 28–30. Givim smol taem long ol grup blong oli wok tugeta.

Mekem olgeta oli ridim ol ves ia we yu bin givim long olgeta, jusum tri long ol impoten toktok insaed long ol ves ia, mo rere blong tokbaot from wanem nao ol toktok ia oli impoten.

- Wanem nao yu bin luk taem yu bin luklukgud long ol skripja we yu no bin luk taem yu bin ridim olgeta kwiktaem? Wanem yumi save mekem blong luklukgud long ol skripja yumiwan?

Eksplenem se Profet Josef Smit i kasem visen blong ol kingdom blong glori afta we hem i tingting hevi long Jon 5:29. Invaetem wan memba blong klas blong ridim Doctrine and Covenants 76:15–20.

- Wanem save yumi bin gat blesing from, from we Josef Smit i bin luklukgud long Jon 5:29?

2. “Lukaotem olgeta we oli stap wet long wota blong Betsata “

Elda Boyd K. Packer i bin yusum stori long Jon 5:1–9 blong talemaot se bae yumi sud helpem ol pipol we oli disebol(handikap). Hem i bin talem se ol bodi mo ol tingting we oli no wok gud “bae oli kam gud evriwan. Be naoia, yumi mas lukaotem olgeta we oli stap wet long wota blong Betsata” (insaed long Conference Report, Epr. 1991, 8; o *Ensign*, Mei 1991, 9).

- Wanem yumi save mekem blong helpem olgeta we bodi mo tingting i no wok gud?

“Bambae Mi Givim long Yu, Ol Ki blong Niufala Wol Ya we God i King long Hem”

Matiu 15:21–17:9

Stamba Tingting Blong mekem ol testimoni blong ol memba blong klas i kam strong long saed blong save blong olgeta se Jisas Hem i Kraes, mo oli putumbak ol prishud ki.

- Rere long Lesen**
1. Ridim, tingting hevi, mo prea abaot ol skripja ia:
 - a. Matiu 15:21–39. Jisas i hilim gel blong wan Jentael woman mo long wan merikol i fidim moa long 4,000 pipol, we plante long olgeta oli ol Jentael.
 - b. Matiu 16:13–19. Pita i testefae se Jisas Hem i Kraes. Jisas i tijim se Jos blong Hem, oli bildim antap long ston blong revelesen mo i promesem blong givim ol ki blong niufala wol ia long Pita.
 - c. Matiu 17:1–9. Jisas i jenisim bodi blong Hem long fored blong Pita, Jemes, mo Jon.
 2. Sam moa riding: Mak 7:24–9:10; Luk 9:18–36; 12:54–57; Bible Dictionary, “Revelation,” 762; “Transfiguration, Mount of,” 786.
 3. Sapos wan map blong Palestaen insaed long Niu Testeman i stap (map 14 insaed long LDS edisen blong King James Bible), yusum long taem blong lesen. Bae yu save mekem wan kopi we i bigwan blong ol memba blong klas oli save luk gud moa.
 4. Wan tingting blong tij: LDS edisen blong King James Bible i tekem plante skripja tul blong help, mo hemia i tekem ol futnot, ol taetol blong ol japta, ol map, Topical Guide, Bible Dictionary, mo sam toktok we i kamaot long Joseph Smith Translation blong Baebol. Yusum ol tul ia taem yu stap rere mo stap tijim ol lesen blong yu, mo helpem ol memba blong klas blong oli lanem blong yusum olgeta long taem blong skripja stadi blong olgetawan.

Wan Tingting blong Lesen

Aktiviti blong
Pulum Tingting

Olsem we i stret yusum aktiviti ia o wan aktiviti blong yuwan blong statem lesen. Serem stori ia:

Plante yia i pas, Presiden Spencer W. Kimball mo sam nara lida blong Jos oli bin visitim wan smol katedrol long Copenhagen, long Denmark, we insaed long hem i gat ston blong Jisas Kraes mo Ol Twelef Aposol we man ia Bertel Thorvaldsen i bin mekem. Taem hem i stap tokbaot eksperiens ia, Elda Rex D. Pinegar i bin talem: “Taem mifala i bin stap lukluk naesfala wok blong art ia, mifala i bin luk se oli katem sam bigfala ki i stap long ol han blong Pita. . . . Taem mifala i stap rere blong lego Katedrol, man we i lukaotem haos ia. . . i stap stanap long doa i stap wet se bae mifala i go. Presiden Kimball i sekan long hem mo i talem tangkyu long hem from kaen fasin blong hem blong letem olgeta oli visitim Katedrol ia. Nao presiden long

taem ia i statem blong eksplenem Jos we Jisas Kraes i bin putum mo from wanem hem i impoten long yumi. . . . Presiden ia i mekem Presiden Tanner, Elda Monson, mo Elda Packer i go kolosap long hem, mo presiden i gohed i talem long hem se, ‘Mifala ol aposol *we i laef*, blong Lod Jisas Kraes. I gat Twelef Aposol mo i gat nara tri we oli stap olsem presidensi blong Jos. Mifala i holem ol tru ki, olsem we Pita i bin holem, mo mifala i stap yusum olgeta evri dei. Oli stap yusum olgeta oltaem’ “ (insaed long Conference Report, Okt. 1976, 104; o *Ensign*, Nov. 1976, 69).

Eksplenem se lesen ia i toktok raon long ol ki blong prishud mo olsem wanem Pita i kasem olgeta long Bigfala Hil.

Yusum mo Toktok
Raon long Skripja

Mekem ol memba blong klas oli lukluk long map blong Palestaen insaed long ol skripja blong olgeta, o soemaot kopi we yu bin mekem i kam bigwan (luk long seksen “Rere long Lesen”). Poenemaot se ol samting we i tekem ples we oli tokbaot insaed long lesen ia i tekem ples long Tyre, Sidon, Decapolis, mo Caesarea Philippi. Helpem ol memba blong klas blong faenem ol ples ia long map. Eksplenem se wokbaot blong Jisas long eria ia i mekem Hem i mitim plante Jentael (ol man we i no blong Isrel).

1. Jisas i hilim gel blong wan Jentael mo i fidim moa long 4000 pipol.

Toktok raon long Matiu 15:21–39. Invaetem ol memba blong klas blong ridim laod ol ves we yu jusum.

- Wanem woman Kenan i askem Jisas blong mekem? (Luk long Matiu 15:22.) From wanem Jisas i no givim samting we hem i askem kwiktaem? (Luk long Matiu 15:24. Hem i no wan Jiu, mo ol blesing blong gospel oli blong givim fastaem long ol man Jiu bifo olgeta Jentael.) From wanem Jisas i hilim gel blong woman ia? (Luk long Matiu 15:28.) Wanem yumi save lanem long woman ia? (I save gat ol ansa olsem se olgeta we oli no gat ful gospel oli save gat tu wan bigfala fet, mo bae yumi no mas lusum fet taem ol blesing oli no kam kwiktaem olsem we yumi wantem.)
- Sevya i go long Solwota blong Galili, mo i wokbaot i go tru long Decapolis (Mak 7:31). Decapolis i wan eria long is blong Lagun blong Galili, long ples we plante Jentael oli stap laef long hem. Olsem wanem Lod i soem lav mo sore long ol pipol long ples ia? (Luk long Matiu 15:29–31.) Olsem wanem ol pipol oli bin mekem afta? (Luk long Matiu 15:31.) Wanem merikol long dei blong yumi tedei i save mekem yu yu givim glori long God?
- Ol pipol oli bin stap wetem Jisas blong tri dei, mo taem i kam we bae oli mas go, Jisas i no bin wantem blong sendem olgeta i go be oli hanggri i stap. Wanem merikol Hem i bin mekem blong olgeta? (Luk long Matiu 15:32–38.)

Eksplenem se merikol ia i defren long hemia fastaem we Hem i fidim 5000 man (Matiu 14:15–21) from se plante long ol pipol ia oli ol Jentael. Elda Bruce R. McConkie i bin eksplenem se wetem merikol blong fidim 5000 man, Jisas i stap “putum fandesen blong Toktok blong Hem Antap long Hil long saed blong Kakae we i Save Givim Laef” (Jon 6:22–69; luk long lesen 12). Wetem narawan we i bin kam afta blong fidim 4000 man, Jisas i stap tijim wetem saen se long fiuja, bae kakae we i save givim laef, bae oli givim tu i go long ol nesen blong ol Jentael. (*Doctrinal New Testament Commentary*, ol buk 3. [1966–73], 1:375.)

2. Jisas i promesen ol ki blong niufala wol long Pita.

Ridim mo toktok raon long Matiu 16:13–19.

- Jisas i aot long Decapolis mo i go long eria blong Caesarea Philippi, mo long ples ia Hem i askem ol disaepol blong Hem, “Be yufala, yufala i stap tokbaot mi, se mi mi hu?” (Matiu 16:15). Wanem ansa blong Pita? (Luk long Matiu 16:16.) Wanem hem i stamba blong testemoni blong Pita? (Luk long Matiu 16:17.) Wanem yumi save lanem long stori ia abaot ol testemoni blong yumi?
- Jisas i bin talem long Pita, “Mo bambae mi stanemap jos blong mi long ston ya” (Matiu 16:18). Profet Josef Smit i bin tijim se ston ia we Jisas i stap tokbaot hem i revelesen (*Teachings of the Prophet Joseph Smith*, sel. Joseph Fielding Smith [1976], 274). Long wanem wei nao revelesen hem i fandesen blong Jos blong Lod?
- Sevya i bin promes blong givim long Pita ol “ki blong niufala wol ya” (Matiu 16:19). Wanem nao ol ki ia? From wanem i nid blong gat olgeta ki ia? (Luk long D&C 128:9–10; 132:46.) Huia i holem olgeta ki ia tedei?

Presiden Joseph F. Smith i bin tijim:

“Prishud i atoriti we oli givim long ol man blong mekem samting long bihaf blong God. Evri man we oli odenem olgeta long wan digri insaed long Prishud, i gat atoriti ia we oli givim long hem.

“Be i gat nit blong evri aksen we oli mekem folem atoriti ia, oli mekem long stret taem, ples, mo long stret fasin, mo folem prapa oda blong hem. Paoa blong lidim ol wok ia i tekem *ol ki* blong Prishud. Long ful paoa blong hem, ol ki ia, i gat wan man nomo i stap holem olgeta long wan taem, hemia profet mo presiden blong Jos. Hem i save givim sam pat blong paoa ia i go long wan narawan, mo long taem olsem, man ia i holem ol ki blong spesel wok ia nomo” (*Gospel Doctrine*, 5 ed. [1939], 136).

- From wanem i nid blong yu mas save gud yuwan se profet i holem ol ki ia, mo samting ia bae i stap olsem wan impoten pat blong ol testemoni blong yumi?

3. Jisas i jenisim Hemwan long fored blong Pita, Jemes, mo Jon.

Ridim mo toktok raon long Matiu 17:1–9. Eksplenem se samples wan wik afta we Jisas i promesem ol ki blong niufala wol long Pita, hem Pita, Jemes, mo Jon oli bin witnesem we Sevya i bin jenisim Hemwan mo kasem ol impoten save mo ol ki. Hemia wan long ol impoten pat blong Niu Testeman. Hem i bin helpem Jisas blong Hem i rere long Atonmen blong Hem mo i bin mekemrere ol tri Aposol blong sam nara responsibiliti we bae oli gat afta, olsem ol lida blong Jos.

- Wanem mining blong toktok ia *jenisim*? (Wan smol jenis long wei we man i luk mo bodi blong Hem; wan jenis i go long wan samting we i moa gud, i gat moa glori. Hem i kam tru long paoa blong God. Luk long D&C 67:11; Moses 1:11.)
- Folem Matiu 17:1–5, wanem i tekem ples taem Jisas, Pita, Jemes mo Jon oli bin stap long Hil we Jisas i bin Jenis? (Bae yu save listim ol ansa blong ol memba blong klas long blakbod.)
 - a. Fes blong Jisas i saen olsem san, mo klos blong Hem i kam waet mo i saen.
 - b. Moses mo Elaeja (Elaeja; luk long 3*b*) i kamaot.
 - c. “Wan klaod we i saen we i saen i kam kavremap olgeta” mo oli bin harem voes blong Papa we i talemaot witnes blong Hem abaot Pikinini blong Hem.

Yu save eksplenem se nem ia Elaeja oli yusum long plante wei insaed long ol skripja. Long Matiu 17:3–4 hem i wan wod blong ol man Gris we i semmak long Hibru nem ia *Elaeja*. Long ol nara ples (olsem long Matiu 17:10–13), hem i wan taetol we i tokbaot wan man olsem wan man we i save win, wan we i bae i save faenem wok mo olsem wan we i laekem blong rere long ol samting.

Eksplenem se ol lata-dei profet oli bin tijim moa abaot wanem i bin tekem ples long Bigfala Hil ia. Luklukbak long ol tijing ia wetem ol memba blong klas mo, sapos yu wantem, raetem sot toktok blong ol long blakbod:

- a. Pita, Jemes, mo Jon i bin luk wan visen long taem we wol ia bae i jenis long taem se Sevyia bae i Kambak Bakegen (D&C 63:20–21).
 - b. Oli “bin jenis bifo [Kraes]” (*Teachings of the Prophet Joseph Smith*, 158).
 - c. Oli bin tijim olgeta long saed blong taem Sevyia bae i ded mo taem we bae Hem i laef bakegen long ded (Joseph Smith Translation, Luke 9:31).
 - d. Oli bin kasem long Jisas, Moses, mo Elaeja, ol prishud ki we bae oli nidim blong lidim Jos afta we Sevyia bae i ded (*Teachings of the Prophet Joseph Smith*, 158; Joseph Fielding Smith, *Doctrines of Salvation*, ol buk 3. [1954–56], 2:110).
- Long 1836 Moses mo Elaeja i bin kambak bakegen. Tufala i bin putum han blong tufala antap long hed blong Josef Smit mo Oliva Kowdri mo i putumbak ol sem ki ia we oli bin givim long Pita, Jemes mo Jon. Wanem ki nao Moses i bin putumbak? (Luk long D&C 110:11. Ol ki blong Isrel i kam wan.) Wanem ki Elaeja i putumbak? (Luk long D&C 110:13–16. Ol ki blong siling paoa.) Olsem wanem oli stap yusum ol ki ia tedei? (Long misinari wok mo tempol wok, we oli wokem folem daereksen blong Presiden blong Jos.)
 - Elda David B. Haight i bin tijim se taem we Jisas i bin Jenis “hem i blong spirit blong yumi i save luksave mo tu i blong olgeta we oli ol witnes” (insaed long Conference Report, Epr. 1977, 8; o *Ensign*, Mei 1977, 7). Wanem yumi save lanem aot long Taem we Jisas i Bin Jenis we i save helpem yumi taem yumi nidim paoa long saed blong spirit?

Bae yu save luklukbak long ol aedia ia we Elda Haight i stap presentem (insaed long Conference Report, Epr. 1977, 9–10; o *Ensign*, Mei 1977, 7–9):

- a. Yumi mas folem eksampol blong Sevyia mo stap prea strong taem yumi nidim help blong gat paoa long saed blong spirit (Luk 9:28). Taem hem i stap tokbaot Taem we Jisas i Bin Jenis, Elda Haight i bin talem: “Ating Jisas i no filim nomo wan pis we i kam long heven, we i kam wetem janis ia blong toktok wetem Papa blong Hem, be tu Hem i bin filim se long stret taem blong hem, bae plante moa we oli no blong wol ia bae oli kam sapotem Hem. . . . Taem Hem i bin stap prea long Papa blong Hem, Hem i bin go antap moa bitim fasin ia blong gat tu tingting o ol rabis fasin blong wol ia we i bin sakemaot Hem.”
- b. Mifala i save talem tru se Jisas bae i mekem yumi strong olsem we Hem i bin mekem long Pita, Jemes mo Jon. Elda Haight i bin talem se, “Hem i bin tekem ol trifala aposol blong Hem wetem Hem, wetem bilif ia, se afta we bae oli luk glori blong Hem . . . bae oli kam strong moa, bae fet blong olgeta i kam strong moa mo bae i mekem olgeta i rere blong tekem ol swea mo ol rabis fasin we bae i kam afta.”
- c. Yumi save kam strong wetem testimoni abaot Sevyia (Matiu 17:5) mo ol doktrin blong gospel. Elda Haight i bin talem, “Olgeta trifala aposol we oli jusum olgeta, oli bin tijim olgeta long saed blong taem we bae [Sevyia] bae i

ded mo long taem we bae Hem i laef bakegen; ol tijing ia bae i sud mekem olgeta i strong moa long ol samting we bae i tekem ples long ol dei we bae i kam afta.”

Las Toktok

Talemaot gud se olsem Ol Lata-dei Sent, yumi gat ol save ia blong helpem yumi blong andastanem wanem i bin tekem ples long Bigfala Hil. Testefae long olsem wanem revelesen insaed long Jos tedei, hem i impoten, mo olsem wanem i nid blong gat ol ki ia. Talem gud long ol memba blong klas, se yumi, olsem Pita, yumi save save, tru long Tabu Spirit se Jisas Hem i Kraes, Pikinini ia blong God we i Laef.

**Wan Nara Aedia
blong Tij**

Ol nara tul ia oli kam helpem lesen aotlaen we i stap. Bae yu save yusum aedia ia olsem pat blong lesen.

Ol taem we Papa i bin testefae abaot Pikinini blong Hem

I gat fo taem we oli rekodem insaed long ol skripja we taem Papa i bin soemaot mo testefae abaot Pikinini blong Hem. Wan long olgeta, oli tokbaot insaed long lesen ia. Invaetem ol memba blong klas blong traem rimemba olgeta tri narawan.

1. Taem Jisas i baptaes (Matiu 3:13–17)
2. Long Taem Jisas i Jenis (Matiu 17:1–9)
3. Taem Jisas i kamaot long ol Nifaet (3 Nifae 11:1–7)
4. Fas Visen blong Josef Smit (Joseph Smith—History 1:13–17)

“Be Hu ol Man ya we Oli Stap Raonabaot long Mi?”

Lesen
14

Matiu 18; Luk 10

Stamba Tingting Blong helpem ol memba blong klas blong putum tingting blong olgeta i stap daon, blong fogivim ol nara man, mo blong soem bigfala lav long wanwan man.

- Rere long Lesen**
1. Ridim, tingting hevi, mo prea abaot ol skripja ia:
 - a. Matiu 18:1–6, 10–11, 14. Jisas i tijim se yumi mas jenis mo kam olsem ol smol pikinini blong go insaed long kingdom blong heven.
 - b. Matiu 18:15, 21–35. Tru long parabol blong man we i no save fogivim ol narafala man, Jisas i tij abaot fasin blong fogif.
 - c. Luk 10:25–37. Tru long parabol blong gudfala man Sameria, Jisas i tijim abaot bigfala lav.
 2. Sam moa riding: Mak 9:33–50; Mosaea 3:17–21; 4:16–19, 26.
 3. Sapos ol tul ia oli stap, yusum olgeta long taem blong lesen:
 - a. Ol pikja, Kraes mo Ol Pikinini (62467; Gospel Art Pikja Kit 216) mo Gudfala Man Sameria (62156; Gospel Art Pikja Kit 218).
 - b. Wan smol pat blong “The Lord’s Prayer,” pat 2 blong vidiokaset ia *The Savior: His Ministry* (53164). Pat ia i tekem tu pat blong parabol blong gudfala Man Sameria.
 4. Sapos yu yusum aktiviti blong pulum tingting, invaetem wan papa o mama blong toktok long klas olsem we oli putum i stap long aktiviti.
 5. Wan tingting blong tij: Wanwan taem invaetem ol memba blong klas (o ol memba blong nara wod) blong help wetem lesen taem oli givim wan ripot, oli serem wan stori, oli serem testimoni, o oli help long sam nara wei. Taem yu givimaot ol wok, mekem klia long man o woman we yu givimaot wok ia, wanem nao yu wantem mo hamas taem bae hem i tekem blong mekem wok ia long klas. (Luk long *Teaching—No Greater Call*, 136, 139.)

Wan Tingting blong Lesen

Aktiviti blong Pulum Tingting

Olsem we i stret, yusum aktiviti ia o wan aktiviti blong yuwan blong statem lesen.

Invaetem wan papa o mama we i gat wan yangfala pikinini (tri kasem faef yia) blong tekem pikinini ia i kam long klas, blong talemaot nem blong hem long klas, mo long sot toktok, tokbaot ol gudfala kwaliti blong pikinini ia. Afta we papa o mama ia i finis, askem ol memba blong klas blong tingting long ol kwaliti we wan pikinini i gat we Jisas bae i wantem yumi blong gat. Listim ol ansa long blakbod.

Eksplenem se lesen ia i toktok raon long ol impoten kwaliti we wan pikinini i save divelopem mo olsem wanem blong mekem gud long evri man wetem tingting i stap daon mo kaen fasin.

Taem yu stap tijim ol skripja ia, toktok raon long olsem wanem yumi save folem ol tijing blong Sevyia abaot fasin blong putum tingting i stap daon, fasin blong fogif, mo bigfala lav.

1. Jisas i stap tij se yumi mas kam olsem ol smol pikinini.

Ridim mo toktok raon long Matiu 18:1–6, 10–11, 14.

- Yu ting se from wanem ol disaepol oli gat tingting long hu nao bae i bigwan moa insaed long kingdom blong Lod? (Matiu 18:1; Mak 9:33–34). Olsem wanem samtaem yumi stap mekem ol sem mistek? Olsem wanem yumi save putum ol tingting olsem i go long saed?
- Soem pikja blong Kraes mo Ol Pikinini. Wanem hem i kaonsel blong Jisas long olgeta we oli wantem winim tru bigfala samting insaed long kingdom blong Hem? (Luk long Matiu 18:2–4; Mak 9:35.) From wanem, samtaem, i had blong folem ol kaonsel blong Hem? Olsem wanem yumi save komperem kaonsel ia wetem wanem we wol i stap tijim abaot fasin blong winim bigfala samting?
- Hem i minim wanem blong kam olsem ol smol pikinini? (Luk long Mosaea 3:19. Eksplenem se nating ol pikinini oli no stret evriwan, oli gat plante kwaliti we yumi mas developem blong kasem kingdom blong heven. Ol kwaliti ia i tekem tu, fasin blong putum tingting i stap daon, fasin blong save wet longtaem, mo wan strong fasin blong wantem bilivim.) Wanem yu bin lanem aot long ol pikinini? Olsem wanem yumi save kam moa olsem wan pikinini mo yumi save lisin mo mekem moa long wanem we Papa long Heven i wantem yumi blong mekem?
- Hem i minim wanem blong “mekem wan long pikinini ya i foldaon long sin”? (Luk long Matiu 18:6, futnot 6a.) Wanem sam long ol wei we ol pipol i mekem ol pikinini oli foldaon long sin? (Olsem ansa i save gat, stap olsem wan pua eksampol long olgeta, tokbaot nogud olgeta, no tijim olgeta, mo yusum nogud olgeta.) Olsem wanem Lod i stap lukluk long ol rong ia? (Luk long Matiu 18:6.)

Elda M. Russell Ballard i bin talem: “Mifala i stap harem ol ripot we oli nogud we i stap tokbaot ol papa mo mama o olgeta we oli lukaotem olgeta se oli stap longwe tumas long Spirit blong Kraes nao, oli stap yusum nogud ol pikinini. Nating oli yusum nogud olgeta o mekem nogud olgeta long saed blong bodi, long saed blong toktok, mo sam nara wei bakegen we man i no save luk o olsem mekem nogud tingting blong olgeta, hem i wan rabis samting mo i wan bigfala sin long ae blong God” (insaed long Conference Report, Epr. 1991, 107; o *Ensign*, Mei 1991, 80).

- Olsem wanem yumiwan, taem yumi save kam olsem ol pikinini i help blong yumi stap kea long olgeta? Wanem yumi save mekem blong mekem wanem we God i wantem we bae “[i no gat] wan long ol smol pikinini ia bae i foldaon”? (Matiu 18:14).

2. Tru long parabol blong man we i no save fogivim man, Jisas i stap tij abaot fasin blong fogif.

Ridim mo toktok raon long Matiu 18:15, 21–35.

- Long Matiu 18:15, wanem Lod i talem se bae yumi mas mekem sapos wan man i mekem nogud long yumi? From wanem hemia hem i nambawan fasin blong stretem ol raorao?

- Olsem wanem Jisas i ansa taem Pita i bin askem Hem hamas taem nao Hem i mas fogif? (Luk long Matiu 18:22. Eksplenem se Jisas i yusum hae namba ia blong tijim se yumi mas fogivim ol nara man evritaem.) From wanem, samtaem, hem i had blong fogif? Olsem wanem yu bin kasem blesing taem yu bin fogivim ol narawan o ol narawan oli bin fogivim yu?
- Blong talemaot moa olsem wanem hem i impoten blong fogivim ol narawan, Jisas i givim parabol blong man we i no save fogivim man (Matiu 18:23–35). Huia king mo ol wokman oli representem? (Luk long Matiu 18:35. King i representem Papa long Heven, mo ol wokman oli representem yumi.) Olsem wanem yumi, yumi semmak nomo long wokman blong king, mo yumi gat wan kaon i stap wetem Lod? (Luk long Matiu 18:24–27.) Wanem nao yumi mas mekem blong Lod i fogivim yumi long “kaon ia”?
- Wanem yumi save lanem long eksampol blong king taem hem i fogivim ol narawan? (Luk long Matiu 18:33.) Wanem sam long ol denja we yumi save fesem sapos yumi no fogivim ol narawan? (Luk long Matiu 18:34–35.)

3. Tru long parabol blong gudfala man Sameria, Jisas i stap tij abaot bigfala lav.

Ridim mo toktok raon long Luk 10:25–37. Soem pikja blong gudfala man Sameria.

- Olsem wanem Jisas i bin ansa long loya we i bin askem wanem hem i mas mekem blong kasem laef we i no save finis? (Luk long Luk 10:25–28.) Olsem wanem komanmen ia blong lavem God mo olgeta we oli stap raonabaot long yumi i kavremap evri samting long gospel? Olsem wanem yumi save obei long tufala komanmen ia fulwan?

- Olsem wanem Jisas i bin ansa taem loya i bin askem, “Be hu ol man ya we oli stap raonabaot long mi?” (Luk long Luk 10:29–37.) Wanem nao parabol ia i stap tijim abaot huia ol man we oli stap raonabaot long yumi?

Presiden Howard W. Hunter i bin talem: “Yumi nid blong tingbaot se nating yumi, yumi mekem ol fren blong yumi, God i bin mekem ol man we oli stap raonabaot long yumi—evri ples. Lav i no mas gat ol fanis blong hem; yumi no mas tru long wan man nomo” (insaed long Conference Report, Okt. 1986, 44; o *Ensign*, Nov. 1986, 35).

- Wanem pris o Livaet i bin mekem taem oli bin luk man ia we oli bin stilim hem mo kilim nogud hem? (Luk long Luk 10:31–32.) Olsem wanem tedei, man i nidim help? Givim sam tingting from wanem nao yumi no stap helpem ol narawan we oli stap long nid? (Luk long Mosaea 4:16–19 blong gat wan eksampol.)
- Olsem wanem gudfala man Sameria i helpem man ia we oli bin stilim mo kilim nogud hem? (Luk long Luk 10:33–35.) Wanem sam long ol gudfala fasin blong wan gudfala neiba we man Sameria ia i bin gat? Yu bin kasem blesing blong sam “gudfala man Sameria”? Olsem wanem yumi save stap olsem “ol gudfala man Sameria”? (Luk long Mosaea 4:26.)

Las Toktok

Testefae abaot olsem wanem i impoten blong folem eksampol blong Sevyia mo putum tingting blong yumi i stap daon, fogivim ol nara man, soem bigfala lav long wanwan long yumi. Givim jalenj long ol memba blong klas blong laef folem ol tijing ia.

Ol nara tul ia oli kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Meri mo Mata

Mekem wan memba blong klas i ridim Luk 10:38–42.

- Olsem wanem Mata i sevem Lod? Wanem “gudfala samting” we Meri i bin jusum? Olsem wanem samtaem yumi “harem nogud from tumas wok” mekem se yumi no stap risivim Jisas long stret fasin? Wanem yumi save lanem aot long ol ves ia?

2. “Yufala i no blokem ol pikinini ya, Yufala i letem olgeta oli kam long mi” (Mak 10:14)

Taem yufala i stap toktok raon long tijing blong Sevyia blong yumi mas kam olsem ol smol pikinini, yu save toktok raon tu long stori blong Hem we Hem i blesem ol pikinini we i stap insaed long Mak 10:13–16.

- Olsem wanem ol disaepol blong Jisas oli stap ansa taem oli stap tekem ol smol pikinini i go long Hem? (Luk long Mak 10:13.) Wanem Jisas i talem long ol disaepol blong Hem? (Luk long Mak 10:14–15.) Wanem Jisas i mekem long ol pikinini? (Luk long Mak 10:16.) Wanem yumi save lanem abaot Jisas insaed long stori ia? Olsem wanem bae yumi save folem gud moa eksampol blong Hem we Hem i soem insaed long stori ia?

3. Sam moa toktok raon long Matiu 18

- Toktok raon long Matiu 18:8–9 mo Mak 9:43–48 (luk tu long Matiu 5:29–30). Ol ves ia oli minim wanem? (Luk long Matiu 18:9, futnot 9a, we i stap talemaot se Joseph Smith Translation i talemaot se ol samting ia we i nogud, oli ol pipol we oli stap pulum yumi i go long rong rod. Hem i moa gud blong stop blong stap fren wetem ol pipol ia, bitim hemia blong letem olgeta oli lidim yumi blong mekem sin. Luk tu long Joseph Smith Translation, Mark 9:40–48.)
- Joseph Smith Translation blong Matthew 18:11 i rekodem se ol smol pikinini oli no nidim blong sakem sin (futnot 11c). From wanem hem i olsem? (Luk long Moronae 8:11–12.) Olsem wanem ol smol pikinini oli stap “laef long Kraes”? (Luk long Moronae 8:12; D&C 29:46–47.) Wanem bae yumi mas mekem blong kam “laef long Kraes”? (Luk long Matiu 18:4; Mosaea 3:19; Moronae 8:10.)
- Ridim Matiu 18:11–14. Olsem wanem yumi save yusum parabol blong sipsip we i lus insaed long ol laef blong yumi? Olsem wanem wan narawan we i bin folem prinsipol ia we i stap insaed long parabol ia, i bin blesem yu o wan we yu save hem?

4. “Lod i bin jusumaot tu, seventi narafala man” (Luk 10:1)

- Toktok raon long Luk 10:1–24. Olsem wanem yumi save komperem ol toksave blong Lod i go long olgeta Seventi wetem ol toksave we Hem i bin givim long Olgeta Twelef insaed long Matiu 10? Wanem sam long ol responsibiliti we ol Seventi oli gat tedei? (Luk long D&C 107:25, 34, 38, 93–97.)

5. Olsem wanem mared rilesensip i tabu

Eksplenem se Matiu 19:1–12 i tokbaot wan taem we Ol Farisi oli bin traem blong trikim Jisas mo oli bin askem Hem sapos divos i wan stret loa (luk tu long Mak 10:1–12). Divos i wan topik we oli bin tokbaot plante long taem ia bitwin ol man Jiu we oli go skul mo olgeta Jiu lida, mo Ol Farisi oli bin hop se bae ansa blong Jisas long kwestin blong olgeta bae i letem olgeta blong mekem ol Jiu oli kros. Mekem wan memba blong klas i ridim Matiu 19:3–9 bigwan.

- Wanem hem i ansa blong Jisas i go long ol man Farisi insaed long ves 3? (Luk long Matiu 19:4–6. Hem i bin talemaot long olgeta se divos i no wan samting we God i odenem.) From wanem Moses i bin letem blong i gat divos long ol man Isrel? (Luk long Matiu 19:7–8.)

Eksplenem se long Isrel blong bifo, wan man i save putum i stap long saed, o divosem, waef blong hem blong ol samting olbaot nomo. Jisas i bin tijim se insaed long wan wol we i stret mo gud evriwan, olsem selestial kingdom, divos i no save stap. From se wol ia i no stret evriwan yet, oli letem divos be hem i no mas tekem ples, be from ol tingting we oli impoten tumas. Matiu 19:9 i tokbaot se wan man we i putum woman blong hem i stap long saed from ol tingting olbaot nomo, bae i mas mared hem long ae blong God, mo olsem hem i komitim adaltri sapos hem i maredem wan nara woman. (Luk long James E. Talmage, *Jesus the Christ*, long namba 3 ed. [1916], 473–75, 484; luk tu long Bruce R. McConkie, *The Mortal Messiah*, long ol buk 4. [1979–81], 2:138–39.)

- Wanem pat, fasin blong putum tingting i stap daon, fasin blong fogif, bigfala lav oli stap plei insaed long wan mared we i gat sakes? Olsem wanem nao taem yumi stap traehad blong kam moa olsem Kraes bae i helpem yumi insaed long mared mo ol nara rilesensip?
- Olsem wanem yumi save helpem ol pipol we oli bin safa from divos?

6. Aktiviti blong ol yut

Raetem (o mekem wan memba blong klas i raetem) ol kwestin abaot lesen ia long ol smol pis pepa. (Olsem wan aktiviti blong luklukbak long lesen, yu save jusum ol kwestin blong wanwan pat blong lesen.) Putum ol pis pepa insaed long wan bag o bokis. Mekem ol memba blong klas oli putum jea blong olgeta i mekem wan raon, mo putum bag o bokis ia long wan jea long medel blong sekol ia. Mekem ol memba blong klas oli go pulum ol kwestin insaed long bag o bokis mo oli ansa long olgeta. (Luk long *Teaching—No Greater Call*, 124–25.)

Stamba Tingting Blong mekem ol testimoni blong ol memba blong klas i kam strong long saed blong save se Jisas Kraes i Sevya blong yumi mo taem yumi stap folem Hem, yumi save kam fri evriwan.

Rere long Lesen

1. Ridim, tingting hevi, mo prea abaot ol skripja ia:
 - a. Jon 7. Jisas i go long Lafet blong Wokem ol Wansaed Haos mo i stap tij long tempol. Sam pipol i bilif se Hem i Mesaea, be sam narawan oli ting se Hem i man blong giaman.
 - b. Jon 8:1–11. Oli tekem wan woman we i slip wetem man we i no man blong hem. Hem i mekemgud hem wetem lav mo sore.
 - c. Jon 8:12–36. Jisas i talemaot, “Mi nao, mi olsem laet blong ol man long wol.” Hem i tijim se ol Jiu we oli bilif long Hem bae oli ol fri man.
2. Wan tingting blong tij: Oltaem luklukbak long lesen blong yu wan wik bifo lesen. Taem yu stap ridim ol skripja we oli jusum eli, bae yu kasem ol tingting mo ol filing long taem blong wik we bae i helpem yu blong tijim lesen ia. Taem yu stap ting hevi long lesen ia long wik, prea blong Spirit i gaedem yu mo blong yu gat fet se bae Lod i blesem yu. (Luk long *Teaching—No Greater Call*, 45–46.)

Wan Tingting blong Lesen

Aktiviti blong Pulum Tingting

Olsem we i stret, yusum aktiviti ia o wan aktiviti blong yuwan blong statem lesen.

Mekem rum i tudak gud, olsem ofem ol laet mo klosem ol keten. Askem wan memba blong klas blong ridim laod Doctrine and Covenants 93:1–2. Taem memba blong klas i ridim finis (o i traem blong ridim) ol ves ia, askem hem:

- Hem i had blong ridim ol ves ia? Wanem bae i mekem hemia bae i moa isi? (Moa laet.)

Onem ol laet mo openem ol keten. Askem memba blong klas ia blong ridim bakegen Doctrine and Covenants 93:1–2. Eksplenem se oli yusum laet truaot long ol skripja olsem wan saen blong Jisas Kraes. Jisas Hemwan i bin yusum saen ia taem Hem i stap tij insaed long tempol. Lesen ia i blong tokbaot ol wei we Jisas Kraes i stap olsem wan laet long yumi.

Sapos yu no save mekem rum i tudak, bae yu droem wan laethaos long blakbod (o soem pikja blong wan laethaos). Eksplenem se stamba tingting blong wan laethaos i blong wonem ol sip long wan denja o blong gaedem olgeta long sef ples. Nao eksplenem se laet ia i wan long ol saen we Jisas i bin yusum long tijing blong Hem abaot misin blong Hem mo rilesensip blong Hem long yumi. Lesen ia bae i toktok raon long olsem wanem Jisas i stap olsem wan laet we i stap soem wei long yumi i go long sef ples long saed blong spirit.

Taem yu stap tijim ol skripja stori ia, serem testemoni blong yu abaot Jisas Kraes taem yu filim se i stret blong yu mekem. Leftemap tingting blong ol memba blong klas blong oli serem tu, testemoni blong olgeta abaot Jisas Kraes taem oli filim se bae oli mas mekem olsem.

1. Jisas i go long Lafet blong Wokem ol Wansaed Haos mo i tij long tempol.

Toktok raon long Jon 7. Invaetem ol memba blong klas blong ridim laod ol ves we oli jusum. Eksplenem se Lafet blong Wokem ol Wansaed Haos i wan Lafet blong ol man Jiu we oli stap holem sikis manis afta long Pasova. Hem i stap blong eit dei mo i makem ol blesing blong Lod we i go long ol pikinini blong Isrel long taem blong ol trip blong olgeta long ples we i no gat man long hem. Hem i blong selebretim tu, yia blong tekem kakae long garen mo i makem en blong taem blong karem kakae long garen. Ol Jiu oli tekem Lafet ia olsem lafet we i bigwan moa mo i wan lafet blong glad moa bitim evri nara lafet blong olgeta. (Luk long Bible Dictionary, "Feasts," 673; luk tu long Levitikas 23:34–43.)

Poenemaot se Jisas i bin go aot long Galili i go kasem Jerusalem blong tekempat long lafet ia long tempol (Jon 7:1–10).

- Wanem ol pipol we oli bin stap long lafet oli bin talem taem oli bin stap wet long Hem blong i kam? (Luk long Jon 7:12.) From wanem ol pipol oli bin sapraes taem Jisas i bin stat blong tij? (Luk long Jon 7:14–15.)
- Wanem Jisas i bin talem long ol pipol insaed long tempol abaot ol tijing blong Hem? (Luk long Jon 7:16.) Wanem toksave Hem i bin givim long ol pipol blong oli mas mekem blong oli kasem wan testemoni blong ol tijing blong Hem? (Luk long Jon 7:17.) Olsem wanem yumi save yusum toksave ia insaed long ol laef blong yumi?

Elda John K. Carmack blong Olgeta Seventi i bin talem: "Jisas i bin eksplenem se, 'Mo sipos wan man i tingting strong blong mekem ol samting we God i wantem, hem bambae i faenemaot se tok ya blong mi i kamaot long God, no i kamaot long mi nomo.' (Jon 7:17). Long nara toktok, sapos yu stap traem bae yu save save sapos hem i tru o no. Hemia i nidim fet blong traem, be hem i nidim wan pruf long saed blong spirit. Long disaepol we i stap traem wan eksperiens, bae i gat strong tingting, save, mo laet bae i kam" (insaed long Conference Report, Okt. 1988, 32; o *Ensign*, Nov. 1988, 26).

Invaetem ol memba blong klas blong talemaot olsem wanem testemoni blong olgeta long saed blong wan gospel prinsipol i bin kam strong taem oli bin laef folem (yu save serem wan eksperiens blong yuwan). Poenemaot se narasaed blong promes ia, we i stap long Jon 7:17 i tru tu: sapos yumi no stap laef folem ol prinsipol blong gospel, ol testemoni blong yumi bae i go slak.

- Olsem we Jisas i bin tijim, ol pipol oli bin gohed blong serem ol tingting blong olgeta abaot Hem. Wanem sam long ol tingting from wanem ol pipol oli bin bilif se Hem i Kraes? (Luk long Jon 7:31, 37–41.) Wanem sam long ol tingting we i mekem ol pipol oli no bin bilif se Hem i Kraes? (Luk long Jon 7:27, 41–42, 52.) Long wanem wei ol pipol oli bin save wea ples Jisas i kam long hem? (Oli bin save famle blong Hem mo taon blong Hem.) Long wanem wei nao oli no bin save se Hem i blong wea? (Luk long Jon 7:28–29; 8:14, 19, 23–29. Oli no bin andastanem se Papa long Heven i bin sendem Hem.)

- Olsem wanem yumi save mekem ol testemoni blong yumi abaot misin blong Jisas Kraes i kam strong moa?

2. Oli tekem wan woman we i slip wetem man we i no man blong hem, i go long Jisas.

Ridim mo toktok raon long Jon 8:1–11.

- From wanem ol tija blong loa mo ol Farisi oli tekem woman ia we i slip wetem man we i no man blong hem, i go long Jisas? (Luk long Jon 8:4–6. Oli bin wantem blong blokem Jisas blong Hem i jajem woman ia blong oli kilim hem i ded o blong Jisas i go agensem loa blong Moses.) Wanem Jisas i bin talem long ol tija blong loa mo ol Farisi? (Luk long Jon 8:7.) From wanem oli no bin stonem woman ia? (Luk long Jon 8:9.)
- Nating Jisas i no bin agri wetem sin blong woman ia, Hem i no bin jajem hem tu from (Jon 8:10–11). Wanem yumi save lanem long eksampol blong Sevyia abaot fasin blong ansa long ol pipol we oli bin mekem ol rabis sin?

Elda Marvin J. Ashton i bin eksplenem: “Ol tija blong loa mo Ol Farisi oli bin tekem i kam long Jisas wan woman we i go wetem man we i no man blong hem. Stamba tingting blong olgeta i no blong no soem lav long woman ia o long Sevyia, be blong mekem se Jisas i sem mo blong trikim Jisas. . . . Jisas i no minim blong lego fasin blong tekem man blong narawan i stap olsem; i no gat tu tingting long fasin blong Hem long saed blong ol rabis fasin. [Be] Hem i jusum blong tij wetem lav—blong soem long ol tija blong loa mo ol Farisi se i gat nid blong sevem woman ia blong hem i kam gud mo blong soemaot ol rabis fos ia blong trik mo fasin blong sem” (insaed long Conference Report, Epr. 1981, 31–32; o *Ensign*, Mei 1981, 24).

3. Jisas i talemaot, “Mi nao, mi olsem laet blong ol man long wol.”

Ridim mo toktok raon long Jon 8:12–36.

- Long taem blong Lafet blong Wokem ol Wansaed Haos, i bin gat fo bigfala laet i bin stap saenem tempol long Jerusalem. Oli bin save luk faea blong ol laet ia raon long siti. (Luk long Bible Dictionary, “Feasts,” 673.) From wanem hemia i wan stret ples blong Jisas i talemaot se, “Mi nao, mi olsem laet blong ol man long wol”? (Jon 8:12). Hem i minim wanem se Jisas i laet blong ol man long wol? (Luk long Jon 8:12; Alma 38:9; 3 Nifae 15:9; D&C 88:6–13.)
- Taem ol pipol oli stap traehad blong kam olsem Jisas, olgeta tu oli kam olsem laet blong wol, mo oli stap saenemaot laet ia blong Hem (Matiu 5:14; 3 Nifae 18:24). Olsem wanem yumi save helpem ol narawan blong oli luk laet we Kraes i wantem givim? (Luk long Matiu 5:16; 28:18–20; Filipae 2:14–15.)
- Jisas i bin talem long ol pipol insaed long tempol se oltaem Hem i bin mekem ol samting we i mekem Papa blong Hem i glad (Jon 8:29). Olsem wanem bae yumi save gat ol strong tingting ia blong mekem Papa long Heven i glad?
- Taem Jisas i testefae abaot Papa blong Hem long Heven, “plante man i bilif long hem” (Jon 8:30). Wanem Jisas i bin promesem long ol pipol ia sapos oli gohed blong folem Hem? (Luk long Jon 8:31–32.) Trutok i mekem yumi fri long wanem? (Luk long Jon 8:33–34.) Olsem wanem, taem yumi mekem wan sin, i mekem se yumi fas i stap? (Luk long Alma 12:11; 34:35.) Olsem wanem, taem yu save trutok i mekem yu, yu fri?

- Afta Jisas i talem se Hem, Hem i “stamba blong trutok” (Jon 14:6). Olsem wanem samting ia i save stiaem andastaning blong yu long saed blong promes we i stap long Jon 8:32? Olsem wanem, taem yumi save Sevyia i mekem se yumi fri? Olsem wanem yumi save kam blong save Hem?

Las Toktok

Testefae se Jisas Kraes i Sevyia blong yumi mo Hem nomo i save mekem yumi fri long ol rop blong sin. Leftemap tingting blong ol memba blong klas blong folem Kraes, “laet blong ol man blong wol,” blong Hem i save gaedem olgeta long wan sef ples long saed blong spirit.

Sam Nara Aedia Blong Tij

Ol nara tul ia oli kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Wota we i Save Givim Tru Laef

Long wan long ol seremoni we oli mekem long Lafet blong Wokem ol Wansaed Haos, wan pris i putum wota blong pul blong Saelom i go long olta. Ofring ia, oli bin mekem blong askem ren mo sakses long saed blong ol krop blong garen long yia we bae i kam. Taem Jisas i bin tij long tempol long las dei blong lafet ia, Hem i bin invaetem ol pipol blong oli tekem wota we i save givim tru laef (Jon 7:37–38).

- Long wanem nara ples bakegen Jisas i talemaot se Hem i wota we i save givim tru laef (Luk long Jon 4:5–15.) Wanem hem i “wota we i save givim laef”? Olsem wanem yumi save dring long hem?

2. Jisas Kraes i Jehova

Ridim mo toktok raon long Jon 8:37–59.

- From wanem Jisas i talem long olgeta man Jiu we oli bin bilif se oli no ol pikinini blong Ebrahim? (Luk long Jon 8:39–40. Nating oli kamaot long laen blong Ebrahim, oli no bin mekem ol stret mo gud wok olsem we Ebrahim i bin mekem.) From wanem Jisas i talem long olgeta se oli no ol pikinini blong God? (Luk long Jon 8:41–44.) Olsem wanem yumi save soem se yumi ol pikinini blong Papa long Heven tru long ol aksen blong yumi?
- From wanem ol man Jiu oli no glad long ol toktok blong Lod abaot Ebrahim? (Luk long Jon 8:51–53, 56–57. Oli no bin luksave se Jisas i stap tokbaot paoa blong Hem blong winim ded [ves 51] mo long laef blong Hem bifo long wol ia [ol ves 56–57].) Wanem nao toktok blong Jisas se, “Taem we Ebrahim i no bon yet, be mi mi stap finis, (Jon 8:58) i helpem yumi blong andastanem abaot Hem? (Luk long futnot 58*b*; luk tu long Eksodas 3:13–14. Jisas i Jehova, “Hem Hem i” God blong Ebrahim, Aesak, mo Jekob.) From wanem hem i impoten blong save se Jisas Hem i Jehova bifo laef blong Hem long wol ia?

Stamba Tingting Blong helpem ol memba blong klas blong oli andastanem moa mo oli glad moa long Jisas Kraes olsem Laet blong Ol Man blong Wol mo olsem Gudfala Man blong Lukaot long Sipsip.

Rere long Lesen

1. Ridim, tingting hevi, mo prea abaot ol skripja ia:
 - a. Jon 9. Jisas i talemaot bakegen se Hem i Laet blong ol Man long Wol mo Hem i hilim wan man we i blaen taem hem i bon. Man ia we i kamgud bakegen i testefae long Ol Farisi mo i wosipim Jisas.
 - b. Jon 10:1–15, 25–28. Jisas i tijim se Hem i Gudfala Man blong Lukaot long Sipsip mo bae Hem i save givimaot laef blong Hem from sipsip blong Hem. Ol sipsip blong Lod oli olgeta we oli harem voes blong Hem mo oli folem Hem.
2. Sapos ol tul ia oli stap, yusum olgeta long taem blong lesen:
 - a. Pikja blong Jisas i Hilim Blaen Man (62145; Gospel Art Pikja Kit 213).
 - b. Pat 3 blong “New Testament Customs,” wan seleksen we i kam long *New Testament Video Presentations* (53914).
3. Wan tingting blong tij: “Blong gat fasin blong putum tingting i stap daon long fored blong God, i wan long ol ki blong gat sakses. Wan tija we i putum tingting blong hem i stap daon long fored blong Lod i stap openem stamba blong evri save mo paoa we i stap kamaot long hem oltaem. Wan tija we i filim se hemwan hem i inaf long wok ia, bae i lusum Spirit. [Yumi] no save mekem wan samting, sapos God i no stap. Wetem Hem, ol samting oli posibol” (*Teaching—No Greater Call*, 5).

Wan Tingting blong Lesen

Aktiviti blong
Pulum Tingting

Olsem we i stret, yusum aktiviti ia o wan aktiviti blong yuwan blong statem lesen.

Askem ol memba blong klas blong tingbaot plante long ol man we oli hadikap, we Jisas i bin hilim olgeta long taem we Hem i laef long wol ia. Listim daon ol ansa blong olgeta long blakbod. Afta poenemaot se pat blong lesen ia i abaot Jisas i hilim wan blaen man—wan merikol we Hem i bin mekem plante taem.

- From wanem, blong hilim ol blaen man i wan bigfala merikol insaed long ministri blong Sevyas? Blong hilim ol blaen man i minim wanem long saed blong spirit? (Paoa blong Sevyas blong helpem yumi blong yumi winim ol blaen ae blong yumi long saed blong spirit mo blong yumi save “luk” o andastanem ol trutok long saed blong spirit.)

Eksplenem se ol skripja we oli stadi long olgeta long lesen ia i lukluk nomo long fasin blong luk mo harem Sevyas mo i lukluk long responsibiliti blong yumi blong helpem ol narawan blong mekem sem samting.

Taem yu stap tijim ol skripja ia, toktok raon long olsem wanem blong yusum olgeta long laef evri dei. Leftemap tingting blong ol memba blong klas blong oli serem eksperiens we i go wetem ol prinsipol blong skripja.

1. Jisas i mekem wan man we i bon blaen, i save lukluk.

Toktok raon long Jon 9. Invaetem ol memba blong klas blong ridim ol ves we yu jusum. Soem pikja blong Jisas i hilim wan blaen man.

- Bifo Hem i hilim man ia we i bon blaen, Jisas i bin talem bakegen, “Mi nao, mi laet blong ol man long wol” (Jon 9:5). Long wanem wei Jisas i bin tekem laet i go long blaen man ia? (Luk long Jon 9:6–7, 35–38.)
- Man ia we i bin blaen i bin testefae plante taem se Jisas i bin hilim hem (Jon 9:10–11, 15, 17, 24–25, 27, 30–33. Bae yu save leftemap tingting blong ol memba blong klas blong makem ol toktok long ol skripja buk blong olgeta). Wanem yumi save lanem aot long eksampol blong man ia? (Yu save gat olsem ansa se yumi wanwan i gat wok ia blong serem ol testemoni blong yumi. Poenemaot se man ia i faenem strong tingting mo paoa blong testefae long plante pipol, nating olgeta we oli sakemaot testemoni blong hem, oli bin tok strong long hem.)
- Olsem wanem testemoni blong man ia i gru taem hem i stap gohed blong serem testemoni blong hem? (Komperem ol ves 11, 17, 33, mo 38.) Olsem wanem testemoni blong yu i gru taem yu bin stap serem testemoni blong yu?
- Olsem wanem Ol Farisi oli bin mekem taem oli bin harem abaot merikol ia? (Luk long Jon 9:16.) Long tingting blong yu, from wanem oli no bin wantem blong luksave se Jisas i mekem merikol ia wetem paoa blong God? (I save gat ol ansa olsem, fasin blong flas, kros from Jisas i hilim man long Sabat, fraet from se bae oli lusum paoa o bae man i nomo luksave olgeta, mo ol nara samting bakegen.) Olsem wanem Ol Farisi oli traem blong spolem nem blong Jisas? (Luk long Jon 9:16, 18–20, 24, 28–29, 34.) Olsem wanem sam pipol tedei oli stap tanem bak blong olgeta long paoa blong God?
- Olsem wanem papa mo mama blong man ia we i bin blaen oli ansa taem Ol Farisi oli bin askem olgeta long saed blong merikol ia? (Luk long Jon 9:18–23.) From wanem papa mo mama ia oli ansa long wei ia? (Luk long Jon 9:22.) Olsem wanem nao, samtaem, yumi tu yumi olsem papa mo mama blong man ia? Olsem wanem bae yumi save strong moa long ol testemoni blong yumi?
- Olsem wanem Ol Farisi oli panisim man ia taem Hem i gohed blong testefae se Jisas i bin hilim hem? (Luk long Jon 9:34. Eksplenem se, blong oli sakemaot hem, hem i minim blong oli karemaot rekod blong hem long jos.) Wanem Jisas i bin mekem taem hem i harem se oli karemaot nem blong man ia from testemoni blong hem? (Luk long Jon 9:35–37.) Olsem wanem Lod i bin blesem yu from se yu bin stap fetful long taem we enemi i stap spolem yu?

Sapos yu stap yusum vidio presentesen ia, soem “The Synagogue” naoia.

- Long wanem wei Ol Farisi oli bin save luk, mo long wanem wei nao oli bin blaen? (Luk long Jon 9:39–41. Oli bin save gud loa, be oli bin blaen from oli no bin save luksave tru stamba tingting blong hem. Oli no bin wantem blong luk se Jisas i kam blong fulfilim loa ia.) Wanem hem i defren bitwin hemia blong luk wetem ol ae blong yumi, mo hemia blong “luk” o andastanem samting

long saed blong spirit? Wanem sam samting we i save mekem yumi blaen long saed blong spirit? Wanem yumi save lanem aot long stori ia abaot olsem wanem blong winim fasin ia blong stap blaen long saed blong spirit?

2. Jisas i stap tijim se Hem i Gudfala Man blong Lukaot long Sipsip.

Ridim mo toktok raon long Jon 10:1–15, 25–28. Long ol ves ia, Jisas i stap tokbaot olsem wanem bae wan man blong lukaot long sipsip bae i protektem mo lukaot gud long ol sipsip blong hem. Eksplenem se, long taem blong Jisas, oli bin stap lidim ol sipsip i go long wan fanis blong oli slip long naet. Wan long ol man blong lukaot long ol sipsip bae i stap long doa blong lukaot long olgeta mo ol narawan bae oli gobak long haos blong spel. Sapos wan wael animol i go insaed long fanis blong ol sipsip, bae man blong lukaot long sipsip bae i mas givimaot laef blong hem sapos i gat nid blong hem i protektem ol animol ia. Long moning, wanwan man blong lukaot long sipsip bae i kambak mo bae i singaotem ol sipsip blong hem. Bae ol sipsip bae oli haremsave voes blong hem mo bae oli folem hem i go long ol ples blong kakae.

- Taem Jisas i stap toktok raon long man blong lukaot long sipsip mo ol sipsip blong hem, huia sipsip i representem? (Luk long Jon 10:4, 27.) Huia hem i man blong lukaot long sipsip? (Luk long Jon 10:11.) Wanem sam long ol kwaliti blong wan gudfala man blong lukaot long sipsip? (Bae yu save listim ol kwaliti ia long blakbod olsem we i stap daon ia.)
 - a. Hem i save ol sipsip blong hem, hem i singaotem olgeta long nem blong olgeta, mo hem i lidim olgeta (Jon 10:3–4, 14).
 - b. Hem i doa blong fanis blong sipsip, i stap letem olgeta insaed blong oli sef mo oli faenem kakae (Jon 10:7, 9).
 - c. Hem i givim sipsip “laef, mo blong laef ya blong olgeta i save fulap gud long evri samting” (Jon 10:10).
 - d. Hem i givim laef blong hem blong sevem sipsip (Jon 10:11, 15).
- Wanem i defren bitwin wan man blong lukaot long sipsip mo wan man we i wok from mane? (Luk long Jon 10:11–14.) Olsem wanem Jisas i stret eksampol blong wan man blong lukaot long sipsip? (Yusum list we yu bin raetem finis long blakbod, mo toktok raon long olsem wanem Jisas i givim eksampol long wanwan long ol kwaliti ia. Luk long 2 Nifae 9:41–42 taem yufala i stap toktok raon long olsem wanem Jisas i doa blong ples blong sipsip. Taem yufala i stap toktok raon long tingting blong Jisas blong wantem givim laef blong Hem from yumi, lukluk long 10:17–18.)
- Olsem wanem ol sipsip oli luksave man blong olgeta we i stap lukaot long olgeta? (Luk long Jon 10:3–4.) Olsem wanem yumi save harem voes blong Lod? (Luk long D&C 1:37–38; 18:33–36; 97:1.) Olsem wanem yumi gat proteksen taem yumi save mo yumi folem voes blong Gudfala Man blong Lukaot long Sipsip?

Sapos yu stap yusum vidio presentesen ia, soem “The Shepherd” mo “The Sheepfold” naoia.

- Huia ol stilman mo ol man we oli stap traem blong kam insaed long fanis blong sipsip? (Luk long Jon 10:1. Oli ol pipol we oli traem blong spolem ol man we oli stap folem Lod mo lidim olgeta i go longwe aotsaed.) Olsem wanem yumi save luksave huia ol tru man blong lukaot long sipsip mo olgeta we oli stap traem blong lidim yumi i go longwe aotsaed) (Luk long Jon 10:10.)
- Olsem wanem ol sipsip we oli folem Gudfala Man blong Lukaot long Sipsip, oli kasem praes blong olgeta taem oli folem Hem? (Luk long Jon 10:9–10, 28.) Wanem blesing yu bin kasem from se yu bin folem Sevyia?

Las Toktok

Testefae se Jisas Hem i Laet blong Ol Man long Wol ia mo Hem i Gudfala Man blong Lukaot long Sipsip. Olsem we i stret, serem wetem ol memba blong klas olsem wanem Lod i bin helpem yu blong lukluk wetem ol ae blong spirit mo helpem yu blong folem Hem.

**Sam Nara Aedia
Blong Tij**

Ol nara tul ia oli kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Ol wok blong yumi olsem ol man blong lukaot long sipsip

- Olsem wanem yumi tu, yumi ol man blong lukaotem long ol sipsip blong Lod? Wanem yumi save mekem blong helpem ol narawan blong harem mo folem voes blong Gudfala Man blong Lukaot long Sipsip?

Elda Bruce R. McConkie i bin tijim: “Eniwan we i wok insaed long Jos mo hem i responsibol long ol samting long saed blong spirit o ol samting long saed blong wol ia, blong ol pikinini blong Lod, hem i wan man blong lukaotem olgeta sipsip ia. Lod bae i askem long ol man ia blong oli ansa long saed blong sefti blong ol sipsip blong Hem” (*Mormon Doctrine*, 2nd ed. [1966], 710).

2. “Mi gat ol nara sipsip” (Jon 10:16)

- Huia Jisas i stap tokbaot long Jon 10:16? (Luk long 3 Nifae 15:21–24.) Long wanem taem nao ol “nara sipsip’ ia oli bin harem voes blong Sevyia? Olsem wanem ves ia i save helpem wan we i stap lukluk insaed long Jos blong andastanem gud moa Buk blong Momon?

Elda Howard W. Hunter i bin tijim: “Olgeta we oli save gud laef mo ol tijing blong Masta from save blong olgeta long ol buk blong Baebol, bae oli gat intres blong save se i gat wan rekod blong taem we Hem i bin kamaot long olgeta pipol long Wes saed blong wol—ol nara sipsip we Hem i bin stap tokbaot. Rekod ia, nem blong hem i Buk blong Momon, nem blong hem i tekem nem blong profet we i bin putum tugeta mo raetem sot ol rekod blong ol pipol blong Amerika. Buk blong Momon i wan narafala witnes blong Kraes mo i rekodem ol tijing blong Hem long ol nara grup blong sipsip long Niufala Wol” (insaed long Conference Report, Epr. 1983, 19; o *Ensign*, Mei 1983, 16).

3. Ol defren wei blong luk

Blong helpem ol memba blong klas blong glad moa long ol wei we Sevyia i save helpem yumi blong luk, mekem wan wodstrip blong wanwan long ol defren mining blong toktok ia *luk* (ol nara toktok ia i stap daon ia). Putum ol wodstrip insaed long wan hat o bokis, mo mekem ol memba blong klas oli gat taem blong olgeta blong jusum wan wodstrip mo eksplenem olsem wanem Sevyia i bin helpem yumi blong luk long wei ia we i stap long pepa. Tingting ia bae i gud blong jusum long ol yut klas.

blong luksave long ae

blong andastanem

blong kasem save

blong tingting long hem olsem wan wei

blong faenemaot

blong pulum tingting

blong luk long wan nara wei


“Bambae Mi Mas Mekem Olsem Wanem blong Kasem Laef Ya we i No Save Finis?”

Lesen
17

Mak 10:17–30; 12:41–44; Luk 12:13–21; 14; 16

Stamba Tingting Blong helpem ol memba blong klas blong andastanem se yumi mas wantem blong sakrifaes long ol samting blong wol ia blong kasem wan ples long kingdom blong heven.

- Rere long Lesen**
1. Ridim, tingting hevi, mo prea abaot ol skripja ia:
 - a. Mak 10:17–30; 12:41–44. Wan rij man i stap askem wanem hem i mas mekem blong hem i save kasem laef we i no save finis, mo Jisas i tijim se taem man i stap trastem ol rij samting blong hem long wol ia, i save mekem se bae hem i no save go insaed long kingdom blong God. Jisas i presem wan pua wido blong givim tu smol mane long bokis blong kleksen.
 - b. Luk 12:13–21. Tru long parabol blong rij man we i no gat hed, Jisas i tijim ol denja blong fasin blong kovetem samting. Hem i askem strong long olgeta we oli stap folem Hem blong lukaot long ol rij samting blong heven, be i no ol rij samting blong wol.
 - c. Luk 14:15–33. Tru long parabol blong bigfala kakae, Jisas i tijim se olgeta we oli stap folem Hem, oli mas wantem blong livim evri nara samting.
 - d. Luk 16:1–12. Tru long parabol blong bos blong wok we i mekem i no stret, Jisas i stap tijim ol man we i stap folem Hem blong oli lukaot long rij samting long saed blong spirit i strong i semmak olsem olgeta we oli stap lukaotem ol rij samting blong wol ia.
 2. Sam moa riding: Matiu 19:16–30; Luk 18:18–30; 21:1–4; Jakob 2:18–19.
 3. Sapos pikja blong Kraes mo Yangala Man blong Rul (Gospel Art Pikja Kit 244) i stap, yusum long taem blong lesen.
 4. Sapos yu yusum aktiviti blong pulum tingting, mekem wan mangkil trap o droem wan long blakbod (luk long pikja daon ia). Blong mekem wan mangkil trap, tekem wan bokis wetem wan lid. Skojem lid i go long bokis, mo katem wan saed blong bokis ia i bigwan inaf blong yu save pusum han blong yu we i open be i no bigwan inaf blong yu pusum antap long han blong yu. Putum wan pis frut o sam pinat insaed long bokis.



5. Wan tingting blong tij: Nifae i bin talem, “mi bin yusum evri skripja long laef blong mifala, blong hem i save stap helpem mo lanem mifala” (1 Nifae 19:23). Stadi long *Teaching—No Greater Call*, ol pej 85–86 mo 116–17, blong luk olsem wanem yu save helpem ol memba blong klas i yusum ol skripja insaed long ol laef blong olgeta.

Wan Tingting blong Lesen

Aktiviti blong
Pulum Tingting

Olsem we i stret, yusum aktiviti ia o wan aktiviti blong yuwan blong statem lesen.

Soem trap we yu bin mekem o droem (luk long seksen “Rere long Lesen”). Eksplenem se wan trap olsem, oli save yusum blong kasem wan mangki. Oli putum gud wan kontena i stap long graon, mo oli putum wan smol kakae (olsem pinat o frut) insaed. Hol long kontena i bigwan inaf blong empti han blong wan mangki i go insaed isi be i smol tumas blong han blong hem i kamaot tugeta wetem kakae (yu save soem hemia). Wan mangki i luk wan kakae mo i go blong tekem kakae ia. Taem mangki i tekem kakae, bae hem i letem blong oli kasem hem tu, be bae i no lego kakae ia. Bae hem i no save sakrifaesem praes blong hem blong wan we i moa bigwan—fridom blong hem.

Poenemaot se samtaem yumi mekem ol sem mistek ia olsem mangki ia. Taem yumi kasem ol samting we i naes tumas, yumi no save livim olgeta nating we sapos yumi holem i stap, bae i mekem se yumi lusum wan samting we i moa gud. Lesen ia i abaot sam samting we bae i nid blong yumi sakrifaes long olgeta blong kasem blesing we i moa bigwan: laef we i no save finis wetem Papa blong yumi long Heven mo Jisas Kraes.

Yusum mo Toktok
Raon long Skripja

Taem yu stap tijim ol skripja ia, helpem ol memba blong klas blong andastanem we oli save askem wanwan long yumi blong yumi sakrifaes long ol defren samting from kingdom blong God. Yumi mas wantem blong sakrifaes wanem we God i stap askem long yumi.

1. Blong stap trastem ol rij samting blong wol i save mekem wan man i stap aotsaed long kingdom blong God.

Ridim mo toktok raon long Mak 10:17–30; 12:41–44. Soem pikja blong Kraes mo rij yangfala man.

- Wanem Jisas i talem long rij yangfala man ia we i askem olsem wanem blong kasem laef we i no save finis? (Luk long Mak 10:17–21.) From wanem ol toktok ia oli mekem yangfala man ia i harem nogud? (Luk long Mak 10:22.) Yu ting se from wanem Lod i bin askem hem blong hem i givimaot evri samting we hem i gat? Olsem wanem yumi save yusum ol toktok blong Sevyia i go long rij yangfala man ia?

Presiden Joseph F. Smith i bin talem: “Wanem i had wetem yangfala man ia [hem i] we hem i bin gat plante samting, mo hem i wantem moa blong dipen long ol rij samting blong hem be i no blong givimaot evriwan mo folem Kraes. . . . I no gat man i save kasem presen blong laef we i no save finis, be sapos nomo hem i glad blong givimaot evri samting blong wol ia blong mekem se hem i save kasem laef ia” (*Gospel Doctrine*, 5th ed. [1939], 261).

- Wanem Jisas i tijim abaot rilesensip bitwin hemia blong gat ol rij samting mo hemia blong go insaed long kingdom blong God? (Luk long Mak 10:23–25.) Wanem hem i defren long hemia blong gat ol rij samting mo hemia blong trastem olgeta rij samting ia? Olsem wanem yumi save gat wan stret fasin long saed blong fasin blong gat ol samting blong wol ia? (Luk long Mosaea 4:19, 21.)

Presiden Smith i bin tijim tu se: “God i no stap lukluk ol man. Rij man i save go insaed blong kingdom blong heven i fri nomo olsem hemia we i pua, sapos nomo bae hem i tekem hat blong hem wetem ol gudfala filing blong hem i go folem loa blong God mo prinsipol blong trutok; sapos nomo hem i putum ol tingting blong hem i stap long God, hat blong hem i stap long trutok, mo sol blong hem i stap blong mekem ol stamba tingting blong God i kamtru, mo i no putum ol tingting mo ol hat blong hem mo ol hop blong hem long ol samting blong wol” (*Gospel Doctrine*, 260–61).

- Komperem rij man mo pua wido we oli tokbaot long Mak 12:41–44. Wanem wido i glad blong mekem we rij man ia i no glad blong mekem? (Luk long Mak 12:44. Hem i glad blong givim evri samting we hem i bin gat blong kingdom blong God.) Olsem wanem yumi save developem wan fasin we i semmak long pua wido ia?

2. Lukaotem ol rij samting blong heven, be i no hemia blong wol.

Ridim mo toktok raon long Luk 12:13–21.

- Wanem Jisas i talem long man ia we i stap wari long ol samting we papa blong hem i lego long hem? (Luk long Luk 12:13–15.) Wanem hem i fasin blong kavet? (Wan strong tingting blong wantem plante rij samting o blong wantem ol samting blong nara man.) Wanem samting ol pipol oli stap kavetem tedei? From wanem i gat denja blong kavetem samting?
- Long wan wol we i stap putum ol samting blong wol i bigwan, olsem wanem yumi save tingbaot we yumi, olsem man, oli no lukluk se yumi impoten tru long ol samting we yumi stap gat long wol ia? (Luk long Luk 12:15.) Wanem blessing i moa impoten bitim ol samting blong wol? (Luk long Luk 12:31–34; D&C 6:7 blong kasem sam eksampol.)
- Olsem wanem man ia insaed long parabol blong rij man ia we i no gat hed, i bin kasem blessing? (Luk long Luk 12:16.) Wanem hem i bin tingting blong mekem wetem wanem we i ova i stap? (Luk long Luk 12:18.) Ol aksen blong hem i soemaot wanem? (Luk long Luk 12:19–21. Hat blong hem i stap long ol rij samting blong hem.) Wanem nao bae hem i save mekem wetem ol samting ia, sapos hem i bin lukaotem ol samting blong heven, be i no ol samting blong wol? (Luk long Mosaea 4:26; D&C 52:40.)
- From wanem plante pipol i stap putum hat blong olgeta i go long ol samting blong wol nating oli save se bae ol samting ia oli stap blong smol taem nomo? Olsem wanem nao bae yumi save se yumi stap wari tumas long ol samting blong wol ia? Olsem wanem yumi save givim moa long ol samting we yumi gat long wol ia mo ol nara blesing we yumi gat olsem taem mo ol talen blong yumi? (Bae yu save leftemap tingting blong ol memba blong klas blong tingting moa long ol kwestin ia taem oli stap aotsaed long klas, olgetawan o taem oli stap wetem ol memba blong famle.)

3. Olgeta man we oli folem Kraes, oli mas wantem blong livim evri samting blong oli save stap olsem ol tru disaepol.

Ridim mo toktok raon long ol ves we yu jusumaot long Luk 14:15–33.

- Taem hem i stap eksplenem parabol blong bigfala kakae, Elda James E. Talmage i bin tijim se olgeta man we oli bin invaetem olgeta oli representem ol kavenan pipol, o haos blong Isrel. Taem wokman ia (Jisas) i bin askem olgeta blong kam long kakae (akseptem gospel), oli bin mekem ol ekskius mo oli no bin wantem blong kam (*Jesus the Christ*, 3rd ed. [1916], 452). From wanem ol man Isrel oli no bin wantem kam long kakae ia? Huia “ol puaman, mo ol blaenman, mo ol man we bodi blong olgeta i nogud” we oli bin kam long kakae? (Luk 14:21).
- Olsem wanem parabol blong bigfala kakae ia i save tokbaot yumi tu? Wanem ekskius o toktok yumi stap mekem blong yumi no stap go kakae long tebol blong Lod—eksampol, blong yumi no stap ridim ol skripja blong yumi o stap go long tempol? Olsem wanem yumi save stap soemaot se yumi akseptem invitesen blong Lod blong go long kakae blong Hem?
- Jisas i bin tijim se ol disaepol blong Hem oli mas wantem blong sakrifaes long eni samting we Hem i askem long olgeta (Luk 14:26–33). Wanem sam long ol samting we Hem i bin askem ol fas disaepol blong oli sakrifaes long ol? Wanem Lod i askem yu blong yu sakrifaes long hem? Wanem blesing yu bin gat taem yu bin mekem ol sakrifaes ia?

4. Lukaot long ol rij samting blong spirit wetem strong glad tingting mo ful paoa.

Ridim mo toktok raon long ol ves we yu jusumaot long Luk 16:1–12. Blong helpem ol memba blong klas blong andastanem parabol blong bos we i no mekem stret samting, mo serem ol infomesen ia:

Elda James E. Talmage i bin eksplenem se Lod i bin yusum parabol ia “blong soem wanem i defren long olgeta man we oli kea, oli gat tingting mo oli glad blong mekem wok, mo oli stap mekem bisnis blong winim mane, mo olgeta man we oli stap mekem bisnis blong winim mane be hat blong olgeta i blong oli mas winim ol mane ia nomo.” Lod i no talem se bae yumi mas kopi long ol rabis fasin blong nogud bos ia, be yumi mas lukaot blong lukaotem ol rij samting blong spirit wetem sem fasin mo hadwok ia we nogud bos ia i stap mekem taem hem i lukaotem ol samting blong wol.

Elda Talmage i gohed, “Ol man we tingting blong olgeta i stap long ol samting blong wol, oli no stap tingting long fiuja blong olgeta, mo plante taem oli stap putum plante samting tumas i stap; be ol ‘pikinini blong laet’, o olgeta we oli bilif se ol rij samting blong spirit oli antap moa bitim ol samting blong wol, oli no stap mov tumas, oli kwaet mo oli stap lukaot, o oli waes” (*Jesus the Christ*, 463).

- Askem ol memba blong klas blong tekem sam taem naoia, mo insaed long tingting blong olgeta, oli tingting long hamas taem, tingting, mo paoa oli stap spendem blong putum plante mane mo pem samting i stap mo hamas taem, tingting mo paoa oli spendem blong lukaotem ol samting blong spirit. Olsem wanem yumi save gat moa tingting mo stap glad mo wok moa blong lukaotem ol rij samting blong spirit?

Las Toktok

Testefae se blong kasem laef we i no save finis, yumi mas wantem blong putum sam samting blong wol i stap mo stap sevem Lod wetem ful hat, strong tingting mo paoa blong yumi. Leftemap tingting blong ol memba blong klas blong talem tangkyu from ol blesing blong wol ia be blong oli lukluk long olgeta long stret fasin blong hem.

**Sam Nara Aedia
Blong Tij**

Ol nara tul ia oli kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Fasin blong Putum Tingting i Stap Daon

Ridim mo toktok raon long Luk 14:7–11.

- Olsem wanem yu bin luk trutok ia we i stap long toktok blong Jisas we i stap insaed long Luk 14:11?

2. Tru Jareti

- Wanem yumi save lanem long Luk 14:12–14 abaot olsem wanem blong stap sev? (I save gat ol ansa olsem we yumi no mas givim seves wetem tingting se bae yumi kasem wan samting afta long hem, o yumi no mas givim seves nomo long olgeta we bae oli talem tangkyu mo iven bae oli talem tangkyu long yumi.) Taem yumi givim seves, wanem nao hem i ol stret tingting we yumi mas gat?
- Olsem wanem tru jareti i stap helpem yumi blong yumi stap kolosap moa long Lod?

3. Parabol blong rij man mo Lasaros

Mekem ol memba blong klas oli ridim mo toktok raon long parabol we i stap insaed long Luk 16:19–31.

- Afta we rij man i ded, wanem nao hem i askem Papa Ebrahim blong mekem blong ol brata blong hem? (Luk long Luk 16:27–28.) Olsem wanem Ebrahim i bin ansa? (Luk long Luk 16:29–31.) Hemia i tijim wanem long yumi abaot fasin blong stap lisin long ol profet?
- Olsem wanem parabol ia i stap tijim yumi se hem i impoten tumas blong stap lukaot long ol pua man? (Luk long D&C 104:18.)

Ating bae ol yut oli glad blong mekem wan drama blong parabol ia. Putum tu (2) memba blong klas (Ebrahim mo Lasaros) long wan saed blong wan fanis, we yu save mekem wetem ol jea (bigfala hol), mo wan nara memba blong klas (rij man) long nara saed. Mekem wan nambafo memba blong klas i stap olsem nareta. Mekem ol memba blong klas oli ridim ol laen blong olgeta kwaet nomo; ol laen ia oli stap long Luk 16:19–31, mo nareta bae i ridim evri samting we olgeta narawan oli no talem. (Luk long *Teaching—No Greater Call*, 141–42.)

Stamba Tingting Blong helpem ol memba blong klas blong andastanem glad we i kam taem yumi sakem sin mo yumi helpem ol narawan blong oli sakem sin.

- Rere long Lesen**
1. Ridim, tingting hevi, mo prea abaot ol skripja ia:
 - a. Luk 15:1–10. Tru long parabol blong sipsip we i lus mo parabol blong smol mane, Jisas i stap tijim olsem wanem ol sol oli gat bigfala praes.
 - b. Luk 15:11–32. Tru long parabol blong yangfala boe we i lusum rod, Jisas i stap tijim se Papa long Heven i stap glad tumas long olgeta we oli stap sakem sin. Sevya i stap tijim tu ol man we oli stap folem Hem se oli mas fogif.
 - c. Luk 17:11–19. Wan man we i kam gud long sik ia, leprosi, i kambak blong talem tangkyu long Jisas.
 2. Sam moa riding: Matiu 18:11–14.
 3. Sapos ol pikja ia Yangfala Man we i Lusum Rod (62155; Gospel Art Pikja Kit 220) mo Ol Ten Man we i Kasem Leprosi (62150; Gospel Art Pikja Kit 221) oli stap, yusum olgeta long taem blong lesen.
 4. Wan tingting blong tij: Jisas, plante taem, i askem ol kwestin blong leftemap tingting long olgeta we oli stap lisin long Hem blong oli yusum ol prinsipol we Hem i bin stap tijim (luk long Matiu 16:13–16; Luk 7:41–42). Wetem prea, rere long ol kwestin we bae i leftemap tingting blong ol memba blong klas blong tekem pat long ol toktok mo bae i helpem olgeta blong andastanem mo yusum ol prinsipol we oli tijim. (Luk long *Teaching—No Greater Call*, 105–6, 130–31.)
-

**Wan Tingting
blong Lesen**

**Aktiviti blong
Pulum Tingting**

Olsem we i stret, yusum aktiviti ia o wan aktiviti blong yuwan blong statem lesen.

Invaetem ol memba blong klas blong talem abaot wan taem we oli bin lusum wan samting we i impoten long olgeta o taem oli lusum wan memba blong famle. Afta askem ol kwestin ia:

- Yu bin filim olsem wanem taem samting ia o man ia i bin lus? Yu bin filim olsem wanem taem samting ia o man ia oli faenem hem bakegen?

Yu save askem ol memba blong klas blong oli tokbaot ol eksperiens we oli bin gat taem we oli bin lus mo afta oli faenem olgeta bakegen.

Eksplenem se plante taem, Jisas i bin tijim ol lesen long saed blong spirit mo hem i stap tokbaot olgeta wetem ol samting we man i stap go tru long olgeta evri dei. Lesen ia i toktok raon long sam parabol we i tijim olsem wanem hem i impoten blong stap lukaot mo faenem olgeta we oli lus.

Taem yufala i stap toktok raon long ol toktok ia long skripja, helpem ol memba blong klas blong andastanem se Papa long Heven mo Jisas Kraes oli lavem wanwan long yumi mo Tufala i wantem yumi blong gobak laef wetem Tufala bakegen.

1. Sevy a i stap tijim olsem wanem ol sol oli gat bigfala praes.

Ridim mo toktok raon long Luk 15:1–10. Eksplenem se Jisas i stap presentem parabol blong sipsip we i lus mo parabol blong smol mane afta we Ol Farisi mo ol tija blong loa oli stap toktok agens mo talem “Man ya, hem i glad blong luk ol man nogud, mo blong go kakae wetem olgeta” (Luk 15:2).

- Insaed long parabol blong sipsip we i lus, man blong lukaot long olgeta i livim naentinaen sipsip blong faenem wan we i bin lus (Luk 15:4). Insaed long parabol blong smol mane, woman ia i lukaotem gud wan smol mane ia nomo we i bin lus (Luk 15:8). Wanem yumi save lanem aot long ol aksen blong man we i lukaot long sipsip ia mo woman ia? (Luk long D&C 18:10–13.)
- Long wanem wei nao wan man i save “lus”? Wanem hem i wok blong yumi long olgeta we oli lus? (Luk long Luk 15:4–5, 8; Alma 31:34–35.)

Presiden Gordon B. Hinckley i bin talem:

“Sam long yumi . . . oli stap krae from sobodi blong olgeta mo safaring blong olgeta mo from oli stap olgetawan nomo o oli fraet. Wok blong yumi, hem i wan bigfala mo tabu wok blong go long olgeta mo helpem olgeta, blong leftemap olgeta, blong fidim olgeta sapos oli hanggri, blong fidim ol spirit blong olgeta sapos oli tosta from trutok o fasin we i stret mo gud . . .

“. . . I gat olgeta we, i bin gat wan taem, we oli bin hot gud insaed long fet blong olgeta, be fet blong olgeta i bin go go i kolkol. Plante long olgeta oli stap wantem blong kambak be oli no save stret olsem wanem blong mekem. Oli nidim ol gudfala han blong fren blong i go kasem olgeta. Wetem smol wok nomo, plante long olgeta, oli save tekem olgeta i kambak blong kakae bakegen long tebol ia blong Lod.

“Ol brata mo sista blong mi, bae mi hop, mi prea se wanwan long yumi . . . bae i mekem tingting blong lukaotem olgeta we i stap nidim help, olgeta we oli harem nogud tumas mo olgeta we oli stap long ol hadtaem, mo leftemap olgeta long spirit blong lav mo tekem olgeta i kam long Jos, long ples we i gat tu ol strong han mo sam hat we i fulap long lav, bae oli mekem olgeta oli filim gud, oli givim komfot long olgeta, oli sastenem olgeta, mo putum olgeta long wan laef we bae oli save hapi mo oli save mekem mo givim gudfala samting” (insaed long Conference Report, Okt. 1996, 118; o *Ensign*, Nov. 1996, 86).

- Olsem wanem bae yumi mekem taem wan we i bin lus i kambak bakegen? (Mekem wan memba blong klas i givim wan tingting we i stap long Luk 15:5, 6, mo 9. Luk tu long ol ves 7 mo 10 mo D&C 18:15–16.)

2. Jisas i tijim se Papa long Heven i stap glad blong fogivim hem we i sakem sin.

Ridim mo toktok raon long Luk 15:11–32. Soem pikja blong yangfala man we i lusum rod.

- Insaed long parabol blong yangfala man we i lusum rod, wanem yangfala boe ia i mekem wetem wanem we papa blong hem i bin givim long hem? (Luk long Luk 15:13.) Wanem sam long ol wei we sam pipol tedei, oli stap mekem ol sem mistek ia olsem yangfala boe ia?
- Wanem i bin hapen long yangfala boe ia we i lusum rod afta we hem i westem nating ol samting we papa blong hem i bin givim long hem? (Luk long Luk 15:14–16.) Olsem wanem samting ia i semmak long yumi tedei?
- Taem yangfala boe ia i bin stap long hadtaem, huia longwe longwe i bin stap lukaot long hem? (Luk long Luk 15:16.) Wanem yumi save lanem long hemia?
- Hu boe ia i bin tingting long hem taem hem i bin luk se i no gat wan man longwe longwe i bin stap lukaot long hem? (Luk long Luk 15:17.) Wanem yumi save lanem abaot fasin blong sakem sin long fasin blong yangfala boe ia? (Luk long Luk 15:18–19.)
- Wanem papa ia i bin mekem taem hem i bin luk se boe blong hem i kambak? (Luk long Luk 15:20.) Olsem wanem papa ia i ansa long boe blong hem taem boe blong hem i konfes long hem? (Luk long Luk 15:21–24.) Olsem wanem ansa blong papa ia i semmak long ansa blong Lod taem yumi stap sakem sin blong yumi? (Luk long Luk 15:7; Mosaea 26:30; D&C 58:42.)
- Long wanem wei yumi, yumi semmak nomo long yangfala boe ia? (Luk long toktok we i stap daon ia.) Wanem hop, parabol blong yangfala boe ia i stap givim long yumi?

Taem hem i stap luklukbak long parabol blong yangfala boe ia we i lus, Presiden Gordon B. Hinckley i bin talem: “Mi askem yu blong yu ridim stori ia. Evri papa mo mama oli mas ridim bakegen mo bakegen. Hem i bigwan inaf blong i tekem evri kaos, i bigwan inaf blong i tekem evri man long wol ia, from se yumi evriwan, yumi ol boe mo gel we i nid blong sakem sin mo tekem pat long sore ia blong Papa long Heven we i save fogif, mo afta folem eksampol blong Hem?” (“Of You It Is Required to Forgive,” *Ensign*, Jun 1991, 5).

- From wanem bigfala boe blong hem i kros wetem ol wei we papa blong hem i bin risivim yangfala boe blong hem? (Luk long Luk 15:25–30.) Olsem wanem papa ia i ansa long toktok blong bigfala boe blong hem? (Luk long Luk 15:31–32.) From wanem hem i had blong welkam bakegen long wan “yangfala boe we i bin lus” mo i bin sakem sin blong hem? Wanem yumi save lanem long ansa blong man ia we hem i givim long boe blong hem we i bin kambak? (Luk long Luk 15:32.)

3. Wan man we Jisas i mekem hem i kam gud long sik ia, leprosi i kam bak talem tangkyu long hem.

Ridim mo toktok raon long Luk 17:11–19. Soem pikja blong Olgeta Ten Man we i Gat Leprosi.

- Taem Sevya i stap go long Jerusalem, hem i bin hilim ten man we i gat sik leprosi (Luk 17:11–14). Long olgeta ten man ia, hamas i bin gobak blong talemaot tangkyu blong olgeta? (Luk long Luk 17:15–16.) Wanem sam long ol tingting we yumi gat taem yumi, semmak olsem olgeta naen man we i gat leprosi, i no stap soem tangkyu blong yumi from ol blesing we yumi stap kasem? From wanem hem i impoten blong yumi mas talemaot tangkyu blong yumi long Lod?

- Nating olgeta ten man we i gat leprosi ia oli bin kam klin, wan man nomo we i bin kambak, i kam klin evriwan (Luk 17:14, 19). Wanem hem i defren taem man i kamgud mo taem man i kamgud evriwan? (Luk long toktok we i stap daon.) Olsem wanem fasin blong talem tangkyu mo fet i save helpem yumi blong yumi kamgud evriwan?

Bishop Merrill J. Bateman i bin tijim: “Taem hem i kam gud evriwan, man we i kasem leprosi we i bin talem tangkyu, i kam gud insaed mo aotsaed. Long dei ia, naen man we i sik long leprosi, skin blong olgeta i kam gud evriwan, be wan nomo, fet blong hem i bin mekem hem i kam gud evriwan” (insaed long Conference Report, Epr. 1995, 16; o *Ensign*, Mei 1995, 14).

Las Toktok

Testefae se yumi stap filim bigfala glad taem yumi sakem sin mo gobak long Lod mo taem we yumi stap helpem ol nara man. Bae yu save talemaot tangkyu blong yu long ol parabol blong Jisas mo ol nara tijing we i soem lav blong God long ol pikinini blong Hem mo tingting blong Hem blong yumi lavem wanwan long yumi.

Sam Nara Aedia Blong Tij

Ol nara tul ia oli kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Parabol blong man blong wok

Ridim mo toktok raon long parabol blong man blong wok (Luk 17:5–10).

- Jisas i presentem parabol ia afta we Ol Aposol blong Hem oli bin askem Hem “Plis yu mekem bilif blong mifala i kam strong moa” (Luk 17:5). Wanem yumi save lanem long parabol ia long fasin we yumi save mekem fet blong yumi i kam strong moa? (Olsem ansa, i save gat se yumi stap grup long fet taem yumi sevem gud Lod.)
- From wanem yumi ol man blong mekem wok nomo nating yumi mekem evri samting we Lod i givim komanmen long yumi blong mekem? (Luk long Mosaea 2:20–25.) Hemia i stap soemaot wanem long saed blong lav we Lod i gat long yumi?

2. Parabol blong ol man we oli go wok long wan masta

Ridim mo toktok raon long parabol blong ol man we oli go wok long wan masta (Matiu 20:1–16).

- Long parabol ia, wanem ol man blong wok ia oli kasem?

Talemaot gud se olgeta we oli bin wok wan haoa oli bin kasem pei i semmak olsem olgeta we oli bin wok ful dei. Yumi no mas wari long huia i kasem moa samting o huia i mekem moa seves i go long Lod. Talemaot gud se olgeta we oli bin wok blong wan haoa oli bin kasem sem pei olsem olgeta we oli bin wok ful dei. Yumi no mas wari tumas long huia i stap kasem moa o huia i stap mekem moa seves i go long Lod. Stret Jaj blong yumi evriwan, we i save ol hat blong yumi, bae i jajem yumi wetem sore mo bae i givim yumi wanem we hem i stret (Matiu 20:4, 7).

3. Ol vidio presentesen

Nambafo pat blong “New Testament Customs,” we i wan seleksen blong *New Testament Video Presentations* (53914), bae i gud blong yusum blong eksplenem olsem wanem man i stap lukluk long ol man we oli stap gat leprosi long ol taem blong Niu Testeman mo olsem wanem hem i wan bigfala samting we i tekem ples, we i jenisim laef blong olgeta mo hem i wan blesing long olgeta tenfala man ia we Kraes i hilim olgeta.

Pat ia i tekem tu ol infomesen abaot olsem wanem ol Jiu long Niu Testeman oli bin stap mesarem taem. Bae yu save soem pat ia sapos yu toktok raon long ol man blong wok long wan masta (luk long nambatu aedia blong tij), blong helpem ol memba blong klas blong oli andastanem moa masta ia we i bin go aot long tri haoa mo afta sikis, naen mo ileven haoa (Matiu 20:3, 5–6).

“Bilif Blong Yu i Mekem Yu Yu Gud Finis”

Lesen
19

Luk 18:1–8, 35–43; 19:1–10; Jon 11

Stamba Tingting Blong helpem ol memba blong klas blong divelopem wan fet we i bigwan moa long Papa long Heven mo long Jisas Kraes.

- Rere long Lesen**
1. Ridim, tingting hevi, mo prea abaot ol skripja ia:
 - a. Luk 18:1–8. Tru long parabol blong woman we i stap krae long jaj blong givhan long hem, Jisas i tijim olsem wanem hem i impoten blong stap strong blong stap prea oltaem.
 - b. Luk 18:35–43. Wan blaen man i soem fet blong hem mo Jisas i bin hilim hem.
 - c. Luk 19:1–10. Jisas i go long haos blong Sakias.
 - d. Jon 11:1–54. Jisas i testefae se Hem i hae tumas taem Hem i mekem Lasaros i laef bakegen long ded.
 2. Sam moa riding: Mak 10:46–52; Luk 11:5–13; Bible Dictionary, “Faith,” 669–70.
 3. Sapos ol pikja ia, Stap Hilim Blaen Man (62145; Gospel Art Pikja Kit 213) mo Jisas i Mekem Lasaros I Laef Bakegen long Ded. (62148; Gospel Art Pikja Kit 222) oli stap, yusum olgeta long taem blong lesen.
 4. Wan tingting blong tij: Presiden David O. McKay i bin talem, “Yu save tij gud nomo wanem we yu yuwan yu filim” (*Gospel Ideals* [1953], 190). Lukaot tru long stadi, prea, mo fasin blong obei blong mekem testimoni blong yu long ol prinsipol we yu stap tijim i kam strong moa. (Luk long *Teaching—No Greater Call*, 11–12.)
-

Wan Tingting blong Lesen

Aktiviti blong Pulum Tingting

Olsem we i stret, yusum aktiviti ia o wan aktiviti blong yuwan blong statem lesen. Bifo Elda Hugh B. Brown i go long wan misin, mama blong hem i bin talem long hem:

“Hugh, yu rimemba taem yu wan smol boe mo yu stap gat wan nogud drim o yu stap wekap long naet mo yu bin stap fraet? Yu stap long rum mo yu stap singaot ‘Mama, yu stap ia?’ mo bae mi ansa mo bae mi traem blong mekem yu harem gud mo tekemaot ol fraet we yu gat. Naoia taem yu stap go long wan misin mo yu go aotsaed long wol, bae i gat ol taem we bae yu fraet, bae yu filim se yu no strong, yu filim se yu no gud blong wan samting, yu stap yuwan, mo yu gat ol problem. Mi wantem yu blong save se yu save singaot long Papa blong yu long Heven olsem we yu bin stap singaotem mi mo talem ‘Papa, yu yu stap ia? Mi nidim help blong yu.’ Mekem hemia wetem save ia se Hem i stap ia mo Hem i rere blong helpem yu sapos yu mekem pat blong yu mo yu stap laef klin inaf blong kasem ol blesing blong yu. Mi wantem talem long yu bakegen se Hem i stap ia mo bae Hem i ansarem ol prea mo ol nid blong yu we i moa gud long yu” (Marvin J. Ashton, “Know He Is There,” i talem, *Ensign*, Feb. 1994, 50).

Eksplenem se insaed long lesen ia, bae yumi stadi long ol stori long skripja we i save helpem yumi blong developem bigfala fet se Papa long Heven mo Jisas Kraes oli save yumi mo oli lavem wanwan long yumi.

Yusum mo Toktok
Raon long Skripja

Wetem prea, jusum ol toktok long skripja, ol kwestin, mo ol nara tul blong lesen we bae i stret gud long ol nid blong ol memba blong klas. Toktok raon long olsem wanem nao ol skripja we yu bin jusum oli save yusum long laef evri dei. Leftemap tingting blong ol memba blong klas blong oli serem eksperiens we i go wetem ol prinsipol blong skripja.

1. Jisas i presentem parabol blong woman we i krae long jif blong i givhan long hem.

Ridim mo toktok raon long Luk 18:1–8. Eksplenem se Jisas i presentem parabol ia i go long wan grup blong Ol Farisi.

- Folem Luk 18:1, from wanem Jisas i givim parabol blong woman we i krae long jif ia? Olsem wanem parabol ia i tijim yumi blong yumi “mas prea oltaem”? (Luk long Luk 18:1–8.)

Elda James E. Talmage i bin tijim, “Jisas i no bin talem se taem jif ia bae i lukluk long rikwes ia bae God tu bae i lukluk long hem; be Hem i talemaot gud se sapos i gat wan man olsem jaj ia, we ‘i no save fraet long God mo i no save tingbaot ol man,’ bae i save harem rikwes blong wido ia mo givim samting we hem i askem, bae i no gat man i mas gat tu tingting se God, Hem we i Stret mo i Gat Sore, bae i harem mo ansarem rikwes ia” (*Jesus the Christ*, 3rd ed. [1916], 436).

- Hem i minim wanem blong stap prea oltaem? (Luk long Luk 18:7; Alma 34:27.) Wanem blesing i save kam long yumi taem yumi stap prea oltaem? (Luk long Luk 18:7–8; 2 Nifae 32:9; D&C 90:24.)
- Olsem wanem nao, taem wan i stap strong blong stap prea oltaem, i olsem wan aksen blong fet? Wanem bae yumi mas mekem taem yumi filim se yumi bin stanap strong blong stap prea oltaem mo yumi filim se yumi no bin kasem wan ansa?

Elda Richard G. Scott i bin talem:

“Hem i wan rong blong tingting se evri prea we yumi mekem bae i gat ansa blong hem i kam kwiktaem nomo. Sam prea i nidim blong yumi hadwok plante long hem yumiwan. . . .

“Taem yumi stap eksplenem wan problem mo yumi givim wan tingting blong stretem [long Papa blong yumi long Heven], samtaem Hem i ansa yes, samtaem Hem i ansa no. Plante taem Hem i holem taet wan ansa, i no from se Hem i no wantem save, be from se Hem i lavem yumi—i tru. Hem i wantem yumi blong yumi mekem mo yusum ol trutok we Hem i bin givim long yumi. Blong yumi save gru, yumi nid blong yumi trastem se yumi gat paoa blong mekem ol stret tingting. Yumi nid blong mekem wanem we yumi *filim* i stret blong mekem. Long stret taem, bae Hem i ansa. Bae Hem i no save lego yumi nating” (insaed long Conference Report, Okt. 1989, 38; o *Ensign*, Nov. 1989, 30–31).

- Wanem yumi bin lanem taem yu bin stanap strong oltaem blong stap prea?

2. Wan blaen man i soem fet blong hem mo Jisas i hilim hem.

Ridim mo toktok raon long Luk 18:35–43. Soem pikja blong Jisas we i Stap Hilim Blaen Man.

- Olsem wanem blaen man kolosap long Jeriko i soem se hem i bin gat fet long Lod? (Luk long Luk 18:38–42.) Olsem wanem yu bin kasem blesing taem yu bin mekem fet blong yu long Jisas Kraes i wok?
- Olsem wanem man ia i bin soem tangkyu blong hem taem hem i bin save luk bakegen? (Luk long Luk 18:43; luk tu long Mak 10:52.) Olsem wanem yumi save soem tangkyu blong yumi long Lod?

3. Jisas i go long haos blong Sakias.

Ridim mo toktok raon long Luk 19:1–10.

- Huia Sakias? (Luk long Luk 19:2. Eksplenem se ol pablikan oli ol man Jiu oli bin stap wok olsem ol man blong kolektem takis blong gavman blong Rom. Ol nara man Jiu oli no bin stap laekem ol pablikan mo oli bin tekem olgeta olsem ol man we i salem kantri blong olgeta mo ol man blong sin.)
- Olsem wanem Sakias i bin soem se hem i wantem tumas blong luk Jisas? (Luk long Luk 19:3–4.) Wanem Jisas i bin talem long Sakias afta we Hem i luk Sakias antap long tri? (Luk long Luk 19:5.) Olsem wanem Sakias i bin ansa long ol toktok blong Jisas? (Luk long Luk 19:6.) Wanem yumi save mekem blong yumi save risivim Sevya wetem moa gladhat insaed long ol hom blong yumi?
- Olsem wanem ol pipol oli mekem taem Jisas i bin go stap wetem Sakias? (Luk long Luk 19:7.) Olsem wanem ansa blong Jisas i go long Sakias i defren long ol nara ansa blong Hem? (Luk long Luk 19:5.) Wanem yumi save lanem aot long eksampol blong Jisas long stori ia?
- Plante pipol oli bin stap longwe long Sakias from wok blong hem olsem wan man blong kolektem takis (Luk 19:2, 7; Bible Dictionary, “Publicans,” 755). Long wanem wei yumi stap mekem ol sem kaen jajmen agensem ol nara man? From wanem hem i impoten blong yumi no stap stap longwe long ol naraman o stap tingting we yumi moa gud bitim olgeta? (Luk long Alma 5:54–56; 38:13–14.) Olsem wanem yumi save winim ol kaen filing we oli nogud, we oli agensem ol narawan?

Elda Joe J. Christensen i bin talem: “I gat olgeta we oli wekap long evri moning we oli fraet tumas blong go long skul, o iven long wan aktiviti blong Jos, from se oli wari long olsem wanem bae oli tritim olgeta. Yu gat paoa blong jenisim ol laef blong oli kam gud moa. . . . Lod i stap lukluk yu, se bae yu save bildimap olgeta mo givhan long olgeta. Tingting daon moa long yuwan mo moa abaot paoa we yu gat blong helpem ol narawan, iven olgeta blong famle blong yuwan” (insaed long Conference Report, Okt. 1996, 54; o *Ensign*, Nov. 1996, 39).

4. Jisas i mekem Lasaros i laef bakegen long ded.

Ridim mo toktok raon long ol skripja we yu jusum long Jon 11:1–54. Eksplenem se i no longtaem afta we Jisas i bin go long haos blong Sakias, hem i kasem mesej long ol fren blong Hem, Meri mo Mata se brata blong tufala, Lasaros, we i gudfala fren blong Jisas tu, i sik (Jon 11:1–5). Tu dei afta, Jisas i talemaot long ol disaepol blong oli go wetem Hem long Betani, taon blong Judia, long ples we Meri, Mata, mo Lasaros oli bin stap laef long hem (Jon 11:6–7).

- Taem Jisas i bin go bak long Betani, Lasaros i bin ded fo dei finis i pas (Jon 11:17). Wanem Mata i bin mekem taem hem i bin harem se Jisas i stap kam? (Luk long Jon 11:20.) Wanem i mekem yu yu sapraes abaot testemoni blong Mata abaot hae misin blong Sevyia? (Luk long Jon 11:21–27.)
- Wanem Jisas i bin mekem taem Hem i bin luk Meri mo ol narawan oli bin stap krae? (Luk long Jon 11:33–35.) Olsem wanem stori ia i stiarem ol filing blong yu abaot Jisas?
- Nating strongfala testemoni blong hem, fet blong Mata i no strong taem Jisas i bin askem blong oli tekemaot ston ia we i blokem hol blong ston we Lasaros i bin stap insaed long hem (Jon 11:39). Olsem wanem Jisas i bin helpem hem? (Luk long Jon 11:40.) Wanem nao yumi save lanem long hemia long saed blong wanem nao Lod i wantem yumi blong mekem?
- Wanem prea we Jisas i bin mekem bifo i mekem Lasaros i laef bakegen long ded, i stap tijim yumi abaot rilesensip blong Hem wetem Papa blong Hem? (Luk long Jon 11:41–42.) Olsem wanem yumi save folem eksampol blong Jisas long ol prea blong yumi wanwan mo long ol famle prea blong yumi?

Soem pikja blong Jisas i mekem Lasaros i laef bakegen long ded, mo invaetem wan memba blong klas blong ridim Jon 11:43–44.

- Jisas i bin mekem tu pipol finis i laef bakegen long ded (Mak 5:22–24, 35–43; Luk 7:11–17). Wanem, taem Hem i mekem Lasaros i laef bakegen long ded i defren long tufala fas taem we Hem i bin mekem man i laef bakegen long ded? (Gel blong Jaeros mo boe blong wido blong Nen, oli mekem tufala i laef bakegen long ded stret afta we bodi mo spirit blong tufala i seperet. Oli no bin stap long ol hol blong ston. Lasaros i bin ded blong fo dei finis, mo oli bin putum bodi blong hem finis long gref blong hem long hol blong ston.)
- Olsem wanem merikol blong mekem Lasaros i laef bakegen long ded i stap olsem wan witness blong hae misin blong Sevyia? Wanem merikol ia i mekem long ol pipol we oli bin witnes long hem? (Luk long Jon 11:45–46.) Olsem wanem merikol ia i mekem fet blong yu long Sevyia i kam strong moa?

Las Toktok

Eksplenem se ol prinsipol we oli bin tijim insaed long ol stori blong yufala i bin toktok raon long olgeta, oli save mekem fet blong yumi long Papa long Heven mo Jisas Kraes i kam strong moa. Afta we yu luklukbak smol taem nomo long ol stori ia, ridim toktok ia we i kam long Elda Thomas S. Monson:

“Taem we i go pas finis i kam kasem tedei, i no jenisim paoa blong Ridima blong jenisim laef blong ol man. Olsem we Hem i bin talem long Lasaros we i bin ded, Hem i stap talem sem samting long yu mo mi: ‘. . . yu kamaot.’ (Jon 11:43.) Yu kamaot long ples blong stap gat tu tingting oltaem. Yu kamaot long fasin blong harem nogud from ol sin. Yu kamaot long ples ia we bilif blong yu i ded i stap. Yu kamaot i kam long wan niu laef. Yu kamaot, yu kam” (insaed long Conference Report, Epr. 1974, 72; o *Ensign*, Mei 1974, 50).

Leftemap tingting blong ol memba blong klas blong oli lukluk long sam rod we i save mekem fet blong olgeta long Papa long Heven mo Jisas Kraes i kam strong moa.

**Wan Nara Aedia
blong Tij**

Ol nara tul ia oli kam helpem lesen aotlaen we i stap. Bae yu save yusum aedia ia olsem pat blong lesen.

Parabol blong Farisi mo man blong tekem takis

Ridim mo toktok raon long parabol blong Farisi mo man blong tekem takis (Luk 18:9–14).

- Olsem wanem yu save tokbaot prea blong Farisi long parabol ia? Olsem wanem bae yu tokbaot prea blong man blong tekem takis?
- Hem i minim wanem we “man we hem nomo i stap leftemap hem, bambae God i mekem hem i stap daon, be man we hem nomo i mekem hem i stap daon, God bambae i leftemap hem”? (Luk long Luk 18:14; Ita 12:27.)

Matiu 21–23; Jon 12:1–8

Stamba Tingting Blong helpem ol memba blong klas blong luksave mo ronwe long fasin blong gat tu fes mo mekem komitmen blong olgeta long Jisas Kraes i kam strong moa.

- Rere long Lesen**
1. Ridim, tingting hevi, mo prea abaot ol skripja ia:
 - a. Jon 12:1–8. Jisas i wokbaot i go long Betani, long ples we Meri i anoentem leg blong Hem. Judas i tokbaot Meri from hem i bin yusum wan oel we i sas tumas.
 - b. Matiu 21:1–11. Jisas i gobak long Jerusalem from lafet blong Pasova. Hem i klaem long wan dongki mo go insaed long taon ia blong soem se Hem i wan King.
 - c. Matiu 21:23–46. Ol jif pris mo ol elda oli kam long Jisas insaed long tempol mo jalenjem atoriti blong Hem. Be, Jisas i no ansa long kwestin blong olgeta be i tokbaot parabol blong man we i gat tufala pikinini.
 - d. Matiu 22:15–46. Ol tija blong loa mo Ol Farisi oli traem blong trikim Jisas blong Hem i talem wan samting we bae i letem olgeta blong spolem nem blong Hem mo mekem se bae oli mas faenem Jisas i rong long wan samting.
 - e. Matiu 23. Jisas i tok strong long ol tija blong loa mo Ol Farisi from se oli gat tu fes.
 2. Sam moa riding: Matiu 26:6–13; Mak 11–12; 14:3–9; Luk 11:37–51; 19:29–48; 20; Jon 12:12–18; Bible Dictionary, “Pharisees,” 750; “Sadducees,” 767; “Spikenard,” 776.
 3. Sapos yu yusum aktiviti blong pulum tingting, tekem wan kap we i klin aotsaed mo insaed, mo wan nara kap we i semmak nomo long narawan be aotsaed i klin mo insaed i doti.
 4. Sapos pikja ia, Taem Jisas I Wokbaot long Jerusalem (62173; Gospel Art Pikja Kit 223) i stap, yusum long taem blong lesen.
 5. Wan tingting blong tij: Taem yu stap rere blong tij, yu mas mekem moa samting be i no blong stap ridim ol skripja ia nomo. Stadi long wanwan long ol longfala skripja ia, tri taem. Faswan, ridim blong yu andastanem wanem stori ia i stap tokbaot. Afta, stadi long hem gud moa, mo lukaotem ol prinsipol, ol doktrin mo ol impoten samting we i bin tekem ples. Nao ridim wan moa taem, mo faenemaot wijwan skripja bae i stret long ol nid blong ol memba blong klas blong yu, mo tu planem wan wei blong toktok raon long ol skripja ia.

Wan Tingting blong Lesen

Aktiviti blong
Pulum Tingting

Olsem we i stret, yusum aktiviti ia o wan aktiviti blong yuwan blong statem lesen. Soem tufala kap (luk long “Rere long Lesen” seksen). Mekemsua se ol memba blong klas oli luk aotsaed nomo blong wanwan kap.

- Wijwan long tufala kap ia bae yu glad blong dring long hem?

Soem insaed blong ol kap long ol memba blong klas.

- Naoia wijwan kap bae yu glad blong dring long hem? From wanem?

Eksplenem se Jisas i bin komperem Ol Farisi long wan kap we i klin aotsaed be i doti insaed (Matiu 23:25–26). Ol Farisi oli bin lukluk tumas long ol odinens mo aksen we oli stap mekem we man i luk, mo bae i mekem se man i ting se oli stret mo gud, be Ol Farisi ia oli no wari blong oli stap stret mo gud insaed long ol hat blong olgeta. From hemia nao Jisas i talem se olgeta oli ol man we oli gat tu fes. Lesen ia bae i toktok raon long toktok blong Sevyia we i agensem olgeta we oli gat tu fes—ol pipol we oli stap traem blong man i luk se oli stret mo gud be oli no stap traem blong laef long wan stret mo gud fasin.

Yusum mo Toktok
Raon long Skripja

Taem yu stap tijim ol skripja ia, toktok raon long wanem oli stap tij abaot fasin blong gat tu fes. Leftemap tingting blong ol memba blong klas blong lukluk gud mo stretem ol fasin blong gat tu fes long laef blong olgetawan, be i no blong traem faenem fasin ia long laef blong ol narawan.

1. Meri i anoentem leg blong Jisas.

Ridim mo toktok raon long Jon 12:1–8. Eksplenem se faef dei bifo oli hangem Jisas long Kros, Jisas i bin spendem wan naet wetem ol fren blong Hem long Betani. Long ples ia, Meri, sista blong Mata mo Lasaros, i anoentem leg blong Sevyia wetem wan senta we oli singaotem nad, wan senta we i sas tumas (Jon 12:1–3). Elda James E. Talmage i bin eksplenem from wanem hem i bin mekem samting ia:

“Blong anoentem hed blong wan ges wetem oel, hem i blong givim ona long hem; blong anoentem leg blong hem i blong soem se hem i wan spesel man mo oli gat wan spesel respek long hem; be blong anoentem hed mo leg wetem senta ia, nad, mo plante olsem, hem i olsem wan bigfala respek we oli no stap givim oltaem, iven long ol king. Aksen blong Meri i wan aksen blong presem Hem; hem i bigfala aksen we i soemaot bigfala hat blong hem we i fulap long wosip mo gudfala filing” (*Jesus the Christ*, 3rd ed. [1916], 512).

- Meri i anaontem leg blong Lod blong soem lav blong hem long Lod. Olsem wanem yumi stap soem lav blong yumi long Lod?
- Judas i bin toktok agensem ol aksen blong Meri. Wanem nao hem i talem se oli sud mekem wetem senta ia? (Luk long Jon 12:4–5.) Olsem wanem Judas i wan man we i gat tu fes? (Luk long Jon 12:6. Sapos yu bin yusum aktiviti blong pulum tingting, yusum infomesen we i stap long aktiviti blong eksplenem wanem hem i wan man we i gat tu fes. Poenemaot se wan pat blong lesen we i kam afta bae i toktok raon long olsem wanem Sevyia i stap filim abaot ol man we i gat tu fes.)

2. Jisas i go insaed long Jerusalem blong soemaot se Hem i King

Ridim mo toktok raon long Mati 21:1–11. Soem pikja blong Jisas i go insaed long Jerusalem blong soemaot se Hem i King. Eksplenem se taem Jisas i bin gobak long Jerusalem blong go long Pasova, plante pipol oli bin kam blong luk Hem from se oli bin harem se Hem i bin mekem Lasaros i laef bakegen long ded (Jon 12:17–18). Taem Jisas i stap kam kolosap long taon, wan bigfala grup blong ol pipol oli bin

welkamem Hem, mo oli bin putum ol kaliko blong olgeta long rod blong Hem mo oli singsingaot long Hem wetem ol lif blong tri, mo hemia i wan ona we oli mekem nomo long ol king. Hemia i fulfilim profesi blong Sekaraea (Sekaraea 9:9) mo i stap olsem wan moa witnes se Jisas, Hem i Mesaea we oli bin promes.

- Wanem i mekem yu yu sapraes long stori ia blong Jisas we i stap ron long wan dongki i go long Jerusalem, mo nating Hem i gat tingting i stap daon be yet Hem i stap olsem wan King? Yu ting se bae yu yu filim olsem wanem sapos yu bin stap longwe long dei ia?
- Ol pipol we oli bin singaot long Jisas wetem ol lif blong tri, oli bin luksave Hem olsem wan profet mo king (Matiu 21:9, 11; Luk 19:38), be ol narawan oli no bin andastanem gud misin blong Hem o oli no bin wantem blong save Hem. Long wanem wei nao ol pipol oli no andastanem gud o oli no wantem save long Sevya tedei? Olsem wanem yumi save kam blong akseptem Hem moa insaed long ol laef blong yumi?

3. Jisas i givim parabol blong man we i gat tufala pikinini mo masta blong plantesen.

Ridim mo toktok raon long ol skripja we yu jusum long Matiu 21:23–46.

- Insaed long parabol blong tufala pikinini ia, olsem wanem fas boe i pruvum se hem i stap obei moa bitim nambatu boe? (Luk long Matiu 21:28–30.) Olsem wanem Jisas i bin yusum parabol ia wetem olgeta man we oli bin stap lisin long Hem? (Luk long Matiu 21:31–32; luk tu long Joseph Smith Translation blong Matthew 21:32 long futnot 32*d*.) Olsem wanem ol man blong tekem mane blong takis mo ol woman blong rod oli olsem fas boe ia? (Faswan oli bin sakemaot ol komanmen blong God, be afta, taem Jon i bin prij long olgeta, oli bin akseptem Kraes mo oli bin sakem sin blong olgeta.) Olsem wanem nao ol jif pris mo ol elda oli olsem nambatu boe? (Oli klemem se oli stap folem God, be oli sakemaot ol tijing blong Jon mo oli bin sakemaot Jisas, iven we olgetawan oli bin luk Hem.) Olsem wanem nao, nambatu boe i wan man we i gat tu fes?
- Wanem promes yumi bin mekem long Lod? (Bae yu save toktok raon long ol promes olsem olgeta promes we yumi stap mekem long taem blong baptaes, taem yumi stap tekem sakramen, mo taem yumi stap kasem prishud.) Olsem wanem nao, samtaem, yumi stap olsem nambatu boe ia? Olsem wanem yumi save mekem tingting mo wok blong yumi long Lod i kam strong moa? Olsem wanem yumi save helpem wanwan long yumi blong kipim ol promes we yumi bin mekem long Lod?
- Insaed long parabol blong masta we i gat plantesen (Matiu 21:33–41), masta blong plantesen i representem huia? (Papa blong yumi long Heven.) Ol man blong masta oli representem huia? (Ol Jiu lida blong rilijen long dei blong Jisas) Ol wokman oli representem huia? (Ol profet.) Boe blong masta ia i representem huia? (Jisas Kraes.)
- Long wanem wei ia nao Ol Jiu lida blong rilijen oli olsem ol man blong masta ia? Wanem nao ol jif pris mo ol elda bae oli talem se bae oli talem wanem long masta abaot ol man blong hem, taem bae hem i kam? (Luk long Matiu 21:41.)
- Huia hem i “pos ya we ol man blong wokem haos oli sakem finis”? (Luk long Matiu 21:42; Ol Wok 4:10–12.) Huia ol man blong wokem haos? Wanem Jisas i talem se bae i hapen long ol man blong wokem haos we oli bin sakem pos ia?

(Luk long Matiu 21:43–44.) Olsem wanem ol toktok blong Jisas we i stap long ves 43, bae yumi save yusum long yumiwan bakegen?

- Olsem wanem ol jif pris mo Ol Farisi oli bin ansa taem oli bin luksave se Jisas i stap tokbaot olgeta long parabol? (Luk long Matiu 21:45–46.) Olsem wanem yumi save winim fasin blong stap praod o kros taem oli askem yumi blong sakem sin?

4. Ol tija blong loa mo Ol Farisi oli traem blong trikim Jisas.

Ridim mo toktok raon long ol skripja we yu jusum long Matiu 22:15–46.

Eksplenem se ol ves ia oli rekodem olgeta tri taem, taem Ol Farisi mo Ol Lida blong Laen blong Isrel oli bin traem blong trikim Jisas blong Hem i talem wan samting we bae i letem olgeta blong spolem nem blong Hem mo blong oli faenem Hem i rong long saed blong loa.

- Olsem wanem Ol Farisi oli bin traem faswan blong trikim Jisas? (Luk long Matiu 22:15–17. Eksplenem se sapos Jisas i bin ansa yes long kwestin blong olgeta, bae oli save talem se Hem i rong from se Hem i stap sapotem gavman blong Rom. Sapos Hem i bin talem no, oli bin save talem se Hem i rong from se Hem i agensem gavman.) Wanem nao Jisas i faenem abaot ol man we oli stap askem kwestin long Hem? (Luk long Matiu 22:18. Poenemaot se Lod i save ol hat mo ol tingting blong yumi. Yumi no save haedem wan samting long Hem.) Olsem wanem Jisas i bin ansa long kwestin ia? (Luk long Matiu 22:19–21.) Olsem wanem ansa ia i save lidim yumi taem yumi promes se bae yumi fetful long God mo long ol gavman blong wol? (Luk tu long Ol Toktok blong Bilif 1:12.)
- Olsem wanem ol lida blong ol laen blong Isrel oli bin traem blong trikim Jisas? (Luk long Matiu 22:23–28.) Long wanem wei nao ol lida blong ol laen blong Isrel oli soem se oli gat tu fes long ol kwestin blong olgeta? (Luk long Matiu 22:23. Oli bin mekem olsem se oli gat wari long saed blong mared long taem blong man i laef bakegen long ded be olgeta oli no stap bilif long laef bakegen long ded.) Olsem wanem Jisas i ansa long kwestin blong olgeta? (Luk long Matiu 22:29–30. Eksplenem se Doctrine and Covenants 132:15–16, 19 i mekem tijing blong Jisas ia i klia moa. Olgeta we oli no mekem mo oli no kipim olgeta kavenan blong tempol mared bae oli stap olgetawan nomo long heven. Long olgeta we oli mekem mo oli kipim ol kavenan ia, bae mared blong olgeta bae i stap blong taem we i no save finis.)
- Wanem hem i nambatri taem we oli traem blong trikim Jisas? (Luk long Matiu 22:34–36.) Olsem wanem ansa blong Jisas i stretem kwestin ia? (Luk long Matiu 22:37–40.) From wanem yu ting se tufala bigfala komanmen ia oli impoten tumas? Wanem moa yumi save mekem blong yumi laef moa folem ol komanmen ia?

Elda Howard W. Hunter i bin talem: “Hem we i lavem Lod wetem ful hat blong hem, hem i hem we . . . i rere blong livim evri samting, i mekem eni samting, o i safa long eni samting blong mekem se hem i mekem Hem i glad mo i gat glori. Hem we i lavem God wetem ful sol blong hem, hem i hem we . . . i rere blong livim laef blong hem from Hem mo hem i no wantem save long ol gudfala samting blong wol ia blong mekem se hem i givim glori nomo long Hem. Hem we i lavem God wetem evri paoa blong hem, hem i hem we i givim evri paoa blong bodi mo sol blong hem long seves blong God. Hem we i lavem God wetem ful tingting blong hem, hem i hem we i lukaot blong mekem hem i mas

save God mo tingting blong God, hem i hem tu we i luk God long evri samting, mo i luksave Hem long evri wei" (insaed long Conference Report, Epr. 1965, 58; o *Improvement Era*, Jun 1965, 512).

5. Jisas i tok agensem sin blong fasin blong gat tu fes.

Ridim mo toktok raon long ol ves we yu jusum long Matiu 23.

- Ol tija blong loa mo Ol Farisi oli bin stap pem taeting, oli stap givim samting long ol puaman, oli bin stap atendem ol wosip seves, mo oli bin stap go oltaem long tempol. Wanem nao i bin mekem we Lod i tok strong agensem olgeta? (Luk long Matiu 23:5, 14, 23–28. Oli no bin stap mekem ol samting ia from fet we oli bin gat, be from se oli bin wantem blong ol naraman oli luk olgeta olsem ol man we oli stret mo gud.) Wanem "nambawan tok blong Loa" Lod i talem se oli no bin folem? (Luk long Matiu 23:23.) Olsem wanem yumi save mekemsua se yumi, yumi folem ol "nambawan tok blong Loa" long laef blong yumiwan?
- Olsem wanem yumi, olsem ol memba blong Jos, samtaem yumi gat tu fes? (Olsem eksampol, samtaem taem yumi kam long ol miting blong Jos, yumi wari moa se ol man bae oli stap luk yumi be yumi no wari tumas blong wosipim God. Yumi save komplem long ol koling blong yumi long Jos taem oli no stap lukluk yumi tumas from ol seves we yumi stap givim. Yumi save sastenem ol lida blong Jos blong yumi, afta biaen yumi tok agensem ol tingting we oli mekem.)
- Wanem yumi save mekem blong yumi stap longwe long fasin blong gat tu fes? Askem ol memba blong klas blong tingting long maen blong olgeta abaot ol kwestin ia: Mi stap pem taeting, mi stap givim long ol pua man, mi stap go long ol miting blong mi, mo stap sevem ol narawan blong glori blong miwan nomo o from glori blong God? Long evri aksien blong mi, mi stap lukluk blong mi kam kolosap long Papa blong mi long Heven mo Jisas Kraes?

Las Toktok

Leftemap tingting blong ol memba blong klas blong oli lukluk insaed long laef blong olgeta long fasin ia blong gat tu fes, mo blong tekemaot evriwan. Testefae se taem yumi gat tru hat blong wantem sevem mo obei long Jisas Kraes, mo yumi gat lav mo tru fet long Hem, bae hem i mekem yumi kam kolosap moa long Hem mo bae lav mo fet blong yumi i kam bigwan moa.

Sam Nara Aedia Blong Tij

Ol nara tul ia oli kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Jisas i mekem wan figtri we i no karem frut i go drae, figtri i saen blong fasin blong tu fes o tu tingting

Ridim mo toktok raon long Matiu 21:17–22. Eksplenem se wan nara saen blong fasin blong gat tu fes, hem i figtri we Jisas i bin luk long rod blong Hem i go long Jerusalem.

- Wanem Jisas i bin mekem taem Hem i faenem se tri ia i gat plante lif be i no karem frut? (Luk long Matiu 21:19.) Olsem wanem figtri ia i olsem man we i gat tu fes?

Elda James E. Talmage i bin eksplenem: “[Tri] i olsem samting we Lod i tok nogud long hem mo tu i stap olsem samting we Lod i yusum long toktok blong Hem blong tij, from se tri ia, we i gat plante lif, yet hem i no karem frut. Sapos hem i bin stret blong yumi talem se tri ia i gat fridom blong jus, bae yumi jajem tri ia tu se hem i wan we i gat tu fes; from se hem i no karem wan frut nating, mo antap long hem, hem i gat plante lif we i mekem hem i naes, i mekem nao se hem i stret long kaen man we i gat tu fes o tu tingting.” (*Jesus the Christ*, 3rd ed. [1916], 527).

2. Vidio presentesen

Nambatu pat blong “New Testament Customs,” wan seleksen blong *New Testament Video Presentations* (53914), i stap eksplenem olsem wanem Ol Jiu oli stap yusum ol paos mo ol tasel. Sapos yu no bin soem pat ia long lesen 9, yu save soemaot naeia blong helpem ol memba blong klas blong oli andastanem Matiu 23:5 (“oli mekem ol paos ya blong olgeta oli bigbigwan, mo oli mekem ol tasel we oli hanghang long kona blong klos blong olgeta oli longfala moa winim ol narafala man”). Toktok raon long olsem wanem ol samting ia oli stap olsem saen se ol tija blong loa mo Ol Farisi oli gat tu fes.

3. “Oli wantem tumas blong ol man oli glad long olgeta” (Jon 12:43)

- Jon i bin rekodem se plante pipol we oli bin bilif long Jisas, oli no save talemaot bilif blong olgeta from se “oli wantem tumas blong ol man oli glad long olgeta” (Jon 12:42–43). Olsem wanem samtaem, yumi wari tumas blong kasem ol pres blong ol man? Wanem sam long ol samting we i save kamaot taem wan i lukaotem blong “man oli glad long olgeta”? Olsem wanem yumi save winim tingting blong yumi blong wantem lukaotem pres mo rekonisen we i kam long ol narawan? (Luk long D&C 82:19; 88:67.)

“Wanem Saen we Bambiae i Soemaot we Yu Bambiae Yu Kambak Bakegen?”

Matiu 24

Stamba Tingting Blong helpem ol memba blong klas blong luksave ol saen we bae i kam bifo Sevyia i kambak bakegen mo blong leftemap tingting blong ol memba blong klas blong oli mekem olgeta oli rere long bigfala samting ia.

Rere long Lesen

1. Ridim, tingting hevi, mo prea abaot ol skripja ia:
 - a. Matiu 24:1–5, 9–13, 15–22. Jisas i talemaot fastaem bigfala trabol long Jerusalem.
 - b. Matiu 24:6–8, 14, 23–51. Jisas i talemaot ol saen we bae i kam bifo Taem we bae Hem i Kambak Bakegen, mo i tijim olsem wanem olgeta we oli folem Hem oli save rere long taem ia we bae Hem i kambak bakegen.
2. Sam moa riding: Mak 13; Luk 21:5–36; Doctrine and Covenants 45:15–55.
3. Sapos yu gat pikja blong Taem we Jisas i Kambak Bakegen (62562; Gospel Art Pikja Kit 238) i stap, yusum long taem blong lesen.
4. Wan tingting blong tij: koling ia blong tij, i no minim se wan i mas save evri samting abaot gospel, mekem se yu no mas sem sapos wan memba blong klas i askem wan kwestin we yu no save ansa. Yu no mekemap wan ansa, be talem stret nomo se yu no save mo bae yu traem faenem wan ansa long hem.

Wan Tingting blong Lesen

Aktiviti blong Pulum Tingting

Olsem we i stret, yusum aktiviti ia o wan aktiviti blong yuwan blong statem lesen:

Mekem ol memba blong klas oli lukluk tru long windo mo oli lukluk long skae. Sapos i no gat windo insaed long klasrum, askem wan memba blong klas blong hem i talem se ples i olsem wanem aotsaed bifo oli bin kam long klas. Nao talemaot se bae i san o no tedei. Eksampol, sapos skae i klia, mo hem i hot aotsaed, talemaot se bae i gat sno i no longtaem. Sapos hem i kolkol mo i ren aotsaed, mo i luk olsem se ren bae i gohed blong samtaem, talemaot se bae i hot mo bae i drae long ol nekis faef minit.

Askem ol memba blong klas blong oli tingbaot wanem abaot yu bin talem. Afta we oli givim tingting blong olgeta, askem ol kwestin ia:

- Yu ting se bae weta i olsem wanem long ol nekis haoa we bae i kam? Wanem i stap helpem yu blong talemaot ol toktok ia?
- Olsem wanem ol saen blong weta i save stiaem ol samting we yumi stap mekem? (Olsem ansa, i save gat we yumi stap mekem rere folem ol saen ia. Eksampol, yumi save mekem sam plan blong mekem sam aktiviti aotsaed taem yumi luk se ples i klia, o yumi rere gud blong sapos ren i ren.)

Poenemaot se blong talemaot se bae ples i olsem wanem, i wan wok we yumi stap dipen long ol saen blong helpem yumi blong talemaot wanem bae i hapen. Sapos yumi stap lukaot long ol saen ia, yumi gat smol janis nomo blong yumi sek long olgeta. I semmak, taem yumi stap lukaot long ol saen we Jisas i talem se bae i gat bifo Hem i Kambak Bakegen, i stap helpem yumi blong yumi rere long bigfala taem ia. Lesen ia i gohed blong tokbaot sam long ol saen we Jisas i talem se bae i kam bifo Hem i Kambak Bakegen. (Bae yu save poenemaot se blong talemaot se wan prediksen i olsem blong talemaot se wan samting i *save* hapen, be wan profesi i talemaot wan samting we *bae* i hapen. Wan prediksen long weta, bae i save kamaot rong, be ol profesi blong skripja long saed blong Taem Jisas bae i Kambak Bakegen, bae evriwan bae i kamtru.)

Yusum mo Toktok
Raon long Skripja

Taem yu stap tijim ol skripja ia, helpem ol memba blong klas blong andastanem se Lod i talemaot ol infomesen ia blong helpem yumi blong rere long Taem we bae Hem i Kambak Bakegen. Nating ol hadtaem blong ol las dei, yumi save wet wetem glad long bigfala dei ia.

Eksplenem se Matiu 24 i tekem ol profesi blong Sevyia abaot taem we Jerusalem bae i lus mo abaot long Taem we bae Hem i Kambak Bakegen. Long ol taem we i pas, oli bin jenisim mo putum gud bakegen ol ves insaed long japta ia, mo i mekem se i had blong andastanem wanem nao wan ves i stap tokbaot. Be, olsem pat blong translesen blong hem blong Baebol we i kam tru long insperesen, Profet Josef Smit i mekem i klia tufala profesi mo i putumbak sam moa infomesen. Translesen blong Profet we i kam long insperesen long Matiu 24 oli faenem insaed long Joseph Smith—Matthew insaed long Pearl of Great Price. Lesen ia i soem se oda blong ol ves we i stap long Joseph Smith—Matthew, i tekem tu sam moa infomesen we oli givim long translesen ia.

Soem pikja blong Taem Jisas i Kambak Bakegen truaot long lesen.

1. Jisas i tokbaot fastaem bigfala trabol long Jerusalem.

Toktok raon long Matiu 24:1–5, 9–13, 15–22. Invaetem ol memba blong klas blong ridim ol ves we yu jusum. (Luk se folem Profet Josef Smit, ol ves 6–8 mo 14 oli stap tokbaot Taem Jisas Kraes bae i Kambak Bakegen. Bae oli toktok raon long ol ves ia long nekis seksen.)

- Sam dei bifo oli nilim Jisas long kros, sam long ol disaepol i bin stap wetem Hem long Hil blong Olif. Wanem tufala kwestin we ol disaepol oli bin askem long Jisas? (Luk long Matiu 24:3.)

Eksplenem se fas kwestin blong olgeta “Bambae ol samting ya oli kamtru wetaem? I stap tokbaot taem tempol mo taon blong Jerusalem bae oli lus evriwan, we Jisas i bin talem profesi blong hem. (luk long Matiu 24:1–2; luk tu long Luk 19:41–44; 21:5–6). Nambatu kwestin blong olgeta, “Wanem saen we bambae i soemaot we yu bambae yu kambak bakegen, mo wol ya i finis?” i stap tokbaot Taem we Sevyia bae i Kambak Bakegen. Eksplenem se translesen blong Josef Smit i mekem i klia se “en blong wol ya” i minim taem ol rabis man bae oli lus evriwan long Taem we Jisas I Kambak Bakegen, be i no en blong evri samting i lus long wol. (Joseph Smith—Matthew 1:4).

- Wanem saen Sevyia i bin profesae we bae oli kam bifo we Jerusalem i lus evriwan? (Luk long Matiu 24:4–5, 9–12.)

- Wanem Jisas i talem long olgeta we oli stap folem Hem blong oli mekem blong mekem se olgeta bae oli no lus evriwan? (Luk long Matiu 24:13, 15–18.) From wanem hem i impoten blong oli no gobak long ol hom blong olgeta afta we oli ronwe long olgeta hom blong olgeta? (Luk long Luk 9:62; D&C 133:14–15.)

Eksplenem se nating plante man Jiu oli no bin bilif se bigfala siti mo tempol blong olgeta i save lus evriwan, ol profesi blong Lod i bin kamtru long yia 70 afta Kraes i ded. From se oli bin bilif se Mesaea bae i kam mo bae i helpem olgeta long faet blong olgeta, ol man Jiu oli bin faet agensem ol man Rom long yia 66 afta Kraes i ded. Fo yia afta, ol man Rom oli prapa spolem ful siti ia. Olgeta we oli bin folem kaonsel blong Sevya mo oli bin ronwe long ol maonten, oli bin sef. Olgeta we oli no bin folem kaonsel ia, oli bin go wanwan mo oli bin ded.

2. Jisas i tokbaot ol saen we bae i kam bifo Taem Hem i Kambak Bakegen.

Ridim mo toktok raon long ol ves we yu jusum long Matiu 24:6–8, 14, 23–51. Mekem ol memba blong klas oli tingbaot se nambatu kwestin we ol disaepol oli bin askem, hem i abaot Taem we Sevya bae i Kambak Bakegen. Poenemaot se translesen blong Josef Smit blong Matiu 24 i talemaot se plante long ol saen we i stap kam bifo long Taem we bae Hem i Kambak bakegen bae oli semmak olsem olgeta we oli bin kam bifo Jerusalem i bin lus long yia 70 afta Kraes i ded. Jerusalem bae i lus evriwan bakegen bifo Sevya i kambak.

Taem yufala i stap toktok raon long ol saen mo ol hadtaem we bae i kam bifo long Taem we Kraes bae i Kambak Bakegen, listim olgeta long blakbod.

- Wanem saen blong Taem Jisas i Kambak Bakegen i stap long Matiu 24:6? Wanem prof we yu bin luk we ol profesi ia oli stap kamtru? Lod i bin tijim se bae yumi no mas wari long ol wo mo ol toktok abaot wo. Olsem wanem yumi save faenem pis long ol taem blong trabol olsem? (Luk long Matiu 11:28–30; Fas Jon 4:16–18; D&C 6:34–36; 45:34–35; 59:23.)

Elda M. Russell Ballard i bin givim ol kaonsel ia blong hop mo blong leftemap tingting:

“Nating ol profesi oli stap talem long yumi se ol samting ia bae oli tekem ples, plante moa pipol oli stap talemaot wanem we i kamaot olsem ol trabol truaot long wol. . . . Yumi mas agri se yumi gat bigfala wari from se yumi no stap luk wan stret ansa long ol trabol ia we famle blong man i stap fesem. Be sapos yumi no lukluk tumas long pikja ia we i tudak, we bae i gat wan taem bae hem i kam nogud moa, yumi no mas letem yumi givap long hop! . . .

“. . . Lod i stap kontrolem ol samting. Hem i save olsem wanem bae hem i en, mo hemia long stat blong hem finis. Hem i bin givim yumi inaf toksave se, sapos yumi folem, bae i mekem se yumi gotru long eni hadtaem long sef fasin nomo. Bae ol stamba tingting blong Hem bae oli kamtru, mo wan dei, bae yumi andastanem ol risen we i no save finis, we i mekem se ol samting ia bae oli tekem ples. Taswe, tedei, yumi mas lukaot blong yumi no mekem bigfala samting tumas, mo tu, yumi no mas wari blong stap bisi blong rere long tumas tumas samting; be wanem yumi mas mekem fastaem, hem i blong stap biae ol komanmen blong God mo neva lusum hop!

“Be weaples blong faenem hop long medel blong ol trabol mo disasta ia? Long simpol fasin nomo, wan sef ples long saed blong spirit long ol hadtaem ia, i blong yumi tanem ol maen mo hat blong yumi i go long Jisas Kraes. . . .

Sapos yumi werem klos blong fet, yumi save winim plante long ol jalenj mo givim fulap paoa blong winim ol fraet mo ples we yumi no strong long hem, mo yumi save se sapos yumi mekem evri samting blong yumi stap biaen long ol komanmen blong God, eni samting i save kam, bae yumi stap oraet nomo” (insaed long Conference Report, Okt. 1992, 41–43; o *Ensign*, Nov. 1992, 31–32).

- Wanem nao ol saen blong Taem we Jisas Bae i Kambak Bakegen we i stap long Matiu 24:7? Wanem prof yu stap luk se ol profesi ia oli stap kamtru? Wanem nao ol profet blong ol las dei oli talem long yumi blong rere long hem long taem blong ol disasta we bae i kam bifo Jisas i Kambak Bakegen?
- Wanem saen blong Taem Jisas i Kambak Bakegen i stap long Matiu 24:14? Olsem wanem profesi ia i stap fulfil tedei? (Misinari wok i kam antap moa, mo oli tijim moa gospel mo oli askeptem gospel long plante moa ples raon long wol.) Wanem nao, wanwan long yumi i save mekem blong help blong profesi ia i kamtru?
- Wanem saen blong Taem Jisas i Kambak Bakegen i stap long Matiu 24:24? Wanem prof yu stap luk se profesi ia i bin stap kamtru? Olsem wanem bae yumi save stap longwe blong ol giaman profet oli mekem yumi harem nogud? (Luk long Matiu 7:15–20; D&C 45:57; 46:7–8.)
- Insaed long translesen blong Josef Smit blong Matiu 24, Jisas i bin talem se sapos yumi stap holem taet gud tok blong Hem, bae yumi no save harem nogud long ol las dei (Joseph Smith—Matthew 1:37). Olsem wanem yumi save holem taet tok blong Lod? Olsem wanem taem yu bin holem taet tok blong Lod i bin helpem yu blong yu long taem oli giaman long yu?
- Lod i bin talem long ol man we oli bin stap folem Hem long Jerusalem se oli mas “stanap long ol tabu ples” (Matiu 24:15), mo Hem i bin givim sem advaes ia long ol dei blong yumi tedei (luk long D&C 87:8; 101:22). Wea nao sam long ol tabu ples we yumi mas stanap long olgeta? Olsem wanem ol tabu ples ia oli save protektem yumi long taem blong ol hadtaem long ol las dei?

Presiden Ezra Taft Benson i bin talem, “Ol tabu man mo tabu woman, oli stanap long ol tabu ples, mo ol tabu ples ia i gat ol tempol blong yumi, ol japel, ol hom blong yumi, mo ol stek blong Saeon, we oli, olsem Lod i bin talemaot se bae oli stap olsem wan ples blong difendem yumi, wan ples blong haed long hariken, o rabis samting taem ol samting ia oli kamdaon long ful wol (luk long D&C 115:6)” (“Prepare Yourself for the Great Day of the Lord,” *Brigham Young University 1981 Fireside and Devotional Speeches* [1981], 68; luk tu long *The Teachings of Ezra Taft Benson* [1988], 106).

- Wanem Jisas i tijim long ol toktok ia blong i helpem yumi blong rere long Taem we bae Hem i Kambak Bakegen?
 - a. Parabol blong figtri (Matiu 24:32–36).
 - b. Lukluk long Taem we Hem i Kambak Bakegen wetem ol dei long taem blong Noa (ol ves 37–39).
 - c. Profesi blong tu man blong wok long garen mo tu man blong wokem kakae (ol ves 40–41).
 - d. Parabol blong gudfala man mo stilman (ol ves 42–44).
 - e. Parabol blong tu man blong wok (ol ves 45–51).

- From wanem hem i impoten blong yumi gohed oltaem blong lukaot mo rere long taem ia we bae Lod i kambak? Olsem wanem yumi save lukaot mo rere blong mitim Lod?
- Wanem bae i hapen long olgeta we i stret mo gud taem Sevyia i kambak bakegen? (Luk long Matiu 24:31, 45–47; Fas Tesalonaeka 4:16–18; D&C 88:96–98.)

Las Toktok

Testefae se ol profesi blong skripja abaot Taem we Jisas Kraes bae i Kambak Bakegen bae oli kamtru. Talemaot gud we taem yumi stadi long ol tijing blong Sevyia mo yumi stap folem ol kaonsel blong ol profet we oli stap laef, yumi save mekem yumi rere blong yumi mitim Kraes. Sapos yumi rere, Taem ia we Jisas i Kambak Bakegen, bae hem i wan bigfala dei blong yumi.

**Wan Nara Aedia
blong Tij**

Ol nara tul ia oli kam helpem lesen aotlaen we i stap. Bae yu save yusum aedia ia olsem pat blong lesen.

Ol Saen blong Taem Jisas i Kambak Bakegen i kamaot long ol las dei

Eksplenem se Profet Josef Smit i bin kasem wan revelesen we i riritim mo i mekem ol profesi we oli givim long ol disaepol blong Jisas bifo, oli klia. Revelesen ia i stap long Doctrine and Covenants 45. Mekem ol memba blong klas oli komperem Doctrine and Covenants 45:15–55 mo Matiu 24. (Bae yu save poenemaot se Doctrine and Covenants 45:60–61 i tekem ol toksave blong Lod we i givim long Josef Smit blong statem translesen blong Niu Testeman, wetem insperesen.)

“Yufala i Kam Tekem Ples blong Yufala long Niufala Wol ia”

Lesen
22

Matiu 25

Stamba Tingting Blong helpem ol memba blong klas blong oli rere blong Taem we Jisas i Kambak Bakegen taem oli laef long fasin we i stret mo gud, oli developem ol talen blong olgeta, mo oli stap sevem ol narawan.

- Rere long Lesen**
1. Ridim, tingting hevi, mo prea abaot ol skripja ia:
 - a. Matiu 25:1–13. Tru long parabol blong ol ten yangfala gel, Jisas i tijim se yumi mas rere blong Taem we Hem i Kambak Bakegen.
 - b. Matiu 25:14–30. Tru long parabol blong ol talen, Jisas i tijim yumi blong yumi mas developem ol presen we yumi bin kasem long God.
 - c. Matiu 25:31–46. Tru long parabol blong sipsip mo ol nani, Jisas i stap tijim se yumi mas wantem blong sevem wanwan long yumi.
 2. Sapos yu yusum aktiviti blong pulum tingting, tekem wan smol glas jag, wan kontena blong oel o kala wota, mo sapos i gat, pikja blong Taem we Jisas Kraes i Kambak Bakegen (62562; Gospel Art Pikja Kit 238).
 3. Givim wan pis pepa mo wan pen o pensel long wanwan memba blong klas.
 4. Wan tingting blong tij: Wanwan taem yusum ol toktok blong ol profet blong ol las dei, we yu save faenem long lesenbuk ia mo insaed long ol magasin blong Jos, blong helpem blong daerektem mo mekem ol toktok raon long klas oli klia, mo blong talemaot gud we Lod i gohed blong talemaot wanem we Hem i wantem tedei. Yusum ol toktok blong sapotem, be i no blong tekem ples blong ol skripja riding mo ol toktok blong klas.
-

Wan Tingting blong Lesen

Aktiviti blong Pulum Tingting Olsem we i stret, yusum aktiviti ia o wan aktiviti blong yuwan blong statem lesen. Soem wan smol glas jag, wan kontena blong oel o kala wota, mo pikja blong Taem Jisas i Kambak Bakegen.

Eksplenem se lesen ia i lukluk long ol tri parabol we Sevyia i bin tijim taem Hem i bin ansa long ol kwestin blong Ol Aposol blong Hem abaot Taem we bae Hem i Kambak Bakegen. Talemaot long ol memba blong klas se bae yu yusum glas jag ia mo oel o kala wota blong representem taem yumi stap rere long Taem blong Hem i Kambak Bakegen.

Yusum mo Toktok Raon long Skripja Taem yu stap tijim ol skripja ia, toktok raon long olsem wanem blong yusum olgeta long laef evri dei. Leftemap tingting blong ol memba blong klas blong oli serem eksperiens we i go wetem ol prinsipol blong skripja.

1. Jisas i presentem parabol blong ol ten yangfala gel.

Ridim mo toktok raon long Matiu 25:1–13. Eksplenem se parabol blong ol ten yangfala gel, i folem mared kastom blong ol man Jiu. Long taem blong Jisas, man we i mared mo ol fren blong hem bae oli tekem woman we i mared i aot long haos blong hem i go long haos blong man we i mared. Long rod ia, ol fren blong woman we i mared bae oli wet blong joenem woman ia. Taem oli kasem haos blong man we i mared, evriwan i go insaed long haos blong go long mared. Ol mared ia oli stap tekem ples long naet, mekem se olgeta we oli wet long tufala we i mared oli stap tekem ol smol oel laet.

- Insaed long parabol blong ol ten yangfala gel, man blong mared i representem huia? (Sevya.) Ol gel ia oli representem huia? (Ol memba blong Jos.) Mared ia i representem wanem? (Taem Sevya i Kambak Bakegen.) Oel insaed long ol laet oli representem wanem? (Taem yumi stap rere long Taem we Hem i Kambak Bakegen.)
- Wanem ol faef yangfala gel ia oli mekem we i no waes nating? (Luk long Matiu 25:3.) Wanem i kamaot from se oli no bin rere gud? (Luk long Matiu 25:8–12.) Olsem wanem yumi tu, samtaem, yumi mekem ol sem mistek olsem ol gel ia we oli no waes nating?
- Wanem ol faef nara gel ia oli bin mekem we oli bin waes? (Matiu 25:4.) Wanem nao i kamaot from se oli bin rere? (Luk long Matiu 25:10.) Wanem yumi save lanem aot long ol aksen blong ol faef waes gel ia? (Luk long D&C 45:56–57. Yumi mas rere yumiwan blong Taem we Jisas Kraes i Kambak Bakegen.)
- Tingting se oel long parabol i representem taem ia we yumi stap rere long Taem we Hem i Kambak Bakegen, wanem nao sam wei we yumi save ademap “oel” long ol “laet” blong yumi? (Olsem ansa i save gat, ol stret samting blong gat wan stret laef, olsem mekem fet i wok, kasem ol odinens, kipim ol kavenan, o givim seves.)

Sapos yu stap yusum jag mo oel o kala wota (luk long aktiviti blong pulum tingting), eksplenem se jag ia i representem laet insaed long parabol. Putum wan drop blong oel insaed long wota evri taem we wan memba blong klas i givim wan tingting blong yusum blong yumi save rere. Bae yu save serem tu sam tingting blong Presiden Spencer W. Kimball:

“Insaed long parabol, oel, yu save pem long maket. Insaed long ol laef blong yumi, oel blong yumi rere, yumi tekem wan drop afta narawan taem yumi stap laef long wan stret laef. Blong livim kakae, famle prea, hom tijing, blong kontrolem ol samting we bodi blong yumi i wantem, prijim gospel, stap stadi long ol skripja—wanwan aksen we i soem we yumi wantem mekem mo yumi stap obei, i stap olsem wan drop we yumi stap ademap long stoa blong yumi. Ol kaen wok, peimen blong ol ofring mo taeting, ol klin tingting mo aksen, mared insaed long kavenan blong taem we i no save finis—olgeta tu, oli kam fulumap oel we yumi stap yusum long medel naet blong laetem ol laet blong yumi” (*Faith Precedes the Miracle* [1972], 256).

Askem ol memba blong klas blong tingting long ol kwestin ia long maen blong olgeta:

- Wanem yu bin mekem long wik we i pas blong ademap oel long laet blong yu? Wanem sam samting we bae yu mekem long wik we i kam blong ademap oel long laet blong yu?

2. Jisas i presentem parabol blong ol talen.

Ridim mo toktok raon long Matiu 25:14–30. Eksplenem se long taem blong Niu Testamen, wan talen hem i wan amaon blong mane (Bible Dictionary, “Money,” 733–34).

- Insaed long parabol blong ol talen, man ia we i wokbaot i go longwe, hem i representem huia? (Lod.) Ol wokman oli representem huia? (Wanwan long yumi.) Ol talen oli representem huia? (Ol presen blong God.)
- Ol wokman we oli bin givim olgeta faef o tu talen, oli bin mekem wanem wetem mane ia? (Luk long Matiu 25:16–17.) Wanem praes tufala i bin kasem? (Luk long Matiu 25:21, 23.) Wanem parabol ia i stap tijim yumi abaot praes we i no save finis we Papa long Heven bae i blesem yumi wetem? (Olsem ol ansa, i save gat blong ol pipol we oli ting se oli gat ol smol presen we i kam long God, bae oli kasem evri blesing sapos oli yusum ol presen blong olgeta fulwan.)

Elda James E. Faust i bin talem long olgeta we oli ting se oli gat smol talen nomo:

“Sapos oli yusum ol talen blong olgeta blong bildimap kingdom blong God mo sevem ol narawan, bae oli glal fulwan long ol promes blong Sevya. Bigfala promes blong Sevya i blong oli kasem praes blong olgeta, iven pis long wol ia, mo laef we i no save finis long wol we bae i kam (luk long D&C 59:23)” (insaed long Conference Report, Epr. 1994, 5; o *Ensign*, Mei 1994, 6).

- Wokman we i bin kasem wan talen (wan milian vatu), i mekem wanem wetem mane ia? (Luk long Matiu 25:24–25.) Wanem masta i talem long hem? (Luk long Matiu 25:26–30.) From wanem sam long yumi oli stap mestem mo oli no divelopem ol talen mo presen we God i bin givim long yumi? Olsem wanem yumi save winim ol samting we i blokem yumi blong yumi divelopem ol presen ia?
- Elda Marvin J. Ashton i bin tijim se “hem i raet mo wok blong yumi blong yumi akseptem ol presen mo blong yumi serem olgeta” (insaed long Conference Report, Okt. 1987, 23; o *Ensign*, Nov. 1987, 20). Olsem wanem yumi save luksave mo akseptem ol talen o presen we Lod i bin givim long yumi wetem tras? From wanem yu ting se hem i impoten blong yumi serem ol talen mo ol presen blong yumi? Wanem blesing i bin kam long laef blong yu from se yu bin divelopem mo yu bin serem ol talen mo ol presen ia? Olsem wanem yu bin kasem blesing from ol narawan oli bin serem ol talen mo ol presen blong olgeta?
- Evriwan i bin gat kolosap wan presen we i kam long God (luk long D&C 46:11–12), be sam long ol presen ia oli isi moa blong luksave olgeta bitim sam narawan. Wanem sam presen we i had blong luksave be oli save yusum blong sevem ol narawan mo tu blong givim glori long God?

Elda Marvin J. Ashton i bin talem:

“Bae mi talemaot sam presen we oli no stap luk olgeta tumas be oli impoten tumas. Long olgeta ia, ating sam oli ol presen blong yu—ol presen we i no isi blong luk se oli tru be oli gat bigfala praes.

“Sam long ol presen we yumi no stap luksave long ae: presen blong askem samting; presen blong lisin; presen blong lisin mo yusum wan smol, kwaet voes; presen blong save kraes; presen blong stap longwe long raorao; presen blong oli save agri wetem yu; presen blong ronwe long fasin blong talem sem toktok oltaem; presen blong lukaotem wanem samting i stret mo gud; presen

blong no jajem man; presen blong tekem kea long ol narawan; presen blong save ting hevi; presen blong save givim wan prea; presen blong save serem testemoni; mo presen blong kasem Tabu Spirit” (insaed long Conference Report, Okt. 1987, 23; o *Ensign*, Nov. 1987, 20).

Givim wanwan memba blong klas wan pen o pensel mo wan pis pepa. Askem olgeta blong raetem daon wan o tu long ol talen o presen blong olgeta wetem wan spesel samting we bae oli mekem long ol wik we bae i kam blong yusum olgeta blong givim seves long ol narawan.

Sapos yu yusum wan jag mo oel o kala wota, ademap sam moa drop insaed long jag. Eksplenem se taem yumi stap developem ol talen mo presen we God i bin givim long yumi, yumi stap ademap oel blong laet blong yumi.

3. Jisas i presentem parabol blong ol sipsip mo ol nani.

Ridim mo toktok raon long Matiu 25:31–46.

- Jisas i bin tijim se Taem we Hem i Kambak Bakegen, bae Hem i seperetem yumi olsem we man blong lukaot long sipsip i seperetem ol sipsip mo ol nani (Matiu 25:31–32). Insaed long parabol blong sipsip mo nani, ol sipsip oli representem huia? (Luk long Matiu 25:33–34.) Ol nani oli representem huia? (Luk long Matiu 25:33, 41.)
- Parabol ia i stap tijim wanem long yumi long wanem yumi mas mekem blong rere long Taem we Jisas i Kambak Bakegen mo long dei blong jajmen? (Luk long Matiu 25:35–46.)

Elda Marion D. Hanks i bin talem:

“Jisas i bin tijim ol man we oli bin stap folem Hem long parabol blong sipsip mo nani, we i stap representem jajmen we bae i kam, mo long ples ia, Hem i mekem i klia huia bae i gat ‘laef ya we i no save finis’ mo olgeta we bae oli gat ‘panis ya we i no save finis’ (Matiu 25:46). Wanem i defren long tufala, hem i we olgeta we bae oli kasem kingdom wetem Hem, oli bin developem fasin ia blong stap helpem man, oli bin gotru long glad blong stap givim samting mo glad blong stap sevem man. Oli bin ansa long ol nid blong olgeta we oli bin hanggri, tosta, neket, sik mo olgeta we oli stap long kalabus. . . .

“Bae i no gat wan samting we i moa klia long bigfala praes we Sevyia i putum long seves long ol naraman we oli mekem wetem gudhat, mo i stap olsem wan stamba blong fasin blong Ol Kristin Man mo fasin blong sevem man. Blong stap help, givim, mo sakrifaes, oli, o oli mas stap olsem, wan samting we i isi nomo olsem taem man i stap gru mo i stap pulum win.” (insaed long Conference Report, Epr. 1992, 10; o *Ensign*, Mei 1992, 9).

Sapos yu yusum jag mo oel o kala wota, ademap sam moa drop i go long jag. Eksplenem se taem yumi stap sevem ol narawan, yumi stap ademap oel i go long laet blong yumi. Yumi save helpem ol narawan blong oli ademap oel i go long laet blong olgeta. Setem ol eksampol blong seves we yu bin luk, mo invaetem ol memba blong klas blong serem sam eksampol we oli bin luk.

- Olsem wanem yumi stap blesem ol narawan tru long seves blong yumi? Olsem wanem taem yu bin sevem wan narawan i bin blesem yu? Olsem wanem yu stap filim abaot olgeta we oli stap sevem yu? Olsem wanem bae yumi kam blong luksave moa ol nid blong ol narawan? Olsem wanem yumi save sevem ol narawan i moa gud?

- Yu ting se Sevyia i minim wanem taem Hem i bin talem, “Taem we yufala i mekem olsem long wan brata blong mi, we i daon moa long ol narafala brata blong mi, be hemia i olsem we yufala i mekem long mi nomo”? (Matiu 25:40; luk tu long Mosaea 2:17).

Las Toktok

Testefae se yumi mas rere long Taem we Jisas Kraes bae i Kambak Bakegen. Yumi mas divelopem ol presen we God i givim long yumi mo yumi mas folem eksampol blong Sevyia blong givim ful laef blong yumi blong stap givim seves long ol narawan. Talemaot gud we yumi evriwan i save mekem olsem, nating se yumi stap gud o nogud.

Sam Nara Aedia Blong Tij

Ol nara tul ia oli kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. “Wan Pua Man we i Harem Nogud mo i Travel”

Wetem ol memba blong klas, singsing o ridim ol toktok blong hym ia “A Poor Wayfaring Man of Grief” (*Hymns*, no. 29). Afta ridim Matiu 25:40. Invaetem ol memba blong klas blong serem ol filing blong olgeta abaot mesej blong hym mo toktok long skripja.

2. Vidio presentesen

Bae yu save yusum nambafaef pat blong “New Testament Customs,” wan seleksen we i kam long *New Testament Video Presentations* (53914), blong eksplenem sam kastom blong lafet blong mared we i stap long taem blong Niu Testeman.

“Olsem we Mi Mi Lavem Yufala, Ale Long Sem Fasin, Yufala i Mas Lavlavem Yufala”

Luk 22:1–38; Jon 13–15

Stamba Tingting Blong givim insperesen long ol memba blong klas blong oli folem eksampol blong Jisas taem oli lavem mo oli givhan long ol narawan.

- Rere long Lesen**
1. Ridim, tingting hevi, mo prea abaot ol skripja ia:
 - a. Luk 22:7–30. Jisas i mitim Ol Twelef Aposol blong Lafet blong Pasova. Hem i setemap sakramen mo i tijim Ol Aposol se oli mas sevem ol narawan.
 - b. Jon 13. Jisas i wasem ol leg blong Ol Aposol mo i givim komanmen long olgeta blong oli lavem wanwan long olgeta.
 - c. Jon 14:1–15; 15. Jisas i tijim, “Mi nao rod ya, mo mi mi stamba blong trutok, mo mi stamba blong laef.” Hem i komperem Hemwan long wan garen blong grep mo ol disaepol blong Hem olsem ol branj blong garen blong grep ia. (Not: ol ves long ol japta 14 mo 15 we oli abaot Komfota, bae oli toktok raon long hem long lesen 24.)
 2. Sam moa riding: Matiu 26:1–5, 14–35; Mak 14:1–2, 10–31.
 3. Sapos yu yusum aktiviti blong pulum tingting, arenjem blong gat wan we i singsing hemwan o wan smol grup blong adalt o pikinini, oli singsing long “Love One Another” (*Hymns*, no. 308) long stat blong klas. Sapos i no posibol, tekem wan kaset blong singsing ia o rere blong mekem ol memba blong klas oli singsing long hem tugeta.
 4. Sapos ol tul ia oli stap, yusum olgeta long taem blong lesen:
 - a. Ol pikja blong Las Kakae (62174; Gospel Art Pikja Kit 225) mo Jisas i Wasem ol Leg blong Ol Aposol (62550; Gospel Art Pikja Kit 226).
 - b. Wan smol flaoa blong yusum long ol toktok blong yu long saed blong Jon 15:1–8.
 5. Wan tingting blong tij: Singsing o plei long hym ia o Praemeri singsing ia we i go wetem topik ia blong lesen; hemia i wan gudfala wei blong invaetem Spirit long taem blong lesen. Lod i talem se sol blong Hem i stap glad long ol singsing we i kam long hat. Ol singsing blong wan we hat blong hem i stret mo gud i olsem wan prea long Hem, mo bae Hem i ansa wetem wan blesing long hed blong olgeta (luk long D&C 25:12; luk tu long Kolosi 3:16). Ol hym mo ol singsing blong Praemeri oli save helpem tu ol memba blong klas blong oli lanem ol doktrin blong gospel. (Luk long *Teaching—No Greater Call*, 137–38.)

**Wan Tingting
blong Lesen**

Aktiviti blong
Pulum Tingting

Olsem we i stret, yusum aktiviti ia o wan aktiviti blong yuwan blong statem lesen.

Mekem hem we bae i singsing, i singsing o mekem wan smol grup i singsing long “Love One Another,” o plei kaset o mekem ol memba blong klas oli singsing long hym ia tugeta (luk long seksen blong “Rere long Lesen”).

Eksplenem se ol toktok blong hym ia oli kam long Jon 13:34–35. Mekem ol memba blong klas oli lukluk long skripja ia mo askem wan blong hem i ridim laod. Poenemaot se Jisas i talemaot ol toktok ia long Las Kakae. Lesen ia bae i toktok raon long komanmen ia mo ol nara samting we Jisas i bin talem mo i bin mekem long miting ia wetem Ol Aposol blong Hem.

Yusum mo Toktok Raon long Skripja

Taem yu stap tijim ol skripja ia, toktok raon long olsem wanem ol toktok mo ol aksen blong Sevyia long taem blong Las Kakae ia i bin soem lav blong Hem we Hem i gat long Ol Aposol blong Hem mo tu long yumi. Helpem ol memba blong klas blong andastanem se Jisas i wantem yumi blong yumi folem eksampol blong Hem taem yumi lavem mo sevem ol narawan.

1. Jisas i statem sakramen.

Toktok raon long Luk 22:7–30. Invaetem ol memba blong klas blong ridim laod ol ves we oli jusum. Poenemaot se kakae blong Pasova ia, we Jisas mo Ol Aposol blong Hem oli bin serem long dei bifo oli nilim Jisas long Kros, oli stap singaotem Las Kakae. Soem pikja blong Las Kakae.

- Taem Jisas mo Ol Aposol blong Hem oli bin mit tugeta blong kakae long kakae blong Pasova, Jisas i statem odinens blong sakramen. Wanem nao Hem i bin talem long Ol Aposol blong Hem long saed blong stamba tingting blong sakramen? (Luk long Luk 22:19–20. Hem i blong helpem olgeta blong oli tingbaot Hem mo sakrifaes blong Hem we i pemaot yumi.) Olsem wanem taem yu tekem sakramen, i stap helpem yu blong tingbaot Sevyia?

Elda Jeffrey R. Holland i bin talem: “Stat long eksperiens ia long rum antap long dei bifo long wanem i bin tekem ples long Getsemane mo Golgota, ol pikinini blong promes oli bin stap anda long kavenan blong oli rimemba sakrifaes blong Kraes long niufala wei ia we i moa hae, i moa tabu mo i blong hemwan. . . . Sapos aksen ia blong tingbaot Hem i fas wok we i stap long yumi, wanem bae i save kam long memori blong yumi taem oli stap givim ol tabu samting ia long yumi?” (insaed long Conference Report, Okt. 1995, 88, 90; o *Ensign*, Nov. 1995, 67, 68).

Toktok raon long ol ansa blong kwestin blong Elda Holland, mo tu sam long ol samting ia we Elda Holland i givim we bae yumi mas tingbaot abaot Sevyia blong yumi (insaed long Conference Report, Okt. 1995, 90–91; o *Ensign*, Nov. 1995, 68–69):

- a. Lav mo paoa blong Hem long Bigfala Kaonsel long Heven.
- b. Se Hem i Krieta blong heven mo wol.
- c. Evri samting we Hem i bin mekem long laef blong Hem bifo laef long wol ia olsem Jehova.
- d. Olsem wanem taem ia we Hem i bin bon, i wan bigfala taem.
- e. Ol Tijing blong Hem.
- f. Ol merikol mo ol hiling blong Hem.
- g. Se “evri samting we i gud i kamaot long Kraes” (Moronae 7:24).
- h. Nogud fasin, taem we oli sakemaot Hem, mo taem oli jajem Hem i rong.
- i. Se Hem i bin go daon bitim evri samting blong Hem i save girap i go antap long olgeta bakegen.

j. Se Hem i bin mekem ol sakrifaes blong Hem mo Hem i bin harem nogud from wanwan long yumi.

- From wanem hem i impoten blong yumi tekem sakramen long evri wik? Olsem wanem yumi save mekem yumi rere long saed blong spirit bifo yumi tekem sakramen?
- Long Las Kakae, Ol Aposol bakegen, oli stap tokbaot olgeta se “hu nao long olgeta i moa hae” (Luk 22:24; luk tu long Matiu 18:1; Luk 9:46). Long wanem wei tu, samtaem, yumi wantem se bae yumi moa hae bitim wan narawan? Olsem wanem yumi save winim ol filing ia?
- Wanem nao Lod i bin tijim abaot tru fasin blong stap ting hae? (Luk long Luk 22:25–27; luk tu long Matiu 20:25–28.) Olsem wanem Hem i givim eksampol blong tijing blong Hem? Olsem wanem yumi save folem eksampol blong Hem?

2. Afta we Hem i wasem ol leg blong olgeta, Jisas i givim komanmen long Ol Aposol blong oli mas lavlavem olgeta.

Ridim mo toktok raon long ol ves we yu jusum long Jon 13. Soem pikja blong Jisas we i stap wasem ol leg blong Ol Aposol. Eksplenem se taem we Jisas mo Ol Aposol blong Hem oli bin kakae long Las Kakae, Jisas i bin wasem ol leg blong wanwan long Ol Aposol blong Hem (Jon 13:4–5). Wok ia, oltaem wan wokman nomo i stap mekem taem i gat wan man i kam kakae long wan haos. From wanem Jisas i bin mekem wok ia, i blong tijim Ol Aposol blong Hem abaot fasin blong gat tingting i stap daon mo fasin blong givim seves.

- From wanem, yu ting se Saemon Pita i no wantem se Jisas i wasem ol leg blong hem? (Luk long Jon 13:6, 8. Hem i bin filim se hem i no stret blong Lod i stap olsem wan wokman.) Olsem wanem Jisas i ansa? (Luk long Jon 13:8.)
- Wanem Jisas i talem long Ol Aposol long saed blong from wanem nao Hem i bin wasem ol leg blong olgeta? (Luk long Jon 13:12–17. Hem i talem long olgeta se oli mas folem eksampol blong seves blong Hem.) Olsem wanem taem yu bin givim seves long ol narawan i bin mekem se yu yu bin glad?
- Wanem yumi save lanem long ol toktok mo aksen blong Jisas abaot ol kwaliti blong ol gudfala lida? Olsem wanem yumi save folem eksampol blong Hem taem yumi stap long ol posisen blong lidasip?
- Long taem blong Las Kakae, Jisas i riptim bakegen long ol disaepol blong Hem blong oli mas lavlavem wanwan long olgeta (Jon 13:34–35; 15:12, 17). Wanem sam spesel samting we yumi save mekem blong yumi folem eksampol blong lav blong Kraes?

3. Jisas i tijim “Mi nao rod ya, mo mi mi stamba blong trutok, mo mi stamba blong laef” mo “Mi nao, mi olsem prapa rop ya grep.”

Toktok raon long Jon 14:1–15; 15. Invaetem ol memba blong klas blong ridim laod ol ves we yu jusum.

- From wanem Tomas i wari taem Jisas i talem long Ol Aposol, “Ples ya we bambae mi go long hem, yufala i save finis rod blong hem”? (Luk long Jon 14:4–5.) Wanem Jisas i bin talem long Tomas? (Luk long Jon 14:6.) From wanem Jisas i wan rod ia nomo we yumi save go long Papa long Heven?

- Jisas i bin tijim ol disaepol blong Hem blong oli soem lav blong olgeta long ol narawan taem oli givim seves. Wanem nao Hem i talem long olgeta blong oli mas mekem blong oli soem lav blong olgeta long Hem ? (Luk long Jon 14:15.) Olsem wanem taem yumi obei, i soem se yumi lavem Lod?
- Taem Hem i bin stap tijim Ol Aposol blong Hem, Jisas i bin yusum saen blong garen blong rop ia grep (Jon 15:1–8). Rop blong grep ia i representem huia? man blong wok long garen i representem huia? ol branj oli representem huia? (Luk long Jon 15:1, 5.)

Sapos yu tekem wan flaoa i kam long klas, yu save soem naoia.

- Wanem i hapen long wan lif o branj taem oli katem hem long flaoa? Olsem wanem rilesensip blong yu wetem Sevyia i semmak long rilesensip blong wan lif o branj long stamba blong flaoa?
- Long wanem we Sevyia i komperem, wanem nao gadena i bin stap mekem long ol branj blong rop blong grep we oli no stap tekem frut? (Luk long Jon 15:2.) Wanem hem i bin stap mekem long ol branj we oli bin stap tekem frut? Olsem wanem yumi save yusum hemia long yumi?
- Jisas i bin tijim, “Man we i joen gud long mi, mo mi joen gud long hem, bambae hem i save karem plante frut long laef blong hem. Be sipos yufala i no joen gud long mi, yufala i no save mekem wan samting nating” (Jon 15:5). Olsem wanem yu bin faenem se samting ia i tru?
- Folem Jon 15:13, wanem hem i wan long ol bigfala aksen blong lav? Hemia i stap talem wanem abaot lav we Sevyia i gat long yumi?

Las Toktok

Testefae se Jisas Kraes i lavem yumi mo i wantem yumi blong yumi lavem mo yumi sevem wanwan long yumi. Givim jalenj long ol memba blong klas blong oli tingbaot Atonmen blong Kraes mo lav blong Hem long yumi long taem blong sakramen long wanwan wik.

Sam Nara Aedia Blong Tij

Ol nara tul ia oli kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Tekem nem blong Kraes long yumi

Long taem we yufala i stap toktok raon long sakramen, yu save toktok raon long ol kwestin ia long saed blong fasin ia blong yumi tekem nem blong Kraes long yumi. Sam long ol ansa ia oli tekem long wan toktok we Elda Dallin H. Oaks i bin givim long jeneral konfrens blong Epril 1985 (luk long Conference Report, Epr. 1985, 101–5; o *Ensign*, Mei 1985, 80–83).

- Wetaem yumi stap tekem nem blong Kraes long yumiwan?
 - a. Taem yumi baptaes long Jos blong Hem (2 Nifae 31:13; Mosaea 25:23; Moronae 6:3; D&C 18:22–25; 20:37).
 - b. Taem yumi riniu ol kavenan blong baptaes blong yumi taem yumi tekem sakramen (Moronae 4:3; 5:2; D&C 20:77, 79).
 - c. Taem yumi talemaot bigwan se yumi bilif long Hem.

- d. Taem yumi tekem long yumiwan atoriti blong wok long nem blong Hem mo yumi mekem ol wok folem raet ia.
- e. Taem yumi tekempat long ol tabu odinens blong tempol.
- Wanem nao yumi promes taem yumi stap tekem long yumiwan nem blong Kraes?
 - a. Yumi soem se yumi wantem blong mekem wok blong kingdom blong Hem mo yumi soem se yumi gat strong tingting blong sevem Hem kasen en (D&C 20:37; Moronae 6:3).
 - b. Yumi promes blong folem Hem wetem tru hat blong yumi; yumi stap obei long Hem mo yumi stap sakem ol sin blong yumi (2 Nifae 31:13; Mosaea 5:8).
- Wanem Jisas Kraes i bin promes long yumi taem yumi tekem nem blong Hem long yumi? (Yumi kam ol pikinini boe mo gel blong Hem, mo yumi tekem ol nem blong Hem. Olgeta, we oli singaotem olgeta long nem blong Hem, bae long las dei bae oli kam olsem God; luk long Mosaea 5:7–9; 15:12; Alma 5:14; 3 Nifae 27:5–6; D&C 76:55, 58, 62).

2. Vidio presentesen

Nambafaef pat blong “New Testament Customs,” wan seleksen blong *New Testament Video Presentations* (53914), i tekem tu ol infomesen abaot ol lafet blong ol taem blong Niu Testeman. Pat ia i save helpem ol memba blong klas blong luksave olsem wanem oli bin mekem Las Kakae mo oli andastanem toktok ia we i tokbaot disaepol we i stap “sidaon kolosap long Jisas” (Jon 13:23).

3. Presentesen blong memba blong klas

Ol toktok we oli olsem “Mi nao, mi olsem prapa rop ya grep”, bae sam i faenem i had blong andastanem, speseli ol yut. Blong tokbaot moa lav we Jisas Kraes i gat long yumi, invaetem wan o tu memba blong klas blong serem wan eksperiens blong taem we oli bin filim lav blong Sevya i givim paoa long olgeta, olsem we rop ia i stap givim paoa long ol lif mo branj blong hem. Mekem wan invitesen, ating wan wik bifo, mo leftemap tingting blong ol memba blong klas blong oli lukaotem insperesen blong Tabu Spirit taem oli jusum wan eksperiens we i stret blong oli serem.

Hemia I Laef Ya We I No Save Finis

Lesen
24

Jon 16–17

Stamba Tingting Blong leftemap tingting blong ol memba blong klas blong oli glad blong folem tingting we Tabu Spirit i stap givim mo blong kam moa kolosap long Papa long Heven mo Jisas Kraes.

Rere long Lesen

- Ridim, tingting hevi, mo prea abaot ol skripja ia:
 - Jon 16:1–15. Jisas i stap mekemrere Ol Aposol blong Hem long ol had taem we bae i kam afta long taem we bae oli krusifaem Hem. Hem i tijim olgeta abaot misin blong Tabu Spirit mo i promisesem olgeta se bambae oli kasem presen ia we i Tabu Spirit.
 - Jon 16:16–33. Jisas i stap talemaot ded mo laef bakegen blong Hem mo kaonsel long Ol Aposol blong “oli no fraet.”
 - Jon 17. Jisas i mekem bigfala prea blong sore blong Ol Aposol blong Hem mo ol naraman we oli biliv long Hem.
- Sam moa riding: Jon 14:16–31; 15:18–27; 3 Nifae 19:19–36; Doctrine and Covenants 132:21–24; Bible Dictionary, “Comforter,” 648; “Holy Ghost” 704.
- Sapos yu yusum aktiviti blong pulum tingting, tekem i kam long klas tu bokis blong presen (o droem long blakbod pikja blong tu (2) bokis blong presen). Priperem tu (2) wodstrip blong putum long ol bokis long taem blong lesen: wan bae talem *Presen we i Tabu Spirit* mo narawan bae i talem *Laef We i No Save Finis*.
- Wan tingting blong tij: Long taem we yu stap prea se bae yu tij wetem Spirit, prea se ol memba blong klas bambae oli lan tru long Spirit mo risivim konfemesen blong hem long saed blong ol trutok we yu bin stap tijim (luk long *Teaching—No Greater Call*, 13–14).

Wan Tingting blong Lesen

Aktiviti blong
Pulum Tingting

Olsem we i stret, yusum aktiviti ia o wan aktiviti blong yuwan blong statem lesen.

Soem tufala bokis blong presen (o droem long blakbod, pikja blong tu (2) bokis blong presen). Invaetem ol memba blong klas blong talem smol abaot ol presen we oli stap wantem blong kasem.

Eksplenem se wan long ol bokis blong presen we yu bin soem i ripresentem wan long ol gudfala presen we yumi save kasem long laef ia. Narafala bokis i ripresentem wanem we Lod i singaotem gudfala presen bitim ol narafala presen blong God (luk long D&C 14:7).

Eksplenem se insaed long lesen ia, ol memba blong klas bae oli faenemaot wanem mining blong tufala presen ia mo bae oli lanem olsem wanem blong kasem tufala.

Taem yu stap tijim olgeta skripja ia, toktok raon long olsem wanem ol toktok blong Sevyia i go long Ol Aposol blong Hem i aplae i kam long yumi evriwan. Leftemap tingting blong ol memba blong klas blong serem ol eksperiens we i go wetem lesen ia.

1. Jisas i promesem Ol Aposol blong Hem se bambae oli kasem presen we i Tabu Spirit.

Toktok raon long Jon 16:1–15. Invaetem ol memba blong klas blong ridim laod ol ves ia we yu bin jusum.

- Long ol las haoa blong ministri blong Hem long wol ia, Jisas i bin tijim mo givhan long Ol Aposol blong Hem blong kam strong. From wanem nao Ol Aposol oli nid blong save kam strong long taem ia? (Luk long Jon 16:1–6; luk tu long Jon 15:18–20.)
- Sevyia i bin talem long Ol Aposol se bambae Hem i sendem Man blong Leftemap Tingting (Tabu Spirit) i kam long olgeta (Jon 16:7). Wanem nao misin blong Tabu Spirit? (Luk long Jon 14:26; 15:26; 16:7–14. Raetem ol ansa long blakbod olsem we oli soem daon ia.)

Tabu Spirit:

- a. I stap leftemap tingting (Jon 14:26).
 - b. I stap tij (Jon 14:26).
 - c. I stap mekem yumi tingabaot ol trutok (Jon 14:26).
 - d. I stap testefae long Sevyia (Jon 15:26).
 - e. I stap lidim yumi i go long evri trutok (Jon 16:13).
 - f. I stap soem long yumi ol samting we bae i kam (Jon 16:13).
 - g. I stap givim glori long Sevyia (Jon 16:14).
- Olgeta Twelef Aposol oli bin eksperiensem fasin we Tabu Spirit i stap soemaot ol samting long taem blong ministri blong Jisas long wol ia, be oli no kasem presen we i Tabu Spirit kasem taem blong ded mo laef bakegen blong Hem, afta oli jes kasem (Jon 20:22). Wanem i defren bitwin fasin ia we Tabu Spirit i stap soemaot samting, mo presen we i Tabu Spirit? (Luk long toktok we i stap daon.) Taem yu bin kasem presen we i Tabu Spirit olsem wanem nao i helpem yu?

Elda Dallin H. Oaks i bin tijim:

“Fasin we Tabu Spirit i stap soemaot ol samting oli givim blong lidim ol man o woman we oli stap wantem wetem wan tru hat blong faenem ol trutok blong gospel we bae i save tanem tingting blong olgeta blong sakem sin mo baptaes. Presen we i Tabu Spirit i mekem yu yu andastanem moa samting. . . . [Hem] i tekem tu raet blong Hem i save stap wetem yu oltaem, blong oltaem yumi ‘save gat Spirit blong Hem i stap wetem [yumi]’ (luk long D&C 20:77).

“Wan niufala memba we i jes baptaes i bin talem long mi, wanem nao hem i bin filim taem hem i bin kasem presen ia. Hemia i wan fetful kristin woman we i bin stap spenem laef blong hem blong givim seves long ol naraman. Hem i save mo lavem Lod, mo i bin filim ol saen blong Spirit blong Hem. Taem hem i bin risivim laet blong gospel ia we i bin kambak bakegen, hem i bin baptaes mo ol elda oli bin putum ol han blong olgeta antap long hed blong hem mo givim long hem presen we i Tabu Spirit. Hem i bin talem, ‘Mi bin filim paoa blong Tabu Spirit i kamdaon long mi wetem strong filing we mi neva filim bifo. Hem i

olsem wan olfala fren blong mi we i bin stap gaedem mi long bifo be naoia i kam blong stap" ' (insaed long Conference Report, Okt. 1996, 80; o *Ensign*, Nov. 1996, 60).

Sapos yu bin yusum aktiviti blong pulum tingting, putum antap long wan long ol bokis blong presen ia wodstrip we i talem *Presen we i Tabu Spirit*.

- Afta we yumi bin kasem presen we i Tabu Spirit, olsem wanem nao blong yumi save stap klin inaf blong Tabu Spirit i stap wetem yumi oltaem? (Luk long Ol Wok 5:32; D&C 6:14; 20:77, 79; 76:116; 121:45–46.) Olsem wanem nao yumi luksave o filmsave paoa blong Tabu Spirit? (Luk long Galesia 5:22–23; D&C 6:15, 23; 11:13.)

Presiden Boyd K. Packer i bin tijim: “Tabu Spirit i stap toktok wetem wan voes we yu *filim* bitim we yu *harem*. Oli bin stap talem se Hem i olsem wan ‘voes we i smol mo i kwaet’. Mo taem yumi tokabaot blong stap ‘lisiin’ long ol toktok smolmol blong Spirit, fulap taem wan i stap tokabaot wan samting long saed blong spirit, hem i stap talem, ‘Mi bin gat wan filing . . .’ . . . Revelesen i stap olsem ol toktok we yumi filim bitim we yumi harem” (insaed long Conference Report, Okt. 1994, 77; o *Ensign*, Nov. 1994, 60).

Long wan drim we Presiden Brigham Young i bin kasem, Profet Josef Smit i bin tijim hem blong tijim Ol Sent se “Spirit blong Lod . . . bae i givim pis mo glad long sol blong olgeta, bae Hem i tekemaot ol harem nogud, ol kros, ol trabol mo evri rabis fasin mo tingting long hat blong olgeta; mo bae evri strong tingting blong olgeta hem i blong mekem gud samting, tekem i kam fasin blong stap stret mo gud mo stanemap kingdom blong God” (*Manuscript History of Brigham Young, 1846–1847*, Komp. Elden J. Watson [1971], 529).

2. Jisas i stap talemaot ded mo laef bakegen blong Hem.

Ridim mo toktok raon long ol ves ia we yu bin jusum long Jon 16:16–33.

- Afta we Jisas i bin tijim Ol Aposol abaot Tabu Spirit, Hem i bin talem long olgeta we kolosap nao bae Hem i ded mo bae Hem i laef bakegen (Jon 16:16–20). Mo afta Hem i bin talem se, evri samting ia mi bin talem finis long yufala, se long mi bae yufala i save gat pis (luk long Jon 16:33). Long tingting blong yu, wanem nao mining blong gat pis long Hem? Wanem nao yumi save lanem aot long ol tijing blong Jisas insaed long Jon 16 we i save helpem yumi gat pis long Hem? (Luk tu long Filipae 4:7–9; D&C 59:23.)
- Jisas i bin talem long Ol Aposol blong Hem, “Long wol ya bambae yufala i harem nogud tumas. Be yufala i no fraet. Mi mi winim paoa blong olgeta samting blong wol ya finis” (Jon 16:33). Olsem wanem save ia, se Jisas i winim wol ia, i helpem yumi blong no fraet taem yumi stap fesem hadtaem? From wanem hem i impoten blong yumi no fraet?

3. Jisas i mekem bigfala prea blong sore.

Ridim mo toktok raon long Jon 17, we i gat insaed, wan prea we Jisas i bin mekem bifo ol harem nogud blong Hem long Garen blong Getsemane mo antap long kros. Prea ia oli stap singaotem plante taem bigfala prea blong sore from se taem we Jisas i stap prea, Hem i bin mekem long bihaf blong yumi, o Hem i bin stanap bitwin yumi mo Papa long Heven, blong askem Hem from fasin blong sevem man blong yumi. Lukaotem blong Spirit i gaedem yu blong yu save jusum ol ves we yufala i save ridim mo toktok raon long ol.

- Long taem we Jisas i bin statem prea blong Hem, olsem wanem nao Hem i tokabaot misin blong Hem long wol? (Luk long Jon 17:1–2; luk tu long Moses 1:39.) Olsem wanem nao Hem i winim misin ia?
- Long prea blong Hem, Sevyia i bin talem, ‘Hemia i laef we i no save finis, blong olgeta oli mas save yu se yu yuwan nomo yu tru God, mo i save mi, se mi, Jisas Kraes, we yu yu sanem mi mi kam’ (luk long Jon 17:3). Olsem wanem nao blong save gud Papa long Heven mo Jisas Kraes i defren blong taem we yu jes save nomo *abaot* Tufala? Olsem wanem blong yumi kam blong save Tufala? (Luk long Fas Jon 4:7–8; Mosaea 5:10–13; Alma 22:18; D&C 18:33–36; 132:21–24.)

Sapos yu bin yusum aktiviti blong pulum tingting, putum wodstrip we i talem se laef we i no save finis antap long seken bokis blong presen. Invaetem wan memba blong klas blong ridim Doctrine and Covenants 14:7.

- Long fas pat blong prea blong Hem, Jisas i bin talem ol samting we Hem i bin mekem blong save fulfilim misin blong Hem (Jon 17:4–8). Olsem wanem nao yumi save talemaot ol hadwok blong yumi long Papa long Heven? Olsem wanem nao hem i save afektem ol aksen blong yumi sapos evri naet long ol prea blong yumi, yumi stap talemaot tu insaed long hem ol hadwok blong yumi blong sevem Hem long dei ia?
- Nomata we Jisas i save se kolosap bae Hem i safu bigwan, long huia nao Hem i prea long hem? (Luk long Jon 17:6–9, 20.) Wanem nao yu save lanem aot long hemia?
- Olsem wanem nao yumi save kam olsem Jisas mo Ol Aposol blong Hem, oli laef long wol be “oli no man blong wol”? (Jon 17:14; luk tu long ol ves 15–16).

Elda M. Russell Ballard i bin talem:

“Insaed long Jos, plante taem yumi talem i folfolem tufala, ‘Stap long wol be yu no man blong wol.’ Taem yumi stap wajem ol so blong televisen we oli gat fasin blong stap swea, fasin blong kilim ded man, mo fasin blong no fetful long mared mo iven fasin blong gat intres long ol samting blong wol, plante taem yumi wis blong yumi save lego wol ia long sam wei mo karemaot ol famle blong yumi long hem. . . .

“Maet yumi mas talem folem tu laen blong toktok we i semsemak olsem oli stap talem bifo olsem tu defren toktok blong woning. Fas, ‘*Stap long wol.*’ Stap tekpat long hem; stap infomem. Traem blong gat wan save mo respektem ol naraman mo blong stap glad long ol defdefren samting. Mekem ol kontribusen we i gat mining blong hem long sosaeti tru long seves mo taem yu tekpat tu long hem. Seken, ‘*Yu no man blong wol.*’ Yu no mas folem ol rod we oli rong o jenisim ol bilif blong yu blong mekem se i fit long hem o akseptem wanem we i no stret.

“Yumi mas traem blong jenisim ol rabis fasin mo fasin blong no gat respek we i stap kamaot long televisen mo insaed long sosaeti, blong lego ol samting we i save mekem yu yu kros mo spolem hom blong yumi. Blong tokbaot ol fasin nogud long wol, mo blong tokbaot ol gud oposesen we oli stap long evri ples, yumi no mas *tekemaot* yumiwan o ol pikinini blong yumi long wol. Jisas i bin talem se, Kingdom blong heven i olsem wan liven, o is (luk long Matiu 13:33). Yumi stap blong leftemap wol mo helpem evriwan blong winim ol fasin nogud we oli stap raon long yumi. Sevyia i bin prea long Papa:

“ ‘Mi mi no askem long yu blong yu tekemaot olgeta long wol ya. Mi wantem blong yu blokem man nogud ya Setan*, blong i no kam spolem olgeta, yu holem olgeta oli stap gud oli sef’ (Jon 17:15)” (insaed long Conference Report, Epr. 1989, 101; o *Ensign*, Mei 1989, 80).

- Long wanem wei nao Papa long Heven mo Jisas Kraes Tufala i “wan,” olsem oli talem long Jon 17:21–22?

Blong stap tokbaot Papa long Heven, Jisas Kraes, mo Tabu Spirit, Presiden Gordon B. Hinckley i talem: “Oli ol seperet man, be oli wan long stamba tingting mo hadwok. Oli joen wanples blong tekem i kam bigfala plan blong fasin blong sevem man we i kam long God mo fasin blong kam olsem God blong ol pikinini blong God. . . . Hemia i stret yuniti ia we i stap wetem Papa, Pikinini, mo Tabu Spirit we i tekem tugeta Trifala blong kam wan long Godhed we i kam long God.” (insaed long Conference Report, Okt. 1986, 69; o *Ensign*, Nov. 1986, 51).

- From wanem hem i impoten blong Ol Aposol oli kam wan? (Luk long Jon 17:22–23.) From wanem yumi nidim yuniti wetem Papa long Heven mo Jisas Kraes? wetem ol narafala memba blong Jos? wetem ol famle blong yumi? Olsem wanem yumi save givhan blong mekem yuniti i kam antap insaed long ol rilesensip ia? (Luk long Jon 17:26; Mosaea 18:21; D&C 35:2.)

Las Toktok

Askem ol memba blong klas blong tingabaot wanem filing blong olgeta taem oli save se wan man i stap prea blong olgeta. Invaetem olgeta blong tingting strong long wanem filing blong olgeta sapos oli bin stap wetem Jisas long taem we Hem i bin mekem prea blong sore. Eksplenem se prea blong sore i save helpem yumi blong stap glad long gudfala presen blong laef we i no save finis, we Sevyia i givim long yumi. Testifae se bambae yumi bles sapos yumi traehad blong folem wanem we Tabu Spirit i stap talem mo bae yumi kam wan wetem Papa long Heven mo Jisas Kraes.

Wan Nara Aedia blong Tij

Ol nara tul ia i kam helpem lesen aotlaen we i stap. Yu save yusum aedia ia long taem blong lesen.

Invaetem Spirit

Blong helpem ol memba blong klas blong filim mo haremsave paoa blong Tabu Spirit, toktok wetem sam long olgeta fastaem, invaetem wanwan long olgeta blong jusum wan long ol presentesen ia blong mekem olsem pat blong lesen:

- Ridim wan pasej blong skripja we yu laekem tumas.
- Serem testimoni.
- Singsing wan hym o wan Praemeri singsing we i abaot Sevyia.
- Talemaot lav blong yu long Papa long Heven mo Jisas Kraes.
- Serem wan eksperiens long saed blong spirit (olsem we i stret).

Afta we yu givim ol presentesen long klas, invaetem ol memba blong klas blong talem gud olsem wanem filing blong olgeta long taem blong ol presentesen ia. Ridim toktok we i kam long Presiden Boyd K. Packer long ol pej “00” (99–100), mo helpem ol memba blong klas blong haremsave ol filing we i kam long Tabu Spirit. Tokabaot wanem filing blong yu taem Tabu Spirit i lidim yu.

Yu No Mekem Folem Tingting blong Mi, Be Folem Tingting blong Yu

Matiu 26:36–46; Mak 14:32–42; Luk 22:39–46

Stamba Tingting Blong mekem ol testimoni blong ol memba blong klas i kam strong, blong olgeta oli save kasem fogivnes, pis, mo laef we i no save finis tru long Atonmen blong Jisas Kraes.

Rere long Lesen

1. Ridim, tingting hevi, mo prea abaot ol skripja ia, we oli tokbaot stori blong ol eksperiens blong Sevya long Garen blong Getsemane: *Matiu 26:36–46, Mak 14:32–42, mo Luk 22:39–46.*
2. Sam moa riding: 2 Nifae 2:5–8; Alma 7:11–14; 34:8–16; 42:1–31; Doctrine and Covenants 19:15–24; Bible Dictionary, “Atonement,” 617; “Gethsemane,” 680.
3. Sapos we pikja blong Jisas i stap Prea long Getsemane (62175; Gospel Art Pikja Kit 227) i stap, yusum long taem blong lesen.
4. Invaetem sam long ol memba blong klas blong mekemrere olgeta taem oli kam long klas blong ekspresem lelebet ol filing blong olgeta abaot Atonmen blong Jisas Kraes long taem oli ridim wan pasej blong skripja we oli laekem tumas o talemaot baehat sam laen blong wan sakramen hym we oli laekem tumas.
5. Wan tingting blong tij: Lod i bin talem, yu no mas fraet blong talemaot toktok blong mi, be yu mas lukaotem blong kasem toktok blong mi fastaem (luk long D&C 11:21). Blong tijim gud ol skripja, yu sud stadi mo tingting hevi long olgeta evri dei. Gohed oltaem blong fidim testimoni blong yu wetem ol paoa mo evri trutok blong skripja. (Luk long *Teaching—No Greater Call*, 10, 85.)

Wan Tingting blong Lesen

Aktiviti blong
Pulum Tingting

Olsem we i stret, yusum aktiviti ia o wan aktiviti blong yuwan blong statem lesen. Sam yia bifo Elda Orson F. Whitney i oden i kam wan Aposol, hem i bin kasem wan visen blong Sevya insaed long Garen blong Getsemane. Ridim toktok ia, we i toktok blong Elda Whitney abaot visen blong hem:

“Mi bin luk miwan se mi stap long Garen blong Getsemane, blong witnesem bigfala harem nogud blong Sevya. Mi bin luk Hem olsem we mi neva luk wan man bifo. Mi stap stanap biaen long wan tri long fored blong mi, mi bin luk Jisas, wetem Pita, Jemes, mo Jon, we oli kamtru long wan smol . . . get long raet saed blong mi. Hem i livim Trifala Aposol kolosap long get, afta Hem i talem long olgeta blong nildaon mo prea, Pikinini blong God bae i go long narasaed blong garen blong Getsemane, long ples we Hem tu i bin nildaon mo prea. Hem i sem prea nomo we evri man we oli stap ridim Baebol oli save: “Papa, sipos yu save mekem, plis yu tekemaot ol samting ya we i stap mekem mi mi harem nogud tumas. Be yu no mekem olsem we mi mi wantem, yu mekem olsem we yu nomo yu wantem.”

“Taem Hem i stap prea, ol wota blong ae blong Hem i stap kamdaon long fes blong Hem, we i fesem mi. Hem i tajem mi tumas, mekem se mi tu mi krae wetem stret sore. Ful hat blong mi i go aot long Hem, mi lavem Hem wetem ful sol blong mi, mi gat wan strong tingting blong stap wetem Hem mo i nomo gat nara tingting bakegen.

“Mo afta Hem i bin girap mo wokbaot i go long ples we Olgeta Aposol ia oli stap nildaon long hem—oli stap silip! Hem i bin seksekem olgeta sloslo, mo wekemap olgeta long wan voes we i daon, mo Hem i no iven soem se Hem i kros o fasin blong no save wet longtaem, mo askem olgeta long wan fasin blong sore sapos oli save wekap wetem Hem wan moa haoa. Long ples ia we Hem i stap, wetem ol bigbigfala sin blong wol antap long solda blong Hem, wetem ol harem nogud blong bodi blong evri man, woman mo pikinini i gotru long sol blong Hem we Hem i letem—mo oli no save wekap wetem Hem wan moa moa!

“Mo Hem i gobak long ples blong Hem, Hem i bin mekem sem prea bakegen; mo afta Hem i bin gobak mo faenem Olgeta Aposol oli silip bakegen. Bakegen, hem i wekemap olgeta, wonem olgeta bakegen, mo Hem i bin gobak bakegen mo prea. Hem i bin mekem prea tri taem bifo i kasem ansa blong Hem” (*Through Memory’s Halls* [1930], 82).

Soem pikja blong Jisas we i stap prea long Getsemane. Askem ol memba blong klas blong tingting abaot lav blong olgeta long Sevyia mo wanem filing blong olgeta sapos oli bin stap luk Hem i stap prea long Garen blong Getsemane long naet bifo oli nilim Hem long kros. Invaetem sam long ol memba blong klas blong serem ol tingting blong olgeta.

Yusum mo Toktok
Raon long Skripja

Lesen ia mo lesen 26 oli abaot Atonmen—Fasin blong stap glad blong mekem samting blong Jisas Kraes blong tekem antap long Hemwan ded mo ol sin mo ol harem nogud blong evri man mo woman. Lesen ia i stap lukluk nomo long eksperiens blong Sevyia long Garen blong Getsemane, taem lesen 26 i stap tokbaot taem we oli Nilim Hem long kros. Hem i impoten blong tingbaot se Atonmen i tekem tu, harem nogud blong Sevyia hemia long garen mo antap long kros.

Presiden Ezra Taft Benson i bin tijim: “Long Getsemane mo antap long Kalvari, Hem i bin mekem i kamtru atonmen we i no gat en mo i no save finis. Hem i wan bigfala fasin blong lav nomo, we i bitim eni narawan, we oli bin rekodem long histri. Hem i mekem se Hem i kam olsem Ridima blong yumi—i pemaot yumi evriwan long ded blong mit mo bun, mo pemaot sam long yumi we bae oli obei ol loa mo ol odinens blong gospel long ded blong spirit” (*The Teachings of Ezra Taft Benson* [1988], 14).

1. Sevyia i tekem antap long Hemwan ol sin mo ol samting we yumi slak long olgeta.

Toktok raon long Matiu 26:36–46; Mak 14:32–42; mo Luk 22:39–46. Invaetem ol memba blong klas blong ridim laod ol ves ia we yu bin jusum.

- Wanem nao Jisas i askem Ol Aposol blong Hem blong mekem long Garen blong Getsemane? (Luk long Luk 22:39–40.) From wanem nao Jisas i askem Ol Aposol blong prea? (Luk long Luk 22:40.) Olsem wanem nao prea i helpem yumi blong winim temtesen?

- Wanem nao Jisas i askem Pita, Jemes, mo Jon blong mekem long Garen blong Getsemane? (Luk long Matiu 26:38, 41. Poenemaot se tok ia *wajem* oli yusum long ples ia i minim se blong stap wekap; luk long futnot 38b.) Olsem wanem nao maet toktok ia blong wajem, o stap wekap i aplae long yumi taem yumi stap traem blong laef folem gospel? (Luk long 2 Nifae 4:28; Alma 7:22; 32:26–27.)
- From wanem nao Jisas i glad blong letem Hem long bigfala safaring we Hem i save se bae Hem i go tru long hem long Garen blong Getsemane? (Luk long Matiu 26:39, 42, 44.) Wanem nao yumi save lanem aot long prea blong Sevyia long Getsemane? Olsem wanem yu bin kasem blesing taem yu letem yuwan i folem tingting blong Papa long Heven?
- Afta we Jisas i talem se Hem bambae i mekem tingting blong Papa long Heven, “nao wan enjel i aot long heven i kam, nao i kamtru long Jisas, i mekem Hem i strong bakegen” (Luk 22:43). Wanem nao hemia i tijim yumi abaot Papa blong yumi long Heven? (Ol ansa maet i save tekem tu se bambae Hem i mekem yumi kam strong sapos yumi mekem samting we Hem i wantem yumi blong mekem, wetem wan tingting we i stap daon.)
- Wanem nao Sevyia i go tru long hem long Getsemane? (Luk long D&C 19:16–19; Luk 22:44; Mosaea 3:7; Alma 7:11–13.)

Elda James E. Talmage i bin tijim: “Bigfala harem nogud blong Kraes long garen i wan samting yumi no save andastanem evriwan wetem wan maen we i gat en, mo tu wetem paoa mo samting we yumi stap mekem. . . . Hem i bin traehad mo harem soa tru long wan hevi samting we i no gat wan man o eni samting we i laef long wol i save tingbaot. Hem i no soa blong mit mo bun, o harem nogud long maen nomo, we i mekem Hem blong safa long kaen bigfala harem nogud olsem we i mekem blong blad i kamaot long evri hol blong bodi; be i wan bigfala harem nogud blong sol we i blong spirit we God nomo i save eksperisem. . . . Long haoa ia blong bigfala harem nogud, Kraes i bin mitim mo winim evri bigfala filing we Setan, ‘masta blong wol ya,’ i save givim. . . . Long semmak fasin, stret mo gudfala tru man we yumi no inaf blong andastanem, Sevyia i tekem antap long Hemwan ol hevi sin blong evri man we i stat long taem blong Adam i go kasem en blong wol ia” (*Jesus the Christ*, long namba 3 ed. [1916], 613).

Elda Neal A. Maxwell i talem: “Olsem pat blong atonmen blong Hem we i no gat en, Jisas i save ‘long saed blong bodi blong mit mo bun’ evri samting we bae yumi go tru long hem. (Alma 7:11–12). Hem i bin karem ol sin, ol bigfala harem nogud, ol sore, mo . . . ol soa blong bodi blong evri man, ol woman, mo ol pikinini (luk long 2 Nifae 9:21)” (insaed long Conference Report, Epr. 1987, 89; o *Ensign*, Mei 1987, 72).

2. Yumi nidim Atonmen blong Jisas Kraes.

- From wanem nao yumi nidim Atonmen blong Jisas Kraes? (Luk long Alma 34:9.)
 - a. Foldaon blong Adam mo Iv i mekem se yumi save kasem ded blong mit mo bun, we i seperesen blong bodi mo spirit (Moses 6:48).
 - b. Taem yumi sin, yumi stap tekem i kam long yumiwan ded blong spirit from se yumi nomo stap wetem God. Ol sin blong yumi oli mekem yumi no klin inaf blong stap wetem God (1 Nifae 10:21).

- c. From se yumi no save winim long yumiwan ded blong mit mo bun mo ded blong spirit, Papa long Heven i sendem Wan Pikinini ia Nomo blong Hem blong mekem Atonmen (Jon 3:16; 2 Nifae 2:5–9).
- Wanem blesing nao oli stap i kam long yumi from se Sevyia i bin mekem wan sakrifae we i pemaot yumi? Olsem wanem nao yumi save kasem ol blesing ia?
 - a. From we Sevyia i bin letem Hem blong ded mo i bin laef bakegen, yumi evriwan bambae yumi laef bakegen, blong winim ded blong mit mo bun (Mosaea 16:7–8).
 - b. From we Hem i bin tekem antap long Hemwan ol sin blong yumi, yumi save sakem sin blong yumi mo yumi save kasem fogivnes, i mekem yumi yumi klin mo klin inaf blong stap wetem God (Alma 7:13–14; Ol Toktok blong Bilif 1:3).
 - c. From se Hem i bin tekem antap long Hemwan ol samting we yumi slak long ol, Hem i andastanem ol hadtaem blong yumi mo save olsem wanem blong helpem yumi (Alma 7:11–12). Yumi kasem pis long Hem sapos nomo yumi putum tingting blong yumi i stap daon mo folem Hem (D&C 19:23).

Elda Marion G. Romney i bin eksplenem se tru long Atonmen, evri pipol oli sev long ded blong mit mo bun mo olgeta we oli filim sore from se oli sakem sin mo olgeta we oli stap obei, olgeta tu oli sev long sin:

“Atonmen blong Jisas Kraes i mekem i posibol blong ol bodi mo spirit oli kam tugeta bakegen long taem blong laef bakegen. Mekem se evri man long wol, olgeta we oli bilif mo olgeta we oli no bilif, oli nidim Ridima blong kasem laef bakegen blong olgeta, from se laef bakegen bae i blong evriwan olsem long foldaon blong Adam mo Iv, we i givim ded long evri man.

“I gat wan narafala samting long atonmen we i mekem mi mi lavem moa Sevyia, mo i fulumap sol blong mi wetem fasin blong talem tangkyu bitim wanem blong talem. I go wetem hemia blong pem praes blong taem Adam i brekem loa, mo tekem i kam laef bakegen, tru long harem nogud blong Sevyia, Hem i pem kaon blong ol sin blong miwan. Hem i pem kaon blong ol sin blong yuwan mo ol sin blong wanwan man o woman we oli laef long wol ia, olgeta we oli nomo stap long wol mo olgeta we bae oli kam stap yet long wol ia. Be hemia Hem i mekem be i gat sam samting we yumi tu yumi nid blong mekem. Ol help blong harem nogud ia blong ol loa we yumi wanwan i brekem bae i no save kam long yumi long sem fasin we laef bakegen bae i kam long yumi nomata long wanem we yumi mekem. Sapos yumi kakae ol blesing blong atonmen olsem we ol loa we yumi wanwan yumi brekem i konsenem, yumi mas obei long loa.

“. . . Taem yumi mekem sin, i mekem yumi yumi no stap kolosap long God mo yumi no inaf blong go insaed long ples we Hem i stap long hem. I no gat wan toti samting i save go insaed long ples we Hem i stap long hem. Long yumiwan, yumi no save, nomata olsem wanem yumi save traem blong mekem yumiwan i fri long toti we i stap long yumi olsem ol ansa blong ol loa we yumi nomo yumi brekem. Blad blong Ridima nomo i save wasemaot toti ia, mo Hem i setemap wan wei we long hem toti ia i save kamaot. Wei ia i gospel blong Jisas Kraes. Gospel i askem yumi blong biliv long Ridima, akseptem Atonmen blong Hem, sakem ol sin blong yumi, kasem baptaes andanit long wota blong kam klin long ol sin blong yumi, putum ol han antap long hed blong kasem presen we i Tabu

Spirit, mo gohed blong stap fetful blong holem taet, o mekem evri samting we yumi save mekem blong holem taet ol prinsipol blong gospel long ol evri dei laef blong yumi” (insaed long Conference Report, Okt. 1953, 35–36).

Invaetem ol memba blong klas we yu bin jusum olgeta fastaem blong serem ol presentesen we oli bin priperem (luk long seken “Rere long Lesen”).

Las Toktok

Testifae long Jisas Kraes mo ekspressem fasin blong talem tangkyu blong yu long Atonmen blong Hem. Olsem we i stret, askem ol memba blong klas blong mekem semmak.

**Sam Nara Aedia
blong Tij**

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Vidio presentesen

Nambafaef pat blong “New Testament Customs,” wan seken blong *New Testament Video Presentations* (53914), eksplenem se *Getsemane* i minim “ples blong mekem oliv oel.” Sapos yu soem pat ia, toktok raon long olsem wanem *Getsemane* i wan stret nem blong garen we Sevy a harem nogud long ol sin blong yumi.

2. “Man blong Givhan”

Elda Boyd K. Packer i bin yusum wan parabol blong tijim abaot olsem wanem Atonmen blong Jisas Kraes i mekem yumi fri long sin sapos yumi sakem sin mo obei ol komanmen. Yu save serem parabol ia blong helpem ol memba blong klas blong andastanem nid blong Atonmen. Parabol ia oli save faenem long ol buk ia:

- a. Olgeta *Gospel Prinsipol* [1997], pej 75–77.
- b. “The Mediator,” wan pat blong *Book of Mormon Video Presentations* (53911).
- c. Conference Report, Epr. 1977, ol pej 79–80; o *Ensign*, Mei 1977, ol pej 54–55.

“Blong Samting Ia Nao, Mi Mi Bon”

Lesen
26

Matiu 26:47–27:66; Mak 14:43–15:39; Luk 22:47–23:56; Jon 18–19

Stamba Tingting Blong helpem ol memba blong klas blong filim lav we Sevyia i gat long olgeta mo mekem lav blong olgeta long Hem i kam antap mo fasin blong talem tangkyu blong olgeta from sakrifaes blong pem praes blong Hem.

- Rere long Lesen**
- Ridim, tingting hevi, mo prea abaot ol skripja ia:
 - Matiu 26:47–75; Mak 14:43–72; Luk 22:47–71; Jon 18:1–27, Smol taem afta long bigfala harem nogud blong Hem long Getsemane, Judas i bin talemaot Jisas long ol enemi, we oli kam wetem ol jif pris, Ol Farasi, mo ol soldia. Jisas i letem Hemwan long ol man we oli kam blong tekem Hem, we oli tekem Hem long garen mo oli putum Hem long fored blong kot blong ol man Jiu. Anas i bin kwestinem Hem fastaem, wan foma hae pris, mo afta Kaeafas, man we i bin tekem ples blong Anas mo hem i man blong gel blong hem. Ol jif pris mo ol elda we oli stap long taem ia oli spet long Jisas, oli jikim Hem, oli fasem Hem, mo tok nogud long Hem from fasin blong tok agensem God, mo kilim Hem i ded long fasin blong brekem loa. Aotsaed long haos blong Kaeafas, Pita i talem se hem i no save Jisas.
 - Matiu 27:1–26; Mak 15:1–15; Luk 23:1–25; Jon 18:28–19:16. From we ol jif pris mo ol elda oli no gat paoa blong talem se Jisas i mas ded, oli sendem Hem i go long Paelat we i man Rom, mo i hed gavman blong ol man Rom long Judia (Bible Dictionary, “Pilate,” 751). Long fored blong Paelat, oli tok nogud long Jisas se Hem i wan enemi blong Kaesa. Oli faenemaot se Jisas Hem i blong Galili, so Paelat i sendem Hem i go long Herod, man we i hed gavman blong ful Galili. Herod i no wantem jajem Jisas mo hem i sendem Hem i gobak long Paelat, we hem i singaot strong i go long plante man mo hem i askem blong oli krusifaem Jisas.
 - Matiu 27:27–66; Mak 15:16–39; Luk 23:26–56; Jon 19:17–42. Oli wipim Jisas mo krusifaem Hem. Antap long kros, Hem i eksperiensem bigfala harem nogud taem Hem i stap letem Hemwan blong oli sakrifaesem Hem from evri man.
 - Sam moa riding: Aesea 53; Mak 15:39–47; Jon 3:16; 15:13; 1 Nifae 11:32–33; 19:7–9; 2 Nifae 9:21–22; Bible Dictionary, “Crucifixion,” 651.
 - Mekemrere seven wodstrip we oli bin talemaot long pej “00”(110) (o stap rere blong raetem ol toktok ia long blakbod).
 - Sapos ol tul ia oli stap, yusum olgeta long taem blong lesen:
 - Ol pikja blong Taem oli Talemaot Jisas long Ol Enemi (62468; Gospel Art Pikja Kit 228); Taem Pita i dinaem Hem (62177; Gospel Art Pikja Kit 229); mo Taem oli Krusifaem Hem (62505; Gospel Art Pikja Kit 230).
 - “To This End Was I Born,” wan sikistin minit pat blong *New Testament Video Presentations* (53914).
 - Wan tingting blong tij: Taem ol tija mo ol memba blong klas oli stap kwaet, olgeta oli invaetem Spirit blong stap long taem ia. Ol memba blong klas oli sud “fri blong

toktok raon long, fri blong toktok, fri blong tekpat long wok blong klas, be i no gat wan memba blong klas i gat raet blong spolem wan narafala studen blong stap fosem hem o poenemaot se mo talemaot ol toktok we oli no impoten tumas” (David O. McKay, *Gospel Ideals* [1954], 224). Soem wan eksampol blong gat reverens long God mo gat respek long wanwan memba blong klas.

Wan Tingting blong Lesen

Aktiviti blong Pulum Tingting

Olsem we i stret, yusum aktiviti ia o wan aktiviti blong yuwan blong statem lesen. Mekem ol memba blong klas oli tanem i go long map “Jerusalem in Jesus’ Time” (ol map 17 insaed long LDS edisen blong King James Bible).

Eksplenem se lesen ia i lukluk nomo long Taem we oli Krusifaem Sevyia mo long ol iven mo haoa we i kam bifo long hem. Ol iven ia oli bin hapen long ol ples we oli faenem long map. Helpem ol memba blong klas blong luk save ol ples ia: (1) Garen blong Getsemane, (2) haos blong Kaeafas, (3) ples blong ol Jentael, (4) Fortress Antonia (haos blong Paelat), mo (5) Hil blong Golgota (Kalvari).

Taem ol memba blong klas oli luk save ples we Hil blong Golgota i stap long hem, eksplenem se oli bin Krusifaem Jisas long ples ia nao. Soem pikja blong Taem we oli Krusifaem Hem. Askem ol memba blong klas blong tingbaot wan smol pikinini we i stap lukluk pikja mo stap askem, “From wanem Jisas i nid blong ded?” Invaetem ol memba blong klas blong tekem taem long taem blong lesen blong traem tingting hevi long wanem nao bae oli talem long pikinini ia. Talem long olgeta se bae yufala i toktok raon long kwestin kolosap long en blong lesen ia.

Yusum mo Toktok Raon long Skripja

Taem yu stap tijim olgeta skripja ia, helpem ol memba blong klas blong andastanem lav we Sevyia i bin soem long olgeta taem Hem i bin letem Hemwan blong oli save givim hadtaem long Hem mo krusifaem Hem.

1. Oli bin talemaot Jisas long ol enemi, oli arestem mo tok nogud long Hem from fasin blong tok agensem God; Pita i dinaem Jisas tri taem.

Toktok raon long Matiu 26:47–75; Mak 14:43–72; Luk 22:47–71; mo Jon 18:1–27. Invaetem ol memba blong klas blong ridim ol ves ia we yu bin jusum. Yu save tok abaot smol stori ia we oli aotlaenem long pat 1a blong seksen “Rere long Lesen”. Soem pikja blong taem we oli talemaot Jisas long ol enemi long Getsemane.

- Olsem wanem nao Pita i ansarem ol man we i kam long garen blong Getsemane blong tekemaot Jisas i go? (Luk long Jon 18:10.) Olsem wanem nao Jisas i ansa long ol man ia? (Luk long Luk 22:51–53; Jon 18:11–12.) From wanem nao Jisas i letem Hemwan blong oli tekem Hem? (Luk long Matiu 26:53–54; Jon 10:17–18. Eksplenem se hem i tingting blong Papa long Heven se Jisas i mas letem laef blong Hem from yumi.)
- Ol jif pris mo ol elda blong ol man Jiu oli bin tok nogud long Jisas from fasin blong tok agensem God, wan rabis fasin we oli mekem i go kasem ded (Mak 14:64). Wanem nao i fasin blong tok agensem God? (Fasin blong no respektem God o stap klem se yu semmak long God.) Wanem nao Jisas i talem we ol jif pris mo ol elda oli ting se Hem i tok agensem God? (Luk long Mak 14:60–63.)

- Taem oli karemaot Jisas long garen, plante long ol disaepol blong Hem “oli lego hem, oli ronwe” (Matiu 26:56). Be, Pita mo Jon i bin gohed blong folem Hem (Matiu 26:58; Jon 18:15; oli stap ting se disaepol we oli no save nem blong hem long Jon 18:15 i Jon). Wanem nao Pita i mekem taem ol pipol aotsaed long haos blong Kaeafas oli bin talem se hem tu i save Jisas? (Luk long Mati u 26:69–74.) Wanem nao Pita i mekem taem hem i save se hem i bin tanem baksaed blong hem long Jisas tri taem? (Luk long Mati u 26:75; luk tu long ves 33–35.)

Soem pikja blong Taem Pita i tanem baksaed blong hem long Jisas.

- Olsem wanem nao, sam long yumi i olsem Pita, samtaem yumi stap tanem baksaed blong yumi long fet blong yumi? Wanem nao yumi save lanem long laef blong Pita afta we hem i bin tanem baksaed blong hem long Lod?

Presiden Gordon B. Hinckley i bin talem:

“Mi filim sore long Pita. Plante long yumi oli olsem hem. Yumi mekem strong promes blong yumi blong stap fetful, yumi talemaot strong tingting blong yumi blong stap strong mo harem gud; samtaem yumi talemaot long pablik se wanem samting we bae i hapen, bambae yumi stanap strong oltaem, mo se bae yumi stap tru long yumiwan mo long ol naraman.

“Mo afta ol paoa i stap blong kam antap. Samtaem oli ol paoa blong gat ol fren. Samtaem oli ol strong tingting blong samting blong wol. Samtaem oli ol giaman tingting blong gat wan samting. I gat ol tingting we ol slak. I gat ol disaplin we oli no strong. I gat ol samting blong save givim temptesen. Mo afta i gat ol giaman toktok, folem wetem ol tok nogud blong yuwan mo ol wota blong ae i krae blong stap tingtingbak long wanem we i nogud. . . .

“ . . . Sapos i gat sam insaed long Jos we long toktok mo long fasin oli stap giaman long fet blong olgeta, mi stap prea se bae yufala i mas holem taet fasin blong leftemap tingting blong yufala mo save olsem wanem oli stretem esksampol blong Pita, we nomata hem i bin stap wokabaot evri dei wetem Jisas, long las haoa blong wokabaot blong hem, hem i giaman se hem i no save Lod, mo tu testemoni we hem i bin gat insaed long hat blong hem. Be hem i bin winim ol samting ia mo kam olsem wan strong difenda mo wan paoaful sapota. So, i gat wan wei blong eni man o woman blong save kam mo ademap paoa mo fet blong hem long paoa mo fet blong ol naraman blong stanemap kingdom blong God” (“And Peter Went Out and Wept Bitterly,” *Ensign*, Maj. 1995, 2–4, 6).

2. Oli bin talemaot blong oli krusifaem Jisas.

Ridim mo toktok raon long ol ves ia we yu bin jusum long Mati u 27:1–26; Mak 15:1–15; Luk 23:1–25; mo Jon 18:28–19:16. Yu save tokabaot smol stori ia we oli aotlaenem long pat 1*b* blong seksen “Rere long Lesen”.

- Taem Paelat i kam blong save se Jisas i blong Galili, hem i bin sendem Hem i go long Herod, we i man we i lukaotem Galili (Luk 23:6–7). From wanem nao Herod i “glad tumas” blong luk Jisas? (Luk long Luk 23:8.) Olsem wanem nao Sevyia i ansa long ol kwestin blong Herod? (Luk long Luk 23:9; komperem ves ia wetem profesi we i stap long Aesea 53:7.)
- Afta we Herod mo ol man blong hem oli tok nogud long Jisas mo jikim Hem, olgeta oli sendem Hem i gobak long Paelat (Luk 23:11). Wanem nao jajmen blong Paelat long Jisas? (Luk long Luk 23:13–17; luk tu long Luk 23:4.) From

wanem nao Paelat i talemaot blong oli krusifaem Jisas? (Luk long Matiu 27:15–24; Mak 15:6–15; Luk 23:18–25; John 19:1–16.) Olsem wanem nao maet yumi olsem Paelat, sam samtaem yumi traem blong stap longwe long responsabiliti blong ol strong disisen?

- Wan long ol kwestin blong Paelat abaot sapos Jisas i wan king, Jisas i bin ansa, blong samting ia nao, mi mi bon, mo blong samting ia, mi mi kam long wol ia, blong mi talemaot mo witnes long ol tok we i tru (luk long Jon 18:37). Long wanem wei nao Jisas i wan King? (Luk long Ol Sam 24:10; Aesea 44:6; Revelesen 11:15; 15:3; 2 Nifae 10:14.) Wanem nao mining blong tok ia se kingdom blong Hem i no stap long wol ia? (luk long Jon 18:36).

3. Oli bin wipim mo krusifaem Jisas.

Ridim mo toktok raon long ol ves ia we yu bin jusum long Matiu 27:27–66; Mak 15:16–39; Luk 23:26–56; mo Jon 19:17–42. Soem pikja blong Taem we oli Krusifaem Hem.

- Wanem nao ol pipol oli mekem long Jisas afta we oli bin talemaot se bae oli krusifaem Hem? (Luk long Matiu 27:27–44; Luk 23:34–39.) From wanem nao Jisas i letem ol pipol blong oli givim hadtaem long Hem? (Luk long 1 Nifae 19:9.)

Ol skripja oli rekodem seven toktok we Jisas i mekem taem Hem i stap long kros. Ridim mo toktok raon long ol ves we oli listim i stap daon. Taem yufala i toktok raon long olgeta, soemaot wodstrip blong ol toktok ia o raetem ol toktok ia long blakbod.

1. *Luk 23:34. "Papa, plis yu fogivim olgeta ya, from we oli no save samting we oli stap mekem."*

- Long Josef Smit Translesen, yumi lanem se taem Jisas i talem toktok ia, Hem i stap prea blong ol soldia blong Rom we oli bin krusifaem Hem (Luk 23:34, futnot 34c). Wanem nao hemia i soemaot abaot Hem? Wanem i fasin blong wol we oli save ansarem ol pipol we oli no laekem yumi o stap spolem yumi? Olsem wanem nao yumi bles taem yumi folem eksampol blong Jisas?

2. *Luk 23:43. Long stil man we i sakem sin: "Tru mi mi talem long yu. Tedei, yu bambae yu stap wetem mi long paradaes."*

3. *Jon 19:26–27. Long mama blong hem, Meri: "Woman, hemia pikinini blong yu!" Long Jon: "Hemia mama blong yu!"*

- Ol nid blong huia nao Jisas i tingting long hem long taem blong bigfala hadtaem blong harem nogud blong Hem? (Luk long Luk 23:43; Jon 19:26–27.) Wanem nao yumi save lanem long ples ia? (Sapos i gat sam kwestin i kamaot long toktok blong Jisas long Luk 23:43, luk long nambatri nara aedia blong tij.)

4. *Matiu 27:46; Mak 15:34. "God blong mi, God blong mi.? From wanem yu lego mi mi stap olsem ya?"*

- Wanem nao Jisas i eksperiensem antap long kros we i mekem Hem blong andastanem mo helpem yumi taem yumi filim se yumi stap yumiwan? From wanem hem i impoten blong save se Sevya i no ded nomo from ol sin blong yumi be tu from ol fasin blong stap yumiwan, ol harem nogud, mo ol fraet blong yumi?

Elda Jeffrey R. Holland i talem: "From se Hem i mas finisim wokabaot ia olsem wan man we i stap purumbut antap long ol frut blong grep we wan man i no save givhan long Hem, Hem i save winim taem blong tudak blong olgeta evriwan, bigfala soa we i kasem Hem? Hemia i no kam wetem smol branj blong hud we i gat nil blong hem mo wetem ol nil, be wetem strong filing we i kam nomo olsem: . . . 'God blong mi, God blong mi. From wanem yu lego mi mi stap olsem ia?' (Mak 15:34). Hem i tekem antap long Hem ol sin blong yumi mo ol fraet blong yumi mo fasin blong stap yumiwan tu? Hem i bin mekem mo Hem i mekem mo bae Hem i mekem" (insaed long Conference Report, Okt. 1989, 32; o *Ensign*, Nov. 1989, 26).

5. *Jon 19:28. "Mi tosta."*

- Nomata long ol wanem we Jisas i bin harem nogud long hem, hemia i jes tokbaot nomo abaot harem nogud blong Hem long bodi blong mit mo bun. Wanem nao oli givim long Hem taem Hem i talem se Hem i tosta? (Luk long Jon 19:29.)

6. *Jon 19:30. "Olgeta samting i finis nao."*

- Folem Joseph Smith Translation, Jisas i bin talem se, Papa, olgeta samting i finis nao, tingting blong yu i finis (luk long 27:50, futnot 50a). From wanem nao Sevyia i nid blong ded blong mekem se Hem i save fulfilim tingting blong Papa long Heven? (Luk long 2 Nifae 9:5; 3 Nifae 27:13–16. Sapos yu bin yusum aktiviti blong pulum tingting, invaetem ol memba blong klas blong serem ol tingting blong olgeta long olsem wanem nao oli save ansarem kwestin blong smol pikinini ia.)

Presiden Spencer W. Kimball i talem: "Hem i nid blong ded, blong mekem se Hem i save openem ol gref blong ol man mo woman semmak olsem we hol blong ston blong Hemwan i open. Witaot bigfala tudak blong taem we oli bin krusifaem Hem, bambae i no save gat wan man o woman i kamaot aot long gref" (insaed long Conference Report, Epr. 1975, 4; o *Ensign*, Mei 1975, 4).

7. *Luk 23:46. "!Papa! !Mi mi putum laef blong mi long han blong yu!"*

Sapos yu stap yusum vidio presentesen ia "To This End Was I Born," soem naoia.

Las Toktok

Eksplenem se ol fas toktok blong Sevyia we oli bin raetem daon long laef bifo i taem Hem i bin talem long Papa blong Hem se Hem i glad blong oli sendem Hem i kam daon long wol blong kam olsem Sevyia (luk long Abraham 3:27). Wan long ol fas toktok blong Hem we oli raetem daon blong laef ia i, Mi mas mekem wok blong Papa blong mi (luk long Luk 2:49). Wan long ol las toktok blong Hem we Hem i bin toktok long hem long laef ia i, taem Hem i bin talem long Papa blong Hem se ol wok blong Hem i finis, ol tingting blong Papa blong Hem i finis (luk long Joseph Smith Translation, Matthew 27:54; luk long Matiu 27:50, futnot 50a). Jisas i neva ting nating long tingting blong Papa blong Hem o long misin blong Hemwan. Hem i save singaotem plante enjel blong oli save sevem Hem, be Hem nomo i no wantem (Matiu 26:53–54). Nomata long bigfala harem nogud, Hem i neva komplem long fasin blong tingting i stap daon mo long strong tingting blong Hem blong komplitim Atonmen we i nogat en.

Testifae long ol trutok we oli bin toktok raon long hem long lesen ia. Olsem we i stret, invaetem ol memba blong klas blong serem ol testimoni blong olgeta.

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Folem eksampol blong Sevyia long ol taem blong hadtaem

Ol aksen blong Sevyia long taem blong las dei blong laef blong Hem long wol ia i soem, hamas ol fasin blong Hem i impoten bigwan. Luklukbak long sam long ol hadtaem we Jisas i bin winim long dei ia. Mo afta askem ol kwestin ia:

- Ol wanem kwaliti blong fasin nao yumi save luksave long Jisas long taem blong hadtaem ia? (Ol ansa maet i go tu wetem, se hem i wari moa long ol naraman bitim Hemwan, se Hem i gat fogivnes, se Hem i save lego tingting blong Hem mo folem tingting blong Papa long Heven, se Hem i no save go angensem ol naraman from ol samting we oli slak long hem, mo se Hem i no save komplem. Listim ol ansa blong ol memba blong klas long blakbod. Askem ol memba blong klas blong givim ol stret eksampol blong wanem taem yumi save luk save ol kwaliti ia.)
- Ol wanem kwaliti nao oli luksave long yumi oltaem long taem blong ol bigfala hadtaem blong yumi? Olsem wanem nao yumi save folem eksampol blong Sevyia long taem blong ol hadtaem blong yumi?

2. Mi bin talemaot man ia we i stret nomo i go long ol enemi (Matiu 27:4)

- Wanem nao Judas i mekem blong hem i save sakemaot sin we hem i bin talemaot Sevyia long ol enemi? (Luk long Matiu 27:3–5.) Wanem nao yumi save lanem long eksperiens blong hem abaot “mani” we wol i givim long yumi blong yumi save mekem ol sin blong yumi?

3. “Tede, yu bambae yu stap wetem mi long paradaes” (Luk 23:43)

Yusum infomesen ia sapos yu nid blong eksplenem ol toktok blong Sevyia insaed long Luk 23:43.

Profet Josef Smit i bin talem se Jisas i bin talem long stilman, “Tede, bae yu stap wetem mi long wol blong ol spirit (Spirit Wol)” (*Teachings of the Prophet Joseph Smith*, sel. Joseph Fielding Smith [1976], 309).

Long Doctrine and Covenants 138:36–37 yumi lanem se Jisas i bin go long wol blong ol spirit bitwin taem blong ded mo Laef Bageken blong Hem mo long ples ia, Hem i bin mekemrere ol fetful spirit blong prijim gospel blong Hem i go long ol spirit we oli no bin kasem gospel long wol ia.

“Be Hem i No Stap Long Ples Ya. Hem i Laef Bakegen Finis”

Lesen
27

Matiu 28; Luk 24; Jon 20–21

Stamba Tingting Blong helpem ol memba blong klas blong filim fasin blong talem tangkyu long Laef Bakegen blong Sevyu mo ol blesing we Hem i givim long yumi.

- Rere long Lesen**
1. Ridim, tingting hevi, mo prea abaot ol skripja ia:
 - a. Matiu 28:1–15; Luk 24:1–12; Jon 20:1–10. Meri, woman Magdala mo sam nara woman oli kam long hol blong ston we oli putum Jisas long hem mo oli faenemaot se i no gat man. Ol enjel oli talemaot long olgeta se Jisas i bin laef bakegen. Pita mo Jon i kam blong luk hol ia we i no gat man long hem. Lod ia we i laef bageken i kamaot long ol woman.
 - b. Luk 24:13–35. Jisas i wokabaot mo Hem i toktok wetem tu disaepol long rod i go long Emeas. Tufala i no luksave Hem kasem taem Hem i brekem bred blong olgeta.
 - c. Matiu 28:16–20; Luk 24:33–53; Jon 20:19–31. Jisas i kamaot long Ol Aposol blong Hem, Hem i soem long olgeta we Hem i bin laef bakegen, mo i komandem olgeta blong tijim gospel long evri nesen. Tomas i tajem ol soa long ol han, leg, mo long saed blong Jisas.
 - d. Jon 21. Jisas i kamaot bakegen long sam long Ol Aposol long Solwota blong Taeberias (Solwota blong Galili). Hem i givim oda long Pita se, “Fidim sipsip blong mi.”
 2. Sam moa riding: Mak 16; Bible Dictionary, “Resurrection,” 761.
 3. Askem wan memba blong klas blong rere blong tokbaot smol, stori blong Jisas mo tufala disaepol long rod i go long Emeas (Luk 24:13–32).
 4. Sapos ol pikja ia oli stap, yusum olgeta long taem blong lesen: Taem oli putum Jisas long hol blong ston (62180; Gospel Art Pikja Kit 231); Hol blong ston blong Jisas (62111; Gospel Art Pikja Kit 232) o Hol blong Ston we i no gat man long hem (Gospel Art Pikja Kit 245); Meri mo Lod we i Laef Bakegen (62186; Gospel Art Pikja Kit 233); Jisas i stap Soem Ol Soa blong Hem (62503; Gospel Art Pikja Kit 234); mo Jisas Kraes we i Laef Bakegen (62187; Gospel Art Pikja Kit 239).
 5. Wan tingting blong tij: Lod i givim oda long Pita blong, “Fidim sipsip blong Hem” (Jon 21:16–17), i aplae tu long evri tija. Wetem prea lukaotem ol wei blong mekem kakae blong spirit we i stap long ol skripja i aplae long ol memba blong klas blong mekem se bae olgeta oli wantem kakae gud long hem. (Luk long *Teaching—No Greater Call*, 3.)

Wan Tingting blong Lesen

**Aktiviti blong
Pulum Tingting**

Olsem we i stret, yusum aktiviti ia o wan aktiviti blong yuwan blong statem lesen.

Talemaot stori ia we i kam long Elda James M. Paramore:

“Plante yia i pas . . . wan man blong raetem niuspepa, i bin stap askem wan impoten kwestin, ‘Wanem bae wan impoten nius tumas we wol bae i save kasem?’ ”

- Olsem wanem nao bae yu save ansarem kwestin ia?

Elda Paramore i bin gohed: “[Man blong Raet ia] i bin tingting mo tingting abaot kwestin ia, hem i bin toktok wetem plante pipol, mo stap ridim evri samting we hem i save ridim long hadwok blong hem blong faenemaot ansa long hemwan. Mo afta long en, hem i bin printim ansa blong hem, ‘Blong save se Jisas Kraes i stap laef tedei, hem i impoten nius we wol bae i save kasem. Be, sapos Hem i stap laef tedei, so yumi tu bae yumi laef long laef we i no save finis olsem we Hem i bin talem’ ” (insaed long Conference Report, Okt. 1990, 80; o *Ensign*, Nov. 1990, 64).

Soemaot ol pikja we oli listim long seken blong “Rere long Lesen”. Eksplenem se sore blong ol disaepol long taem blong ded blong Kraes, oli putumbak wetem glad we oli save eskprese wetem toktok long Laef Bakegen blong Hem. Yumi tu, yumi glad long save ia se Kraes i bin laef bakegen.

Livim ol pikja we oli blong soemaot. Luklukbak long olgeta long stret taem blong hem.

Yusum mo Toktok
Raon long Skripja

Taem yu stap tijim olgeta skripja ia, toktok raon wetem ol memba blong klas long olsem wanem save blong olgeta abaot Laef Bakegen i stap afektem evri laef blong olgeta. Bitim we blong stap traem blong stap talem ol stret ples mo wei we i stap raon long taem blong Laef Bakegen (wanwan man blong raetem Gospel i stap givim long defdefren wei), i lukluk nomo long ol testimoni blong Laef Bakegen we oli givim long wanwan histri blong Gospel.

1. Meri, woman Magdala mo sam nara woman oli witnes blong Lod we i laef bakegen.

Toktok raon long Matiu 28:1–15; Luk 24:1–12; mo Jon 20:1–10. Invaetem ol memba blong klas blong ridim ol ves ia we yu bin jusum. Eksplenem se afta we oli krusifaem Jisas, oli kavremap bodi blong hem long ol klin strong kaliko mo putum insaed long wan hol blong ston we i blong Josef, wan man Aramatia, wan long ol disaepol blong Jisas (Matiu 27:57–60; Luk 23:50–53; Jon 19:38–42). Hemia oli mekem kwik nomo from se kolosap sabat bae i stat. Long moning blong nekis dei afta we sabat i pas, Meri, woman Magdala mo sam nara woman oli gobak long hol blong ston wetem ol lif we i gat gudfala smel mo ol krim blong rapem long skin, blong oli save anoentem mo tritim gud bodi blong Jisas.

- Wanem nao Meri, woman Magdala mo sam nara woman oli faenem taem oli kam long hol blong ston we oli putum Jisas long hem? (Luk long Matiu 28:1–4; Luk 24:1–4. Talem se long Joseph Smith Translation blong Matthew 28 i talem se, olsem Luk i talem, se i gat tu enjel. Luk long Matiu 28:2, futnot 2a.) Wanem nao ol enjel ia oli talem long ol woman ia? (Luk long Matiu 28:5–7; Luk 24:5–8.)
- Wanem nao ol enjel oli wantem minim taem oli talem se, “Hem i go antap”? (Jisas i bin laef bakegen.) Wanem nao mining blong laef bakegen? (Luk long Alma 11:42–45; luk tu long Bible Dictionary, “Resurrection,” 761.) Wanem blesing nao bae yumi save kasem tru long Laef Bakegen blong Jisas? (Luk long Fas Korin 15:22, 50–58; Alma 11:42–45. Yumi evriwan bambae i laef bakegen mo gat ol bodi we bae oli nomo save ded.)
- Presiden Howard W. Hunter i talem se, ol toktok ia, Hem i no stap long ples ia, be Hem i go antap (luk long Luk 24:6) “hem i gat evri hop, fasin blong stretem samting, mo i bilif inaf blong save helpem yumi long ol jalens blong yumi mo

santaem long harem nogud we oli stap kam long ol laef blong yumi” (insaed long Conference Report, Epr. 1986, 18; o *Ensign*, Mei 1986, 15–16). Olsem wanem nao testemoni blong yu long saed blong Atonmen mo long saed blong Laef Bakegen long ded i bin helpem yu long taem blong ol hadtaem blong yu?

- Wanem nao ol woman ia oli mekem afta we ol enjel oli finis toktok long olgeta? (Luk long Matiu 28:8; Luk 24:8–9.) Wanem nao yumi save lanem aot long eksampol blong olgeta?
- Meri mo ol nara woman ia oli ol faswan long ol nara plante pipol we oli bin luk Jisas Kraes afta we Hem i bin laef bakegen (luk tu long sam moa aedia blong tij, nambatu mo nambatri). Long tingting blong yu, from wanem hem i impoten blong Lod we i laef bakegen i kamaot long ol witnes blong wol ia? (Luk long Seken Korin 13:1.)

2. Tufala disaepol long rod i go long Emeas, tufala i witnes blong Lod we i laef bakegen.

Toktok raon long Luk 24:13–35. Gat wan memba blong klas we oli askem hem blong tokbaot skripja pasej blong i tokbaot smol skripja pasej ia.

- From wanem Kleopas mo kompanion blong hem i bin sidaon taem tufala i stap folem rod i go long Emeas? (Luk long Luk 24:13–24.) Wanem nao Lod we i laef bakegen i tijim long tufala taem oli stap wokbaot i go? (Luk long Luk 24:25–27.)
- Wanem nao tufala disaepol i filim taem Jisas i bin tijim tufala? (Luk long Luk 24:32.) Wanem nao i bin givim filing ia long tufala? (Paoa blong Tabu Spirit.) Invaetem ol memba blong klas blong talem ol eksperiens blong taem oli bin kasem wan witnes i kam long Spirit taem oli stap stadi long gospel o harem wan man i tij.

3. Ol Aposol oli ol witnes blong Lod we i laef bakegen.

Ridim mo toktok raon long ol ves ia we yu bin jusum long Matiu 28:16–20; Luk 24:33–53; mo Jon 20:19–31.

- Wanem nao Ol Aposol oli ting se oli stap luk taem Sevyia i bin kamaot long olgeta long aftenun long dei we Hem i bin laef bakegen? (Luk long Luk 24:36–37.) Olsem wanem Jisas i leftemap tingting blong olgeta se Hem i wan man we i laef bakegen, be i no wan spirit? (Luk long Luk 24:38–43.)
- Olsem wanem Tomas i ansa long ol testemoni blong ol nara Aposol se Lod i bin laef bakegen? (Luk long Jon 20:24–25.) Olsem wanem hem i kam blong bilivim se Lod i bin laef bakegen? (Luk long Jon 20:26–29.) Olsem wanem nao santaem yumi soem semmak samting we yumi slak long hem olsem Tomas?

Elda Gordon B. Hinckley i talem:

“Yu no bin harem ol naraman oli stap toktok olsem we Tomas i bin toktok? ‘Givim long mifala,’ oli talem ‘long fasin blong wantem luk stret. Pruvum long fored blong ae blong mifala, mo long sora blong mifala, mo long ol han blong mifala, sapos no bae mifala i no save bilivim.’ Hemia i lanwis blong taem we yumi stap laef long hem tedei. Tomas, man blong Daot i kam olsem wan eksampol blong ol man long wol yia, we oli no wantem blong akseptem, be we oli wantem blong pruvum samting wetem bodi blong wol ia (ae) mo eksplenem—olsem sapos, olgeta oli save pruvum lav, o fet, o iven ol kaen samting blong wol olsem elektrisiti. . . .

“Blong olgeta we oli stap harem saon blong voes blong mi we ating oli gat ol daot, mi talem bakegen ol toktok we Lod i talem long Tomas, taem hem i bin tajem ol soa we oli stap long ol han blong Lod: ‘Yu no mas lego fet blong yu, be stap bilif’ (insaed long Conference Report, Epr. 1978, 90; o *Ensign*, Mei 1978, 59).

- Olsem wanem nao yumi save folem gud woning toktok blong Lod blong “yu no mas lego fet blong yu, be stap bilif”? (luk long Jon 20:27).

4. Sam long Ol Aposol oli luk Jisas bakegen long Solwota blong Taeberias (Solwota blong Galili).

Ridim mo toktok raon long ol ves ia we yu bin jusum long Jon 21.

- Lod we i laef bakegen i bin soem Hemwan long seven disaepol blong Hem taem olgeta oli stap fising. Olsem wanem nao oli kam blong luksave se Jisas ia i stap long so? (Luk long Jon 21:4–7.) Afta we oli kakae finis, wanem nao Jisas i askem Pita mo ol nara Aposol blong mekem? (Luk long Jon 21:15–17.) Olsem wanem nao yumi save fidim sipsip blong Lod?
- Wanem risen nao blong Jon blong stap raetem daon sam long ol samting we Jisas we i laef bakegen i bin talem mo i bin mekem? (Luk long Jon 20:30–31.) Olsem wanem nao yu stap kasem help taem yu stap stadi long ol stori, insaed long skripja, blong taem we Jisas i laef bakegen?

Las Toktok

Testifae se Jisas Kraes i laef bakegen mo se tru long Hem, yumi tu bae yumi laef bakegen. Serem testimoni abaot paoa mo fasin blong harem gud from save blong yu long saed blong laef bakegen.

Sam Nara Aedia blong Tij

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Hem i go antap (luk long Matiu 28:6)

Jusum wan smol grup blong singsing “He Is Risen” (*Hymns*, no. 199) o “Christ the Lord Is Risen Today” (*Hymns*, no. 200) long en blong lesen. O gat wan grup blong ol pikinini i singsing “Did Jesus Really Live Again?” (*Children’s Songbook*, 64).

2. “Woman. Yu stap krae from wanem?” (Jon 20:15)

Poenemaot se Gospel blong Jon nomo i wan Gospel we insaed i gat stori blong Lod we i kamaot long Meri, woman Magdala jes afta long Laef Bakegen blong Hem. Mekem wan memba blong klas i ridim laod stori ia long Jon 20:11–18. Invaetem ol memba blong klas blong serem ol tingting mo ol filing blong olgeta abaot iven ia.

3. Ol narafala witnes blong Lod we i laef bakegen

- Wetem plante witnes we oli stap talem insaed long Ol Gospel, huia bakegen i bin luk Lod we i laef bakegen? (Sam ansa oli listim andanit.)

Steven (Ol Wok 7:55)

Bitim 500 man (Fas Korin 15:6)

Aposol Jemes (Fas Korin 15:7)

Aposol Pol (Fas Korin 15:8)

2,500 Sent blong ol man Amerika bifo (3 Nifae 11:8–15; 17:25)

Profet Josef Smit (Joseph Smith—History 1:17; D&C 76:22–24)

Sidney Rigdon (D&C 76:22–24)

4. Ol skripja abaot Laef Bakegen

Sam pasej blong skripja long Buk blong Momon mo Doctrine and Covenants i mekem save blong yumi long Laef Bakegen i kam antap. Toktok raon plante long sam long ol poen ia sapos i gat inaf taem:

- Jisas i faswan we i bin laef bakegen (2 Nifae 2:8), mo from Laef Bakegen blong Hem, evri pipol bae oli laef bakegen (2 Nifae 9:22; Alma 11:42, 44).
- Afta Jisas Kraes, olgeta we bae oli kasem selestial glori, olgeta we bae oli kasem terestial glori, olgeta we bae oli kasem telestial mo laswan ol pikinini blong pedisen (setan) (D&C 88:96–102).
- Taem we bae yumi laef bakegen, ol spirit blong yumi bae oli joen tugeta wetem ol bodi blong yumi we oli stret gud, mo bambae oli nomo save seperet bakegen (Alma 11:43, 45).
- Ol save mo waes we yumi kasem long wol ia “bae yumi go antap wetem long laef bakegen” (D&C 130:18–19).
- Spirit blong ol ded man oli luk seperesen blong bodi olsem wan samting we i blokem olgeta; laef bakegen i mekem yumi i eksperiensem wan bigfala glad (D&C 138:12–17, 50).

Stamba Tingting Blong mekem ol memba blong klas oli tingbaot responsabiliti blong olgeta blong stap olsem ol witnes blong Jisas Kraes mo blong helpem olgeta oli luk olsem wanem nao presen we i Tabu Spirit i save helpem olgeta blong mekem samting ia.

Rere long Lesen

1. Ridim, tingting hevi, mo prea abaot ol skripja ia:
 - a. Ol Wok 1. Afta we i stap kamaot long medel blong ol disaepol blong Hem blong 40 dei, Lod we i laef bakegen i go antap long heven. Oli jusum Matias blong tekem ples blong Judas we i bin lego kworom blong Ol Twelef Aposol.
 - b. Ol Wok 2. Long dei blong Pentekos, Ol Aposol oli fulap wetem Tabu Spirit mo oli toktok long plante lanwis. Plante we oli harem olgeta, oli bin jenisim laef blong ol.
 - c. Ol Wok 3–4. Pita mo Jon i hilim wan man we i no save lukluk mo tufala i testefae se man ia i kam gud tru long paoa blong Jisas Kraes. Ol Aposol oli prea from mo risivim bigfala paoa tru long Tabu Spirit.
 - d. Ol Wok 5:12–42. Ol Aposol oli gohed blong prij mo mekem gud man wetem bigfala paoa. Oli bin arestem olgeta mo sarem olgeta long prisen be oli bin rilis long prisen tru long wan enjel. Olgeta i talem maot long ol jif pris se olgeta oli obei long God be i no ol man. Gamaliel i toktok long Ol Farasi blong no kilim Ol Aposol.
2. Sam moa riding: Mak 16:19–20; Luk 24:49–53; Joseph Smith—History 1:21–25.
3. Sapos pikja ia Taem Jisas i Go Antap long Heven (62497; Gospel Art Pikja Kit 236) i stap, yusum long taem blong lesen.
4. Sapos yu yusum aktiviti blong pulum tingting, arenjem blong gat tu pipol i kam insaed long klasrum bifo klas i stat, taem ol memba blong klas oli staon. (Sapos i posibol, tufala ia i sud tufala pipol we tufala i no stap atendem klas blong yufala oltaem.) Mekem tufala i kam insaed long rum, mekem wan smol samting (eksampol, toktok wetem yu o karem wan samting i kam insaed long rum), mo afta gobak. Tufala i no mas toktok long ol memba blong klas o blong mekem blong oli luk save tufala.
5. Wan tingting blong tij: Ol tija oli mas testefae se wanem we olgeta oli stap tijim i tru. Testifae long Jisas Kraes mo gospel blong Hem long eni taem we Spirit i talem long yu, be i no jes long en blong lesen. Serem testimoni i mekem tijing blong yu i gat paoa. (Luk long *Teaching—No Greater Call*, 11–12, 111–12.)

**Wan Tingting
blong Lesen**

Aktiviti blong
Pulum Tingting

Olsem we i stret, yusum aktiviti ia o wan aktiviti blong yuwan blong statem lesen. Askem ol memba blong klas sapos olgeta oli bin luksave tufala pipol ia we tufala i bin kam insaed long rum mo afta gobak bifo klas i stat (luk long seksen “Rere long

Lesen"). Sapos eni memba blong klas i bin luksave tufala, mekem olgeta oli tokbaot se tufala pipol i luk olsem wanem, samting olsem huia nao tufala, wanem nao tufala i warem, mo wanem nao tufala i bin mekem. Poenemaot se ol memba blong klas we oli bin luk tufala visita ia, oli ol witnes. (Sapos i no gat wan i luk save tufala visita, talem wanem tufala i mekem mo eksplenem se yu yu wan witnes) Wan man o woman we i luk o eksperiensem wan iven mo talemaot long ol narafala, hem i wan witnes.

Askem eni memba blong klas we i no bin luk tufala visita:

- Yu bilivim wanem we ol witnes ia oli stap talem long yu? From wanem o from wanem nao no?

Eksplenem se lesen blong tedei i abaot Ol Aposol blong bifo, we olgeta oli ol witnes blong Jisas Kraes we i laef bakegen. Taem oli bin testefae long Hem, plante pipol oli bin bilivim olgeta mo oli bin baptaes insaed long Jos.

Yusum mo Toktok
Raon long Skripja

Taem yu stap tijim olgeta skripja ia, tokabaot fet mo paoa we Ol Aposol oli bin testefae long hem long saed blong Lod we i laef bakegen. Toktok raon wetem ol memba blong klas, olsem wanem nao olgeta tu oli save stap olsem ol witnes blong Jisas Kraes.

Eksplenem se buk blong Ol Wok i histri blong Luk abaot ol impoten iven insaed long Jos long 30 yia mo tu abaot laef blong Jisas Kraes long wol ia. Luk i talem abaot 40-dei ministri blong Lod we i laef bakegen mo taem Hem i bin gobak antap long heven. Mo tu hem i tokbaot bigfala taem blong spirit we Spirit i kamdaon long dei blong Pentekos, lidasip blong Pita insaed long Jos, ol misinari hadwok blong Ol Aposol bifo, mo ol intresting toktok blong Pol. Haf blong buk ia i fokes long ol misinari wok blong Pol long medel blong Ol Jentael.

1. Lod i go antap long heven. Oli kolem Matias blong kam wan Aposol.

Toktok raon long Ol Wok 1. Invaetem ol memba blong klas blong ridim ol ves ia we yu bin jusum. Soem pikja blong taem Hem i go antap long heven.

- Afta we Jisas i laef bakegen, Hem i bin stap wetem olgeta Aposol blong Hem blong 40 dei, mo Hem i stap tokbaot long olgeta, ol samting we oli blong kingdom blong God (luk long Ol Wok 1:3). Bifo Hem i gobak long Papa blong Hem long heven, wanem nao Hem i bin promesem Olgeta Aposol blong Hem we kolosap bae olgeta i kasem? (Luk long Ol Wok 1:4–5; luk tu long Luk 24:49. Poenemaot se nomata we Olgeta Aposol oli bin stap eksperiensem *ol fasin* we Tabu Spirit i stap *soemaot* samting, olgeta oli no kasem iet *presen* we i Tabu Spirit.)
- Wanem nao Jisas i bin talem long Ol Aposol blong oli mekem afta we olgeta bae oli risivim presen we i Tabu Spirit (Luk long Ol Wok 1:8.) Olsem wanem nao yumi save komperem toksave ia wetem responsabiliti we oli stap givim long Ol Aposol tedei? (Luk long D&C 107:23, 35.) Olsem wanem nao Ol Aposol oli fulfilim responsabiliti ia jes afta long taem blong Laef Bakegen blong Jisas? (Olsem, eksampol, sam long ol paoaful testimonni we oli bin stap testefae long hem, oli bin rekodem insaed long Ol Wok 2–5.) Olsem wanem Ol Aposol oli stap fulfilim responsabiliti ia tedei?
- Olsem wanem nao presen we i Tabu Spirit i helpem Ol Aposol long ol responsabiliti blong olgeta blong stap olsem ol witnes blong Jisas Kraes? (Luk long Jon 15:26–27; 1 Fas Korin 12:3.) Wanem i wok blong Tabu Spirit long ol hadwok blong yumi blong tijim gospel? (Luk long 2 Nifae 33:1; D&C 42:14.)

- Taem Ol Aposol oli bin watjem Jisas i go antap long heven, tu man long waet klos tufala i stanap kolosap long olgeta. Wanem nao tufala man ia i talem long Ol Aposol? (Luk long Ol Wok 1:10–11.) Testifae se Kambak Bakegen blong Kraes bae i wan semmak iven olsem. Kraes bae i kambak long wol blong lidim Milenium mo rulum wol ia.
- Afta long Gobak Antap long heven blong Lod, oli jusum wan niufala Aposol blong fulumap spes we i stap insaed long Kworom we Judas i bin lego. Olsem wanem nao oli jusum Matias blong kam wan niu Aposol? (Luk long Ol Wok 1:21–26.) Olsem wanem nao oli stap jusum Ol Aposol mo ol narafala lida blong Jos tedei? (Luk long Ol Toktok blong Bilif 1:5.)

2. Long dei blong Pentekos, Ol Aposol oli fulap wetem Tabu Spirit.

Ridim mo toktok raon long ol ves ia we yu bin jusum long Ol Wok 2. Eksplenem se Lafet blong Pentekos i wan selebresen blong taem we oli stap karem ol niufala kakae long garen we i stap stat long 50 dei afta long lafet blong Pasova. Ol man Jiu long plante nesen oli kam long Jerusalem blong lafet ia. (Luk long Bible Dictionary, “Feasts,” 673.)

- Wanem impoten iven nao i bin hapen long dei blong Pentekos, wan wik afta long taem we Sevyia i Go Antap long heven? (Luk long Ol Wok 2:1–4. Poenemaot olsem wanem nao hemia i fulfilim promes blong Lod long Jon 14:26, 15:26, mo 16:7–14 mo long Ol Wok 1:5.)
- Wanem nao Ol Aposol oli mekem taem olgeta i risivim Tabu Spirit? (Luk long Ol Wok 2:4.) Wanem nao ol pipol mekem taem oli harem Ol Aposol oli stap toktok long ol defdefren kaen lanwis? (Luk long Ol Wok 2:5–13.) Olsem wanem fasin blong prijim gospel tedei i semmak long fasin blong prijim gospel long dei blong Pentekos? (Luk long D&C 90:11; 100:5–8.)
- Olsem wanem nao Pita i ansa long olgeta we oli bin jikim Ol Aposol blong stap toktok long ol defdefren kaen lanwis? (Luk long Ol Wok 2:14–24, 36.) Wanem filing blong yu abaot ansa blong Pita? From wanem hem i impoten blong gat wan testemoni blong Jisas Kraes mo misin blong Hem we i hae tumas? From wanem hem i impoten long yumi blong serem testemoni blong yumi wetem ol naraman? Olsem wanem nao Tabu Spirit i helpem yumi blong serem ol testemoni blong yumi?
- Olsem wanem nao testemoni blong Pita i tajem olgeta we oli bin harem hem? (Luk long Ol Wok 2:37.) Wanem nao Pita i tijim long ol pipol we oli bin biliv long testemoni blong hem? (luk long 2:38.) Mekem ol memba blong klas oli komperem Ol Wok 2:38 wetem nambafo toktok blong bilif mo 3 Nifae 27:19–20. Poenemaot se ol besik prinsipol mo odinens blong gospel oli semmak nomo long evri dispensesen.
- Abaot 3,000 pipol we oli bin biliv long ol toktok blong Pita oli bin kasem baptaes. Olsem wanem olgeta pipol ia oli soemaot se olgeta oli bin jenisim laef blong olgeta long gospel blong Jisas Kraes? (Luk long Ol Wok 2:41–47. Listim ol ansa blong ol memba blong klas long blakbod.) Wanem nao yumi save lanem aot long eksampol blong olgeta?

3. Pita mo Jon i hilim wan man we i no save lukluk tru long paoa blong Jisas Kraes.

Ridim mo toktok raon long ol ves ia we yu bin jusum long Ol Wok 3–4. Yu save mekem wan memba blong klas i ridim laod Ol Wok 3:1–11.

- Nomata we Pita mo Jon i no gat mani blong givim long man ia we i no save lukluk i go longwe we i stap long get blong tempol, wanem nao tufala i givim long hem? Long wanem paoa nao, man ia i kam gud bakegen? (Luk long Ol Wok 3:6, 12–13, 16; 4:10.) Yu bin filim paoa blong hiling blong Jisas Kraes insaed long laef blong yu?
- Pita i bin yusum merikol ia olsem wan janis blong testefae long Jisas Kraes (Ol Wok 3:12–26; 4:5–12). Wanem janis nao yumi gat blong testefae long Kraes? Olsem wanem nao yu bin gat blesing taem yu bin kam olsem wan witnes (o yu bin harem ol naraman oli kam olsem ol witnes) blong Jisas Kraes?
- Olsem wanem nao ol pris mo Ol Sadusi oli ansarem toktok blong Pita? (Luk long Ol Wok 4:1–3. Oli bin arestem Pita mo Jon.) Olsem wanem nao grup blong ol pipol oli ansarem toktok blong Pita? (Luk long Ol Wok 4:4.) From wanem long tingting blong yu, tufala grup ia i givim defdefren ansa long semmak toktok nomo? Wanem nao ansa blong yumi long ol toktok blong ol lida blong Jos we oli rivilim abaot kondisen blong ol hat blong yumi?
- Wetem man ia we i bin kam gud we i stap stanap kolosap, ol pris mo Ol Sadusi oli no save dinaem se wan merikol i bin hapen (Ol Wok 4:13–14, 16). Long taem we i no gat wan risen blong putum Pita mo Jon long prisem, wanem nao olgeta i mekem bakegen? (Luk long Ol Wok 4:15–18. Poenemaot se ol lida blong rilijin blong ol man Jiu oli bin gat hop se bae oli fogetem Jisas mo ol tijing Hem afta long taem we oli Krusifaem Hem. Ol Aposol oli bin gohed blong prijim gospel blong Jisas Kraes, ol lida blong ol man Jiu oli traem blong stopem olgeta.)
- Olsem wanem nao Pita mo Jon i ansa long ol pris mo Ol Sadusi we oli askem tufala blong nomo prijim gospel? (Luk long Ol Wok 4:19–20.) Wanem i sam fasin long laef blong yufala we maet i gat semmak strong tingting blong stap olsem wan witnes blong Jisas Kraes?
- Afta we Pita mo Jon i rilis, tufala i bin gobak long ol memba blong Jos mo prea wetem olgeta (Ol Wok 4:23–30). Wanem nao tufala i askem long prea blong tufala? (Luk long Ol Wok 4:29–30.) Wanem i bin hapen olsem wan ansa blong prea ia mo risal blong ol aksen blong Ol Aposol? (Luk long Ol Wok 4:31–35; 5:12–16.)

4. Ol Aposol oli gohed blong prij mo hilim man wetem bigfala paoa.

Ridim mo toktok raon long ol ves ia we yu bin jusum long Ol Wok 5:12–42.

- Taem Ol Aposol oli gohed blong prij mo mekem ol merikol, ol pris mo Ol Sadusi oli tekem olgeta mo sareme olgeta insaed long prisem (Ol Wok 5:17–18). Olsem wanem nao olgeta i rilis long prisem? (Luk long Ol Wok 5:19–20.) Wanem nao olgeta i mekem taem olgeta i bin rilis? (Luk long Ol Wok 5:21, 25.) From wanem nao Ol Aposol oli gohed blong prijim gospel iven sapos oli putum olgeta long prisem? (Luk long Ol Wok 5:29–32.)
- Wanem toktok nao Gamaliel i givim long ol lida blong ol man Jiu we oli stap wantem blong kilim Ol Aposol? (Luk long Ol Wok 5:33–39.) Wanem ol eksperiens we oli soem long yufala se ol toktok blong Gamaliel i tru?
- Wanem jenis nao presen we i Tabu Spirit i tekem i kam long Ol Aposol? (Komperem Matiu 26:47–56, 69–75 wetem Ol Wok 4:5–21; 5:17–18, 26–42.) Olsem wanem nao ol eksampol blong Ol Aposol i givhan long yumi blong kam olsem ol witnes blong trutok?

Eksplenem se afta we Ol Aposol oli bin kasem presen we i Tabu Spirit, olgeta i kam olsem ol paoaful witnes blong Jisas Kraes. Taem Ol Aposol oli gat wan spesel koling blong kam olsem ol witnes blong Kraes, wanwan memba blong Jos tu i gat responsabiliti blong talemaot witnes long saed blong Hem. Serem testimoni se Tabu Spirit i save helpem yumi blong save wanem taem mo olsem wanem blong testefae long Kraes. Taem yumi folem ol wanem we Spirit i talem, fet blong yumi bae i kam antap, fasin blong yumi blong gat Spirit bae i gru, mo bae yumi kam ol strong witnes blong Lod Jisas Kraes.

Sam Nara Aedia blong Tij

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Fasin we Tabu Spirit i stap soemaot ol samting long dedikesen blong Keitlan Tempol

Eksplenem se wan taem we Spirit i strong tumas i semmak olsem hemia long Ol Wok 2:1–4 we i bin tekem ples long taem blong dedikesen blong Keitlan Tempol long 27 Maj 1836 (luk long D&C109:36–37, pat blong dedikesen prea ia we Profet Josef Smit i bin mekem we long hem, Spirit tu i strong tumas). Mo afta askem wan narafala memba blong klas blong ridim toktok ia we i stap daon, we i stap talemaot olsem wanem prea ia we hem i bin askem, i bin kamaot:

Profet Josef Smit i talem, long wan miting long aftenun long dei ia we Keitlan Tempol i bin dediket, “Brata George A. Smith i bin girap mo stat blong profesae, taem wan noes i kamaot, oli harem olsem wan bigfala strong win, we i bin fulumap Tempol, mo evri pipol long taem ia, semtaem nomo evriwan i bin girap, wan paoa we yumi no save luk i bin muvum olgeta; fulap oli stat blong toktok long defdefren kaen lanwis mo stap profesae; ol narawan oli bin stap luk ol naesfala visen; mo mi bin luk Tempol i fulap wetem ol enjel, mo long semtaem ia mi bin talemaot long kongregesen. Ol pipol we oli stap stap kolosap long mifala oli bin ron i kam tugeta (mo stap harem saon ia we oli no save luk bitwin olgeta, mo stap luk wan kliia laet olsem wan longfala faea we i go antap, we i stap kavremap Tempol), mo olgeta oli bin sapraes tumas long wanem we i bin hapen” (*History of the Church*, 2:428).

2. Taem blong kambak blong evri samting (luk long Ol Wok 3:21)

Mekem wan memba blong klas i ridim Ol Wok 3:20–21.

- Wanem nao Pita i stap luk taem hem i bin profesae long wan kambak blong evri samting (Hem i stap lukluk kambak blong gospel blong Jisas Kraes long lata-dei tru long Profet Josef Smit.)

3. Olgeta i gat evri samting i semmak nomo (luk long Ol Wol 4:32)

Toktok raon long Ol Wok 4:32–5:11. Eksplenem se ol fas memba blong Jos, oli gat evri samting i semmak nomo (Ol Wok 2:44; luk tu long Ol Wok 4:32, 34–37). Olgeta i givimaot evri samting we oli gat blong mekem se i save mitim nid blong evriwan. (Yu save komperem hemia wetem siti blong Enok [Moses 7:18], ol laen blong Lihae [4 Nifae 1:1–3], mo ol fas memba blong Jos long dispensesen ia [D&C 42:30–34].)

- Olsem wanem nao Banabas i ansa long loa blong stap givimaot evri samting we yu gat? (Luk long Ol Wok 4:36–37.) Olsem wanem nao Ananaeas mo Safaera i brekem loa ia? (Luk long Ol Wok 5:1–2.) Wanem nao Pita i talem long Ananaeas mo Safaera abaot ol aksen blong tufala? (Luk long Ol Wok 5:3–4, 8–9.) Olsem wanem yumi save soem stret se yumi stap ones wetem God?
- Nomata we yumi no stap laef anda long stret loa blong stap givimaot evri samting we yumi gat, wanem nao oli askem yumi blong givim long God o blong serem wetem ol narafala pipol? (Luk long Omni 1:26; Mosaea 4:16; D&C 4:2; 119:4 blong sam eksampol.) Olsem wanem, samtaem “yumi stap holemtaet samting blong mekem se i blong yumi nomo”?

Elda Neal A. Maxwell i bin givim wan tingting:

“Ananaeas mo Safaera . . . tufala i “holemtaet” sam be i no blong givimaot evri samting we tufala i gat (luk long Ol Wok 5:1–11). Sam long yumi bae oli no save *saalem* Jisas long teti pis blong silva, mo tu bae oli no save *givim* long Hem tu, evri samting we oli gat!

“. . . Samtaem, yumi stap ting se fasin blong givimaot evri samting we yumi gat, i lukluk nomo long ol kaen samting olsem propeti blong yumi mo mane. Be i gat plante wei blong stap holemtaet samting. Wan man, maet i save givim mane mo taem blong hem, be yet hem i stap holemtaet wan impoten samting blong hemwan. Wan man, maet i save serem ol talen blong hem long pablik, be yet long sam wei blong hemwan, hem i stap haetem hae tingting blong hem. Wan man, maet i save holemtaet hem blong nildaon long fored blong ples blong God be yet, long sam wei, hem i stap soem respek o folem tingting blong wan grup. Wan man, maet i save akseptem wan koling blong Jos, be yet hem i stap putum hat blong hem moa blong holemtaet samfala wok long wol” (insaed long Conference Report, Okt. 1992, 90; o *Ensign*, Nov. 1992, 66).

- Olsem wanem nao yumi save winim fasin ia blong “stap holemtaet samting se i blong yumi nomo”? Wanem ol blesing we oli save kam long yumi sapos yumi givim evri samting we yumi gat i go long Lod?

4. Aktiviti blong yut

Ol tija blong ol yut oli save yusum fasin blong “askem trening” olsem ol pat blong lesen (fasin ia oli tokbaot long *Teaching—No Greater Call*, ol pej 147–48). Olsem eksampol, bae yu save askem ol memba blong klas blong traem blong talem stret topik blong lesen taem yu stap askem ol kwestin we yu save ansarem wetem “yes” o “no.”

Stamba Tingting Blong helpem ol memba blong klas blong luksave se plante pipol oli stap mekem wok blong Jos, evriwan long olgeta i serem ol talen mo ol testemoni blong olgeta blong mekem Jos i kam strong.

Rere long Lesen

1. Ridim, tingting hevi, mo prea abaot ol skripja ia:
 - a. Ol Wok 6:1–7. Olgeta Twelef Aposol oli odenem seven man blong lukaotem ol wok blong Jos.
 - b. Ol Wok 6:8–7:60. Steven, wan long olgeta seven man ia, i stap testefae long fored blong kaonsel blong ol pipol blong ol man blong Jiu. Toktok blong hem i mekem ol pipol we oli stap lisin long hem oli kros, mo olgeta oli tekemaot hem long siti mo stonem hem i ded.
 - c. Ol Wok 8:4–40. Filip, wan moa long olgeta seven man ia bakegen, i stap prij mo stap mekem ol merikol long Sameria. Hem i tijim mo baptaesem wan haeman blong Etiopia.
 - d. Ol Wok 8:1–3; 9:1–31. Sol i stap givim hadtaem long Jos kasem taem we hem i kasem wan visen blong Jisas Kraes. Sol i bin jenisim laef blong hem mo kasem baptaes mo stat blong prijim gospel.
2. Sam moa riding: Ol Wok 22:1–16; 26:1–5, 9–18.
3. Wan tingting blong tij: Tingbaot se yu stap tijim wan klas blong ol man mo woman. Olgeta oli gat defdefren tingting long saed blong ol eksperiens blong laef, hamas membasip insaed long Jos, blong andastanem ol gospel doktrin mo ol prinsipol, ol talen mo ol fasin blong wok, mo ol janis blong go long skul (edukesen). Traem blong andastanem ol defren tingting blong ol memba blong klas mo helpem wanwan man blong andastanem ol trutok we oli stap tijim. (Luk long *Teaching—No Greater Call*, 25–31; luk tu long 39–42.)

Wan Tingting blong Lesen

Aktiviti blong
Pulum Tingting

Olsem we i stret, yusum aktiviti ia o wan aktiviti blong yuwan blong statem lesen.

Askem ol memba blong klas:

- Wanem pat blong bodi blong yu nao, yu ting se i moa impoten? From wanem?

Afta long samfala ansa blong ol memba blong klas, askem:

- Wanem memba blong Jos nao, yu ting se i moa impoten? From wanem?

Bakegen letem samfala memba blong klas blong ansarem. Mo afta askem wan memba blong klas blong ridim laod Fas Korin 12:14–21, mo askem wan narafala memba blong klas blong ridim Fas Korin 12:12–13. Eksplenem se long ol ves ia, Aposol Pol i stap komperem ol memba blong Jos long ol pat blong bodi. Hem i olsem leg, han, sorae, mo ae oli impoten long ol defdefren wok blong olgeta, so ol memba blong Jos tu oli impoten wetem ol defdefren skil mo talen blong olgeta.

Taem yu stap tijim ol skripja ia, tokbaot olsem wanem blong yusum long laef evri dei. Leftemap tingting blong ol memba blong klas blong oli serem ol eksperiens we i go wetem ol prinsipol blong skripja.

1. Oli odenem seven man blong lukaotem ol wok blong Jos.

Ridim mo toktok raon long Ol Wok 6:1–7. Eksplenem se anda long daereksen blong Ol Aposol, Jos i gru hariap, fulap konvet long plante nesen. Hemia i mekem bigfala glad, be tu hem i bin krietem sam jalens. Taem Jos i stap gru, Ol Aposol oli nidim sam narafala memba blong givhan long saed blong daerektem Jos mo bildimap kingdom blong God.

- Taem Jos i stap gru, ol grup we oli stap kolosap long olgeta, samtaem i stap gat ol raorao wetem wanwan long olgeta. From wanem nao sam long ol memba blong Grik oli stap tok agensem ol memba blong Hibu? (Luk long Ol Wok 6:1.) Olsem wanem nao yumi olsem ol memba blong Jos, yumi save winim ol raorao mo ol samting we i mekem yumi stap seperet, nomata olgeta i bes long sam fasin, ekonomik, kalja, mo ol narafala defren samting? From wanem i impoten blong yumi winim ol kaen samting olsem we i mekem yumi stap wanwan? (Luk long 2 Nifae 26:33; D&C 38:26–27.)

Presiden Howard W. Hunter i talem: “Hem i blong andastanem gud mo stap akseptem, bigfala wok blong wan papa long saed blong God, we i stap long evri ples, blong evri man blong wol oli mas glad gud long wari blong God from olgeta mo tu rilesensip bitim olgeta wanwan. Hem i mesej blong laef mo lav we i stap go stret blong daonem ol kastom we oli stap kam antap, olsem ol defdefren grup blong pipol, lanwis, ekonomik o ol samting blong politik, standet blong eduksen, o bakgraon blong wan kalja, be yumi evriwan i kamaot long sem laen blong spirit. Yumi gat wan famle laen we i kam antap, evri pipol oli ol spirit pikinini blong God” (insaed long Conference Report, Okt. 1991, 22; o *Ensign*, Nov. 1991, 18).

- Olsem wanem nao ol defdefren kaen memba insaed long Jos oli mekem Jos i kam rij mo strong? Olsem wanem nao yumi defdefren long wanwan long yumi, be yumi stil stap olsem wan grup?
- Ol Aposol oli filim se olgeta oli no sud wet blong tijim gospel blong stretem ol dispiut mo tekem kea long ol narafala bisnis blong wol (Ol Wok 6:2). Olsem wanem nao olgeta i solvem problem ia? (Luk long Ol Wok 6:3–6.) From wanem hem i impoten blong serem wok blong Jos long fulap pipol? Olsem wanem nao yu bin kasem blesing tru long ol janis blong sev insaed long Jos?
- Ol wanem jenis nao long oganaesesen we Lod i bin talem long ol lida blong Jos long lata-dei blong mekem taem Jos i stap gru? (Maet ol ansa i gat tu sam moa Kworom blong Ol Seventi o oganaesesen blong Jos long ol eria we Ol Eria Presidensi nao oli prisaed long hem.) Olsem wanem nao ol jenis ia i givhan long ol nid blong ol memba truaot long wol?

2. Steven i stap testefae long fored blong kaonsel blong ol pipol blong ol man Jiu mo oli bin stonem hem i ded.

Toktok raon long Ol Wok 6:8–7:60. Invaetem ol memba blong klas blong ridim ol ves ia we yu bin jusum.

- Steven wan long olgeta seven man ia we oli bin kolem olgeta blong helpem Ol Twelef Aposol, oli bin arestem hem from ol giaman toktok blong tok agensem God mo tekem hem i go long fored blong kaonsel blong ol pipol blong ol man Jiu (Ol Wok 6:11–15; sapos i nid, eksplenem se blong tok agensem God i taem yumi no soem respek long God mo ol tabu samting). Wanem nao Steven i mekem taem hem i bin fesem kaonsel ia? (Luk long Ol Wok 7:1–53. Hem i bin tokbaot pat blong histri blong ol man Israel.)
- Long tingting blong yu, from wanem nao Steven i bin talemaot ol bigbigfala wok blong Lod long histri blong ol man Israel? Olsem wanem nao yumi save mekemsua se yumi no mas fogetem ol wok blong Lod long ol laef blong yumi? Olsem wanem blong stap tingbaot ol blesing blong Lod we oli pas i helpem yumi blong stap fetful long taem ia?
- Long tingting blong yu, from wanem nao Steven i talemaot tu fasin blong stap oltaem fogetem God mo fasin blong no stap obei blong ol man? Wanem nao Steven i komperem bitwin ol man we oli stap lisin long hem mo ol man Israel we oli no stap obei bifo? (Luk long Ol Wok 7:51–53.) Olsem wanem nao ol pipol oli ansa long toktok ia? (Luk long Ol Wok 7:54.)
- Afta we Steven i finis blong stap toktok, wanem visen nao hem i luk? (Luk long Ol Wok 7:55–56.) Wanem nao ol pipol oli mekem taem hem i bin talemaot visen ia long olgeta (Luk long Ol Wok 7:57–58.) Ol las toktok blong Steven i soemaot wanem abaot wok blong hem olsem wan disaepol? (Luk long Ol Wok 7:59–60.)

3. Filip i stap prij mo stap mekem ol merikol long Sameria.

Ridim mo toktok raon long ol ves ia we yu bin jusum long Ol Wok 8:4–40.

- Filip, wan long olgeta seven man we oli bin jusum hem blong helpem Ol Aposol, hem i bin stap prij mo mekem ol merikol long Sameria. Olsem wanem nao ol pipol blong Sameria oli lukluk long mesej blong Filip? (Luk long Ol Wok 8:6–8, 12.) Olsem wanem nao ol pipol ia oli kasem presen we i Tabu Spirit (Luk long Ol Wok 8:14–17.)
- Wan long ol konvet blong Sameria ia i wan man blong mekem blak majik we nem blong hem i Saemon. Long hu olgeta nao, Saemon i stap mekem olsem blong oli trastem hem folem fasin blong blak majik blong hem? (Luk long Ol Wok 8:9–11.) Long hu olgeta nao, Ol Aposol oli stap mekem olsem blong oli trastem olgeta from ol merikol we oli stap mekem? (Luk long Ol Wok 4:7–10.) From wanem hem i gat defdefren mining? (Poenemaot se plante pipol we oli stap kompit long ol samting olsem i blong pulum tingting mo strong tingting blong yumi, mo oli mekem blong leftemap olgeta nomo. Be long narasaed, ol wokman blong God oli mekem blong givim glori long God. Blong andastanem ol samting ia, bae i save helpem yumi blong luksave plante samting we i stap kam long laef blong yumi.)
- Wanem nao Saemon i mekem taem hem i bin luk Ol Aposol oli stap givim presen we i Tabu Spirit? (Luk long Ol Wok 8:18–19.) Olsem wanem nao Pita i ansarem wanem we Saemon i askem? (Luk long Ol Wok 8:20–23.) Ol wanem nao wan man i save kwalifae blong kasem prishud paoa? (Luk long Hibru 5:4; D&C 121:36.)

Presiden James E. Faust i talem: “Paoa ia we i moa bigwan bitim evri paoa, hem i prishud paoa, oli no yusum long semmak fasin we yumi stap yusum paoa blong wol. Oli no save pem o salem. . . . Paoa blong wol ia, oltaem oli yusum wetem fasin blong no gat lav mo sore. Be, paoa blong prishud i save kam long yu nomo tru taem yu folem olgeta prinsipol blong kam stret mo gud we long hem, prishud i anda long hem “ (insaed long Conference Report, Epr. 1997, 59–60; o *Ensign*, Mei 1997, 43).

- Olsem wanem nao Filip i mitim haeman blong Etiopia ia? (Luk long Ol Wok 8:25–29.) From we Filip i bin folem Spirit, wanem ol blesing we i bin kam long hem mo tu long man Etiopia ia? (Luk long Ol Wok 8:30–38.) Wanem ol blesing we oli kam long yu (o long eni man we yu save) from se yu bin folem Spirit?
- Olsem wanem nao man Etiopia ia i soemaot fasin blong tingting i stap daon? (Luk long Ol Wok 8:30–39.) Olsem wanem nao fasin blong tingting i stap daon i helpem yumi blong andastanem mo akseptem toktok blong God?

4. Sol i bin jenisim laef blong hem mo kasem baptaes mo stat blong prijim gospel.

Ridim mo toktok raon long ol ves ia we yu bin jusum long Ol Wok 8:1–3 mo 9:1–31. Eksplenem se Sol i wan Farisi we i stap oltaem givim hadtaem long Ol Sent blong fastaem. Hem i bin stap long taem we oli stonem Steven (Ol Wok 7:58) mo hem i bin responsibol long ded mo taem oli stap sareme plante memba blong Jos long prisem (Ol Wok 8:3; 22:4). Nomata long hemia, hem i bin eksperiensem wan bigfala fasin blong jenisim laef mo kam wan gudfala misinari.

- Wanem nao i bin mekem Sol i jenisim hem olsem wan man we i stap givim hadtaem long Ol Sent mo afta kam wan gudfala wokman blong Lod? (Luk long Ol Wok 9:1–9, 17.) Poenemaot se Sol i bin jenisim laef blong hem taem hem i bin harem voes blong Lod. Olsem wanem nao yumi save harem voes blong Lod? (Luk long D&C 1:38; 6:23; 8:2; 18:34–36.) Olsem wanem blong stap harem voes blong Hem i helpem yumi blong jenisim laef blong yumi?

Helpem ol memba blong klas blong tingbaot se fasin blong jenisim laef i oltaem wan kwaet, fasin blong go sloslo, i no wan kwiktaem eksperiens we i bigwan olsem hemia blong Sol. Elda Robert D. Hales i talem, “Long samtaem, wanwan man i save gat [ol kaen eksperiens olsem hemia blong Sol], be blong evriwan, fasin blong jenisim laef i stap hapen long sam taem olsem long taem blong stadi, prea, eksperiens, mo fet i helpem yumi blong gru long ol testemoni blong yumi mo fasin blong jenisim laef” (insaed long Conference Report, Epr. 1997, 111; o *Ensign*, Mei 1997, 80).

- Elda Ezra Taft Benson i talem se kwestin blong Pol ia se, “Lod, wanem nao yu wantem blong mi mekem blong yu?” hem i wan impoten kwestin tumas we yumi save stap askem long laef ia (insaed long Conference Report, Okt. 1972, 53; o *Ensign*, Jan. 1973, 57). From wanem hem i impoten tumas blong yumi askem kwestin ia? Olsem wanem nao yumi kasem blesing taem yu stap folem tingting we God i gat long yumi?
- From wanem Ananaeas i glad nomo blong go mitim Sol? (Luk long Ol Wok 9:10–14.) From wanem nao Ananaeas i go nating we hem i gat ol samting blong i stap mekem? (Luk long Ol Wok 9:15–16.) Wanem nao yumi save lanem aot long ol aksen blong Ananaeas? (Ol ansa bae i save tekem tu se God i stap givim

yumi strong tingting blong mekem eni samting we hem i askem yumi blong mekem mo we yumi no mas fraet long eni man, iven sapos man o woman ia i kasem wan help we i kam long spirit.)

- Wanem nao Ananaeas i mekem long Sol? (Luk long Ol Wok 9:17–18.) Wanem nao Sol i mekem afta we hem i bin baptaes? (Luk long Ol Wok 9:19–22, 26–29.) Wanem nao oli ol responsabiliti blong yumi, taem yumi kam konvet long gospel blong Jisas Kraes? (Luk long Luk 22:32; Jon 8:31; Mosaea 18:8–10; D&C 88:81.)

Las Toktok

Poenemaot se yumi i olsem Steven, Filip, mo Sol, yumi stap laef long wan taem we Jos i stap gru hariap. Testefae se Lod i wantem blong wanwan blong yumi blong sev insaed long kingdom blong Hem taem hem i stap gru. Leftemap tingting blong ol memba blong klas blong tingbaot mo stap glad long ol defren kwaliti, ol talen, mo ol eksperiens we wanwan memba blong wod o branj i stap mekem long seves blong Lod.

**Sam Nara Aedia
blong Tij**

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Hem i had long yu blong kikim ol sap samting (luk long Ol Wok 9:5)

- Mekem wan memba blong klas i ridim Ol Wok 9:5. Wanem i mining blong toktok ia blong kikim ol sap samting? (Blong givim toksave o daereksen. Wan smol wod we i sap, we samtaem oli stap yusum blong blokem ol animol, blong mekem olgeta i go moa kwik o go long ol defren daereksen. Sapos wan animol i go agensem smol wud ia, bae wud bae i stikim hem, mo animol ia bae i harem moa nogud.) Olsem wanem nao ol aksen blong Sol bifo long visen blong hem, i mekem hem i harem nogud? Olsem wanem nao yumi stap spolem yumiwan bakegen taem yumi stap faet agensem trutok?

2. Aktiviti blong yut

Raetem olgeta toktok ia long ol wodstrip o long blakbod: *Ananaeas, atoriti, rabis, ol ae, Tabu Spirit, laet, prij, ol skal, fasin blong no save talemaot wan samting, seksek, wokman blong Lod, voes.*

Mekem ol memba blong klas blong oli stadi long Ol Wok 9:1–22 mo traem blong talemaot wanem i mining blong ol toktok ia mo from wanem oli yusum ol toktok ia insaed long stori blong Sol we i bin jenisim laef blong hem.

“God I Stap Mekem I Semmak Nomo Long Olgeta Man”

Lesen
30

Ol Wok 10–14; 15:1–35

Stamba Tingting Blong helpem ol memba blong klas blong luksave se gospel i blong evri pipol mo we Jos i stap gohed tedei tru long revelesen we i stap oltaem.

- Rere long Lesen**
1. Ridim, tingting hevi, mo prea abaot ol skripja ia:
 - a. Ol Wok 10:1–11:18. Wan enjel i soemaot hem long Konilias long wan visen mo talem long hem se bae hem i sendem Aposol Pita i kam long hem. Pita i lanem long wan visen se oli mas prijim gospel tu i go long Ol Jentael (ol pipol we oli no ol man Jiu). Hem i go long Sisaria blong tijim Konilias mo ol famle mo ol fren blong hem. Tabu Spirit i kamdaon long Konilias mo long olgeta narawan, mo olgeta i kasem baptaes. Sam long ol memba blong Jos i tokspolem Pita from hem i stap tijim Ol Jentael, be taem hem i talemaot visen blong hem, olgeta i akseptem olsem wan revelesen blong Jos.
 - b. Ol Wok 12. King Herod i kilim Jemes mo putum Pita long prisen. Ol Sent oli prea blong Pita i save kamaot long prisen, mo wan enjel blong Lod i mekem hem i fri. Wan enjel blong Lod i kilim Herod i ded.
 - c. Ol Wok 13–14. Sol (we oli save hem olsem Pol) mo Banabas i mekem fas misinari wokbaot blong tufala, mo stanemap Jos long plante siti blong Ol Jentael.
 - d. Ol Wok 15:1–35. Sam Sent we oli ol man Jiu oli tijim se Ol Jentael we oli joenem Jos, oli mas kipim loa blong Moses, olsem fasin blong sakomsaesem ol man. Ol Aposol oli talemaot se hemia Lod i no askem blong mekem.
 2. Sam moa riding: Bible Dictionary, “Circumcision,” 646; “Cornelius,” 650.
 3. Sapos wan map blong fas misinari wokbaot blong Pol i stap (map 19 in the LDS edition of the King James Bible), yu save yusum long taem blong lesen.
 4. Wan tingting blong tij: Elda Gordon B. Hinckley i talem se: “Ol studen blong yu oli nidim yu tumas bitim wanem we yu save. Olgeta oli nidim yu tumas mo hanggri from fasin we God i stap toktok long yu. Olgeta oli wantem wom laet blong rilesensip blong yuwan. Hemia i oltaem rank blong wan gudfala tija.” (insaed long Conference Report, Okt. 1965, 52; o *Improvement Era*, Dis. 1965, 1124). Prea wetem strong tingting blong olsem wanem yu save developem samting ia mo soemaot lav long ol narafala memba blong klas. (Luk long *Teaching—No Greater Call*, 6–7, 29, 167.)

Wan Tingting blong Lesen

Aktiviti blong Pulum Tingting

Olsem we i stret, yusum aktiviti ia o wan aktiviti blong yuwan blong statem lesen. Givim ol ki toktok ia, wan afta narawan, mo askem ol memba blong klas blong talemaot stret, wanem impoten iven nao insaed long histri blong Jos, ol toktok ia oli stap lukluk bak long hem:

1. Revelesen
2. 8 Jun 1978
3. Presiden Spencer W. Kimball
4. Prishud
5. Official Declaration 2

Mekem ol memba blong klas oli tanem i go long Official Declaration 2 (we i stap long en blong Doctrine and Covenants) mo ridim seken paragraf long olgetawan bakegen (stat long “In early June”). Poenemaot se Declaration 2 i revelesen we oli rekodem long taem we oli letem prishud i go long evri papa mo boe we oli memba blong Jos we oli stap klin mo stret.

Sapos eniwan long ol memba blong klas i tingbaot dei we oli bin anaonsem revelesen ia, invaetem olgeta blong tokbaot olsem wanem filing blong olgeta taem oli bin lanem revelesen ia.

- Huia nao i bin mekem i posibol blong evri papa mo evri boe we oli memba blong Jos we oli klin mo stret inaf oli save kasem prishud? (Lod.) Olsem wanem Lod i stap soemaot tingting blong Hem long Jos? (Hem i bin talemaot revelesen ia long profet, mo afta profet i bin anaonsem long ol memba blong Jos.) Olsem wanem revelesen ia i helpem Jos?

Eksplenem se revelesen ia i wan eksampol blong olsem wanem Lod i stap gohed blong daerektem Jos blong Hem tru long revelesen. Lesen ia i stap toktok raon long wan semmak revelesen we i bin kam long ol memba blong Jos, smol taem afta long Laef Bakegen blong Jisas Kraes.

Yusum mo Toktok
Raon long Skripja

Taem yu stap tijim olgeta skripja ia, talemaot gud impoten fasin blong revelesen we i stil stap gohed tedei, we Lod i stap givim i kam long Jos blong Hem. Leftemap tingting blong ol memba blong klas blong serem ol testimoni blong olgeta long saed blong revelesen we i stil stap gohed yet tedei.

1. Pita i lanem long wan visen se oli mas prijim gospel tu i go long Ol Jentael.

Toktok raon long Ol Wok 10:1–11:18. Invaetem ol memba blong klas blong ridim ol ves ia we yu bin jusum.

- Konilias hem i wanem kaen man? (Luk long Ol Wok 10:1–2, 30–31. Hem i wan man we i stret mo gud we i bilif long God, be hem i wan Jentael o man we i no wan man Jiu.) Wanem nao mesej blong enjel we i talem long Konilias? (Luk long Ol Wok 10:3–6.) Olsem wanem nao Konilias i folem mesej ia? (Luk long Ol Wok 10:7–8, 33.) From wanem nao i impoten blong folem kwik ol toksave o ol samting we God i stap talem long yumi tru long ol filing?
- Taem tufala man blong Konilias, tufala i stap wokbaot blong go long Jopa, Pita i bin luk wan visen (Ol Wok 10:9–16). Wanem nao Pita i luk long visen ia? (Luk long Ol Wok 10:11–12.) Wanem nao oli bin talem long Pita blong mekem? (Luk long Ol Wok 10:13.) From wanem nao Pita i no wantem folem toktok ia? (Luk long Ol Wok 10:14. Hem i no wantem kakae ol animol we long loa blong Moses oli gat strong tingting long hem se hem i no klin.) Olsem wanem nao Lod i ansa long wari blong Pita? (Luk long Ol Wok 10:15–16.)

- Taem we Pita i bin mitim Konilias, hem i jes andastanem drim blong hem. Wanem nao mining blong drim blong hem? (Luk long Ol Wok 10:28, 34–35. Gospel i blong evri pipol, be i no blong ol man Jiu nomo. Eksplenem se “God i stap mekem i semmak nomo long evri man mo woman” i mining se God bae i givim janis long evri man mo woman blong save kasem ol blesing we oli stap tru long plan blong sevem man.) From wanem nao insaed long drim ia, ol Jentael oli ripresentem olgeta olsem ol animol we oli no klin? (Ol man Jiu oli bin tingting se Ol Jentael oli no klin mo stret o no klin long saed blong spirit, olsem ol animol we loa blong Moses i blokem ol man Jiu blong oli no kakae. Blong talem se ol animol long drim, naoia oli “klin” finis, Lod i stap talem long Pita se naoia oli mas prijim gospel i go long evri pipol.)
- Afta we Pita i bin eksplenem drim blong hem, hem i bin stat blong tijim Konilias mo ol fren blong hem. Wanem nao hem i tijim long olgeta insaed long fas toktok blong hem? (Luk long Ol Wok 10:36–43.) Wanem nao i bin hapen taem Pita i stap prij? (Luk long Ol Wok 10:44, 46.) From wanem nao samting ia i tanem tingting blong Pita blong Konilias mo ol fren blong hem oli mas kasem baptaes? (Luk long Ol Wok 10:47–48; luk tu long Ol Wok 11:15–17.)
- Olsem wanem nao sam memba blong Jos oli lukluk taem oli harem se Pita i bin stap tijim gospel long Ol Jentael? (Luk long Ol Wok 11:1–3.) From wanem nao ol memba oli harem nogud? (Olgeta oli no tingting strong se Ol Jentael oli pat blong ol pipol we God i bin jusum olgeta.)
- Olsem wanem nao tingting blong ol memba blong Jos i jenis taem Pita i bin talem long olgeta abaot visen blong hem mo eksperiens blong hem wetem Konilias? (Luk long Ol Wok 11:4–18.) Wanem nao yumi mas mekem taem yumi stap kasem ol niufala toksave we i stap kam long ol lida blong yumi long Jos, iven sapos fastaem yumi no laekem o faenem i had blong andastanem olgeta? (Luk long Jon 7:17; 2 Nifae 28:30; D&C 6:11, 14–15.)
- From wanem nao Pita hemwan nomo, hem i bin kasem revelesen blong tijim gospel long Ol Jentael? (Hem i lida blong Jos long taem ia.) Huia nao i stap risivim revelesen tedei blong ful Jos? From wanem hem i impoten blong gat wan man nomo we i save kasem revelesen blong ful Jos? (Luk long D&C 43:2–6.)

2. Pita i fri long prisen tru long fasin blong mekem merikol.

Ridim mo toktok raon long ol ves ia we yu bin jusum long Ol Wok 12.

- King Herod i bin kilim Aposol Jemes, mo afta sarem Pita insaed long prisen mo putum ol strong man blong oli gad long hem (Ol Wok 12:1–4). Olsem wanem ol memba blong Jos oli helpem Pita, taem oli sarem hem long prisen? (Luk long Ol Wok 12:5.) Olsem wanem ol prea blong yumi i helpem profet mo ol narafala lida blong Jos tedei? (Luk long D&C 43:12; 93:51; 107:22.)

Presiden Joseph F. Smith i bin talemaot se, “Bae i neva gat wan dei we i pas, we evri pipol we oli stap insaed long Jos, oli mas leftemap voes blong olgeta blong prea long Lod blong sastenem ol wokman blong Hem” (*Gospel Doctrine*, long namba 5 ed. [1939], 223).

- Olsem wanem Pita i ronwe long prisen? (Luk long Ol Wok 12:6–10. Wanem wan narafala taem we Lod i bin lukaotem gud laef blong wan man tru long fasin blong Hem blong mekem merikol kasem taem we man ia i finisim gud misin blong hem long wol? (Ol eksampol we oli kam long ol skripja i tekem tu Daniel; Sadrak, Mesak, mo Abednego; Abinadae; Alma mo Amulek; mo Josef Smit.)

- Wanem i bin hapen long King Herod afta we Pita i ronwe? (Luk long 12:21–23.) Komperem wanem we i bin hapen long Herod wetem wanem we i bin hapen long Jos, olsem long nekis ves i talemaot (Ol Wok 12:24). Olsem wanem nao yu stap luk Jos i gru nomata long ol hadwok blong sam pipol we oli stap traem blong spolem?

3. Sol (we oli save hem olsem Pol) mo Banabas i prijim gospel long Ol Jentael.

Ridim mo toktok raon long ol ves ia we yu bin jusum long Ol Wok 13–14. Sapos yu stap yusum map, poenemaot ol ples we Pol mo Banabas i bin visitim long taem yu stap toktok raon long olgeta.

- Wanem nao koling blong Sol mo Banabas i soem abaot olsem wanem oli kolem ol memba blong Jos long seves blong God? (Luk long Ol Wok 13:1–3. Toktok raon long nid blong prea mo fasin blong livim kaka, revelesen, mo prishud atoriti blong save kolem ol memba blong wok insaed long Jos.) Wanem eksperiens nao oli bin helpem yu blong save se ol koling blong Jos oli ol save we i kam long Spirit?
- Ol lida blong haos blong prea long Antiok oli bin invaetem Pol blong toktok long miting long Sabat dei (Ol Wok 13:14–15). Wanem nao men mesej blong Pol long taem ia? (Luk long Ol Wok 13:23–31, 38–41.) Olsem wanem Ol Jentael long Antiok oli glad long ol misinari mo mesej blong olgeta? (Luk long Ol Wok 13:42–44, 48.) From wanem sam long ol man Jiu i givim hadtaem long Pol mo Banabas? (Luk long Ol Wok 13:45–47.)
- Olsem wanem nao ol pipol long Listra oli soemaot fasin blong olgeta taem we Pol i bin hilim wan man we i no save wokbaot? (Luk long Ol Wok 14:8–13. Eksplenem se Sus mo Heremes oli ol giaman god we bifo ol pipol oli stap wosipim.) Olsem wanem nao Pol mo Banabas i ansa long glad fasin mo strong tingting blong ol pipol ia? (Luk long Ol Wok 14:14–18.) Poenemaot se ol tru tija blong toktok blong God, oli oltaem lukaotem blong givim glori long God mo lego evri tingting blong olgeta. Olsem wanem yu bin luk ol lida blong Jos tedei oli stap soemaot fasin ia?
- Long wanwan siti we Pol mo Banabas i visitim, tufala i bin faenem ol pipol we oli gat strong tingting blong akseptem gospel, be tu tufala i faenemaot olgeta pipol we oli stap givim hadtaem long ol pipol ia we oli stap wantem gospel mo stap giaman long ol naraman blong go agensem Jos (Ol Wok 13:43–45, 50; 14:1–6, 19). From wanem nao Pol mo Banabas i gobak long wanwan siti ia nomata we oli bin givim hadtaem long tufala long olgeta ples ia? (Luk long Ol Wok 14:21–23. Tufala i bin stanemap ol branj blong Jos long ol siti ia, mo tufala i bin go blong leftemap tingting mo tijim ol niu memba blong ol branj ia.) Wanem nao yumi save mekem blong sapotem ol niu memba blong wod o branj blong yumi?

Presiden Gordon B. Hinckley i bin givim wan toktok: “Wetem namba blong ol konvet we i stap go antap evritaem, yumi mas traem blong faenem sam impoten wei blong helpem olgeta, taem olgeta oli stap faenem laef. Evriwan long olgeta oli nidim tri samting: wan fren, wan responsabiliti, mo ‘fidim olgeta wetem gudfala toktok blong God’ (Moronae 6:4). Hemia i diuti mo janis blong yumi blong givimaot olgeta samting ia” (insaed long Conference Report, Epr. 1997, 66; o *Ensign*, Mei 1997, 47).

4. Ol Aposol oli talemaot stret se Ol Jentael oli no nid blong kipim loa blong Moses.

Ridim mo toktok raon long ol ves ia we yu bin jusum long Ol Wok 15:1–35.

- Wanem raorao nao Pol mo Banabas i go long Jerusalem blong stretem? (Luk long Ol Wok 15:1–2; luk tu long Bible Dictionary, “Circumcision,” 646. Eksplenem se sakomsaes i saen blong ful loa blong Moses. Wan man we i bin sakomsaes hem i hemia we i bin folem loa. Nomata we Jisas Kraes i bin fulfilim loa blong Moses, sam long olgeta kristin man blong Jiu oli stil praktisim samting ia mo olgeta oli stap wantem blong ol konvet Jentael oli mas praktisim tu.) Olsem wanem nao oli bin stretem raorao ia? (Afta long wan toktok raon we oli mekem, Ol Aposol oli bin disaed tru long fasin we God i toktok long man se oli no nidim fasin blong sakomsaes.)
- Olsem wanem ol iven ia we oli talemaot long Ol Wok 15:6–31 i soemaot fasin we long hem, oli save mekem ol disisen abaot polisi blong Jos mo ol wanem blong mekem mo folem?
 - a. Ol lida blong Jos oli stap tugeta blong lukluk long samting ia (ves 6).
 - b. Olgeta i toktok raon long evri samting we i go wetem samting ia (ol ves 7–21).
 - c. Olgeta i mekem wan tingting we i go wetem tingting blong Lod (ol ves 19–21).
 - d. Tabu Spirit i konfemem se disisen ia i stret (ves 28).
 - e. Disisen ia oli anaonsem long olgeta Sent blong oli save agri wetem (ol ves 22–31).

Las Toktok

Testefae se Jos i oltaem gaed tru long revelesen we i kam antap mo revelesen ia i stil stap gohed tedei. Leftemap tingting blong ol memba blong klas blong folem kaonsel blong profet we i stap laef tedei mo ol narafala lida blong Jos.

**Wan Nara Aedia
blong Tij**

Ol nara tul ia i kam helpem lesen aotlaen we i stap. Yu save yusum aedia ia olsem pat blong lesen.

Jos blong Ful Wol

Blong soem long ol memba blong klas, olsem wanem Jos i stap gru, soemaot wan map blong wol. Poenemaot ol eria we ol memba blong Jos oli bin stap stap long hem long taem blong Konilias (Isrel long dei blong yumi tedei, Turkey, Greece blong tedei, mo ol eria we oli stap raon). Afta askem ol memba blong klas blong poenemaot ol eria we ol memba blong Jos oli stap stap long hem tedei. Eksplenem se, long stat blong 1998, Jos i bin gat ova long ten milian memba we oli stap stap long 162 kantri mo teretri. I gat bitim 57,000 misinari we oli stap wok long 116 kaontri, mo oli stap toktok long 45 bigfala lanwis mo plante nara smol lanwis. (Yu save faenemaot statistik blong tedei insaed long ol magasin blong Jos we oli stap kamaot.)

“Nao Long Fasin Ya, Olgeta Man Long Jos Long Evri Ples Oli Kam Strong Moa Long Bilif Blong Olgeta”

Ol Wok 15:36–18:22; Fas mo Seken Tesalonaeka

Stamba Tingting Blong helpem ol memba blong klas blong lanem ol tijing blong Pol abaot olsem wanem blong serem gospel mo olsem wanem blong stap olsem Ol Sent.

- Rere long Lesen**
1. Ridim, tingting hevi, mo prea abaot ol skripja ia:
 - a. Ol Wok 15:36–41; 16; 17:1–15; 18:1–22. Afta we oli stretem raorao we i stap bitwin ol konvet Jentael mo loa blong Moses, Pol mo Banabas i mekemrere long seken misinari wokbaot blong tufala. Tufala i no agri long misinari kompanion blong tufala mo tufala i disaed blong seperet. Pol i tekem Saelas mo Timoti mo statem ol misinari wok long Masedonia mo Gris. Oltaem oli givim hadtaem long olgeta be oli konvetem plante pipol.
 - b. Ol Wok 17:16–34. Pol i visitim Atens mo luk ful siti i fulap wetem fasin blong wosipim ol aedol. Hem i testefae long ol man we oli waes long saed blong toktok blong ol man Atens mo i prij long fored blong kaonsel blong ol man Atens abaot fasin blong God, yuniti blong ol pipol olsem ol pikinini blong God, mo Laef Bakegen.
 - c. Fas mo Seken Tesalonaeka. Pol i raetem tu leta i go long Ol Sent long Tesalonaeka, wan siti long Masedonia. Hem i stap toktok long olgeta abaot fasin blong serem gospel, stap rere long taem we Kraes i kam bakegen, mo stap laef olsem Ol Sent.
 2. Sam moa riding: Fas Korin 2:4–5, 10–13; Bible Dictionary, “Pauline Epistles: Epistles to the Thessalonians,” 743.
 3. Sapos ol tul ia oli stap, yu save yusum olgeta long taem blong lesen:
 - a. Wan map blong seken misinari wokbaot blong Pol (map 20 in the LDS edition of the King James Bible).
 - b. “The Second Coming,” wan tri minit pat blong *New Testament Video Presentations* (53914).
 4. Wan tingting blong tij: Ol memba blong klas oli gat responsabiliti blong mekemrere olgeta taem oli kam long klas, blong oli save askem ol kwestin, serem ol tingting we oli andastanem, serem ol eksperiens, mo serem ol testemoni. Leftemap tingting ol memba blong klas blong rere long klas long taem oli stap stadi ol skripja mo stap prea evri dei. Ekspresem intres we yu gat insaed mo talemaot tangkyu long ol memba blong klas long saed blong evri tingting we oli stap serem long klas.

Wan Tingting blong Lesen

Aktiviti blong Pulum Tingting Olsem we i stret, yusum aktiviti ia o wan aktiviti blong yuwan blong statem lesen.

Tokbaot stori ia:

Taem we hem i stap stap wetem famle Heywood long Sol Lek Siti long let 1800, Jon Morgan i bin drim long wan naet se hem i stap wokbaot i go daon long wan rod long Georgia. Hem i bin luksave rod ia from se hem i bin stap yusum plante taem we hem i stap olsem wan soldia long Sivil Wo blong Yunaeted Stet. Hem i bin kam long wan ples we rod i seperet long hem mo hem i bin luk Bringham Young we i stap stanap long ples ia. Nomata we rod we i tanem i go long raet, i rod blong go long nekis daon, Presiden Young i bin talem long hem blong go long rod we i tanem i go long lef.

Mr. Morgan, we long taem ia, hem i no wan memba blong Jos yet, hem i bin talemaot drim blong hem long Sista Heywood mo hem i bin askem hem se, wanem tingting blong hem abaot drim ia. Sista Heywood i bin talem long hem se hem i bilif se hem (Mr. Morgan) bae i joenem Jos mo bae i sevem wan misin long ol stet blong saot, mo we wan dei bae hem i stanap long rod ia we hem i bin luk long drim blong hem. Taem samting bae i kamtru, hem i mas tingbaot kaonsel blong Bringham Young mo go folem rod we i tanem i go long lef.

Plante yia i pas, afta we Jon Morgan i bin kasem baptaes mo oli bin kolem hem i kam olsem wan misinari long ol stet blong saot, hem i bin kam long ples ia we rod i seperet long hem olsem we hem i bin luk long drim blong hem. Hem i bin tingbaot kaonsel ia blong folem lef rod, so hem i folem. Wan haoa i pas, hem i bin kamaot long en blong vale blong Heywood—wan naesfala ples wetem wan sem nem olsem hemia blong famle we hem i bin stap stap wetem olgeta taem hem i bin luk drim ia long ol yia we i pas.

Taem hem i bin wokbaot mo stap prij folem vale ia, hem i bin faenemaot se evri pipol oli rere gud blong harem gospel. Taem oli stap harem hem i stap tij, sam long ol famle oli bin talemaot se i bin gat wan man we olgeta oli no save hem, hem i bin kam kamaot long vale ia ten dei i pas, mo hem i askem olgeta blong makem ol Baebol blong olgeta. Mo man ia we oli no save hem, hem i bin talem long olgeta se wan narafala mesenja bae i kam mo hem bae i eksplenem ol toktok long skripja ia we hem i bin makem blong olgeta. Jon Morgan i bin eksplenem ol toktok long skripja ia we oli bin makem mo long semtaem hem i stap tijim gospel long olgeta. Long ol nara wik we i kam, Elda Morgan i bin tijim mo baptaesem evri man mo twenti tri famle nomo long vale oli stap. (Bryant S. Hinckley, *The Faith of Our Pioneer Fathers* [1956], 242–44.)

- Wanem i bin givhan blong mekem misin blong Jon Morgan i gat sakses? (Ol ansa i save tekem tu se hem i glad blong wokhad, hem i bin lisin long Spirit, mo hat blong evri pipol i bin rere blong akseptem gospel.)

Eksplenem se lesen ia i abaot Aposol Pol, we i olsem Jon Morgan, hem i bin lisin long Spirit mo hem i wan gudfala misinari. Long seken misinari wokbaot blong hem, Pol i bin fesem plante hadtaem be tu hem i bin faenem plante pipol we oli bin rere blong risivim gospel blong Jisas Kraes.

Yusum mo Toktok
Raon long Skripja

Long taem we yu stap tij abaot seken misinari wokbaot blong Pol, toktok raon long wanem yumi save lanem aot long Pol abaot fasin blong stap tijim gospel, fasin blong mekemrere yumi wanwan blong lanem gospel, mo fasin blong mekem ol testimoni blong yumi i kam strong moa.

1. Pol, Saelas, mo Timoti i prij truaot long Masedonia mo Gris.

Toktok raon long Ol Wok 15:36–41; 16; 17:1–15; 18:1–22. Invaetem ol memba blong klas blong ridim ol ves ia we yu bin jusum. Yu save mekem ol memba blong klas blong tingbaot se buk blong Ol Wok, Luk nao i bin raetem. Samtaem hem i stap go aot wetem Pol long sam long olgeta misinari wokbaot blong Pol, from we oltaem hem i stap yusum toktok *mifala* taem we hem i stap tokbaot ol aksen blong Pol mo ol misinari kompanion blong hem (Ol Wok 16:10).

- Long taem blong seken misinari wokbaot blong hem, Pol i bin prij long plante siti blong Masedonia mo Grik, i tekem tu Filipae, Tesalonaeka, Berea, Korin, mo Athens. (Poenemaot ol siti insaed long map.) Olsem wanem Spirit i daerektem Pol mo ol kompanion blong hem long taem blong wokbaot blong olgeta? (Luk long Ol Wok 16:6–10; 18:9–11.) Olsem wanem Spirit i bin lidim yu long ol hadwok blong yu blong sevem Lod?
- Ol skripja oli rekodem se Lidia i bin harem mo bilivim ol toktok blong Pol from se Lod i bin openem hat blong hem (Ol Wok 16:14–15). From wanem wan i nid blong “openem hat” long fasin blong jenisim laef insaed long gospel? (Luk long Mosaea 2:9; D&C 64:34.) Invaetem ol memba blong klas blong tokbaot ol eksperiens blong olgeta long taem we Lod i bin openem hat blong olgeta (o hat blong wan narawan we olgeta i save) long gospel.
- From wanem oli bin sarem Pol mo ol kompanion blong hem long prisen long Tuatira (Luk long Ol Wok 16:16–24.) Olsen wanem olgeta oli bin aot long prisen? (Luk long Ol Wok 16:25–26.) Olsem wanem olgeta oli yusum eksperiens ia olsem wan wei blong mekem misinari wok? (Luk long Ol Wok 16:27–34.) Wanem i sam long ol nara eksampol, long histri blong Jos o long laef blong yuwan, we gud samting i bin kamaot afta long wan hadtaem?
- Wanem Pol i tijim long ol pipol long Tesalonaeka taem hem i bin spenem tri Sabat insaed long haos blong prea wetem olgeta? (Luk long Ol Wok 17:1–3.) Wanem i risal blong ol tijing blong Pol long Tesalonaeka? (Luk long Ol Wok 17:4–10.)
- Olsem wanem nao ol pipol long haos blong prea long Berea oli kasem ol tijing blong Pol (Luk long Ol Wok 17:10–12.) Olsem wanem yumi save developem wan maen we i rere gud blong save lanem gospel?

2. Pol i prij long fored blong Kaonsel blong Athens long ol man Athens we oli waes long saed blong toktok.

Ridim mo toktok raon long ol ves ia we yu bin jusum long Ol Wok 17:16–34. Eksplenem se afta we Aposol Pol i bin lego Berea, hem i bin kam long Athens, we long ples ia i kam olsem wan senta blong ol kalja blong wol. Ol man we oli waes long saed blong toktok long ples ia oli lukluk God olsem wan samting we oli jes mekem o paoa, bitim we blong save se Hem i stret Papa blong ol spirit blong yumi. Olgeta oli stap wosipim ol samting we God i bin mekem bitim we, blong wosipim God Hemwan. Olgeta oli bin riplesem revelesen wetem risen mo fasin blong toktok raonraon long wan samting, oli stap tingting hae moa long save blong ol man bitim ol trutok blong God.

- Ol man we oli waes long saed blong toktok long Athens “oli wantem sidaon blong harem ol niufala tok, mo blong storian gud long ol samting olsem” (Ol Wok 17:21). Olsem wanem fasin ia i semmak tedei? Wanem ol denja we oli stap we i mekem blong yumi mas oltaem lukaotem “sam niufala tok”?

- Wanem nao Pol i tijim ol man Atens abaot God? (Luk long Ol Wok 17:22–31; luk tu long the Joseph Smith Translation Acts 17:27 long futnot 27b.) From wanem hem i impoten blong yumi save se “yumi ol pikinini blong [God]”? (Ol Wok 17:28). Olsem wanem nao wan save abaot tru fasin blong God mo rol blong Hem olsem Papa blong yumi, i helpem yumi blong yumi lavem Hem mo wosipim Hem?
- Pol i bin ansarem bak toktok mo bigfala tingting blong ol man we oli waes long saed blong toktok wetem wan tru witnes blong God, Papa blong yumi. Blong stap tijim gospel, from wanem wan tru testimoni i gat moa paoa blong jenisim hat bitim ol bigfala tingting mo toktok? (Luk long Fas Korin 2:4–5, 10–13.)
- From wanem ol man ia we oli waes long saed blong toktok oli lisin long Pol? (Luk long Ol Wok 17:18–21.) Long tingting blong yu, olsem wanem tingting ia i bin afektem ansa blong olgeta folem mesej blong Pol? (Luk long Ol Wok 17:32–33.) Olsem wanem yumi save mekemrere yumiwan blong harem mo andastanem ol toktok blong ol lida blong Jos?

3. Pol i raetem ol leta blong kaonsel i go long Ol Sent long Tesalonaeka.

Ridim mo toktok raon long ol ves ia we yu bin jusum long Fas mo Seken Tesalonaeka.

- Pol i bin wari abaot Ol Sent long Tesalonaeka be hem i no save gobak blong visitim olgeta, so hem i bin sendem Timoti (Fas Tesalonaeka 2:17–18; 3:1–2, 5–7). Afta we Timoti i kambak, Pol i bin raetem tu leta blong givim kaonsel mo leftemap tingting blong Ol Sent blong Tesalonaeka. Wanem nao yumi save lanem aot long ol hadwok blong Pol long bihaf blong ol niu memba blong Jos?
- Wanem nao Pol i stap tijim long Fas Tesalonaeka 1:5 mo 2:2–12 abaot olsem wanem blong tijim gospel long ol naraman? (Listim ol ansa blong ol memba blong klas long blakbod.) Olsem wanem taem yu bin stap folem ol prinsipol ia, i bin helpem yu blong tijim gospel?
- Wanem i wari blong Ol Sent blong Tesalonaeka we Pol i bin talemaot long ol eksplenesen blong hem long saed long taem Kraes i Kam Bakegen? (Luk long Fas Tesalonaeka 4:13–18; 5:1–3.) Wanem nao Pol i talem long ol man Tesalonaeka se bae i hapen, bifo Kraes i Kam Bakegen? (Luk long Seken Tesalonaeka 2:1–4.) Olsem wanem profesi ia i bin fulfil? (Luk long D&C 1:15–16; 112:23; Joseph Smith—History 1:19.)
- Wanem Pol i talem long Ol Sent blong Tesalonaeka blong oli mas mekem blong rere long taem Kraes i Kam Bakegen? (Luk long Fas Tesalonaeka 5:4–8.) Wanem yumi tu yumi mas mekem blong rere long taem Kraes i Kam Bakegen?

Sapos yu stap yusum vidio presentesen ia “The Second Coming,” soem naoia. Toktok raon lelebet long kaonsel blong Elda Packer mo Elda Maxwell abaot fasin blong stap rere long taem Kraes i Kam Bakegen be yumi no mas wari abaot wanem taem samting ia bae i hapen.

- Wanem kaonsel nao Pol i givim long ol man Tesalonaeka abaot fasin blong stap laef olsem Ol Sent (Luk long Fas Tesalonaeka 4:9–12; 5:11–22.) Listim ol ansa blong ol memba blong klas long blakbod. Sapos we Spirit i talem long yu, toktok raon long sam long olgeta poen blong kaonsel ia we yu bin listim daon. Toktok ia maet i save tekem tu, olsem wanem yumi save folem gud kaonsel ia mo olsem wanem yumi kasem blesing sapos yumi folem.

Serem testimoni blong yu long saed blong ol trutok we Pol i bin tijim abaot ol kwaliti we ol gudfala misinari mo Ol Lata-Dei Sent we oli gat lav mo sore i mas gat. Leftemap tingting blong ol memba blong klas blong lukaotem blong divelopem ol kwaliti ia blong mekem se i save helpem olgeta blong priperem olgeta bakegen mo ol narawan long taem we Lod i Kam Bakegen.

Wan Nara Aedia blong Tij

Ol nara tul ia i kam helpem lesen aotlaen we i stap. Yu save yusum aedia ia olsem pat blong lesen blong yu.

Tijim gospel wetem stret fasin

Mekem ol memba blong klas oli ridim Fas Tesalonaeka 2:2–3. Poenemaot se Pol i bin talem se gospel ia oli mas prijim wetem fasin blong leftemap tingting be i no wetem fasin blong stap giaman o fasin blong mekem trik. Elda James E. Talmage i bin sapotem se yumi mas tijim gospel long stret fasin blong hem, be hem i no blong stap tok nogud long man o stap go agensem ol bilif blong ol nara pipol. Serem stori ia blong eksplenem samting ia:

Taem we Elda Talmage i stap olsem wan studen, i bin gat wan man we hem i bin kam long hem wan taem mo wantem blong salem long hem wan gudfala oel laet. Elda Talmage i gat wan laet finis we hem i filim se i stret long tingting blong hem, be hem i bin letem man blong salem laet ia i kam antap long rum blong hem blong soemaot olsem wanem blong yusum.

“Mitufala i bin go insaed long rum blong mi, mo mi bin laetem gudfala laet blong mi. Visita blong mi i presem mi bigwan. Hem i wan gudfala laet bitim ol narafala kaen laet, hem i bin talem, mo mi neva luk wan laet we i klia gud olsem. Hem i bin tanem wik blong laet i go antap mo i go daon, mo hem i bin talemaot se hem i gud tumas.

“ ‘Naoia,’ hem i talem, ‘wetem raet we yu givim long mi, bae mi laetem laet blong mi,’ mo afta hem i tekemaot laet long bag blong hem. . . . Laet blong hem i laetem evri kona blong rum blong mi. Klia laet blong hem i bin mekem laet blong laet blong mi i wik mo i kam smol. Long taem ia nomo blong soemaot olsem wanem blong yusum laet ia, i jenisim tingting blong mi, mo mi kam blong save bigfala tudak we mi bin stap stap long hem mo stap wok, stap stadi mo stap wokhad long hem.”

Elda Talmage i bin pem niufala laet ia, mo afta biaen long hem, hem i bin givim wan tingting se wanem nao yumi save lanem aot long man blong salem laet ia taem yumi stap tijim gospel: “Man we i bin salem laet, hem i no tok jikim blong mi. Hem i bin putum bigfala laet blong hem long saed blong smol laet blong mi, mo mi bin hariap blong tekem.

“Ol misinari wokman blong Jos blong Jisas Kraes tedei oli sendem olgeta oli goaot, i no blong spolem o blong go agensem ol bilif blong ol man, be oli goaot blong soemaot long wol wan laet we i moa antap, we tru long hem ol bigfala smok blong ol bigfala laet we man nomo i mekem bae oli kam klia. Wok blong Jos i blong bildimap, be i no blong spolem” (insaed long Albert L. Zobell Jr., *Story Gems* [1953], 45–48; luk tu long *The Parables of James E. Talmage*, komp. Albert L. Zobell Jr. [1973], 1–6).

“Tabu Spirit, Hem i Givim Laef Long Yumi”

Lesen
32

Ol Wok 18:23–20:38; Galesia

Stamba Tingting Blong leftemap tingting blong ol memba blong klas blong lukaotem ol filing we i stap kam long Tabu Spirit mo blong no letem ol fasin mo ol aksen we bae i blokem olgeta blong oli no save kasem ol filing ia.

Rere long Lesen

1. Ridim, tingting hevi, mo prea abaot ol skripja ia:
 - a. Ol Wok 18:23–19:41. Pol i statem nambatri misinari wokbaot blong hem. Akwila mo Prisila i tijim gospel long Apolos. Pol i tij, mekem baptaes, mo givim presen we i Tabu Spirit long ol man we oli bilif we oli stap long Efesas. Demetrius mo ol naraman we oli stap wokem ol samting long silva oli talem ol giaman toktok long ol pipol blong Efesas blong mekem ol pipol oli go agensem Pol.
 - b. Ol Wok 20. Pol i lego Efesas mo hem i prij long Masedonia mo Gris. Long rod blong hem blong gobak long Jerusalem, hem i givim wan gudbae toktok i go long ol lida blong Jos blong Efesas, mo wonem olgeta abaot Apostasi.
 - c. Galesia. Pol i raetem wan leta blong stretem ol man Galesia blong kambak folem loa blong Moses. Hem i helpem olgeta blong oli tingbaot impoten fasin blong stap gat fet long Jisas Kraes mo leftemap tingting blong olgeta blong oli lukaotem ol fasin blong Spirit.
2. Sam moa riding: Bible Dictionary, “Holy Ghost,” 704; “Pauline Epistles: Epistle to the Galatians,” 744–45.
3. Sapos wan map blong nambatri misinari wokbaot blong Pol i stap (map 21 in the LDS edition of the King James Bible), yu save yusum long taem blong lesen.
4. Wan tingting blong tij: Sam long ol gudfala stori mo ol eksampol oli olgeta we oli kamaot long laef blong yuwan. Dipen long Spirit blong i save helpem yu blong save wijwan long ol eksperiens blong yu we i stret mo i nid blong yu save serem wetem ol memba blong klas. (Luk long *Teaching—No Greater Call*, 87, 127.)

Wan Tingting blong Lesen

Aktiviti blong Pulum Tingting

Olsem we i stret, yusum aktiviti ia o wan aktiviti blong yuwan blong statem lesen.

Askem ol memba blong klas blong tingbaot wan talen o wan skil (kaen olsem save plei long wan instrumen, somap, raet, o plei long wan spot) olgeta samting ia oli save develop i kam antap be bae oli no save yusum longtaem. Askem:

- Yufala i bin filim glad blong yusum talen mo skil ia tedei? Olsem wanem blong yu save kam antap gud sapos yu yusum talen mo skil ia? Wanem yu nid blong mekem blong yusum talen o skil ia semmak olsem we yu bin stap mekem finis long ol taem i pas? (Sapos i no gat wan memba blong klas i save tingbaot wan talen o skil, toktok raon long wan eksampol blong laef blong yuwan.)

Poenemaot se blong haremsave ol filing blong Tabu Spirit, oli save talem se hem i olsem wan talen o wan paoa long saed blong spirit blong mekem samting. Moa we yumi yusum talen ia, moa yumi kam gud long hem.

- Olsem wanem yumi save developem fasin blong save stap haremsave ol filing we i kam long Tabu Spirit? (Ol ansa maet i save tekem tu, tru long fasin blong stap laef stret mo gud, tru long fasin we God i stap toktok long man tru long Tabu Spirit, mo tru long fasin blong stap obei ol filing ia taem yumi kasem olgeta.) Wanem bae i hapen sapos yumi developem fasin ia mo afta yumi go agensem samting ia bakegen?

Eksplenem se storian blong tedei abaot nambatri misinari wokbaot blong Pol mo leta blong hem i go long ol man Galesia, bae i tekem tu storian blong ol wei we yumi nid blong folem ol filing we i kam long Tabu Spirit mo olsem wanem blong yumi save kasem blesing sapos yumi folem.

Yusum mo Toktok
Raon long Skripja

Wetem prea jusum ol toktok blong skripja mo ol kwestin we bae oli save givhan gud long nid blong ol memba blong klas. Toktok raon long olsem wanem ol skripja ia oli aplae long evri dei laef blong yumi. Leftemap tingting blong ol memba blong klas blong oli serem ol eksperiens we i go wetem ol prinsipol blong skripja ia.

1. Pol i tij, mekem baptaes, mo givim Tabu Spirit i go long ol man we oli bilif we oli stap long Efesas.

Toktok raon long Ol Wok 18:23–19:41. Invaetem ol memba blong klas blong ridim ol ves ia we yu bin jusum. Eksplenem se afta we Pol i kambak long seken misin blong hem, hem i bin spenem sam taem long Antiok mo afta hem i bin aot bakegen blong go long nambatri misin blong hem (Ol Wok 18:22–23). Long nambatri misin ia, hem i bin spenem plante taem blong hem—kolosap tri yia—blong stap prijim gospel long Efesas. (Sapos yu stap yusum map, poenemaot ples we Pol i stap go long hem long stret taem taem yu stap toktok raon long nambatri misinari wokbaot blong hem.)

- Apolos i wan man Jiu we hem i bin save abaot baptaes long taem we Jon Baptaes i stap tijim long ol man, be hem i no save abaot presen we i Tabu Spirit. Taem Akwila mo Prisila, tufala memba blong Jos we tufala i stap stap long Efesas, tufala i bin harem Apolos i stap prij, tufala i tijim hem “Rod blong God i moa klia long hem” (Ol Wok 18:26). Wanem nao ol kwaliti we Apolos i gat olsem wan tija? (Luk long Ol Wok 18:24–28.) Olsem wanem nao ol kwaliti ia oli mekem hem i kam olsem wan gudfala tija? Olsem wanem yumi save developem ol kwaliti ia?
- Wanem fasin blong soemaot samting long saed blong spirit i bin hapen long taem we ol man Efesas oli bin kasem presen we i Tabu Spirit? (Luk long Ol Wok 19:6.) Long wanem narafala taem nao we sem kaen fasin blong soemaot samting i bin hapen? (Luk long Ol Wok 2:1–4; 10:44–46. Ol Aposol oli bin toktok long defdefren lanwis taem olgeta oli bin kasem presen we i Tabu Spirit long dei blong Pentekos. Sam long Ol Jentael long Sisaria tu oli bin toktok long ol defdefren lanwis mo afta Pita i bin kasem wan visen se oli mas prijim gospel long Ol Jentael.) Wanem fasin we blong Tabu Spirit i stap soemaot samting, oli oltaem eksperiensem tedei? (Luk long D&C 6:15, 23; 8:2 blong sam eksampol; luk tu long Fas King 19:12.)

- From wanem Pol i lego haos blong prea long Efesas mo stat blong tij long skul blong Tiranias? (Luk long Ol Wok 19:8–9. *Raorao* insaed long ol ves ia oli no minim se hem i stap prij o stap givim wan toktok.) Olsem wanem yumi save ansarem ol pipol we oli stap tokspolem o oli stap go agensem gospel? (Luk long 3 Nifae 11:29–30.)

Elda Marvin J. Ashton i bin tijim: “Taem ol narafala man oli no agri wetem ol bilif blong yumi, yumi no mas tok agensem olgeta, tokbak long olgeta long sem fasin, o faet agensem olgeta. . . . Responsabiliti blong yumi i blong eksplenem wok blong yumi se from wanem i impoten, long fasin blong stap olsem wan fren blong eni man tru long ol bilif blong yumi, mo blong talemaot ol stret samting we yumi save se i tru mo i stap tedei. Responsabiliti blong yumi i blong stanap strong mo folem ol gudfala tingting we oli stap givimaot evri dei mo ol prinsipol blong gospel we i no save finis, be i no blong faet agensem eni man o eni oganaesesen. Ol raorao i stap krietem seperesen bitwin ol pipol. Lav i save mekem komiunikesen i posibol. . . . Raorao bae i neva tekem yumi tugeta long wan tingting we yumi save kam antap long hem.” (insaed long Conference Report, Epr. 1978, 10; o *Ensign*, Mei 1978, 7–8).

- From wanem Demetrius mo ol narafala man we oli stap wokem ol samting long silva oli kros long wanem we Pol i stap prijim? (Luk long Ol Wok 19:23–28. Olgeta oli stap mekem mo stap salem ol ting blong Atemis, wan giaman womangod, mo olgeta oli gat wari long ol kastoma blong olgeta, from sapos no bae oli lusum olgeta taem Pol i stap helpem ol pipol blong kam jenisim laef blong olgeta tru long gospel blong Jisas Kraes.) Olsem wanem ol wari blong yumi long saed blong ol samting blong mani o wan nara samting blong wol we yu putum intres blong yu long hem, i afektem laef blong yumi blong putum God fastaem? Olsem wanem kaen wari ia i afektem fasin blong yumi blong save lisin long ol filing we i kam long Spirit?
- Komperem fasin blong Demetrius mo ol man we oli stap wokem ol samting long silva wetem fasin blong ol man Efesas we oli sakemaot ol buk blong blak majik blong olgeta taem oli stat blong folem Jisas Kraes (Ol Wok 19:18–19). Olsem wanem yumi save gat wan stret lukluk long ol samting blong wol ia?

2. Pol i givim wan gudbae toktok i go long ol lida blong Jos long Efesas.

Ridim mo toktok raon long ol ves ia we yu bin jusum long Ol Wok 20. Eksplenem se Pol i bin lego Efesas mo wokbaot i go raon long Masedonia mo Gris, hem i stap prijim gospel. Hem i bin plan blong gobak long Jerusalem from bigfala kakae blong Pentekos. Long rod blong hem blong gobak long Jerusalem, hem i bin sendem wan mesenja blong go talem long ol lida blong Jos long Efesas blong oli go mitim hem long Maelitas. Hem i bin givim wan gudbae toktok we i tajem hat blong olgeta we oli stap mo afta gohed long wokbaot blong hem.

- Yumi biliv se hemia hem i las taem blong hem we hem bae i toktok long ol elda blong Efesas, wanem nao Pol i tokbaot long gudbae toktok blong hem? (Luk long Ol Wok 20:28–35.) Huia nao i “ol wael dog” we Pol i stap wonem ol pipol long hem? (Luk long Ol Wok 20:29. Ol enemi blong Jos.) Huia bakegen we Pol i stap wonem ol pipol long hem? (Luk long Ol Wok 20:30. Ol memba blong Jos we oli wantem blong statem wan Jos blong olgeta mo stap traem blong tekemaot ol nara memba.) Olsem wanem yumi save lukaotem gud ol laef blong yumi agensem apostasi?

- Wanem Pol i talem long Ol Elda blong Efesas blong oli mas mekem blong help blong protektem ol memba blong Jos aot long olgeta we oli stap traem blong lidim olgeta aot long Jos? (Luk long Ol Wok 20:28; luk tu long Jon 21:15–17.) Olsem wanem yumi save givhan blong protektem sipsip blong God aot long “ol wael dog”?
- Pol i bin finisim toktok blong hem long ol brata blong Efesas blong helpem olgeta tingbaot tijing blong Lod we i se “Man we i stap givim presen i go, hem i save harem gud moa, i winim man we i stap kasem presen blong hem” (Ol Wok 20:35). Olsem wanem yu bin faenemaot se samting ia i tru insaed long laef blong yu?

3. Pol i tok long fasin blong stretem samting mo givim kaonsel long Ol Sent blong Galesia.

Ridim mo toktok raon long ol ves ia we yu bin jusum long leta blong Pol we i raetem i go long ol man Galesia. Eksplenem se taem Pol i stap long nambatri misinari wokbaot blong hem, hem i bin raetem wan leta i go long Ol Sent long Galesia, plante long olgeta oli bin kambak bakegen blong kipim loa blong Moses. Hem i bin tok long fasin blong stretem olgeta we oli bilif se fasin blong sevem man bae i save kam long wan man tru long ol wok we loa blong Moses i askem blong mekem be i no tru long fet long Lod Jisas Kraes.

- Wanem nao i stamba tingting blong loa blong Moses? (Luk long Galesia 3:23–26; Jakob 4:4–5; Mosaea 13:29–30. Lod i bin givim loa ia long ol man Isrel blong helpem olgeta blong oli stap tingbaot Hem mo tu hem i blong priperem olgeta blong oli save kasem fasin blong sevem man tru long Atonmen blong Hem.) Olsem wanem nao loa blong Moses i bin fulfil? (Luk long 3 Nifae 15:2–5; Alma 34:10; 3 Nifae 9:19. Jisas i bin fulfilim loa blong Moses tru long Atonmen blong Hem, we Hem i soemaot ol saen blong Hem tru long plante loa blong ol odinens.)
- Pol i bin sapraes bigwan we Ol Sent blong Galesia oli bin gobak long loa blong Moses jes afta nomo we oli bin lanem gospel blong Jisas Kraes (Galesia 1:6; 4:9). From wanem fasin ia blong gobak long loa blong Moses i soemaot hamas fet we oli gat long Lod? (Luk long Galesia 2:16; 3:1–5; 5:1–6.)
- Long taem blong Pol, i gat sam pipol we oli bin lukaotem blong tanem, o jenisim, gospel blong Jisas Kraes (Galesia 1:7–8). Wanem i sam long olgeta samting blong bifo we oli soemaot pruf abaot samting ia? Olsem wanem yumi save givhan blong stopem ol wok ia blong tanem gospel?
- Wanem yumi save lanem long Galesia 1:11–12 abaot olsem wanem yumi save kasem wan testemoni blong gospel? From wanem hem i impoten se ol testemoni blong yumi oli mas stanap long revelesen we i stap kam long Jisas Kraes? (Yu save toktok raon long olsem wanem ol testemoni we oli stanap long ol nara faondesem, olsem ol rilesensip bitwin wan grup o sam wei we yumi faenem gud rilesensip long hem, plante taem hem i no save givhan long ol tes blong fet blong yumi.)
- Pol i bin wonem ol man Galesia blong no folem ol fasin blong ol man blong wol (luk long Galesia 5:19). Wanem i ol fasin blong ol man blong wol? (Luk long Galesia 5:19–21.) Wanem i risal blong ol fasin ia sapos wan man i stap mekem? (Luk long Galesia 5:21.) Nomata long ol fasin blong ol man blong wol we i stap hapen olbaot long wol tedei, wanem yumi save mekem long wik ia blong save kam antap long ol ples we yu stap stap long hem, blong spirit i save stap long hem?

- Pol i bin leftemap tingting blong ol man Galesia blong lukaotem ol fasin, o ol samting we i kamaot sapos yu stap folem Spirit (Galesia 5:16, 25). Wanem nao sam long ol fasin ia? (Luk long Galesia 5:22–23.) Olsem wanem nao ol fasin ia oli kamtru long laef blong yu? Wanem nao yumi mas mekem sapos yumi filim se yumi no gat ol fasin ia insaed long laef blong yumi?
- Wanem Pol i tijim long Ol Sent blong Galesia abaot olsem wanem oli save tritim ol man we oli stap raonabaot long olgeta? (Luk long Galesia 5:14; 6:2; luk long Mosaea 18:8–10.) Olsem wanem yumi save givhan long ol hevi samting blong wanwan long yumi? Olsem wanem nao taem yumi mekem samting ia i helpem yumi blong kam moa kolosap long Jisas Kraes?
- Wanem Pol i wantem minim long ples ia taem hem i talem se “i no gat wan man i save giaman long God”? (Luk long Galesia 6:7; luk tu long D&C 63:58. Wan mining blong hem i se olgeta we oli no wantem obei long God mo oli no wantem sakem sin oli stap jikim hem mo God bae i panisim olgeta.) Olsem wanem ol pipol oli stap jikim God tedei?
- Wanem mining blong toktok ia we i se “Wanem sid we wan man i planem fastaem long garen blong hem, be frut blong hem nomo, man ya bae i mas kakae”? (Luk long Galesia 6:7–9.) Olsem wanem nao prinsipol ia i go wetem fasin blong stap harem mo folem ol filing we i kam long Tabu Spirit? Olsem wanem nao prinsipol i aplae tu long rilesensip blong yumi wetem ol nara pipol? Olsem wanem nao prinsipol ia i aplae tu long ol narafala situesen insaed long laef blong yumi?

Las Toktok

Testefae se ol fasin mo ol aksen we oli no stret olsem fasin raorao, fasin blong stap folem wol, mo apostasi, bae oli blokem yumi blong kasem ol wok we i kam long Tabu Spirit. Be sapos yumi traehad blong laef long fasin we i stret mo gud, mo stap folem ol fasin we yumi stap risivim, paoa blong yumi blong haremsave mo folem ol wok we oli kam long Spirit bae i kam antap moa. Leftemap tingting blong ol memba blong klas blong lukaotem mo folem ol wok we oli kam long Tabu Spirit.

Wan Nara Aedia blong Tij

Ol nara tul ia i kam helpem lesen aotlaen we i stap. Yu save yusum aedia ia olsem pat blong lesen.

Tijim gospel olsem we Pol i mekem

- Wanem yumi save lanem aot long Pol folem fasin blong hem blong tijim gospel? (Luk long Ol Wok 19:8–10, 21; 20:7–12, 18–24, 27, 31, 35–36. Luk tu long storian we i stap long Fas Tesalonaeka 1:5 mo 2:2–12 insaed long lesen 31.)

Listim daon ol ansa blong ol memba blong klas long blakbod, mo toktok raon long olsem wanem blong yumi folem eksampol blong Pol long taem we yumi stap tij.

Stamba Tingting Blong helpem ol memba blong klas blong lukaotem ol blesing we oli save kasem taem oli joen tugeta long Kraes, folem Spirit, mo stap klin long ol tingting mo fasin blong olgeta.

Rere long Lesen

1. Ridim, tingting hevi, mo prea abaot ol skripja ia:
 - a. Fas Korin 1:10–13; 3:1–11. Pol i wonem Ol Sent blong oli stap longwe long raorao, mo oli mas gat wan tingting mo tu wan fasin nomo blong jajem man.
 - b. Fas Korin 1:17–31; 2:1–16. Pol i toktok long Ol Sent blong oli dipen long Spirit be i no long ol waes tingting mo save blong wol ia.
 - c. Fas Korin 3:16–17; 5; 6:9–20. Pol i wonem Ol Sent blong oli mas stap klin oltaem long ol tingting mo fasin blong olgeta.
2. Sam moa riding: Fas Korin 7–10; Bible Dictionary, “Pauline Epistles: Epistles to the Corinthians,” 743–44.
3. Wan tingting blong tij: Elda Boyd K. Packer i bin talem: “Hem i impoten tumas blong wan tija i andastanem se ol pipol oli gud tumas. Hem i impoten blong save ol fasin blong ol blong mekem se yu save mekem ol samting we i stret long olgeta. Tingting we i kam antap i blong mekem fet blong olgeta i gru. Hem i gat bigfala defren taem yumi stap long fored blong ol stret pikinini blong yumi o stanap long fored blong wan klas blong ol yang pipol blong tijim olgeta” (*Teach Ye Diligently* [1975], 73).

Wan Tingting blong Lesen

Aktiviti blong Pulum Tingting

Olsem we i stret, yusum aktiviti ia o wan aktiviti blong yuwan blong statem lesen. Droem wan rod long blakbod, mo droem wan ka o wan narafala trak long rod ia. Mo afta serem eksperiens we Elda Joseph B. Wirthlin i givim:

“Long wan aftanun, taem mitufala i stap ron long trak long wan rod antap long hil wetem wan bigfala ren we i kam wetem win we i strong tumas, ol noes blong tanda i stap faerap wetem ol laet blong laetning i stap saen olbaot, mi mo Sista Wirthlin i jes stap luk rod kolosap nomo, hemia long fored blong mitufala, mo long raet mo long lef saed blong mitufala. Mi stap wajem wetem fasin blong kea inaf, ol waet laen we i stap long rod, bitim bifo. Stap kolosap long laen ia i helpem mitufala blong no go aot long rod mo long wan bigfala grik we i stap long saed blong rod mo i bin helpem mitufala long ol narafala denja we oli stap long rod blong mitufala. Mitufala i stap tingting se blong go ova long laen ia hem i denja tumas. Mo mi bin tingbaot, ‘Bae i save gat wan raet man we i gat wan gudfala tingting blong no tanem i go long lef o long raet saed blong rod sapos hem i save se long en i gat wan denja? Sapos hem i bin lukluk gud long laef blong hem blong wol, semtaem bae hem i save putum laef blong hem bitwin ol laen ia.

“Eksperiens ia blong ron long trak long rod ia antap long hil i semmak olsem laef blong yumi. Sapos yumi stap long medel blong ol laen we God i bin putum, Hem bae i protektem yumi, mo bae yumi save stap sef kasem weaples we yumi stap wantem blong go long hem” (insaed long Conference Report, Okt. 1990, 80; o *Ensign*, Nov. 1990, 64).

Eksplenem se long taem we Pol i bin raetem fas leta blong hem i go long Ol Sent long Korin, sam long olgeta oli stat blong go aot long laen blong gospel. Lesen ia bae yumi toktok raon long ol woning blong Pol we i talem long Ol Sent blong oli sakem sin blong olgeta i folem tri wei we i mekem olgeta oli stat blong go aot long gospel. Droem tri laen long blakbod blong soem se trak i no gat long rod ia. Long en blong fas laen, yu raetem *Raorao mo fasin blong nogat yuniti*. Long en blong seken laen, yu raetem *Dipen long ol waes blong wol*. Long en blong nambatri laen, yu raetem *Fasin blong no gat respek*.

Yusum mo Toktok
Raon long Skripja

Taem yu stap tijim olgeta skripja ia, toktok raon long olsem wanem kaonsel blong Pol i aplae long laef blong yumi mo olsem wanem yumi save yusum ol tijing blong hem insaed long laef blong yumi.

1. Stap longwe long raorao mo joen tugeta oltaem.

Ridim mo toktok raon long Fas Korin 1:10–13; 3:1–11.

- Wanem problem nao Pol i tokbaot long Fas Korin 1:10–13? Wanem mining blong ol toktok ia we sam long Olgeta Sent oli stap klem se olgeta oli “ blong Pol,” sam long olgeta oli se “mifala i blong Apolos,” sam oli se “mifala i blong Pita,” mo sam oli se “mifala i blong Kraes”? (Blong stap joen tugeta olsem ol man we oli stap folem Jisas Kraes, sam long Olgeta Sent oli seperetem olgeta long ol grup o long ol defdefren oganaesesen insaed long Jos.) Olsem wanem samtaem yumi tu yumi mekem semmak mistek olsem? Wanem sam long ol risal blong ol kaen seperesen olsem? Olsem wanem nao ol seperesen mo ol raorao olsem i stap afektem wok blong yumi olsem ol disaepol blong Kraes? (Luk long Mosaea 18:21–22; 3 Nifae 11:29–30; D&C 38:27.)
- Wanem nao Pol i talem olsem wan kaonsel long Ol Sent blong oli mekem blong oli save joen tugeta oltaem? (Luk long Fas Korin 1:10. Taem wan memba blong klas i stap ridim ves ia, raetem long blakbod, wanwan pat blong ol kaonsel blong Pol we i stap daon.) Olsem wanem yumi save yusum kaonsel ia long hom mo insaed long Jos?
 - a. “Tingting blong yufala i mas kam wan nomo.”
 - b. “No moa seraot long ol naranarafala grup.”
 - c. “Joen gud we yufala i gat wan tingting nomo, mo we fasin blong yufala i wan nomo.”
- From wanem Ol Sent blong Korin oli kasem nomo “melek” blong gospel? (Luk long Fas Korin 3:1–4.) From wanem raorao i blokem yumi blong yumi no save kasem “mit” blong gospel? Olsem wanem yumi save priperem yumi wanwan blong kakae “mit” blong gospel?
- Pol i bin tijim se i gat plante minista (wokman) blong gospel be se Jisas Kraes nomo i stret fandesen (Fas Korin 3:5–1). From wanem hem i impoten blong yumi putum Sevyala olsem fandesen blong fet blong yumi? (Luk long Hileman 5:12.)

2. Dipen long Spirit be i no long ol waes tingting blong wol.

Toktok raon long Fas Korin 1:17–31; 2:1–16. Invaetem ol memba blong klas blong ridim ol ves ia we yu bin jusum.

- Pol i bin tijim se waes tingting blong God bae i mekem waes tingting blong wol ia i “kam olsem krangke tok nomo” (Fas Korin 1:18–21). Olsem wanem nao waes tingting blong God i defren long waes tingting blong wol? (Luk long Aesea 55:8–9; D&C 38:1–2.) Wanem i sam long olgeta eksampol we waes tingting blong God i bin mekem waes tingting blong wol i kam olsem krangke tok nomo?
- Long wanem wei nao save blong wol i kam olsem wan blesing long yumi? (Sapos i stret, eksplenem se *save blong wol* i stap mining ol save we i no blong God.) Long wanem wei nao save blong wol ia i save kam ol samting we i save blokem rod blong yumi? Olsem wanem yumi save komperem ol save blong wol mo ol save long saed blong spirit? (Luk long 2 Nifae 9:28–29.)

Presiden Spencer W. Kimball i bin tijim: “I gat janis blong save gat tufala tugeta long semtaem [save blong wol mo ol save long saed blong spirit]. . . .Sapos yumi spenem ol dei blong yumi long laef blong wol ia blong stap lukaotem ol save blong wol mo lego save long saed blong spirit, samting ia i mining se yumi no stap gru, from we laef ia hem i taem blong ol man blong mekemrere blong mitim God; hemia hem i taem blong bildimap fet, blong stap mekem ol baptaes, blong stap kasem Tabu Spirit, mo blong stap mekem ol odinens. Mo wetem program ia we i stap bae yu save gat save blong wol, mo iven long spirit wol afta long ded, spirit blong yumi bae i stil gohed blong lanem samting.” (*The Teachings of Spencer W. Kimball*, ed. Edward L. Kimball [1982], 390).

- Wanem Pol i stap wantem mining taem hem i talem se God i stap jusum “ol samting we ol man blong wol oli stap talem se oli krangke, blong mekem ol man we oli waes blong oli sem” mo “ol samting we ol man blong wol oli stap talem se oli no gat paoa, blong mekem ol man we oli gat paoa oli sem”? (Fas Korin 1:27). From wanem plante taem, God i stap jusum “ol samting we ol man blong wol oli stap talem se oli no gat paoa” blong fufilim ol stamba tingting blong Hem?
- Wanem ol wiknes we Pol i fesem long taem hem i stap prijim gospel? (Luk long Fas Korin 2:1–3.) Olsem wanem ol wiknes blong hem, i kam olsem samting we i givim paoa long hem? (Luk long Fas Korin 2:2, 4–5.) Olsem wanem Lod i bin helpem yu taem yu filim se yu no save mekem o fraet blong wokem wok blong Hem?
- Folem Pol, olsem wanem blong yumi save “ol samting ya we God i stap tingbaot”? (Luk long Fas Korin 2:10–13.) From wanem nao, samtaem yumi stap dipen plante long stret waes mo save blong yumi bitim revelesen we i stap kam long Spirit? Wanem nao yu bin luk we i defren bitwin save we i stap kam long Spirit mo save we i stap kam long save blong yumi nomo?

Elda Bruce R. McConkie i bin tijim: “Klin rilijin i samting blong Spirit be i no blong save we i kam long man nomo, mo ol trutok blong hem i mas go insaed long hat blong ol pipol we oli stap harem tru long paoa blong Tabu Spirit, bae sapos no, sol blong ol pipol ia i no save jenis . . . mo olgeta pipol ia we oli stap lukaotem fasin blong sevem man bae oli save kam laef long kraes” (*Doctrinal New Testament Commentary*, long ol buk 3. [1966–73], 2:318).

- Pol i bin tijim se hem i no posibol blong man we i stap folem fasin blong wol i save kasem ol samting blong God (Fas Korin 2:14). From wanem i olsem ia? Wanem yumi mas mekem blong winim man we i stap folem fasin blong wol? (Luk long Mosaea 3:19.)

3. Stap klin oltaem long tingting mo fasin.

Ridim mo toktok raon long ol ves ia we yu bin jusum long Fas Korin 3:16–17; 5; 6:9–20.

- Wanem nao Pol i bin komperem ol bodi blong yumi wetem? (Luk long Fas Korin 3:16–17; 6:19–20.) Long tingting blong yufala, from wanem hemia i stret wei blong komperem olsem? Wanem samting nao i save spolem ol bodi blong yumi? Wanem nao yumi sud mekem blong kipim bodi blong yumi olsem ol tempol?
- Long woning blong Pol agensem plante rabis sin long dei blong hem, hem i tokbaot tu insaed sam sin blong taem wan man o woman i go slip wetem wan naraman o woman (Fas Korin 6:9). Wanem i loa blong God long saed blong taem wan man o woman i slip wetem wan naraman o woman long laef blong wol ia? (Luk long D&C 42:23; 59:6.)

Elda Richard G. Scott i talem: “Eni fasin long saed blong taem wan man o woman i go slip wetem wan naraman o woman aotsaed long ol promes blong mared—mi mining eni aksen we yu mining blong mekem wetem ol tabu, mo pravet pat blong bodi blong wan naraman o woman, wetem o witaot ol klos—hem i wan sin mo God i no glad long hem. Tu hem i wan foldaon blong loa taem yu gat ol strong filing mo tingting olsem long stret bodi blong yuwan” (insaed long Conference Report, Okt. 1994, 51; o *Ensign*, Nov. 1994, 38).

- From wanem ol sin we man o woman i go slip wetem wan naraman o woman i nogud tumas? (Luk long ol toktok ia we i stap daon.) Wanem i ol blesing blong stap klin oltaem long tingting mo fasin?

Elda Joseph B. Wirthlin i bin tijim: “Wan long ol bigfala giaman tingting long ol yia we i jes pas, i se fasin blong nomo save ded hem i no wan samting mo i blong evriwan mo i no gat ol risal we i no gud long hem. Blong talemaot trutok, fasin blong nomo save ded, hem i wan taem we oli putum blong stap safa mo harem nogud long plante nara problem we oli stap kamaot klia tedei, we i tekem tu ol rabis fasin we oli no save kontrolem tedei, fasin blong kilim ded pikinini bifo i bon, ol famle we oli brokbrok, ol famle we oli no gat papa, mo ol mama we oli gat ol pikinini be i no gat papa” (insaed long Conference Report, Okt. 1994, 100–101; o *Ensign*, Nov. 1994, 76).

Elda Boyd K. Packer i bin tijim: “[Setan] i save se paoa ia blong krietem wan laef i no jes wan samting we i kam nomo long plan, be hem i ki blong plan ia. Hem i save sapos hem i giaman long yu blong yu yusum paoa kwiktaem, o blong yusum naoia, o blong spolem long eni wei, bae yu save lusum ol janis blong yu blong kam olsem wan God” (insaed long Conference Report, Epr. 1972, 137; o *Ensign*, Julae 1972, 112).

- Pol i bin givim kaonsel long Olgeta Sent blong oli no mas go joen [stap] wetem ol man o woman we oli stap mekem ol fasin nogud wetem man o woman (luk long Fas Korin 5:9). Olsem wanem kaonsel ia maet i kam tu long yumi? (Toktok raon long olsem wanem ol fren mo ol kaen entetenmen we yumi stap jusum

olgeta oli save afektem strong tingting blong yumi mo fasin blong yumi blong stap klin oltaem long tingting mo fasin.) Olsem wanem yumi save stap longwe long ol tingting blong no gat fasin blong respek?

- Wanem ol wei we Setan i stap traem blong yusum blong tanem tingting blong yumi se i gat ol janis long ol loa blong God blong wol ia? (Luk long toktok we i stap daon.) Olsem wanem yumi save winim ol temtesen ia? Wanem promes nao Fas Korin 10:13 i givim long yumi sapos yumi traem blong winim ol temtesen we oli stap mekem yumi blong komitim sin long saed blong taem wan man o woman i go slip wetem wan naraman o woman? Olsem wanem yu bin kasem blesing taem we yu lukaotem Lod blong i givhan long yu blong winim temtesen?

Elda Richard G. Scott i bin talem: “Setan i save temtem wan blong bilivim se level blong ol aksen blong mit mo bun i fri nomo bitwin wanwan man o woman we tufala i glad long tufala, mo we tufala i gat wan strong tingting mo filing we i kam long tufala wanwan, mo sapos tufala i holemtaet olsem wan promes blong tufala, bae i no gat wan samting nogud bae i kam tru olsem wan ansa blong hem. Olsem wan witnes blong Jisas Kraes, mi testefae se hem i wan giaman tingting. . . . Jusum wanem bae yu mekem mo wanem bae yu no mekem. Taem temtesen i kam, yu no mas jenisim ol standet blong yu” (insaed long Conference Report, Okt. 1994, 51; o *Ensign*, Nov. 1994, 38).

- Wanem promes Atonmen blong Jisas Kraes i givim long olgeta we oli sakem sin blong ol long saed blong sin blong taem wan man o woman i go slip wetem wan naraman o woman? (Luk long Fas Korin 6:11; Aesea 1:18; D&C 58:42.)

Las Toktok

Testefae se, olsem Pol, ol aposol mo ol profet blong dei blong yumi tedei oli stap gohed blong tijim yumi long wanem yumi sud mekem blong yumi save stap oltaem insaed long ol baondri we Lod i bin putum. Yu save toktok raon lelebet long wan toktok blong las konfrens we long hem, profet o wan long ol aposol i bin tokbaot wan topik we Pol i bin tokbaot insaed long leta blong hem we i go long ol pipol blong Korin, kaen olsem, fasin blong stap longwe long raorao, dipen long Spirit, o stap klin oltaem long tingting mo fasin. Olsem we i stret, serem olsem wanem yu bin kasem blesing taem yu stap aplaem kaonsel blong Pol o wan long ol lata-dei aposol o profet.

Sam Nara Aedia blong Tij

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. “God i putumgud plante samting oli rere finis blong ol man we oli lavem hem” (Fas Korin 2:9)

- Wanem i wan long ol gudfala o naesfala samting we bifo yu neva luk o go tru long hem?

Mekem wan memba blong klas i ridim Fas Korin 2:9. Testefae se ol blesing we God i bin mekemrere blong yumi sapos yumi lavem Hem mo kipim ol komanmen blong Hem oli moa gud bitim eni samting we yumi save stap tingting long hem.

2. Brata i karem brata i go long kot (luk long Fas Korin 6:6)

Ridim mo toktok raon long Fas Korin 6:1–8.

- Olsem wanem nao plante long Ol Sent long Korin oli stretem ol raorao blong olgeta? (Luk long Fas Korin 6:1–8.) Olsem wanem samting ia i krietem bigfala fasin blong no gat yuniti? Olsem wanem problem ia i kam bigwan tedei? Wanem yumi save lanem aot long kaonsel blong Pol?

Lesen 34 Holem Ol Odinens, Stret Olsem We Mi Tijim Yufala long Hem Fastaem

Fas Korin 11–16


Stamba Tingting Blong helpem ol memba blong klas blong luksave impoten fasin blong stap laef folem ol doktrin blong gospel mo blong stap kasem ol odinens blong prishud.

- Rere long Lesen**
1. Ridim, tingting hevi, mo prea abaot ol skripja ia:
 - a. Fas Korin 11:1–3, 11–12. Pol i tijim ol rilesensip blong ol hasban mo waef long olgeta wanwan mo wetem Lod.
 - b. Fas Korin 11:17–29. Pol i tijim se sakramen i wan saen blong sakrifaes blong Sevyu mo oli sud kakae oltaem blong save stap tingbaot Hem.
 - c. Fas Korin 12–14. Pol i tijim se i gat plante presen blong spirit mo se evriwan oli impoten tumas blong Jos. Hem i tijim se jareti i moa impoten bitim eni nara presen o kwaliti. Hem i tijim se ol presen blong spirit ia, oli sud yusum long wei we i blong givhan long evriwan.
 - d. Fas Korin 15. Pol i tijim se, from se Jisas Kraes i bin laef bakegen, yumi evriwan bae yumi laef bakegen long ded. Hem i tokbaot tu baptaes blong ol ded man mo ol trifala level blong glori.
 2. Sam moa riding: 3 Nifae 18:1–14; Moronae 7:44–48; 10:8–18; Doctrine and Covenants 46:1–26; 76:50–119; 88:27–32, 95–102.
 3. Sapos ol pikja ia oli stap, yusum sam long olgeta long taem blong lesen blong soemaot jareti: Wet long Taem blong Yumi (62316); Serem Trisaekol (62317); Famle Pleiplei (62384); Blesem Ol Sik (62342; Gospel Art Pikja Kit 613); Hom Tijing (Gospel Art Pikja Kit 614); Sevem Yumi Wanwan (Gospel Art Pikja Kit 615).
 4. Wan tingting blong tij: Blong tijim gud gospel, ol tija oli nidim presen we i blong save andastanem hat blong wan man. Blong andastanem gud ol nid blong ol memba blong klas, ol tija oli sud gat jareti mo Tabu Spirit i mas gaedem olgeta. Ol tija oli sud prea mo tingting hevi long ol nid blong wanwan memba blong klas mo olsem wanem blong oli save helpem olgeta blong mitim ol nid ia. (Luk long *Teaching—No Greater Call*, 25–26.)
-

Wan Tingting blong Lesen

Aktiviti blong Pulum Tingting

Olsem we i stret, yusum aktiviti ia o wan aktiviti blong yuwan blong statem lesen. Askem ol memba blong klas sapos oli save wanem nao i wan relrod swis poen. Droem wan antap long blakbod (olsem we oli soem long nekis pej), mo eksplenem se wan swis poen i ples long wan relrod we tren i pas long hem mo tren i save kamaot long wan relrod i go long wan nara rod.



Serem eksperiens ia we i kam long Elda Gordon B. Hinckley:

“Plante yia i pas, mi bin stap wok long wan hed ofis blong wan long ol relrod blong yumi. Wan dei mi bin risivim wan telefon kol we i kam long wan wokfren blong mi long Newak, Niu Jesi, we i bin talem se wan pasenja tren i bin kam kamaot be i no gat ka we gat ol bag insaed. Ol pipol long tren ia oli kros tumas.

“Mifala i bin faenemaot se tren i bin mekem gud nomo long Oklan, Kalifonia, mo afta karemaot gud evri samting long St. Luis, long stesen ia nao we evri samting i stap long hem mo afta i save stap go stret long ol ples we oli sud stap go long hem long is saed. Be insaed long yiad long St. Luis, wan swisman we i no tingting gud i bin muvum wan pis blong aean i go aot nomo long tri ins. Pis blong aean ia i wan swis poen, mo ka we i sud kam long Newak, long Niu Jesi, i stap long Niu Olan, long Luisiana, hemia i wan handredteti mael aot long ples we i sud go long hem” (insaed long Conference Report, Okt. 1972, 106–7; o *Ensign*, Jan. 1973, 91).

Taem yu finisim stori, luklukbak long relrod swis poen we i stap long blakbod mo askem ol kwestin ia:

- Olsem wanem wan smol jenis we oli save luksave nomo be i mekem wan impoten problem long ples we tren i sud go long hem? Wanem i sam swis poen we yumi gat insaed long laef blong yumi? (Ol ansa i save tekem tu ol iven, ol disisen, niufala save, o eni samting we i save jenisim daereksen blong laef blong yumi. Ol swis poen oli save nekativ sapos oli lidim yumi goaot long trutok o positiv sapos oli tekem yumi i kambak long stret rod.)

Ol las japta blong fas leta blong Pol i go long ol pipol blong Korin, hem i tokbaot fo swis poen long saed blong doktrin we ol pipol blong Korin oli goaot long trutok from. Eksplenem se taem yumi stap stadi long ol tijing blong Pol long ol japta ia, yumi save mekem ol komitmen blong yumi long saed blong folem stret rod i kam strong mo i save lidim yumi blong gobak long Papa blong yumi long Heven.

Yusum mo Toktok
Raon long Skripja

Taem yu stap tijim ol skripja stori ia, toktok raon long olsem wanem ol skripja ia oli aplae long evri dei laef. Leftemap tingting blong ol memba blong klas blong oli serem ol eksperiens we i go wetem ol prinsipol blong skripja.

1. Ol rilesensip blong ol hasban mo waef long olgeta wanwan mo wetem Lod

Ridim mo toktok raon long Fas Korin 11:1–3, 11–12.

- Wanem i ol tri rilesensip we Pol i tokbaot long Fas Korin 11:3? Long tingting blong yu, from wanem Pol i tokbaot trifala rilesensip ia wanples? Wanem ol

kwaliti we i stap insaed long rilesensip bitwin Jisas Kraes mo Papa blong Hem? (Luk long Jon 5:20; 8:29; 17:21–22.) Olsem wanem yumi save divelopem ol kwaliti ia insaed long rilesensip blong yumi wetem Jisas Kraes? Olsem wanem ol hasban mo waef oli save divelopem ol kwaliti ia insaed long rilesensip blong olgeta?

- Wanem nao mining blong toktok ia we i se “long Kristin laef, woman i no save mekem olgeta samting hem wan, mo man tu i no save mekem olgeta samting hem wan”? (Fas Korin 11:11). From wanem nao rilesensip blong wan hasban mo waef i impoten tumas insaed long kingdom blong God? Wanem nao toktok ia i tijim yumi long hem, blong olsem wanem ol hasban mo waef oli sud tritim olgeta wanwan?

Presiden Marion G. Romney i bin tijim: “[Wan hasban mo waef], tufala i sud stap wan long hamoni, respek, mo fasin blong serem tingting. Tufala i sud planem o folem wan wei we tufala nomo i mekem. Tufala i sud toktok raon wetem tufala, prea, mo jusum tugeta wanem blong mekem. . . . Tingbaot se waef o hasban i no slev blong narawan. Hasban mo waef, tufala i semmak patna (wan i no hae bitim narawan)” (“In the Image of God,” *Ensign*, Maj. 1978, 2, 4).

Sapos yu bin yusum aktiviti blong pulum tingting, toktok raon long olsem wanem ol rilesensip ia i save stap olsem ol positiv o negetiv swis poen insaed long ol laef blong yumi.

2. Stamba tingting blong sakramen

Ridim mo toktok raon long Fas Korin 11:17–29. Eksplenem se plante blong Ol Sent long Korin oli no stap folem stamba tingting blong sakramen seves. Olgeta oli stap raorao bitwin olgeta wanwan mo stap kakae mo stap drink blong stap fulap long hem, be oli no stap lukluk nomo long odinens blong sakramen (Fas Korin 11:18–22).

- Wanem i fas stamba tingting blong sakramen miting? (Luk long Joseph Smith Translation 1 Corinthians 11:20, we i talem se, hem i blong kakae Lod sapa.)
Elda Jeffrey R. Holland i bin tijim: “Wetem fulap we yumi lusum o kasem, yumi sud tekem [sakramen] wetem fasin blong mas kea bitim samtaem we yumi stap tekem. Hem i sud wan paoaful taem, taem blong stap kwaet, mo stap tingbaot wanem we i bin stap hapen. Hem i sud leftemap ol filing mo maen blong yumi long saed blong spirit. Mo oli no mas mekem long wan kwik fasin. Hem i no wan samting blong ‘go tru’ long hem nomo blong mekem se oli folem stret stamba tingting blong wan sakramen miting. Hemia hem *i* stret stamba tingting blong miting” (insaed long Conference Report, Okt. 1995, 89; o *Ensign*, Nov. 1995, 68).
- Folem Pol, wanem oli ol stamba tingting blong sakramen? (Luk long Fas Korin 11:23–26; luk tu long Luk 22:19–20.) Olsem wanem yumi save kipim ol maen mo ol hat blong yumi blong lukluk nomo long Jisas long taem yumi stap kakae sakramen?
- Wanem Pol i tij abaot impoten fasin blong kakae sakramen wetem fasin blong klin inaf? (Luk long Fas Korin 11:27–29.) Wanem mining blong kakae sakramen wetem fasin blong no klin inaf? From wanem blong stap lukluk mo tingting gud long fasin blong yumi blong stap klin gud i wan impoten pat blong sakramen?

- Blong stap kakae sakramen, olem wanem i bin blesem yu? Olem wanem yumi save mekem odinens ia i gat moa mining blong hem insaed long laef blong yumi?

Sapos yu bin yusum aktiviti blong pulum tingting, toktok raon long olem wanem ol fasin blong yumi long taem blong sakramen i save stap olem wan swis poen long laef blong yumi.

3. Impoten fasin blong evri presen blong spirit

Toktok raon long Fas Korin 12–14. Invaetem ol memba blong klas blong ridim ol ves ia we yu bin jusum. Eksplenem se leta blong Pol i talem se Ol Sent long Korin, oli trastem tumas impoten fasin blong ol presen blong toktok long defdefren lanwis (Fas Korin 14:2–14, 27–28). Long ol japta 12–14, Pol i eksplenem se evri presen blong Spirit oli impoten, be Ol Sent oli sud lukaotem ol presen we bae i blong givhan long ol nid long olgeta evriwan.

- Wanem oli ol presen blong spirit? (Ol blesing o ol fasin blong spirit we Tabu Spirit i stap givim. Luk long Fas Korin 12:7–11; D&C 46:11.) From wanem God i stap givim ol presen blong spirit? (Luk long D&C 46:26.)
- Wanem i ol presen blong spirit we yu bin eksperiensem o luk? (Yu save listim daon mo toktok raon long sam long ol presen blong spirit we oli talemaot long Fas Korin 12:8–10, Moronae 10:8–17, mo D&C 46:13–25.) Olem wanem ol presen ia oli bin blesem yu o ol sam narawan?
- Long tingting blong yu, from wanem Pol i komperem ol memba blong Jos long ol defdefren pat blong bodi? (Fas Korin 12:12–25. Blong soem se wanwan memba i impoten long ol nara memba mo tu long ful Jos.) Olem wanem yumi save yusum fasin ia blong komperem bodi wetem ol defdefren presen blong Spirit?
- Ol skripja oli givim kaonsel long yumi blong lukaotem ol presen blong spirit (Fas Korin 12:31; D&C 46:8). Wanem oli ol risen blong yumi blong stap lukaotem ol presen blong spirit? (Fas Korin 14:12; D&C 46:9. Sapos i nid, eksplenem se blong kam antap i blong bildimap, tijim, impruv, mo luksave gud.)
- Wanem presen we Pol i tijim, se moa hae long evri nara presen blong spirit? (Luk long Fas Korin 13. Talemaot mining blong ol wanwan fasin blong jareti we oli tokbaot long ves 4–7, mo toktok raon long olem wanem yumi save aplaem olgeta long laef blong yumi. Yu save listim ol fasin ia long blakbod.) From wanem jareti i moa impoten long eni nara presen blong spirit? (Luk long Fas Korin 13:1–3, 8–13.)
- Olem wanem yu bin kasem blesing tru long wan we i bin soemaot jareti long yu? Olem wanem nao yumi save developem gudfala jareti? (Luk long Moronae 7:44–48.)

Sapos yu bin yusum aktiviti blong pulum tingting, toktok raon long olem wanem jareti i save wok olem wan swis poen insaed long laef blong yumi.

4. Laef bakegen long ded mo ol trifala level blong glori

Ridim mo toktok raon long ol ves ia we yu bin jusum long Fas Korin 15. Eksplenem se plante long ol pipol blong Korin oli bin stap raorao long saed blong tru save blong laef bakegen long ded (Fas Korin 15:12).

- Wanem i ol witnes blong Laef Bakegen long ded we Pol i talemaot? (Luk long Fas Korin 15:5–8.) Long tingting blong yu, from wanem Pol i bin talemaot plante witnes long saed long Laef Bakegen long ded? (Luk long Seken Korin 13:1.) From wanem ol witnes long saed blong Laef Bakegen long ded i impoten long yumi?
- Wanem nao Pol i bin tijim abaot rilesensip blong Foldaon blong Adam mo Laef Bakegen long ded? (Luk long Fas Korin 15:20–23.)
- Olsem wanem Pol i yusum doktrin blong baptaes blong olgeta ded blong tijim abaot Laef Bakegen long ded? (Luk long Fas Korin 15:29. Odinens blong baptaes blong olgeta ded man bae i no save gat wan gudfala mining blong hem witaot Laef Bakegen long ded.)
- Wanem nao Pol i stap tijim long saed blong ol kingdom blong glori? (Luk long Fas Korin 15:35–44. Bae yumi kasem laef bakegen long ded blong go long ol defdefren kingdom blong glori—selestial, terestrial, o telestial. Luk tu long D&C 88:27–32.) Olsem wanem nao save we yufala i gat long saed blong Laef Bakegen Long Ded mo ol kingdom blong glori, i save tanem ol wei we yufala i stap laef folem?

Las Toktok

Testefae long impoten fasin blong stap folem ol doktrin we bae i save lidim yumi blong gobak long Papa blong yumi long Heven. Sapos yu bin yusum aktiviti blong pulum tingting, invaetem ol memba blong klas blong lukluk stret long ol laef blong olgetawan long ol swis poen—ol fasin mo ol aksen we, sapos oli folem, bae i save jenisim fasin blong laef blong olgeta. Leftemap tingting olgeta blong jusum ol daereksen we bae i save givim wan gudfala ansa long laef blong olgeta.

Sam Nara Aedia blong Tij

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. “God i no stamba blong fasin ya we olgeta samting oli paspas” (Fas Korin 4:33)

Mekem ol memba blong klas oli ridim Fas Korin 14:33. Mo afta askem ol kwestin ia:

- Wanem i sam long olgeta topik we i gat plante konfius mo fasin blong raorao long hem long wol? Long tingting blong yu, from wanem i gat plante fasin blong konfius long wol? Olsem wanem God i stap olsem “stamba . . . blong pis”?

2. Aktiviti blong yut

Bifo klas, tingbaot sam situesen long evri dei laef blong ol yut we olgeta oli gat janis blong soem jareti (olsem eksampol, luk wan man o woman we i nidim help long skul, i no glad long wan brata o sista blong hem, o gat wan fren we i filim se hem i stap hemwan o oli no glad long hem). Presentem ol situesen ia long ol yut, mo askem olgeta blong olsem wanem bae oli save yusum ol fasin blong jareti, olsem we Pol i bin tijim long Fas Korin 13, blong mekem situesen i kam gud moa.

“Plis, Yufala i Letem God i Kam Fren Blong Yufala”

Lesen
35

Seken Korin

Stamba Tingting Blong leftemap tingting blong ol memba blong klas blong stap olsem ol tru disaepol blong Jisas Kraes, taem yumi stap aplaem kaonsel blong Pol long Seken Korin.

- Rere long Lesen**
1. Ridim, tingting hevi, mo prea abaot ol skripja ia:
 - a. Seken Korin 1:3–11; 4; 6:1–10; 11:21–33; 12:1–10. Pol i tijim abaot fasin blong stap winim ol hadtaem.
 - b. Seken Korin 2:5–11. Pol i wonem Ol Sent blong fogivim olgeta wanwan.
 - c. Seken Korin 7:8–10. Pol i tijim abaot fasin blong harem nogud be yumi lukluk long God from ol sin.
 - d. Seken Korin 5:17–21. Pol i askem strong long Ol Sent blong oli mas letem God i tanem hat blong olgeta, mo bae oli nomo enemi blong Hem, be oli kam fren blong Hem.
 2. Sapos *New Testament Video Presentations* (53914) i stap, soem “Godly Sorrow,” wan leven-minit pat, long taem blong lesen.
 3. Sapos yu yusum aktiviti blong pulum tingting, tekem i kam long klas wan smol bag blong sanbij.
 4. Wan tingting blong tij: Livim taem long en blong klas blong tokbaot smol bakegen wanem we yu bin tijim. Wan sot toktok we bae yu planem gud we i save helpem ol memba blong klas blong oganaesem olgeta mo mekem olgeta oli kam klia long wanem oli bin lanem, mo givhan long olgeta blong luksave olsem wanem blong yusum long laef blong ol. (Luk long *Teaching—No Greater Call*, pej 81, blong sam wei blong fasin blong givim ol sot toktok.)
-

Wan Tingting blong Lesen

Aktiviti blong Pulum Tingting

Olsem we i stret, yusum aktiviti ia o wan aktiviti blong yuwan blong statem lesen.

Soem long ol memba blong klas, sanbij we yu bin tekem i kam long klas.

- Sapos wan man we yu trastem i givim sanbij long yu wetem wan promes se i gat gol i stap insaed, wanem nao bae yu mekem?

Letem ol memba blong klas blong ansarem kwestin. Mo afta ridim toktok ia we i kam long Elda Henry B. Eyring abaot fasin blong stap kasem kaonsel long ol profet:

“Yu no mas tekem olsem wan samting nating, be protektem olsem wan samting we i gud mo i impoten tumas. Sapos wan man we yu trastem i bin givim long yu, wan samting we bae yu lukluk olsem wan samting nating bitim sanbij we i gat promes se, i gat gol insaed long hem, maet bae yu save holemtaet sanbij ia long han wetem waes tingting, mo stap seksekem long wei we i sloslo nomo. Evri taem mi stap mekem samting ia wetem kaonsel blong ol profet, afta long taem we ol smolsmol pis blong gol i stat blong kamaot mo mi mi glad tumas” (insaed long *Conference Report*, Epr. 1997, 35; o *Ensign*, Mei 1997, 26).

- Wanem i mining blong toktok blong Elda Eyring?

Eksplenem se, Seken buk blong Korin i gat insaed ol kaonsel blong profet we oli aplae long dei blong yumi tedei. Tijing blong Pol long leta ia i semmak long ol tijing we yumi stap harem oltaem insaed long jenerol konfrens. Elda Eyring i bin lukluk gud, “Taem oli stap gohed blong ripitim ol toktok blong ol profet, hemia i blong givim save long yumi blong yumi lukluk [long olgeta] wetem strong tingting” (insaed long Conference Report, Epr. 1997, 32; o *Ensign*, Mei 1997, 25). Leftemap tingting blong ol memba blong klas blong risivim kaonsel insaed long lesen ia mo “protektem olsem wan samting we i gud mo i impoten tumas.”

Yusum mo Toktok
Raon long Skripja

Lesen ia oli seperetem long fo seksen we i lukluk long ol impoten topik insaed long Seken Korin. Wetem prea, selektem wijwan long ol topik we yu save toktok raon long ol wetem ol memba blong klas.

1. Stap winim ol hadtaem

Ridim mo toktok raon long Seken Korin 1:3–11; 4; 6:1–10; 11:21–33; 12:1–10. Invaetem ol memba blong klas blong ridim ol ves ia we yu bin jusum .

- Leta blong Pol i go long ol man Korin, oli bin raetem afta long wan bigfala hadtaem taem Pol mo Timoti “tufala i no moa tingbaot se bambae tufala i laef” (Seken Korin 1:8). From wanem Pol mo Timoti oli bin save stap stap longwe long fasin blong lusum hop, nating oli bin wari, tingting blong olgeta i fas, oli bin mekem nogud long olgeta, mo oli bin sakemaot olgeta? (Luk long Seken Korin 1:3–5; 4:5–15.) Olsem wanem Papa long Heven mo Jisas Kraes, Tufala i helpem yumi long taem blong hadtaem?

Elda Neal A. Maxwell i talem stret long yumi se Jisas Kraes bae i helpem yumi long taem blong ol hadtaem blong yumi:

“Taem yumi tekem yok blong Jisas long solda blong yumi, hemia i tekem yumi i go stret long wanem we Pol i singoatem ‘joen long [Kraes] blong kasem haf blong ol samting we oli mekem Hem i harem nogud long bodi blong Hem’ (Filipae 3: 10). Nomata long ol siknes o fasin blong stap yuwan, fasin blong mekem samting i no semmak o fasin blong oli no laekem yu, . . . blong stap komperem wetem ol harem nogud blong yumi, hem i ol smol harem nogud, sapos yumi no stap flas, bae yumi harem glad tumas insaed long sol blong yumi. Mo afta bae yumi glad gud, i no long ol harem nogud nomo blong Jisas from yumi, be tu long stret fasin blong Hem, bae i save helpem yumi blong gat fasin blong save honarem Hem mo iven gat fasin blong tingting blong kam olsem Hem.

“Alma i bin talemaot se Jisas i save olsem wanem blong helpem yumi long stret taem blong ol wari mo siknes blong yumi, from se Jisas i bin tekem finis antap long Hemwan, ol wari mo ol siknes blong yumi (luk long Alma 7:11–12). Hem i bin save olgeta finis; hemia nao Hem givim lav mo sore blong Hem. Yes, yumi no save kam blong save gud o yumi no save andastanem olsem wanem Hem i bin ded from ol sin blong wol, be Atonmen blong Hem i stil stap tedei blong stap sevem man mo stap leftemap ol tingting” (insaed long Conference Report, Epr. 1997, 13; o *Ensign*, Mei 1997, 12).

- Olsem wanem Papa long Heven mo Jisas Kraes i givhan long yumi long taem blong hadtaem?

- Pol i bin ekspressem wan strong tingting blong helpem ol naraman blong kasem semmak harem gud we hem i bin kasem long God (Seken Korin 1:4). Olsem wanem nao yumi save helpem ol naraman blong kasem wan harem gud we i kam long God?
- Pol i bin talem tangkyu long Ol Sent we oli bin prea blong hem mo Timoti long taem blong hadtaem blong tufala (Seken Korin 1:11). From wanem hem i impoten blong yumi prea blong yumi wanwan? Olsem wanem ol prea blong ol naraman i bin blesem yu o wan naraman we yu save? Olsem wanem nao yumi kasem blesing taem yumi stap prea blong ol naraman?
- Olsem wanem nao ol tijing long Seken Korin 4:17–18 i helpem yumi long taem blong ol hadtaem? (Luk tu long D&C 121:7–8.) From wanem hem i moa gud taem yumi luk ol tes blong yumi long wan longfala lukluk we i no save finis? Olsem wanem yumi save lanem blong luk long ol tes blong yumi long wan longfala lukluk we i no save finis?
- Pol i bin talem ol tes we hem mo plante long Olgeta Sent oli bin winim long ol pipol blong Korin, from bilif blong olgeta long Jisas Kraes (Seken Korin 6:4–5; 11:23–33). Wanem nao ol fasin we Pol i tijim we yumi sud developem blong save helpem yumi blong winim ol tes? (Luk long Seken Korin 6:4, 6–7.) Olsem wanem wan o moa long ol fasin ia i bin helpem yu long taem blong wan tes?
- Pol i bin talem se Lod i bin givim long hem wan siknes—“olsem wan nil blong aranis, we i stap stikim hem” (Seken Korin 12:7). From wanem Lod i givim siknes long Pol? (Luk long Seken Korin 12:7.) Wanem nao Pol i lanem taem Lod i no tekemaot “samting olsem nil blong aranis, we i stap stikim hem” olsem we hem i bin askem? (Luk long Seken Korin 12:8–10.) Olsem wanem ol samting we yumi wik long hem i helpem yumi blong kam strong long Jisas Kraes? (Luk long Ita 12:27.) Olsem wanem nao yu bin luk trutok blong toktok blong Pol we i se “taem mi wik, i mekem mi mi strong”?

2. Fogivim ol naraman

Ridim mo toktok raon long Seken Korin 2:5–11.

- Pol i bin wonem Ol Sent blong fogivim olgeta wanwan (Seken Korin 2:5–8). From wanem nao hem i impoten blong yumi fogivim ol naraman? (Luk long Matiu 6:14–15; Seken Korin 2:7–8; D&C 64:9–10. Toktok raon long olsem wanem i save afektem yumi—mo ol naraman—taem yumi stap fogivim mo taem yumi no wantem fogivim ol man.)

Presiden Gordon B. Hinckley i talem:

“Yumi stap luk nid blong [fogivnes] insaed long ol hom blong ol pipol, weaples we ol smolsmol tingting we oli no andastanem gud oli stap stat mo oli kam olsem ol bigfala raorao. Yumi stap luk long medel blong ol man we oli stap raonabaot long yumi, weaples we ol defdefren samting we oli no impoten, oli stap krietem ol raorao we i no save finis. Yumi stap luk long ol bisnis we oli stap wok tugeta, oli stap raorao mo oli no wantem blong strettem fasin ia mo fogivim taem, plante taem yumi, sapos i gat wan gladhat blong save sidaon tugeta mo toktok kwiktaem long olgeta wanwan, problem ia bae oli save strettem blong kam olsem wan blesing blong evriwan. Bitim, blong spenem ol dei blong olgeta blong lukaotem ol rao mo stap planem blong mekem wan rabis fasin. . . .

“Sapos gat eniwan we oli stap kipim insaed long hat blong hem ol rabis filing ia blong stap mekem nogud long ol naraman, mi askem strong long yu blong askem Lod blong i fogivim gud yu. Toktok ia we i kam wetem strong tingting bae i kam olsem wan impotem toktok blong fasin blong sakem sin blong yu. Bae hem i no isi, mo bae i no save kam kwiktaem. Be sapos yu lukaotem wetem tru tingting mo divelopem, bae hem i kam. . . .

“ . . . Hem i no gat pis we i luklukbak long soa blong ol soa bodi blong bifo. Hem i gat pis nomo long fasin blong sakem sin mo fogivnes. Hem i gat swit pis blong Kraes, we i bin talem se, ‘olgeta we oli man blong mekem pis oli save harem gud, from we God bae i talem se,’ Yufala i pikinini blong mi.’ (Matt. 5:9.)” (“Of You It Is Required to Forgive,” *Ensign*, Jun 1991, 2, 5).

- Wanem nao yumi save mekem blong yumi save gat moa fasin blong fogiv?

3. Filim nogud be yumi lukluk long God from ol sin blong yumi

Ridim mo toktok raon long Seken Korin 7:8–10.

- Afta we hem i harem se wan long ol leta blong hem i bin “mekem [ol pipol blong Korin] oli sore,” Pol i bin glad (Seken Korin 7:8–9). From wanem Pol i ansarem sore blong ol pipol blong Korin long wei ia? (Luk long Seken Korin 7:9–10.) Wanem i mining blong yumi harem nogud be yumi lukluk long God from ol sin blong yumi?

Sapos yu stap yusum vidio presentesen ia “Godly Sorrow,” soem naoia.

- Wanem i defren bitwin harem nogud be yu lukluk long God mo “sore blong wol”? From wanem nao harem nogud be yu lukluk long God i wan impoten step blong fasin blong sakem sin?

Presiden Spencer W. Kimball i bin eksplenem: “Sapos wan man o woman i sore from se wan man i bin faenemaot ol sin blong hem, fasin blong sakem sin blong hem i no kompli. Harem nogud be yu lukluk long God i mekem wan man o woman i wantem blong sakem sin, iven sapos ol naraman oli no bin faenemaot hem, mo i mekem hem i gat strong tingting blong mekem gud samting nomata long wanem we i bin hapen. Kaen sore olsem ia i save tekem i kam fasin blong stap stret mo gud, mo bae i givhan long yu blong wok blong kasem fogivnes” (*Repentance Brings Forgiveness* [pamphlet, 1984], 8).

4. Letem God i kam fren blong yu

Ridim mo toktok raon long Seken Korin 5:17–21.

- Pol mo Timoti i bin givim kaonsel long ol pipol blong Korin blong letem God i kam fren blong olgeta (Seken Korin 5:20). Wanem mining blong letem God i kam fren blong yu?

Elda Bruce R. McConkie i bin tijim: “Fasin blong mekem pis bakegen i wan step blong stap rilisim man long stet blong sin mo long saed blong tudak blong spirit mo blong putumbak hem long stet blong hamoni mo yuniti wetem Hae God. . . . Man, we i stap olsem man blong wol mo i rabis, we i laef folem ol wei blong wol, hem i kam olsem wan niufala pikinini blong Tabu Spirit; hem i bon bakegen; mo, iven i kam olsem wan smol pikinini, hem i kam laef bakegen long Kraes” (*Doctrinal New Testament Commentary*, long ol buk 3. [1965–73], 2:422–23).

- Olsem wanem blong yumi save kam blong letem God i fren blong yumi? (Luk long Seken Korin 5:17–19, 21; 2 Nifae 25:23; Jakob 4:10–11.)

Las Toktok

Testefae long saed blong ol trutok we yu bin toktok raon long olgeta. Leftemap tingting blong ol memba blong klas blong tingbaot mo folem kaonsel blong Pol insaed long Seken Korin.

**Sam Nara Aedia
blong Tij**

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Man blong aotsaed mo man blong insaed (luk long Seken Korin 4:16)

- Pol i bin tokbaot man blong aotsaed mo man blong insaed (luk long Seken Korin 4:16). Wanem mining blong tufala toktok ia? Olsem wanem maet man blong insaed [oli mas] stap riniuim evri dei"? (Seken Korin 4:16).

2. Ol ambasada blong Kraes (luk long Seken Korin 5:20)

- Pol i bin talem se hem mo Timoti, tufala i “ol ambasada blong Kraes” (Seken Korin 5:20). Wanem i wan ambasada? (Wan ambasada i wan ofisol representativ we i stap toktok long bihaf blong lidasip blong wan kaontri o oganaesesen. Wan ambasada i stap wok blong stanemap ol gud rilesensip bitwin ol pipol we hem i ripresentem olgeta mo ol narafala pipol.) Olsem wanem Pol mo Timoti, tufala i olsem ol ambasada blong Jisas Kraes? Olsem wanem yumi wanwan i save kam olsem wan ambasada blong Jisas Kraes?

“God i Lavem Yufala, mo Hem i Singaot Yufala Finis blong Yufala i Kam Man blong Hem”

Rom

Stamba Tingting

Blong mekem ol memba blong klas oli tingbaot se olgeta oli ol pikinini blong God mo blong leftemap tingting blong olgeta blong laef folem wan laef we i klin inaf blong oli save kasem bak ol samting we oli bin kasem long laef bifo, we ol samting ia oli kam long God.

Rere long Lesen

1. Ridim, tingting hevi, mo prea abaot ol skripja ia:
 - a. Rom 2–5. Pol i tijim se ol pipol oli kam stret tru fet long Jisas Kraes, we i soemaot tru long ol wok we oli stret.
 - b. Rom 6; 8. Pol i tijim se ol pikinini blong God oli save bon bakegen mo kasem ol gudgudfala samting olsem Kraes i gat.
 - c. Rom 12–13; 15:1–7. Pol i givim kaonsel long ol pipol blong Rom blong laef olsem Ol Sent.
2. Sam moa riding: Bible Dictionary, “Grace,” 697; “Pauline Epistles: Romans,” 745.
3. Yu save mekem blong invaetem wan man o woman we i stap singsing o wan smol grup blong singsing o plei long “Mi pikinini blong God” (*Hym*, namba. 58, o *Children’s Songbook*, 2–3) o “I Feel My Savior’s Love” (*Children’s Songbook*, 74–75). Sapos yu no save mekem olsem, yu save mekemrere blong singsing long “Mi Pikinini blong God”.
4. Wan tingting blong tij: Long leta blong Pol i go long ol pipol blong Rom, hem i bin helpem ol tija blong oli tingbaot impoten fasin blong laef folem ol prinsipol we oli stap tijim (Rom 2:21–22). Eksampol blong yu i save tijim ol memba blong klas moa bitim ol toktok blong yu. Soem long ol memba blong klas se testemoni blong yu long ol gospel prinsipol i stap kam antap taem yu stap laef folem olgeta prinsipol ia evri dei (Jon 7:17). (Luk long *Teaching—No Greater Call*, 9, 88–89.)

Wan Tingting blong Lesen

Aktiviti blong Pulum Tingting

Olsem we i stret, yusum aktiviti ia o wan aktiviti blong yuwan blong statem lesen. Mekem wan memba blong klas i ridim Rom 3:10. Eksplenem se insaed long ves ia, Pol i no talem se i no gat wan man we hem i neva mekem ol stret fasin, hem i stap traem blong talem se, i no gat wan man long wol we i stret we i stret gud. Kraes Hemwan nomo we i bin laef stret mo i no gat sin long laef blong Hem. Yumi evriwan i komitim sam sin (luk tu long Rom 3:23).

- Taem yumi mekem sin, wanem yumi mas mekem blong kam klin bakegen? (Mekem fet blong yumi long Kraes i wok mo sakem ol sin blong yumi, blong mekem se yumi save kasem paoa blong kam klin tru long Atonmen blong Hem.)

Eksplenem se taem we yumi komitim sin, yumi no save kam klin fulwan bakegen long wei blong yumiwan. Lesen ia bae i toktok raon long olsem wanem yumi save kam klin tru long Atonmen blong Jisas Kraes, wan wei we Pol i singaotem fasin blong kam stret.

Yusum mo Toktok
Raon long Skripja

Wetem prea selektem ol skripja pasej mo ol kwestin we bae oli save givhan gud long ol nid blong ol memba blong klas. Leftemap tingting blong ol memba blong klas blong serem ol testimoni blong olgeta long saed blong ol doktrin mo ol prinsipol we oli bin toktok raon long olgeta long lesen ia.

1. Yumi kam stret tru fet long Jisas Kraes.

Ridim mo toktok raon long Rom 2–5. Invaetem ol memba blong klas blong ridim laod ol ves ia we yu bin jusum. Eksplenem se Pol i bin stap raet long ol memba blong Jos long plante defren eria we oli stap gobak blong stap praktisim loa blong Moses, mo oli stap bilivim se blong kasem fasin blong sevem man, oli mas holemtaet loa ia. Nomata Ol Sent long Rom oli stap strong long gospel (Rom 1:8), Pol i bin raetem leta ia, blong talem stret se fasin blong kam stret mo fasin blong sevem man i kam nomo tru fet long Kraes, be i no long ol wok blong loa blong Moses.

- Long leta blong hem, Pol i bin traem blong helpem Ol Sent blong Rom blong andastanem doktrin blong fasin blong kam stret. Wanem nao mining blong kam stret? (Blong kam fren blong God, talem sore long harem nogud blong sin, mo talemaot se yu wantem kam stret mo stap klin inaf.)
- From wanem i nid blong yumi mas stap klin? (Luk long Rom 3:10–12, 23; luk tu long Alma 7:21. Yumi evriwan i stap mekem God i harem nogud mo kam toti tru long sin. Olsem i stap finis, i no gat wan samting we i toti i save stap wetem God, yumi mas kam stret, blong save mekem se yumi save gobak blong stap wetem Hem.)
- Wanem nao Pol i tijim abaot olsem wanem blong yumi stap klin? (Luk long Rom 3:24, 28; 5:1–2; luk tu long 2 Nifae 2:6. Yumi kam stret tru long gladhat blong Jisas Kraes mo fet blong yumi long Hem.) Wanem i gladhat? (Wan help o paoa we i blong antap; luk long Bible Dictionary, “Grace,” 697.) Olsem wanem help ia we i kam antap i givhan long yumi evriwan? (Luk long Rom 5:8–11; 2 Nifae 2:7–8. Gladhat blong Jisas Kraes i givhan long yumi evriwan tru long Atonmen blong Hem.) From wanem hem i impoten long yumi, blong yumi gat fet blong save kasem gladhat blong Sevyia?
- Pol i bin eksplenem se fasin blong kam stret i kam tru long gladhat blong Jisas Kraes, be i no long “ol fasin blong loa” (Rom 3:20, 24, 28). From wanem yumi no save kasem fasin blong kam stret mo ful fasin blong sevem man tru long ol wok blong yumi? (Luk long Mosaea 2:20–21; Alma 22:14.)
- Plante pipol oli bin tanem ol toktok blong Pol blong givim save se, yumi save kam stret nomo tru fet sapos i nogat ol gud wok. Wanem i rilisensip bitwin ol aksen (o ol wok) blong yumi mo fasin blong kam stret tru long gladhat blong Kraes? (Luk long Rom 3:31; Jemes 2:14–18, 24; 2 Nifae 25:23; D&C 88:38–39.)

Prophet Josef Smit i bin talem: “Blong kam stret long ae blong God, yumi mas lavem wanwan long yumi: yumi mas winim setan; yumi mas visitim ol papa we

oli stap olgetawan nomo mo ol mama we oli no gat man mo we oli stap harem nogud, mo yumi mas kipim yumiwan i klin aot long ol samting blong wol: ol kaen klin fasin olsem oli kamaot long gudfala stat blong wan klin rilijin, i givim paoa long fet blong yumi taem yumi stap ademap evri gudfala kwaliti we oli gud tumas blong ol pikinini blong Jisas we oli gat blesing. Yumi save prea long ol taem blong prea; yumi save lavem ol man we oli stap raonabaot long yumi olsem we yumi lavem yumiwan bakegen, mo stap fetful long ol hadtaem, mo yumi save se ansa blong kaen samting olsem i bigwan tumas long kingdom blong heven. Hamas bae yu harem gud! Hamas bae yu glad!" (*Teachings of the Prophet Joseph Smith*, sel. Joseph Fielding Smith [1976], 76).

2. Yumi save bon bakegen mo kasem ol gudgudfala samting olsem Kraes i gat.

Ridim mo toktok raon long ol ves ia we yu bin jusum long Rom 6 mo 8.

- Pol i bin komperem baptaes olsem ded, taem oli putum man long grev, mo laef bakegen long ded. Olsem wanem nao baptaes i ripresentem ded, taem oli putum man long grev, mo laef bakegen long ded (niufala laef)? (Luk long Rom 6:3–4; D&C 76:50–52.) Olsem wanem nao baptaes i wan niufala laef long yu?

Eksplenem se baptaes andanit long wota i wan saen blong bon bakegen blong yumi long saed blong spirit. Taem yumi go andanit long wota, hem i wan saen se yumi stap berem olfala laef blong yumi long wan grev. Taem yumi kamaot long wota, yumi mekem saen se yumi kam klin. Yumi kam olsem wan niufala man we i bin promes blong folem Kraes.

- Olsem wanem yumi save holemtaet fasin blong stap klin mo “fasin blong kam niu” long laef (Rom 6:4) we yu bin eksperiensem long taem blong baptaes? (Ol ansa i save tekem tu, blong stap riniu ol kavenan blong baptaes blong yumi taem yumi kakae sakramen long evri wik, blong stap sakem sin mo askem fogivnes long Lod, mo taem yumi statem wanwan dei evritaem wetem wan strongfala tingting blong sevem God.)
- Wanem mining blong “gat maen blong wol”? (Luk long Rom 8:5–6.) Wanem i ol risal blong gat maen blong wol (Luk long Rom 8:6–8, 13.) Olsem wanem yumi save tekemaot ol tingting blong wol long maen mo hat blong yumi? Olsem wanem yu bin kasem blesing taem yu bin jusum blong gat maen blong spirit?
- Pol i bin testifae “se yumi pikinini blong God” (Rom 8:16). Olsem wanem save ia se yu pikinini blong God i bin afektem yu? Wanem nao tingting ia i kam olsem wan impoten tingting long yu abaot wanem we yu save mekem mo blong kam olsem?

Elda Dallin H. Oaks i bin talem: “Ting hevi long paoa blong aedia we oli tijim long singsing ia we yumi lavem tumas ‘Mi pikinini blong God’ (*Hym*, 58) . . . long ples ia i gat ansa blong wan long ol bigfala kwestin blong laef, ‘Huia mi?’ Mi wan pikinini blong God wetem wan spirit famle laen blong papa mo mama blong heven. Famle laen ia i mekem i klia raet blong yumi we i no save finis. Paoaful aedia ia i wan strong meresin we i save mekem yumi harem gud. Hem i save mekem wanwan blong yumi i kam strong blong mekem ol raet joes mo blong lukaotem hamas we yumi save mekem blong yumi. Putum insaed long maen blong wan yang man o woman, paoaful aedia ia se hem i wan pikinini blong God, mo yu stap givim long yang man o woman ia fasin blong respektem

yuwan mo olsem wanem blong gat save blong go agensem ol problem blong laef” (insaed long Conference Report, Okt. 1995, 31; o *Ensign*, Nov. 1995, 25).

Sapos yu bin arenjem blong oli singsing “Mi Pikinini blong God” o plei long hem olsem wan spesel miusikol namba, mekem man o woman ia we i stap singsing blong singsing o gat wan smol grup blong presentem naoia. O singsing long hem wetem ol memba blong klas (luk long seken “Rere long Lesen”).

- Wanem gudfala promes nao Pol i talem se ol pikinini blong God bae oli kasem? (Luk long Rom 8:17.) Wanem mining blong kasem ol gudgudfala samting olsem Kraes i gat? (Luk long D&C 76:50, 54–70.) Wanem yumi mas mekem blong kasem ol gudfala samting we oli stap blong yumi? (Luk long D&C 76:51–53.)
- Olsem wanem nao blong save se yumi ol pikinini blong God mo strong tingting blong yumi blong kasem ol gudgudfala samting olsem Kraes i gat, i helpem yumi blong winim ol tes blong wol ia? (Luk long Rom 8:18, 28, 31; luk tu long Rom 5:3–5.) Olsem wanem nao yufala i save luk “se God i stap wok long olgeta samting we i stap kam tru long laef blong yumi, blong mekem i gud long yumi ya we yumi lavem Hem”? (Rom 8:28).
- Wanem nao Pol i tijim insaed long Rom 8:35–39 abaot lav blong Jisas Kraes? Olsem wanem yu bin filim lav blong Sevya insaed long laef blong yu? Wanem nao jenis we lav blong Hem i bin mekem insaed long laef blong yu?

Sapos yu bin arenjem blong singsing “I Feel My Savior’s Love” o plei long hem olsem wan spesel miusikol namba, mekem man o woman ia we i stap singsing blong singsing o gat wan smol grup i presentem naoia. O singsing long hem wetem ol memba blong klas (luk long seken “Rere long Lesen”).

3. Yumi sud laef olsem se yumi kam Ol Sent

Ridim mo toktok raon long ol ves ia we yu bin jusum long Rom 12–13; 15:1–7.

- Pol i bin wonem Ol Sent blong Rom blong oli letem olgetawan olsem “wan sakrifaes we i laef mo i tabu, mo we God i glad blong tekem” (Rom 12:1). Olsem wanem yumi save presentem laef blong yumiwan olsem wan sakrifaes we i laef long God? (Luk long 3 Nifae 9:20; D&C 59:8.)

Elda Bruce R. McConkie i bin eksplenem, “Blong presentem [yuwan] olsem wan sakrifaes we i laef, hem i blong kam fored wetem wan hat we i fulap wetem sore mo spirit we i wantem blong sakem sin tru long fasin blong stap obei” (*Doctrinal New Testament Commentary*, long ol buk 3. [1966–73], 2:292).

- Pol i bin givim kaonsel long ol pipol blong Rom blong “oli no mas letem fasin blong olgeta i kam olsem fasin blong man long wol” (Rom 12:2). Wanem nao i sam wei we yumi stap traem blong stap folem long wol tedei? Olsem wanem yumi save winim fasin ia? (Luk long Rom 12:2.)
- Rom 12 mo 13 i listim daon plante fasin blong Ol tru Sent. Mekem ol memba blong klas oli luksave ol fasin ia, mo afta raetem olgeta long blakbod. (Yu save seperem klas long ol smol grup mo talem long wanwan grup blong wok long pat blong wan japta.) Mo afta, toktok raon long ol kwestin ia abaot sam long olgeta fasin ia: From wanem ol fasin ia oli impoten blong developem? Wanem nao yumi save mekem long wik ia blong developem moa ol fasin ia?

- Olsem wanem Pol i tijim yumi blong tritim ol enemi blong yumi? (Luk long Rom 12:19–21.) Wanem ol blesing we oli save kam long laef blong yumi sapos yumi stap tritim ol enemi blong yumi long wei ia? Wanem ol eksampol we yu bin luk long wan man we i stap yusum fasin blong stap kaen blong winim rabis tingting o nogud fasin?
- Wanem komanmen Pol i talem we i go wetem ol narafala komanmen? (Luk long Rom 13:8–9.) Olsem wanem komanmen ia i tekem tu ol narafalawan? (Luk long Rom 13:10.)
- Wanem Pol i tijim abaot hao nao ol memba we fet blong olgeta i strong oli sud ansa long ol memba we fet blong olgeta i slak? (Luk long Rom 15:1–7.) Olsem wanem wan man we fet blong hem i strong i save helpem wan man we i slak?

Las Toktok

Talemaot gud se hem i tru long fet long Jisas Kraes mo fasin blong laef stret mo gud, yumi save kam stret—hem i talemaot fasin blong stap stret mo gud mo kam olsem fren blong God. Testifae se yumi ol pikinini blong God mo yumi gat raet blong save kasem ol gudgudfala samting olsem Kraes i gat sapos yumi gat fet long Hem mo laef olsem we Hem i bin komandem yumi.

Sam Nara Aedia blong Tij

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. “Mi mi no sem nating long gud nius ya” (Rom 1:16)

Mekem wan memba blong klas i ridim Rom 1:16.

- Olsem wanem yumi save soem se yumi no sem nating long gospel blong Jisas Kraes? (Luk long Fas Pita 3:15 blong wan tingting. Listim ol ansa blong ol memba blong klas long blakbod, mo leftemap tingting blong wanwan memba blong klas blong mekem wan long olgeta samting ia long eni taem long wik we i stap kam.)

2. Aktiviti blong yut

Givim long wanwan memba blong klas wan pis blong pepa mo wan pen o pensel. Mekem ol memba blong klas oli raetem long ol pepa blong olgeta, kwestin ia we i stap long Rom 8:31:

Sapos God i stap wetem yumi, huia nao i save agensem yumi? (Yu save yusum toktok long Joseph Smith Translation, we i givim las pat blong sentens ia we i se, huia i save kam agensem yumi?)

Toktok raon long olsem wanem toktok ia i save givim paoa long ol memba blong klas long evri dei laef blong olgeta. Leftemap tingting blong ol memba blong klas blong putum wan kad long ples we olgeta oli save stap lukluk long hem oltaem.

Jisas Kraes: “Hem Nomo i Stamba Blong Bilif blong Yumi, Long Stat Gogo i Kasem En blong Hem”

Lesen
37

Hibrus

Stamba Tingting Blong mekem ol memba blong klas oli tingbaot se fasin blong sevem man i kam tru long fet long Jisas Kraes mo taem yumi obei long ol komanmen blong Hem.

- Rere long Lesen**
1. Ridim, tingting hevi, mo prea abaot ol skripja ia:
 - a. Hibrus 1–4. Pol i testifae se Jisas Kraes, Wan Pikinini Nomo blong Papa long Heven, Hem i Sevy a blong yumi.
 - b. Hibrus 5; 6:20; 7. Pol i eksplenem se Melkesedek Prishud i wan pat blong fulnes blong gospel.
 - c. Hibrus 8:1–10:18. Pol i tijim se loa blong Moses hem i olfala kavenan bitwin God mo ol pikinini blong Hem, be gospel blong Jisas Kraes hem i niufala kavenan. Olfala kavenan i wan saen, o fasin, blong niufala kavenan, be niufala kavenan nomo i gat paoa blong save sevem man.
 - d. Hibrus 10:19–11:40. Pol i talem strong long Ol Sent blong mekem fet blong olgeta long Jisas Kraes i wok, blong mekem se oli save gat wan ples insaed long Kingdom blong God.
 2. Sam moa riding: Hibrus 6; 12–13; Bible Dictionary, “Pauline Epistles: Epistle to the Hibrus,” 746–47.
 3. Wan tingting blong tij: Yu lukaot gud blong yu no mas kam olsem wan tija (blong yunivesiti). Samtaem bae yu nid blong yu tokbaot smol tingting nomo blong presentem infomesen, be blong stap tokbaot evri samting, i save lusum stret tingting blong wanem we yu wantem tokbaot taem yu stap yusum sem fasin blong stap tij. Afta we yumi givim infomesen o eksplenem wan prinsipol, yu mas mekem súa blong givim janis long ol memba blong klas blong ansa mo serem ol tingting. (Luk long *Teaching—No Greater Call*, 126.)
-

Wan Tingting blong Lesen

Aktiviti blong Pulum Tingting

Olsem we i stret, yusum aktiviti ia o wan aktiviti blong yuwan blong statem lesen. Tokbaot ol sitiuesen ia, mo askem ol memba blong klas blong faenem wan skripja we bae oli save yusum long wan long ol sitiuesen ia. (Sam skripja oli givim i stap long ol parentes.)

1. Wan pikinini we yu save, we i jes lanem nomo long praemeri se Jisas Kraes i bin krietem wol mo hem i wantem blong save weaples insaed long skripja, oli eksplenem samting ia long hem. (Hibrus 1:2; Jon 1:1–3, 10; Efesas 3:9; Mosaea 3:8)

2. Wan fren we i gat sam problem blong hemwan mo hem i stap wantem blong save olsem wanem Sevy a bae i save lukaotem gud hemwan o andastanem wanem hem i stap go tru long hem. (Hibrus 2:6–8, 18; 2 Nifae 1:15; Alma 7:11–12)
3. Wan fren we i no memba we i stap wantem blong save, sapos hem i impoten tru blong wan man i mas gat prishud blong mekem ol baptaes mo ol nara odinens. (Hibrus 5:1, 4; Eksodas 28:41; Jon 15:16)

Invaetem wan o tu memba blong klas blong ridim ol skripja we oli jusum blong wanwan sitiuesen. Poenemaot se leta blong Pol i go long ol pipol blong Hibrus i gat insaed ol skripja we i stret long wanwan long ol trifala sitiuesen ia. Invaetem ol memba blong klas blong lisin long ol skripja ia taem yu stap toktok raon long buk blong Hibrus.

Yusum mo Toktok
Raon long Skripja

Taem yu stap tijim ol skripja ia, tokbaot olsem wanem blong yusum long evri dei laef. Leftemap tingting blong ol memba blong klas blong oli serem ol eksperiens we i go wetem ol prinsipol blong skripja.

Eksplenem se truaot long ol misinari wokbaot blong hem, Pol i bin lukaotem blong tanem tingting blong ol memba blong Jos blong oli nomo praktisim loa blong Moses. Taem Ol Kristin man Jiu oli bin tijim se fasin blong sevem man i kamtru tru long fet long Jisas Kraes, plante long olgeta oli stil bilivim se, blong stap obei long loa blong Moses, hem i impoten tumas long fasin blong sevem man blong olgeta. Pol i bin raetem leta i go long ol pipol blong Hibrus blong talemaot bakegen se Kraes i bin fulfilim loa blong Moses.

1. Jisas Kraes, Wan Pikinini Nomo blong Papa long Heven, Hem i Sevy a blong yumi.

Toktok raon long Hibrus 1–4. Invaetem ol memba blong klas blong ridim ol ves ia we yu bin jusum.

- Wanem nao yumi bin lanem abaot Jisas Kraes long Hibrus 1? (Listim ol ansa blong ol memba blong klas long blakbod. Ol ansa i save tekem tu olgeta we oli listim i stap daon.)
 - a. Hem i bin krietem wol (ves 2, 10).
 - b. Hem i gat imej blong God Papa (ves 3).
 - c. Hem i bin pemaot ol sin blong yumi (ves 3).
 - d. Hem i Fasbon Pikinini blong God Papa (ves 5–6).
 - e. Glori mo paoa blong Hem, hem i no save finis mo i no save jenis (ves 8, 12).
- Pol i bin talem se Pikinini blong God, God i leftemap Hem, Hem i moa hae long ol enjel (luk long Hibrus 1:4), mo tu oli bin “mekem Hem i daon smol long ol enjel blong smoltaem” (Hibrus 2:9). Long wanem wei nao, oli “mekem Jisas i daon smol long ol enjel blong smoltaem”? (Luk long Mosaea 13:34–35. Hem i bin kam long wol olsem wan we i save ded mo i blong harem soa mo ded.) From wanem hemia hem i impoten? (Luk long Hibrus 2:9–10, 16–18; 4:15–16; luk tu long Matiu 23:10–11.)

- Pol i bin leftemap tingting blong Ol Sent blong laef long stret fasin, blong mekem se olgeta bae oli go insaed long ples blong spel blong God (Hibus 3:7–19; 4:1–11). Wanem mining blong go insaed long ples blong spel blong God? (Luk long D&C 84:23–24; 3 Nifae 27:19.) Wanem Pol i eksplenem abaot hao nao sam long ol pikinini blong Isrel long taem blong Moses oli no save go insaed long ples blong spel blong God? (Luk long Hibus 3:7–11, 16–19; 4:1–2.) Olsem wanem yumi save helpem wanwan long yumi blong klin mo stret inaf blong go insaed long ples blong spel blong God? (Luk long Hibus 3:13–14; 4:11; Alma 13:12–13, 16.)

2. Melkesedek Prishud i pat blong fulnes blong gospel.

Ridim mo toktok raon long ol ves ia we yu bin jusum long Hibus 5; 6:20; 7.

- Wanem Pol i tijim abaot olsem wanem wan man i mas kasem mo yusum prishud atoriti? (Luk long Hibus 5:1–4.) From wanem wan man we i gat prishud, God i mas kolem hem bitim we blong jes [tekem] long hemwan se hem i gat prishud”?
- Olsem wanem prishud atoriti i bin go wetem loa blong Moses? (Aronik Prishud, oli singaotem tu Livaetekol, smol, prishud blong stap mekemrere. Luk long D&C 84:25–27.) Wanem prishud atoriti nao Jisas Kraes i holem? (Luk long Hibus 5:5–6; 6:20.) Eksplenem se taem Jisas i bin kam mo fulfilim loa blong Moses, Hem i bin putumbak tu Melkesedek Prishud. From wanem hemia hem i impoten? (Luk long Hibus 7:11. Aronik Prishud i no gat atoriti blong mekem ol odinens we oli impoten blong sevem man.)

“Nomata long loa blong Moses o prishud blong Aron we i bin stap givhan, hem i save tekem fasin blong kam stret gud i go long ol pikinini blong God. Aronik prishud hem i smol atoriti, mo hem i stap givhan nomo long gospel blong stap mekemrere. Melkesedek Prishud, long nara toktok, hem i prishud we i hae tumas, oli givim blong wokem ol odinens blong gospel long ful fasin blong olgeta mo hem i save klinim laef blong yumi blong mekem se yumi save go insaed bakegen long ples blong Lod” (*The Life and Teachings of Jesus and His Apostles* [Church Educational System manual, 1979], 385–86; luk tu long D&C 107:18–20).

- From wanem yumi stap singaotem bigfala prishud, Melkesedek Prishud? (Luk long D&C 107:2–4.) Olsem wanem ol memba blong Jos tedei oli bin bles blong gat Melkesedek Prishud mo tu Aronik Prishud? Olsem wanem prishud i blesem laef blong yufala?

3. Gospel blong Jisas Kraes hem i niufala kavenan bitwin God mo ol pikinini blong Hem.

Ridim mo toktok raon long ol ves ia we yu bin jusum long Hibus 8:1–10:18.

Eksplenem se Pol i bin helpem ol memba blong Jos oli tingbaot se blong wosip anda long loa blong Moses i stap soemaot Lod Jisas Kraes.

- Folem Hibus 8:5, wanem nao Lod i talem long Moses blong mekem, taem hem i stap bildim tabenakol blong ol pipol blong Isrel blong oli yusum blong wosip long hem? (Eksplenem se ol seremoni insaed long tabenakol oli stap olsem saen blong “ol samting blong heven,” olsem we oli aotlaenem i stap daon.)

Odinens insaed long tabenakol:	Wanem i stap olsem ol saen blong hem:
a. Ol pris oli presentem ol animol olsem ol sakrifaes i go long God (Hibrus 10:1–4, 11).	Jisas i bin presentem Hemwan olsem wan sakrifaes blong ol sin blong yumi (Hibrus 9:26–28; 10:4–12).
b. Ol pris oli putum blad blong ol animol we oli bin sakrifaes olgeta antap long olta blong stap olsem saen blong fasin blong kam klin mo fasin blong klin gud blong ol pipol (Hibrus 9:6–7, 19–23).	Blad blong Jisas we i givim long taem blong Atonmen, i klinim yumi mo mekem yumi klin gud long sin (Hibrus 9:11–15).
c. Hae pris i go tru long vel mo go long rum we i Tabu we i Tabu tumas (Hibrus 9:1–7).	Jisas, bigfala hae pris, Hem i gotru long vel mo go antap long heven long Hemwan (Hibrus 9:24).

- Pol i bin eksplenem se loa blong Moses, hem i olfala kavenan bitwin God mo ol pipol blong Hem (Hibrus 8:9; luk tu long Galesia 3:24–25). Wanem niufala kavenan we Jisas Kraes i bin tekem i kam? (Luk long Hibrus 8:6–8, 10–13. Fulnes blong gospel.) Poenemaot se olfala kavenan oli tokbaot insaed long Ol Testeman long Baebol, mo niufala kavenan oli tokbaot insaed long Niu Testeman.
- From wanem olfala kavenan i no save mekem olgeta we oli stap praktisim oli no save kam stret? (Luk long Hibrus 10:1–4.) From wanem niufala kavenan i givim long yumi bigfala hop blong save kam stret evriwan? (Luk long Hibrus 10:9–18.)

4. Olgeta we oli mekem fet blong olgeta long Jisas Kraes i wok bae oli save gat wan ples insaed long Kingdom blong God.

Ridim mo toktok raon long ol ves ia we yu bin jusum long Hibrus 10:19–11:40. Poenemaot we Pol i bin eksplenem ol wei we from wanem fulnes blong gospel i moa hae, mo hem i komplitim loa we i riplesem loa blong Moses, hem i bin talem strong long Ol Sent blong folem niu mo stret rod ia, blong stap putum fet blong olgeta long Jisas Kraes (Hibrus 10:19–22).

- Wanem hem i fas, o moa impoten prinsipol blong gospel? (Luk long Ol Toktok blong Bilif 1:4.) Wanem hem i fet? (Luk long Hibrus 11:1; Alma 32:21; Ita 12:6.) (Olsem wanem fet hem i moa bitim blong stap bilif? From wanem fet long Jisas Kraes hem i impoten long salvesen blong yumi?)
- Pol i bin givim plante eksampol blong ol pipol we oli bin wokem plante samting i kamtru tru fet long Jisas Kraes. Huia olgeta nao hem i talem olgeta? (Luk long Hibrus 11:4–12, 17–34.) Listim long blakbod, ol nem blong olgeta we oli talem olgeta, mo toktok raon long olsem wanem ol aksen blong wanwan man ia i soemaot fet.

Blong toktok raon, yu save putum ol memba blong klas long ol smolsmol grup. Askem wanwan grup blong ting hevi long sam long ol pipol ia we oli talem olgeta insaed long Hibrus 11. Givim smol taem long grup blong toktok raon long olsem wanem ol aksen blong ol pipol ia i soemaot fet, mo afta gat wanwan grup blong presentem smol, ol las toktok blong olgeta long klas.

- Pol i bin tijim tu se fet i save helpem yumi long ol taem blong harem nogud o long taem we wan samting i go agensem yumi (Hibrus 11:32–38). Olsem wanem nao fet i bin helpem yu blong yu go tru wetem wanem i kam agensem yu? Wanem sam nara blesing we yu (o wan man we yu save) bin kasem taem yu stap mekem fet blong yu long Jisas Kraes i wok?

Las Toktok

Poenemaot se yumi bin bles blong stap laef long wan taem, taem fulnes blong gospel i stap. Testifae se fasin blong sevem man i kamtru tru long fet long Jisas Kraes mo taem yumi obei long ol komanmen blong Hem. Leftemap tingting blong ol memba blong klas blong kipim ol kavenan mo ol komanmen blong gospel ia we i bin kambak bakegen.

**Sam Nara Aedia
blong Tij**

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. God bae i kipim ol promes blong Hem

- Wanem nao Hibrus 6:10–19 i tijim abaot ol promes blong God long ol pikinini blong Hem? Wanem nao ves 15 i tijim abaot rilisensip blong taem wan i stap winim ol tes mo stap kasem ol promes we i kam long God? (Luk tu long D&C 82:10.) Wanem eksperiens yu bin gat wetem God, we i bin fulfilim ol promes blong Hem long yu?

2. “Mi mi Hae God, mo mi save stretem olgeta ya we mi lavem olgeta” (Hibrus 12:6)

Mekem ol memba blong klas oli ridim Hibrus 12:5–11.

- Olsem wanem Lod i save stretem yumi? Olsem wanem Lod i stap stretem yumi, blong mekem yumi yumi kam tabu? (Luk long Hibrus 12:10; D&C 61:8; 95:1; 101:5.) Olsem wanem yumi save yusum fasin blong stap stretem olsem wan janis blong lanem samting mo gru? Invaetem ol memba blong klas blong tokbaot ol taem, taem Lod i bin stretem olgeta mo wanem nao oli bin lanem aot long eksperiens blong olgeta.

Stamba Tingting Blong leftemap tingting blong ol memba blong klas blong folem eksampol blong Pol mo stap olsem ol fetful witnes blong Jisas Kraes iven long medel blong ol tes mo ol hadtaem.

- Rere long Lesen**
1. Ridim, tingting hevi, mo prea abaot ol skripja ia:
 - a. Ol Wok 21:1–22:21. Nomata long wanem we ol kompanion blong hem oli no wantem folem, from we oli fraet long laef blong hem, Pol i go long Jerusalem. Hem i talemaot misinari wokbaot blong hem long ol brata blong hem we oli stap longwe. Hem i go long Tempol mo sam grup blong pipol we oli kros tumas, oli holem hem. Jif kapten i arestem hem be hem i letem hem blong toktok long ol pipol. Pol i tokbaot long ol pipol abaot taem hem i bin jenisim laef blong hem long gospel blong Jisas Kraes.
 - b. Ol Wok 22:22–23:35. Grup blong ol pipol we oli kros oli no laekem Pol mo oli wantem blong tekemaot laef blong hem. Jif kapten i karemaot Pol long ol pipol ia we oli kros mo putum hem i stap insaed long wan bigfala haos. Long nekis dei, Jif kapten i tekem Pol i go long fored blong Kaonsel blong ol man Jiu. Wan nara bigfala raorao i kamaot, mo Jif kapten i muvumaot Pol mo tekem hem i gobak bakegen long bigfala haos. Long naet ia, Lod i kamaot long Pol mo talem long hem se oli singaotem hem blong talemaot witnes long Rom mo tu long Jerusalem. Moa bitim 40 man Jiu oli plan blong kilim Pol, mo oli tekem hem i go long Filiks, we i hed gavman, blong sevem hem.
 - c. Ol Wok 26. Afta long sam yia blong hadtaem mo stap long prisen, oli bin tekem Pol i go long fored blong King Agripa blong testifae long hem. Agripa i no agri long testemoni blong Pol mo sendem hem i go long Rom blong luk Sisa.
 - d. Ol Wok 27–28. Pol i bin rek long sip long rod blong hem blong go long Rom afta we kapten blong sip i no wantem blong lisin long kaonsel blong hem. Taem hem i kasem Rom, oli sarem hem long prisen, be hem i stap prij long evriwan we oli stap lisin.
 2. Sapos ol tul ia oli stap, yusum olgeta long taem blong lesen:
 - a. “Paul—A Chosen Vessel,” Wan leven-minit pat blong *New Testament Video Presentations* (53914). Luk pat ia fastaem, sapos i posibol, blong mekem se bae yu save wanem taem blong yu stopem vidio blong toktok raon long hem.
 - b. Wan map blong wokbaot blong Pol long Rom (map 22 insaed long LDS edisen blong King James Bible).
 3. Wan tingting blong tij: “Hem i impoten blong olgeta we yu stap tijim olgeta oli mas kasem wanem we yu stap tijim, blong olgeta oli mas tingbaot se oli bin tijim wan samting long olgeta. Evritaem taem we oli kam long klas, oli sud kasem wan tingting, wan aedia, wan save we i kam long God, we i blong olgeta blong tekem insaed long klas. Bae hem i save olsem wan smol tingting, o wan we oli save gud, samting we i moa impoten hem i, taem yu stap folem gud” (Boyd K. Packer, *Teach Ye Diligently* [1975], 154).

Wan Tingting blong Lesen

Aktiviti blong
Pulum Tingting

Olsem we i stret, yusum aktiviti ia o wan aktiviti blong yuwan blong statem lesen.

- I gat eni man insaed long ol skripja we yu filim mo save se i semmak, from we hem i gat ol semmak tingting, eksperiens, o sitiuesen? From wanem yu filim se hem i semmak long man ia?

Givim taem long sam memba blong klas blong serem tingting. Mo afta poenemaot se, blong luklukbak long ol eksperiens blong hem afta long Fas Visen, Profet Josef Smit i filim se ol eksperiens blong hem oli semmak long hemia blong Aposol Pol. Mekem ol memba blong klas oli ridim Joseph Smith—History 1:23–25 blong faenemaot from wanem.

Eksplenem se wan long olgeta iven we bae yumi toktok raon long hem long lesen ia, i taem Aposol Pol i kam long fored blong King Agripa. Long sitiuesen ia mo truaot long ol misinari wokbaot blong hem, nomata long taem oli no stap wantem hem mo givim ol hadtaem long hem, Pol i stanap strong long fet mo gohed wetem fasin blong leftemap tingting blong serem testimoni long saed blong Jisas Kraes.

Yusum mo Toktok
Raon long Skripja

Taem yu stap tijim olgeta skripja ia, toktok raon long olsem wanem yumi save divelopem fasin blong no save fraet mo fet blong yumi i kam strong olsem Pol. Leftemap tingting blong ol memba blong klas blong tokbaot ol taem we oli bin serem testimoni wetem fasin blong no save fraet, tru long ol toktok mo ol aksen blong olgeta.

1. Pol i talemaot ol wokbaot blong hem mo taem hem i fesem sam man we oli kros, long Jerusalem.

Sapos yu stap yusum vidio presentesen ia “Paul—A Chosen Vessel,” soem fas pat naoia. Stopem vidio long taem we man we i stap toktok i talem, “He fulfilled the Lord’s words that he would bear His name before kings and rulers” (long taem blong ol toktok ia, sam soldia oli stap folem Pol long wan rod insaed long haos).

Toktok raon long Ol Wok 21:1–22:21. Invaetem ol memba blong klas blong ridim ol ves ia we yu bin jusum. Eksplenem se afta long tri gudgudfala misinari wokbaot we hem i bin mekem truaot long ol kaontri blong Rom, Pol i gobak long Jerusalem, nomata we hem i save se hem i denja tumas blong mekem olsem.

- From wanem ol fren blong Pol oli traem blong stopem Pol blong no gobak long Jerusalem? (Luk long Ol Wok 21:10–12.) Olsem wanem Pol i ansa long ol wari blong ol fren blong hem? (Luk long Ol Wok 21:13.) Olsem wanem hemia i soemaot komitmen blong Pol long Kraes?
- Wanem Pol i mekem long dei ia we hem i bin kasem Jerusalem? (Luk long Ol Wok 21:17–19.) Olsem wanem hemia i semmak long wanem we ol misinari tedei oli stap mekem afta we oli kambak long misin blong olgeta? (Olgeta oli stap serem ol eksperiens blong misin blong olgeta long stek presiden mo hae kaonsela mo plante taem long ol memba blong wod o branj insaed long sakramen miting.) Olsem wanem blong stap harem abaot ol misinari eksperiens blong ol naraman i bin helpem yufala?

- Plante Kristin man blong Jiu oli bin kros long Pol we i tijim se fasin blong sevem man i kamtru tru long Jisas Kraes, be i no long loa blong Moses (Ol Wok 15:1–35). Blong mekem tingting blong ol pipol ia i go daon, ol brata blong hem long Jerusalem oli bin askem Pol blong go insaed long tempol mo eksperiensem fasin we oli stap yusum blong kam klin blong olgeta olsem wan saen se hem i stil kipim loa (Ol Wok 21:20–25). Wanem i bin hapen taem Pol i stap insaed long Tempol? (Luk long Ol Wok 21:26–30. Sam grup blong ol pipol we oli stap kros oli bin arestem hem mo tok nogud long hem from fasin blong stap tij agensem loa blong Moses mo blong stap spolem tempol blong stap tekem wan man we hem i no wan Jiu i kam long hem.) Olsem wanem Pol i bin kamaot long ol pipol ia? (Luk long Ol Wok 21:31–36.) Wanem Pol i mekem taem jif kapten i letem hem blong toktok long ol pipol ia? (Luk long Ol Wok 21:37–22:21. From wanem hemia i soemaot fasin blong no save fraet?

Yu save statem wan list long blakbod blong evri taem we Pol i bin soem bigfala fasin blong no save fraet insaed long Ol Wok 21–28 long taem we hem i stap olsem wan witnes blong Jisas Kraes. Ademap list ia sapos i stret long taem blong lesen.

- Long wanem taem nao yu bin serem testemoni blong yu long wan situesen we yu bin nidim fasin blong no save fraet? Olsem wanem nao yu bin kasem fasin blong no save fraet blong mekem samting ia? Olsem wanem nao blong stap lanem abaot ol aksen blong Pol i helpem yumi blong gat moa fasin blong no save fraet blong serem ol testemoni blong yumi wetem ol nara man?

2. Oli bin tekem Pol i go long fored blong Kaonsel blong ol man Jiu.

Ridim mo toktok raon long ol ves ia we yu bin jusum long Ol Wok 22:22–23:35.

- Olsem wanem plante pipol we oli stap aotsaed long tempol, oli ansa long stori blong Pol abaot wei we hem i bin jenisim laef blong hem? (Luk long Ol Wok 22:22.) Wanem i stamba tingting blong jif kapten blong tekemaot Pol aot long ol pipol we oli stap kros? (Luk long Ol Wok 22:24.) Olsem wanem Pol i stap longwe long fasin blong oli kilim hem i ded? (Luk long Ol Wok 22:25–26. Hem i bin poenemaot se hem i wan man Rom. Hemia i bin givim long hem ol spesel raet mo janis blong go long gavman blong Rom, we Jerusalem i wan pat blong hem.)
- Wanem i fas samting we Pol i talem taem oli tekem hem i go long fored blong Kaonsel blong ol man Jiu? (Luk long Ol Wok 23:1; luk tu long Ol Wok 24:16. Luk long D&C 135:4 blong wan semmak toktok olsem, we i kam long Profet Josef Smit.) Long tingting blong yu, olsem wanem nao “gudfala save we Pol i gat long saed blong God” i bin helpem hem long taem ia? Invaetem ol memba blong klas blong ting hevi long ol wanem jenis we oli nid blong mekem long laef blong olgeta blong gat wan “gudfala save long saed blong God.”
- Wanem nao Lod i talem taem Hem i bin kamaot long Pol folem taem we Pol bae i go blong pas long kaonsel blong ol man Jiu? (Luk long Ol Wok 23:11.) Olsem wanem Lod i save helpem yu blong “yu no fraet” long taem blong ol hadtaem?
- Afta long dei we Lod i bin kamaot long Pol, moa bitim 40 man Jiu oli plan blong kilim Pol, mo oli mekem promes blong oli no kakae o drink kasem taem oli mekem samting ia (Ol Wok 23:12–15). Olsem wanem nao oli protektem Pol long plan blong olgeta ia? (Luk long Ol Wok 23:16–35. Yu save poenemaot se hemia hem i nambatri taem we oli stap protektem Pol jes sam dei nomo we oli blong kilim hem i ded.)

3. Pol i testifae long Agripa, be hem i no akseptem testemoni blong hem.

Ridim mo toktok raon long ol ves ia we yu bin jusum long Ol Wok 26. Yu save serem wan sot toktok abaot infomesen ia we i stap long Ol Wok 24–25: Oli sendem Pol i go long Filiks, we i hed gavman, mo hem i bin testifae wetem fasin blong no save fraet long fored blong hem. Pol i helpem wan prisena blong tingbaot tu yia taem taem we Filiks i hop blong kasem mane blong rilisim hem. Taem Festas i jusum Filiks blong tekem ples blong hem, ol man Jiu oli bin askem Festas blong sendem Pol i go long Jerusalem blong pas long kot. Pol i no wantem go, hem i save se bae hem i no save kasem wan stret kot long ples ia. Taswe, Pol i bin apil long Sisa, olsem hem i raet blong hem, olsem wan man Rom. Festas i agri blong sendem Pol i go long Rom, be Pol i mas go kamaot fastaem long fored blong Herod Agripa, man we oli jusum hem long Rom blong lukaotem Judea.

Sapos yu stap yusum vidio presentesen ia, soem seken pat blong hem naoia. Stopem vidio afta long toktok blong Pol, “I would to God that not only thou, but also all who hear me this day, were such as I am, except these bonds” (jes bifo we oli protektem Pol, long kot blong King Agripa).

- Wanem nao i givim strong tingting long yu abaot ol toktok blong Pol i go long King Agripa? (Luk long Ol Wok 26:2–27.) Olsem wanem Agripa i ansabak long ol toktok blong Pol? (Luk long Ol Wok 26:28.) Wanem i maet stap kipim Agripa blong kam wan kristin? Wanem ol fasin mo ol narafala problem we oli stap holemtaet ol pipol tedei blong akseptem gospel blong Jisas Kraes?
- Olsem wanem Pol i luk se ol aksen blong Festas mo Agripa i defdefren? Olsem wanem nao tufala i semmak? (Luk long Ol Wok 26:24, 28. Poenemaot se i no gat wan samting i moa daon bitim blong givim wan stret mo gud devosen long Lod, we hemia nomo Hem i akseptem. Nomata we Agripa i bin bilivim mesej blong Pol taem Festas i no akseptem long samtaem, tufala tugeta i no pasem tes blong fet we Pol i givim long tufala.)

4. Pol i bin rek long sip long rod blong hem i go long Rom.

Ridim mo toktok raon long ol ves ia we yu bin jusum long Ol Wok 27–28. Eksplenem se Agripa i bin glad blong rilisim Pol (Ol Wok 26:32), be Pol i bin apil long Sisa, i mekem se oli bin sendem hem i go long Rom. Taem yufala i stap toktok raon long wokbaot blong Pol i go long Rom, soemaot map mo poenemaot ol impoten ples, olsem Gudfala haba, long ples ia we Pol i bin givim kaonsel long ol man blong stap from taem blong sno, mo Malta (Molta), long ples ia we ol pasenja blong sip we i bin rek oli swim i go so long hem.

- Wanem i bin hapen taem masta blong sip i no wantem lisin long woning blong Pol, we i se hem i denja tumas blong go long Gudfala Haba? (Luk long Ol Wok 27:7–20.) Wanem i bin mekem se kapten blong ol soldia i no wantem lisin long kaonsel blong Pol? (Luk long Ol Wok 27:11–12.) From wanem samtaem sam long yumi i no wantem lisin long kaonsel blong ol lida blong Jos blong yumi? Olsem wanem nao yu bin lanem se hem i impoten tumas blong folem kaonsel blong ol lida blong Jos?
- Olsem wanem Pol i save se evri pasenja bae oli go sef nomo long ples we bae oli go long hem, nating strong win i spolem sip? (Luk long Ol Wok 27:21–26.) Olsem wanem profesi ia i kamtru? (Luk long Ol Wok 27:27–44.)

- Olsem wanem Pol i bin yusum prishud paoa blong hem taem hem i stap long aelan blong Molta? (Luk long Ol Wok 28:7–9.) Wanem nao iven ia i poenemaot abaot stamba tingting blong prishud paoa? Olsem wanem nao blong stap onarem prishud blong yumi i helpem yumi blong wok olsem ol witnes blong Kraes?
- Afta long sam manis, Pol i bin go kasem Rom, long ples ia, oli putum hem bakegen long prisen. Olsem wanem nao hem i tanem samting ia we i stap we oli stap luk i kam olsem wei blong hem blong win? (Luk long Ol Wok 28:16–31. Hem i bin givim sem fridom, mekem se hem i bin spendem taem blong hem blong tijim gospel mo testifae long Kraes.) Wanem yumi save lanem long Pol, blong stap olsem wan witnes blong Jisas Kraes? (Sapos yu bin mekem wan list antap long blakbod blong ol taem we Pol i bin soem fasin blong no save fraet blong stap olsem wan fetful witnes, lukluk i go bak long hem.)

Sapos yu stap yusum vidio presentesen ia, soem hemia we i stap naoia.

Las Toktok

Eksplenem se ol man blong histri oli talem se Pol i ded long fasin blong stap kilim man i ded, abaot A.D. 65 long Rom. Truaot long laef blong hem, hem i bin fulfilim responsabiliti blong hem olsem wan Aposol blong, go long ol man long olgeta ples long wol, mo tijim olgeta (luk long Matiu 28:19). Hem i bin fulfilim tu profesi blong Lod, se bae hem i prijim gospel long “ol man we oli no laen blong Isrel, mo long ol king, mo long ol laen blong Isrel tu” (Ol Wok 9:15). Hem i wan fetful witnes blong Kraes, nomata long toktok mo ol harem nogud blong mit mo bun, fasin blong go long prisen long wei we i no stret, mo ol samting blong wol blong spolem man.

Testifae se taem yumi folem eksampol blong Pol blong stap olsem fetful witnes blong Jisas Kraes long evri sitiuesen, Hem bae i givim paoa long yumi blong yumi winim ol tes blong yumi.

Wan Nara Aedia blong Tij

Ol nara tul ia i kam helpem lesen aotlaen we i stap. Yu save yusum aedia ia olsem pat blong lesen.

Luklukbak long laef blong Pol

Blong helpem ol memba blong klas blong oli glad long hao nao Pol i bin fulfilim misin long laef blong hem blong testifae long Kraes, mekem olgeta i tanem i go long ples we nem blong “Pol” i stap, insaed long Bible Dictionary (pej 742–43). Mekem wanwan memba blong klas blong selektem wan stori insaed long laef blong Pol taem Pol i stap testifae long saed blong Kraes. (Oli save yusum, sam stori we oli no stap insaed long Bible Dictionary tu.) Invaetem wanwan memba blong klas blong serem wanem we hem i bin jusum wetem klas, mo listim evri stori ia antap long blakbod. Afta askem ol memba blong klas blong tanem i go long map blong ol wokbaot blong Pol (ol map 19–22 insaed long LDS edisen blong King James Bible) mo soemaot weaples, wanwan stori i tekem ples long hem. Helpem ol memba blong klas blong oli luklukbak long stret skripja sapos i stret, blong faenemaot stret ples blong stori.

“Blong Olgeta Man blong Hem Bambiae Oli Rere blong Mekem Wok blong Hem”

Lesen
39

Efesas

Stamba Tingting Blong helpem ol memba blong klas blong andastanem se fasin ia blong stretem Ol Sent (luk long Efesas 4:12) i nid blong yumi mekem fet blong yumi long Kraes i kam antap, folem ol tijing blong ol aposol mo ol profet, mo yumi mas protektem yumiwan aot long ol rabis fasin blong wol.

- Rere long Lesen**
1. Ridim, tingting hevi, mo prea abaot ol skripja ia:
 - a. Efesas 1:9–10. Pol i tijim se stamba tingting blong dispensesen blong ol las dei i blong “olgeta samting we Kraes i mekem, bambiae oli kam joen wanples long Hem.”
 - b. Efesas 2:12–22; 4:1–16. Pol i tijim se Jisas Kraes i konaston blong yumi. Hem i tijim se Lod i givim ol aposol mo ol profet long yumi blong oli helpem yumi blong kam stret mo kam long wan “yuniti long fet.”
 - c. Efesas 5:22–29; 6:1–4. Pol i tijim nid blong yuniti bitwin hasban mo waef mo bitwin papa mo mama, mo pikinini.
 - d. Efesas 4:21–32; 6:10–18. Pol i tijim se yumi sud “kam niufala man” mo “warem ful klos blong faet blong God” blong protektem yumi long ol rabis fasin blong wol.
 2. Sam moa riding: Jon 17:11; Mosaea 18:21–22; Doctrine and Covenants 27:15–18; 38:25–27; Bible Dictionary, “Dispensations,” 657–58.
 3. Sapos yu yusum aktiviti blong pulum tingting, tekem i kam long klas wan pis blong tred (we i abaot 30 go kasem 90 sentimeta) mo wan pis blong rop we longfala blong hem tu i semmak.
 4. Wan tingting blong tij: Blong stap makem ol skripja i helpem ol tija mo ol memba blong klas blong luksave ol impoten toktok, ol aedia, pipol, mo ol stori. Yu save leftemap tingting blong ol memba blong klas blong makem ol srikpja blong olgeta blong poenemaot ol impoten prinsipol, stap givim ol kros-referens, o talem wanem we yu bin raetem long smol spes we i stap long saed blong skripja blong yu.
-

Wan Tingting blong Lesen

Aktiviti blong Pulum Tingting

- Olsem we i stret, yusum aktiviti ia o wan aktiviti blong yuwan blong statem lesen. Soem tred mo rop ia long ol memba blong klas (luk long seksen “Rere long Lesen”).
- Long wanem wei nao tred mo rop, tufala i semmak long hem? (Oli mekem tufala tugeta wetem koten o kaen samting olsem koten.) Olsem wanem tufala i defdefren? (Tred hem i wan singel pis blong koten nomo, be rop oli mekem wetem plante pis blong koten we oli tantanem tugeta.) Wijwan long tufala samting ia i moa strong?

Eksplenem se, olsem wan pis blong tred, yumi no strong taem we yumi dipen long yumiwan. Nomata long hem, olsem wan rop, yumi save kam moa strong taem yumi kam tugeta long fet mo gat fasin blong stap stret mo gud wetem ol naraman. Insaed long leta blong hem i go long ol pipol blong Efesas, Pol i talemaot impoten fasin blong “stretim ol sent” mo blong kasem “wan yuniti blong fet” (Efesas 4:12–13). Lesen ia i toktok raon long olsem wanem, blong ol famle mo Jos, yumi save wok tugeta blong kam stret gud mo gat yuniti taem yumi stap trastem Sevy, stap folem ol aposol mo ol profet, divelopem ol strong famle, mo warem ful klos blong faet blong God.

Yusum mo Toktok Raon long Skripja

Wetem prea, selektem ol toktok blong skripja we bae oli lukluk stret long ol nid blong ol memba blong klas. Leftemap tingting blong ol memba blong klas blong oli serem ol eksperiens we i go wetem ol prinsipol blong skripja.

1. Dispensesen blong ol las dei

Ridim mo toktok raon long Efesas 1:9–10.

- Insaed long fas japta blong Efesas, Pol i bin talem abaot dispensesen blong ol las dei (luk long Efesas 1:10). Wanem i wan dispensesen blong gospel? (Wan spes blong taem, taem Lod i gat abaot wan wokman blong hem long wol we i holem ol ki blong prishud mo oli givim raet long hem blong serem gospel. Luk long Bible Dictionary, “Dispensations,” 657–58.)
- Wanem i dispensesen blong ol las dei? (Dispensesen we i bin stat wetem restoresen blong gospel mo oganaesesen blong Jos tru long Josef Smit.) From wanem dispensesen ia blong yumi, oli stap talem olsem se, hem i blong las dei? Presiden Gordon B. Hinckley i bin tijim: “Yu mo mi i eksperiensem ol bigbigfala mo gudfala blesing blong dispensesen blong las dei ia. Long dei mo taem tedei, oli bin putumbak bakegen long wol evri prinsipol, paoa, blesing, mo ol ki blong evri dispensesen we oli pas finis” (insaed long Conference Report, Epr. 1992, 98; o *Ensign*, Mei 1992, 70).
- Wanem nao Pol i talem we Papa blong yumi long Heven bae i mekem long dispensesen ia? (Luk long Efesas 1:9–10.) Yu ting se i minim wanem long yu blong “olgeta samting we Kraes i mekem, bambae oli kam joen wanples long Hem”? Wanem i sam long ol samting long dei blong yumi tedei we oli bin joen tugeta? (Ol ansa i save tekem tu ol skripja, ol memba blong Jos, ol rikod blong ol ded man, ol famle we oli sil insaed long tempol.) Olsem wanem yumi save givhan long wok ia blong joenem samting tugeta?

2. Jisas Kraes i olsem konaston blong yumi

Ridim mo toktok raon long ol ves ia we yu bin jusum long Efesas 2:12–22 mo 4:1–16.

- Komperem Efesas 2:12 mo 2:19. Olsem wanem Pol i tokbaot ol jenis we i save hapen long olgeta we oli bin akseptem mo folem Sevy? Olsem wanem yu bin luk ol semmak jenis ia insaed long laef blong yu mo blong ol narawan? Olsem wanem yu save joen wetem ol narafala memba blong Jos olsem “ol sem man nomo” insaed long gospel we i stap blesem laef blong yu?

- Wanem nao Pol i stap minim, blong tijim se Jisas Kraes i jif konaston blong Jos? (luk long Efesas 2:20). (Sapos i nid, eksplenem se wan konaston, hem i wan fandesen ston we oli stanemap long wan kona, long ples we tu wol i mit long hem. Konaston, impoten wok blong hem i blong holemtaet mo joenem tugeta wanem we yu stap mekem.) Olsem wanem Jisas Kraes i stap olsem konaston blong fet blong yumi?
- Wanem nao Pol i tijim insaed long Efesas 2:20 mo 4:11–14 abaot olsem wanem ol aposol mo ol profet oli impoten? From wanem aposol mo ol profet we oli laef oli impoten tumas long tru Jos? Wanem i sam long olgeta tijing blong ol aposol mo ol profet blong lata-dei we oli helpem yumi blong kam stret mo gud, mo gat yuniti? (Yu save listim ol ansa blong ol memba blong klas antap long blakbod.)
 Presiden Boyd K. Packer i bin tijim: “Wok blong ol profet mo ol aposol i stap lidim olgeta oltaem i go long hom mo famle. . . . Impoten stamba tingting blong evri samting we yumi stap tijim i blong yunaetem ol papa mo mama mo ol pikinini blong gat fet long Lod Jisas Kraes, blong oli save stap glad long hom, sil long wan mared we i no save finis, joen tugeta wetem ol jeneresen blong olgeta, mo sua blong kam olsem God insaed long ples blong Papa blong yumi long Heven” (insaed long Conference Report, Epr. 1995, 8; o *Ensign*, Mei 1995, 8).
- Wanem nao Pol i stap minim, taem hem i stap tijim se i gat “wan Masta nomo, i gat wan tok nomo blong yumi bilif long hem, mo i gat wan baptaes nomo”? (Efesas 4:5). From wanem hem i impoten blong yumi joen tugeta long wanem we yumi yumi save mo stap tijim olsem ol besik doktrin blong Jos?

3. Yuniti bitwin hasban mo waef mo bitwin papa, mama mo pikinini

Ridim mo toktok raon long Efesas 5:22–29; 6:1–4.

- Wanem nao Pol i yusum blong komperem rilisensip bitwin hasban mo waef long taem hem i stap tokbaot? (Luk long Efesas 5:22–29.) Wanem ol hasban mo waef oli save lanem aot long fasin ia blong stap komperem samting, blong helpem olgeta blong developem gudfala lav mo yuniti insaed long mared blong olgeta? (Toktok raon long ol stret wei we Jisas i bin soem lav blong Hem long Jos mo olsem wanem oli save aplaem wanwan wei ia long mared. Yu save listim ol ansa blong ol memba blong klas antap long blakbod.)

Presiden Spencer W. Kimball i bin tijim: “Yu save faenem weaples insaed long evri tabu skripja, we Lod Jisas Kraes i no bin stap strong blong givhan long Jos blong Hem? . . . Hem i fetful? Hem i tru? I gat eni samting we i gud mo i klin inaf we Hem i no bin givim? Mo afta samting ia nao yumi stap askem — wanem nao Hem i askem long wan hasban. . . .

“. . . Bae yu save tingbaot, olsem wanem Hem i bin lavem Jos? Evri samting we oli stap pulum win oli impoten long Hem. Evri samting we oli stap gru, evri wanwan man mo woman, oli gud tumas long Hem. Hem i givim long ol pipol ia, evri paoa we i gat, evri paoa blong Hem, mo evri samting we Hem i stap intres long Hem. Hem i givim laef blong Hem—wanem moa Hem i givim?” (*Men of Example* [address delivered to religious educators, 12 Sept. 1975], 4–5).

- Wanem hem i kaonsel blong Pol i go long ol pikinini insaed long Efesas 6:1–3? From wanem kaonsel ia hem i impoten tedei? Olsem wanem yu kasem blesing, taem yu stap onarem papa mo mama blong yu?

- Wanem nao Pol i stap minim taem hem i givim kaonsel long ol papa mo mama blong lukaotem gud wan pikinini blong “stretim mo tijim hem, olsem we Masta blong yumi i stap stretem yumi, i stap tijim yumi”? (Efes 6:4). Olsem wanem ol papa mo mama oli save stretem mo tijim ol pikinini long saed blong spirit? Olsem wanem ol papa mo mama oli save folem eksampol blong Lod taem oli stap stretem mo tijim ol pikinini?
- Olsem wanem kaonsel blong Pol i go long ol papa mo mama, mo ol pikinini i givhan blong mekem ol rilisensip blong famle i strong mo holemtaet yuniti insaed long hom? Wanem kaonsel nao we ol aposol mo ol profet blong lata-dei ia, oli givim long yumi we i lukluk long saed blong ol famle? Invaetem ol memba blong klas blong toktok raon long wan kaonsel we i jes kamaot insaed long ol jeneral konfrens, insaed long ol narafala miting o faesaed, mo insaed long ol toktok blong Jos magasin.

Insaed long “Famle: Wan Ofisol Toktok I Go Long Wol,” Fas Presidensi mo Kworom blong Olgeta Twelef Aposol oli bin tijim se “Hapines insaed long famle laef i gat gudfala janis blong kam tru sapos laef insaed long famle i stanap long ol tijing blong Lod Jisas Kraes. I gat sakes oltaem long ol mared laef mo famle, taem oli folem ol stamba tingting blong fet, prea, sakem sin, fasin blong fogif, respek, lav, fasin blong kea, wok mo ol samting o pleiplei we oli gud” (*Ensign*, Nov. 1995, 102).

4. “Kam niufala man” mo warem “ful klos blong faet blong God”

Ridim mo toktok raon long Efes 4:21–32 mo 6:10–18.

- Wanem nao Pol i stap minim taem hem i leftemap tingting blong ol pipol blong Efes blong “oli kam niufala man”? (Efes 4:24). Wanem i sam long ol fasin blong ol pipol we oli kam “niu” tru long Atonmen blong Jisas Kraes? (Luk long Efes 4:21–32.)
- Taem hem i stap wonem Ol Sent blong warem klos blong faet blong God, Pol i bin wonem olgeta tu abaot plante kaen rabis fasin we i save tanem tingting (Efes 6:10–12). Wanem i sam long ol rabis fasin ia we i save tanem tingting long laef ia?
- Wanem i ol defdefren pis samting we Pol i singaotem olgeta klos blong faet blong God? Wanwan pis blong hem i ripresentem wanem? (Luk long Efes 6:13–18; D&C 27:15–18. Yu save listim ol ansa long blakbod andanit long heding, *Klos blong Faet* mo *Ripresentem*.) Olsem wanem nao wanwan pis blong klos blong faet blong God ia i protektem yumi agensem ol samting we Setan i stap mekem? Wanem nao yumi save mekem blong warem klos blong faet blong God ia evri dei?

Las Toktok

Testifae se Lod i stanemap Jos blong Hem, wetem ol aposol mo ol profet, blong helpem yumi blong kam olsem Hem mo blong gobak stap wetem Hem. Leftemap tingting blong ol memba blong klas blong oli traehad tugeta blong “stretim Ol Sent” blong stap folem ol tijing blong Pol insaed long Efes.

Sam Nara Aedia blong Tij

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Warem ful klos blong faet blong God (luk long Efesas 6:11)

Soem "The Whole Armor of God," wan tetin-minit pat blong vidio long *New Testament Video Presentations* (53914). Afta askem ol kwestin ia:

- Wanem denja nao ol soldia insaed long vidio presentesen ia oli fesem? Wanem denja nao ol yang pipol oli stap fesem? Olsem wanem ol wanwan memba blong grup oli kasem blesing blong stap warem ol klos blong faet blong olgeta?

2. Prea blong ol lida blong Jos

- Ridim Efesas 6:18–20. Long tingting blong yu, from wanem Pol i bin askem ol man Efesas blong oli prea blong hem? Long wanem taem prea blong ol nara man i bin givim paoa long yu? From wanem hem i impoten blong yumi prea blong yumi wanwan mo blong ol lida blong Jos?

3. "Tru long gladhat, yufala i sev, from yufala i bilif long Kraes" (Efesas 2:8)

- Wanem nao Pol i tijim insaed long Efesas 2:8–9 abaot olsem wanem wan man i save kasem salvesen? From wanem hem i no posibol long yumi blong yumi save sevem yumiwan tru long ol wok blong yumi? (Luk long Rom 3:23; Mosaea 3:17; Alma 22:14. Yu save poenemaot se Pol i oltaem helpem Ol Sent we oli blong Jiu blong tingting abaot se ol wok blong loa blong Moses i no save sevem olgeta. Blong save moa long toktok raon blong gladhat mo ol wok, luk long lesen 36.)

“Mi Save Mekem Evri Samting, long Paoa blong Kraes”

Filipae, Kolosi, Filimon

Stamba Tingting Blong leftemap tingting blong ol memba blong klas blong developem ol fasin blong ol tru man we oli stap folem Jisas Kraes.

Rere long Lesen

1. Ridim, tingting hevi, mo prea abaot ol skripja ia:
 - a. Filipae. Pol i talem tangkyu long Ol Sent long Filipae mo leftemap tingting blong olgeta blong oli mas yunaet, stap olsem ol fetful man blong folem Kraes.
 - b. Kolosi 1. Pol i helpem Ol Sent long Kolosi blong oli tingbaot se fasin blong pemaot sin i kamtru nomo tru long Jisas Kraes.
 - c. Kolosi 2:1–8, 16–23; 3; 4. Pol i stap tijim Ol Sent blong Kolosi abaot ol samting we oli sud mekem mo ol fasin we oli sud developem olsem ol man blong God.
 - d. Filimon. Pol i leftemap tingting blong Filimon blong mas fogivim Onesimas, wan slev we i bin ronwei.
2. Sam moa riding: Bible Dictionary, “Pauline Epistles: Epistle to the Philippians,” 745–46; “Pauline Epistles: Epistle to the Colossians,” 746; and “Pauline Epistles: Epistle to Philemon,” 746.
3. Wan tingting blong tij: Wan lesen aotlaen o skripja blok i save gat insaed plante samting we yu gat taem blong yusum insaed long klas. Taem yu stap priperem wanwan lesen, wetem prea, jusum ol wij doktrin o prinsipol we klas blong yu i nidim bigwan. Planem blong tijim hemia fastaem, mo tu ol narafala pat blong lesen sapos i gat inaf taem. Taem yu stap tij, nomata long hemia, yu mas stap redi long Spirit mo rere inaf blong jenis plan blong yu sapos Spirit i givim filing long yu blong mekem. (Luk long *Teaching—No Greater Call*, 113.)

Wan Tingting blong Lesen

Aktiviti blong
Pulum Tingting

Olsem we i stret, yusum aktiviti ia o wan aktiviti blong yuwan blong statem lesen.

Raetem antap long blakbod, sam long ol ki toktok we oli stap insaed long nambatetin toktok blong bilif, kaen olsem *talem tru tok, ones, samting we i klin, mo samting we i gudfala mo i nambawan tru*.

- Wanem toktok blong bilif nao i gat insaed ol toktok ia? (Sapos ol memba blong klas oli no save, mekem olgeta i luk long Ol Toktok blong Bilif, we i stap long en blong Pearl of Great Price.)

Taem ol memba blong klas oli ansarem stret, askem wan memba blong klas blong talemaot long fasin blong no luk buk o ridim nambatetin toktok blong bilif. Afta talem long wan memba blong klas blong talemaot bakegen, fas haf blong toktok blong bilif wetem fasin blong no luk buk, go kasem “ol tijing blong Pol.”

- Wanem i “tijing blong Pol”? Weaples i stap long hem?

Mekem ol memba blong klas oli tanem i go long Filipae 4:8 mo komperem wetem nambatetin toktok blong bilif. Eksplenem se taem Josef Smit i bin talemaot ol tijing blong Pol insaed long nambatetin toktok blong bilif, hem i stap tekem i go long Filipae 4:8, we hem i pat blong wan leta blong Pol we i bin raetem i go long Ol Sent long Filipae. Lesen blong tedei bae i kavremap leta ia mo ol leta blong Pol i go long ol man Kolosi mo long Filimon, evriwan long olgeta, Pol i bin raetem long taem hem stap long prisem long Rom. Ol leta ia oli toktok raon long ol fasin we yumi sud lukaotem blong developem olsem ol fetful man mo woman we oli stap folem Jisas Kraes.

Yusum mo Toktok Raon long Skripja

Taem yu stap tijim olgeta skripja ia, toktok raon long olsem wanem ol toktok ia i aplae long yumi tedei semmak olsem i aplae long Ol Sent long taem blong Pol. Leftemap tingting blong ol memba blong klas blong oli serem ol eksperiens we i go wetem ol prinsipol blong skripja.

1. Pol i leftemap tingting blong Ol Sent blong Filipae blong folem Jisas Kraes.

Toktok raon long leta blong Pol i go long ol pipol blong Filipae. Invaetem ol memba blong klas blong ridim ol ves ia we yu bin jusum .

- Pol i stap insaed long prisem long Rom taem hem i bin raet i go long ol man Filipae. Olsem wanem ol narafala memba blong Jos oli ak long taem oli sarem Pol insaed long prisem? (Luk long Filipae 1:12–18.) Olsem wanem nao blong stap luk mo harem abaot ol naraman we oli stap sevem Lod wetem glad fasin, i bin helpem yu?
- Insaed long Filipae 2:2–3, wanem nao Pol i talemaot strong long ol memba blong Jos blong mekem? Long wanem wei nao ol memba blong Jos oli sud stap “wok olsem wan tim”? (Luk long Filipae 1:27; 2:14–15.) From wanem nao, samtaem yumi stap mekem ol samting blong “gat ol hae tingting long hem”? Long tingting blong yu, from wanem Pol i bin givim kaonsel agensem samting ia? From wanem hem i impoten blong yumi no mas ting se yumi moa gud bitim ol narafala pipol? (Luk long D&C 38:24–26.)
- Wanem nao Pol i tijim abaot Jisas insaed long Filipae 2:5–8? Olsem wanem Kraes i soemaot wan stret eksampol mo lego tingting blong Hem blong folem tingting blong Papa long Heven? (Luk long Jon 8:29.) Olsem wanem yumi save gat moa tingting we i stap daon mo lego tingting blong yumi blong folem tingting blong Papa long Heven?
- Long tingting blong yu, wanem Pol i wantem minim taem hem i bin talem long ol man Filipae, “Yufala i mas gohed blong wok had, we yufala i ona long God, mo yufala i fraet tu long hem. Yufala i mas mekem olsem, blong yufala i save finisim wok ya we hem i mekem blong sevem yufala”? (Filipae 2:12).

Presiden David O. McKay i bin eksplenem: “Wok from stret fasin blong sevem man blong yuwan’ i wan woning we yu sud soemaot tru long aktiviti, strong tingting blong obei long wan fet we i tru. Be hemia yu mas mekem wetem wan strong save se yu sud dipen plante long yuwan, bae i save krietem tu hae tingting mo mekem yu yu no strong blong yu save foldaon. Wetem ‘fasin blong fraet mo ona long God’ yumi sud lukaotem blong kam strong mo fasin blong stap kaen blong God blong kasem ol save long God blong winim las tes” (insaed long Conference Report, Epr. 1957, 7).

- Pol i bin givim kaonsel bakegen long ol man Filipae blong “oli mas glad long Lod” (Filipae 3:1; 4:4). Olsem wanem yumi save glad long Lod?
- Pol i bin talem long ol man Filipae se hem i bin sakrifaesem evri samting long Kraes (Filipae 3:7–8). Wanem nao Pol i bin sakrifaesem? From wanem hem i impoten blong yumi mekem sakrifaes long Kraes? (Luk long Filipae 3:9–12.)
Profet Josef Smit i bin tijim: “Wan rilijin we i no askem sakrifaes blong evri samting, hem i neva gat inaf paoa blong mekem wan fet we i inaf blong kasem laef mo fasin blong sevem man; from se, long fastaem we oli mekem man mo hem i laef long wol, fet hem i impoten blong save stap glad long laef mo wan i no save kasem fasin blong sevem man witaot sakrifaes blong evri samting blong wol” (*Lectures on Faith* [1985], 69).
- Olsem wanem yumi save gat “pis blong God” we oli tokbaot insaed long Filipae 4:7? (Luk long Filipae 4:6–7.) Long wanem taem nao yu bin filim pis blong God?
- Olsem wanem nao yumi save yusum kaonsel blong Pol we i stap insaed long Filipae 4:8? (Luk tu long Ol Toktok blong Bilif 1:13.) Olsem wanem nao yumi kasem blesing taem yumi folem woning toktok ia?
- Pol i bin testifae, “Mi save mekem evri samting, long paoa blong Kraes ya we i stap mekem mi mi strong” (Filipae 4:13). Long tingting blong yu, olsem wanem Pol i bin kasem testemoni ia blong Kraes? Olsem wanem nao yu luk se yu save mekem evri samting tru long Kraes”?

2. Pol i helpem ol pipol blong Kolosi blong tingbaot se fasin blong pemaot sin i kamtru nomo tru long Kraes.

Toktok raon long Kolosi 1. Invaetem ol memba blong klas blong ridim ol ves ia we yu bin jusum. Eksplenem se Ol Sent long Kolosi, wan smol siti long is blong Efesas, oli bin gat strong tingting long ol tijing we i blong putum daon impoten fasin blong Sevyia mo lukluk nomo long fasin blong kipim ol odinens mo wosipim ol enjel we i save givim fasin blong kam moa stret mo gud. Long leta blong hem i go long Kolosi, Pol i givim woning agensem ol tijing ia, mo talem strong long Ol Sent blong gohed blong stap “stanap strong mo gohed blong bilif strong” (Kolosi 1:23; luk long Kolosi 2:5–7) long save se fasin blong pemaot sin i kamtru nomo tru long Jisas Kraes.

- Wanem trutok abaot Jisas Kraes nao Pol i tijim long ol man Kolosi? (Luk long Kolosi 1:12–22. Listim ol ansa blong ol memba blong klas antap long blakbod’.) From wanem hem i impoten blong ol man Kolosi oli andastanem ol trutok ia? Olsem wanem nao save blong yu mo testemoni blong yu long saed blong Jisas Kraes i stap afektem wei we yu stap laef?
- Wanem i “ol samting blong Ol Sent” we yumi save kasem tru long Papa blong yumi long Heven? (Luk long Kolosi 1:12; 2 Nifae 9:18; D&C 50:5.) Huia i mekem ol samting ia i posibol? (Luk long Kolosi 1:12–14.) Wanem yumi mas mekem blong kasem ol samting ia? (Luk long Kolosi 1:10–12; 2 Nifae 9:18; Alma 5:51; D&C 50:5.)
- Wanem nao Pol i wantem minim taem hem i bin wonem ol man Kolosia blong mas “stanap strong, mo mas gohed blong bilif strong” long gospel? (Luk long Kolosi 1:23.) Wanem i mekem se sam pipol oli stap lego hop blong olgeta long gospel? (Kolosi 1:23). Wanem nao yumi save mekem blong ol testemoni blong yumi oli kam strong?

3. Pol i stap tijim ol man Kolosi long wanem we oli sud mekem olsem ol man blong God.

Toktok raon long Kolosi 2:1–8, 16–23; 3; 4. Invaetem ol memba blong klas blong ridim ol ves ia we yu bin jusum .

- Pol i wantem blong Ol Sent oli joenem ol hat blong olgeta tugeta long lav mo long save blong God Papa mo Jisas Kraes (Kolosi 2:2–3). Olsem wanem yumi save mekem samting ia insaed long wod o branj blong yumiwan?
- Wanem nao i mining blong “holem strong, olsem we rus blong tri i holem graon” long Kraes? (Luk long Kolosi 2:7.) Olsem wanem yumi save kam strong long Kraes? Olsem wanem nao blong stap “holem strong, olsem we rus blong tri i holem graon” long Kraes i helpem yumi long ol taem blong tes? (Yu save komperem tri wetem ol sot, smol rus wetem ol rus we oli long, mo i dip. Toktok raon long wijwan long ol tri i save laef long taem blong ol tes, olsem hariken o long wan longfala taem blong trae sisen o ren)
- Wanem i ol fasin we “man blong God” i mas gat we i stap long Kolosi 3:12–15? (Listim ol ansa blong ol memba blong klas long blakbod.) Olsem wanem Jisas Kraes i wan eksampol blong ol fasin ia? (Askem ol memba blong klas blong tingbaot wan spesel taem we Jisas i soemaot gud wanwan long ol fasin ia.) Olsem wanem yumi save developem ol fasin ia?
- Olsem wanem yumi letem toktok blong Kraes i stap insaed long yumi, olsem we Pol i tijim? (Luk long Kolosi 3:16–17; luk tu long D&C 1:37; 18:34–36.) Olsem wanem ol hym oli save mekem save mo testemoni blong yumi i kam strong long toktok blong Kraes? Olsem wanem yumi save yusum gud ol hym mo ol nara tabu miusik?

Elda Dallin H. Oaks i talem: “Yumi nidim blong yusum moa ol hym blong yumi blong putum yumi long stret rod wetem Spirit blong Lod, blong tekem yumi tugeta, mo blong helpem yumi blong tij mo lanem ol doktrin blong yumi. Yumi nidim blong yusum moa gud ol hym blong yumi long ol tijing blong misinari, long ol gospel klas, long ol kworom miting, long ol hom evning, mo long ol visit blong hom tijing. Miusik i wan gudfala wei blong wosipim Papa blong yumi long Heven mo pikinini blong Hem, Jisas Kraes. Yumi sud yusum ol hym taem yumi nidim blong kam strong long saed blong spirit mo fasin we God i toktok long man” (insaed long Conference Report, Okt. 1994, 13; o *Ensign*, Nov. 1994, 12).

- Oltaem Pol i talemaot olsem wanem fasin blong stap talem tangkyu i impoten (Kolosi 2:7; 3:15, 17). From wanem hem i impoten blong yumi mas talem tangkyu? Olsem wanem nao yumi save soem fasin blong talem tangkyu long Papa long Heven mo long Jisas Kraes long evri samting we yumi stap mekem?

4. Pol i leftemap tingting blong Filimon blong mas fogivim Onesimas.

Toktok raon long leta blong Pol i go long Filimon. Invaetem ol memba blong klas blong ridim ol ves ia we yu bin jusum. Eksplenem se Pol i bin raetem wan leta blong hemwan i go long Filimon, wan memba blong Jos long Kolosi, long bihaf blong Onesimas we i stap olsem slev blong Filimon. Onesimas i bin stilim Filimon mo ronwei i go long Rom, long ples ia we hem i bin mitim Pol mo kam konvet insaed long Jos. Pol i bin askem Filimon blong fogivim Onesimas mo akseptem hem olsem wan brata insaed long gospel.

- Wanem yumi save lanem abaot Pol long leta blong hem i go long Filimon?
- Olsem wanem Pol i soem respek long fridom blong jus blong Filimon? (Luk long Filimon 1:14.) Olsem wanem Pol i soem komitmen blong hem long gud blong Onesimas?
- Wanem yumi save lanem aot long leta ia abaot paoa blong gospel we i save jenisim ol rilisensip blong man? (Luk long Filimon 1:16.) Olsem wanem gospel i afektem ol rilisensip blong yu wetem ol pipol we oli stap raon long yu?

Las Toktok

Testifae se impoten fasin blong stap developem ol fasin we i helpem yumi blong kam moa olsem Jisas Kraes, olsem olgeta ia we oli talemaot insaed long ol leta blong Pol i go long ol man Filipae, ol man Kolosi, mo Filimon. Invaetem ol memba blong klas blong ridim Filipae 4:8 mo Kolosi 3:12–15 mo jusum wan fasin aot long ol ves ia blong wok long hem blong developem long wik ia.

Sam Nara Aedia blong Tij

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Ol rilisensip bitwin ol papa, mama mo pikinini

Mekem wan memba blong klas i ridim Kolosi 3:20–21.

- Folem Pol, wanem i responsabiliti blong wan pikinini long papa mo mama blong hem? Wanem i responsabiliti blong papa mo mama long wan pikinini? Olsem wanem yumi save impruvum rilisensip bitwin papa, mama mo pikinini insaed long famle blong yumi?

2. “Prapa Masta we yufala i wok blong hem, hem i Kraes nomo” (Kolosi 3:24)

Mekem wan memba blong klas i ridim Kolosi 3:23–24.

- Olsem wanem yumi save folem ol toksave blong Pol insaed long ol ves ia? (Luk tu long Matiu 25:34–40.) Wanem i defren maet fasin ia i save soemaot taem yumi stap sev?

“Mi Mi Kamtru Finis long En blong Hem”

Lesen
41

Fas mo Seken Timoti; Taetas

Stamba Tingting Blong leftemap tingting blong ol memba blong klas blong lanem mo tijim tru doktrin mo stap olsem ol stret mo gudfala eksampol long ol naraman.

- Rere long Lesen**
1. Ridim, tingting hevi, mo prea abaot ol skripja ia:
 - a. Fas Timoti 4; Seken Timoti 1–4; Taetas 1. Pol i talemaot ol saen blong apostasi. Hem i tijim se blong stap lanem mo tijim tru doktrin i givhan mo protektem yumi agensem apostasi.
 - b. Fas Timoti 4:12. Pol i tijim se yumi sud stap olsem “wan gudfala eksampol blong ol kristin man.”
 - c. Fas Timoti 6; Taetas 2–3. Pol i tijim se yumi sud “folem ol fasin blong stap stret mo gud” mo lego ol fasin we oli no soem respek long God.
 2. Sam moa riding: Bible Dictionary, “Pauline Epistles: 1 Timothy,” 747; “Pauline Epistles: 2 Timothy,” 748; “Pauline Epistles: Epistle to Titus,” 747; “Timothy,” 785; “Titus,” 785–86.
 3. Sapos yu yusum aktiviti blong pulum tingting, mekemrere ol wodstrip folem ol toktok ia, o rere blong raet long blakbod:

*Blong finisim resis blong mi, mi mas:
Lanem mo tijim tru doktrin
Stap olsem wan eksampol blong ol kristin man
Folem ol fasin blong stap stret mo gud, mo lego ol fasin we i no soem respek long God*
 4. Wan tingting blong tij: Jenisim ol buk o ol samting we yu stap yusum blong tij mo fasin we yu stap yusum long taem yu stap tij. Olsem eksampol, maet yu save yusum ol pikja o luk ol vidio, wan defren teknik blong toktok raon, o wan defren arenjmen blong staon insaed long klas. Defren kaen samting olsem, i save helpem ol memba blong klas blong gat intres long ol lesen. Luk long *Teaching—No Greater Call*, ol pej 56–57 mo 96–97, blong ol buk o ol samting we yu stap yusum mo ol fasin we i stret long ol lesen blong yu.
-

Wan Tingting blong Lesen

Aktiviti blong
Pulum Tingting

- Olsem we i stret, yusum aktiviti ia o wan aktiviti blong yuwan blong statem lesen.
- Wanem i las resis we yu bin kompit long hem o wajem? Wanem i defren bitwin taem wan i *win* o *finisim* wan kompitisen blong resis we oli stap kompit long hem? I gat hamas wina long wan nomol resis? Wanem nao yu sud mekem blong yu win?
 - Olsem wanem rod blong laef blong yumi i olsem wan resis? (Evri pipol oli save winim “resis” blong laef.) Wanem i ol samting blong yumi mekem blong finisim gud resis blong laef blong yumi?

Askem wan memba blong klas blong ridim Seken Timoti 4:7. (Yu save poenemaot se wan “resis” oli save singaotem tu wan “rod.”) Eksplenem se Aposol Pol i bin laef long wan wei we hem i save mekem toktok ia i go wetem en blong laef blong hem. Lesen ia i toktok raon long sam long ol tijing blong Pol we bae i save helpem yumi, taem yumi stap traehad blong finisim gud rod blong yumi.

Soem wodstrip *Blong finisim resis blong mi, mi mas:*

Yusum mo Toktok
Raon long Skripja

Taem yu stap tijim ol skripja ia, tokbaot olsem wanem blong yusum long laef evri dei. Leftemap tingting blong ol memba blong klas blong oli serem ol eksperiens we i go wetem ol prinsipol blong skripja.

Eksplenem se Timoti mo Taetas, tufala i fren blong Pol we tufala i stap givhan long hem blong prijim gospel. Afta we Pol i go long prisen blong fastaem long Rom, hem i bin tekembak ol misinari wokbaot blong hem. Long Efesas, hem i bin lego Timoti blong lukaotem Jos, mo long Krit, hem i bin lego Taetas wetem wan semmak wok. Taem Pol i stap gohed long wokbaot blong hem, hem i bin raetem ol leta blong mekem ol fren ia blong hem oli stap strong mo blong givim kaonsel long tufala long ol responsabiliti blong tufala olsem ol pasta o ol man blong lukaotem Ol Sent. I mekem se ol leta ia oli oltaem singaotem olgeta, ol leta blong ol pasta.

1. Lanem mo tijim tru doktrin.

Toktok raon long Fas Timoti 4; Seken Timoti 1–4; mo Taetas 1. Invaetem ol memba blong klas blong ridim ol ves ia we yu bin jusum.

- Wanem ol saen blong apostasi we Pol i talemaot insaed long ol leta blong hem long Timoti mo Taetas? (Luk long Fas Timoti 4:1–3; Seken Timoti 3:1–7, 13; 4:3–4; Taetas 1:10–11.) Olsem wanem ol saen blong apostasi ia oli stap kamtru tedei? (Luk long 2 Nifae 28:3–9; D&C 1:15–16.) Olsem wanem yumi save protektem yumiwan agensem ol nogud fasin ia?
- From wanem sam pipol oli stap lanem gospel oltaem be oli neva kam blong gat save blong trutok? (Seken Timoti 3:7). Olsem wanem nao yumi save mekemsua se wanem we yumi stap lanem bae i save givim yumi wan save blong trutok?
- From wanem Pol i tijim Timoti abaot ol responsabiliti blong ol pipol we oli stap tijim gospel? (Luk long Fas Timoti 4:6–7, 13–16; Seken Timoti 2:16, 23–25; 3:14–17; 4:2, 5. Yu save listim ol responsabiliti ia antap long blakbod.) Wanem ol janis we yumi gat blong tijim gospel? (Ol ansa i save tekem tu, tijim ol memba blong famle, fulfilim ol koling insaed long Jos, toktok long gospel wetem ol fren mo olgeta we yu stap wetem olgeta oltaem. Poenemaot se wanwan long yumi long sam wei, yumi i wan tija blong gospel.) Olsem wanem yumi save tijim gud gospel?
- Pol i bin tokbaot impoten fasin blong stap tijim mo lanem tru doktrin (Fas Timoti 1:3; 4:6, 13; Taetas 2:1). Olsem wanem blong stap lanem tru doktrin i helpem yumi mo lukaotem yumi agensem apostasi? Wanem i sam long olgeta denja blong ol giaman tijing? Olsem wanem nao taem yumi stap lanem ol tru doktrin blong gospel i blesem laef blong yumi?

Blong stap tokbaot paoa blong tru doktrin, Elda Boyd K. Packer i bin talem:
“Tru doktrin, we yu andastanem, i save jenisim ol aksen mo fasin. Stadi blong ol

doktrin blong gospel bae i impruvum fasin kwiktaem bitim wan stadi blong fasin blong i impruvum fasin. . . . Hemia from wanem mifala i stap talem strong, stadi long ol doktrin blong gospel” (insaed long Conference Report, Okt. 1986, 20; o *Ensign*, Nov. 1986, 17).

- Olsem wanem yumi save sua se wanem we yumi stap tijim i tru doktrin? (Luk long Mosaea 18:19–20; D&C 52:9.)

Elda Joseph B. Wirthlin i bin kaonsel: “God i bin rivilim evri samting we oli impoten blong fasin blong sevem man blong yumi. Yumi sud tijim mo stap insaed long ol samting we Hem i bin rivilim mo stap longwe long fasin blong stap lukaotem ol defdefren niufala samting we i stap hapen. Kaonsel blong mi i go long ol tija insaed long Jos, nomata oli stap tij insaed long ol wod mo stek, ol Jos skul we oli stap lanem ol hae samting, ol institiut blong rilijin, ol seminari, o iven olsem ol papa mo mama insaed long ol hom blong olgeta, hem i blong mekem ol tijing blong olgeta i bes long ol skripja mo ol toktok blong ol profet blong lata-dei” (insaed long Conference Report, Okt. 1994, 101; o *Ensign*, Nov. 1994, 77).

- Wanem Pol i givim kaonsel long yumi blong yumi mekem taem yumi kasem ful doktrin? (Luk long Seken Timoti 1:13; Taetas 1:9.) Yu ting se i minim wanem blong “holem taet”? (Luk long Fas Nifae 15:23–24.)

Sapos yu bin yusum aktiviti blong pulum tingting, soemaot wodstrip *Lanem mo tijim tru doktrin*.

2. “Stap olsem . . . wan gudfala eksampol blong ol kristin man.”

Ridim mo toktok raon long Fas Timoti 4:12.

- Yu ting se i minim wanem blong stap olsem “wan gudfala eksampol blong ol kristin man”? (Fas Timoti 4:12). Olsem wanem wan man i bin pulum tingting blong yu tru long “wan gudfala eksampol blong ol kristin man”?

Listim wanwan wei we Pol i wonem Timoti blong stap olsem wan eksampol. Askem ol memba blong klas blong talemaot, olsem wanem yumi save stap olsem wan eksampol long evri wei ia.

Toktok

Fasin blong jenisim laef (i minim tu aksen o fasin)

Bigfala lav

Spirit

Fet

Klin fasin

Sapos yu bin yusum aktiviti blong pulum tingting, soemaot wodstrip *Stap olsem wan eksampol blong ol kristin man*.

3. “Folem ol fasin blong stap stret mo gud” mo lego ol fasin we oli no soem respek long God.

Ridim mo toktok raon long ol ves ia we yu bin jusum long Fas Timoti 6 mo Taetas 2–3.

- Wanem nao Pol i tijim abaot fasin blong stap laekem mane? (Luk long Fas Timoti 6:7–10.) Long wanem wei se blong stap laekem mane tumas i “stamba

blong olgeta fasin nogud"? Olsem wanem nao yumi save mekemsua se yumi no mas tingting tumas long mane mo long ol narafala samting we i mekem yumi yumi rij? (Luk long Fas Timoti 6:17–19; Jekob 2:18–19.)

Elda Dallin H. Oaks i bin tijim: "I no gat wan samting we oli save luk niu mo nogud abaot mane. Gudfala man Sameria i bin yusum semmak mane ia blong sevem fren blong hem, we Judas tu i bin yusum blong salem Masta long ol enemi blong Hem. Hemia i fasin '*blong stap laekem mane* [we] hem i stamba blong olgeta fasin nogud.' (Fas Timoti 6:10; oli ademap italik.) Impoten wei we i defren long hem, hem i hamas level blong fasin blong gat Spirit we yumi stap eksasaesem taem yumi stap luk, taem yumi stap faenemaot impoten fasin blong hem, mo stap manejem ol samting blong wol ia" (insaed long Conference Report, Okt. 1985, 78; o *Ensign*, Nov. 1985, 63).

- Long ol leta blong hem i go long Timoti mo Taetas, Pol i bin givim plante toksave abaot fasin blong stap laef stret mo gud. Wanem kaonsel nao Pol i givim long ol ves ia: Fas Timoti 6:11–12; Seken Timoti 2:22; Titus 2:1–8, 12; 3:1–2, 8? (Tokbaot smol ol ansa blong ol memba blong klas' antap long blakbod. Toktok raon long wanem nao ol toksave ia i stap minim mo olsem wanem yumi save yusum olgeta insaed long ol laef blong yumi.)

Sapos yu bin yusum aktiviti blong pulum tingting, soemaot wodstrip *Folem ol fasin blong stap stret mo gud mo lego ol fasin we oli no soem respek long God*.

Las Toktok

Eksplenem se Pol i save se kolosap bae oli kilim ded hem from testemoni blong hem long Jisas Kraes. Be hem i bin save tu se from hem i bin stap laef folem gospel, [oli] putum blong [hem] i stap wan praes blong fasin blong stap stret mo gud (luk long Seken Timoti 4:8). Serem testemoni blong yu long impoten fasin blong stap mekem ol stret samting evri dei mo stap oltaem long rod, blong mekem se yumi save talem wetem Pol, "Long laef blong mi we mi mi bilif strong long Kraes*, i olsem we mi mi stap resis strong long wan resis, mo naoia mi mi stap holem strong yet fasin blong bilif" (Seken Timoti 4:7).

Sam Nara Aedia blong Tij

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Sam moa toktok raon long Fas Timoti

- Wanem kaonsel nao Pol i givim abaot prea insaed long Fas Timoti 2:1–3? From wanem yumi sud prea blong evri pipol? Olsem wanem yumi save mekem samting ia i gat moa mining? From wanem yumi sud prea speseli blong ol lida blong ol nesen?
- Insaed long Fas Timoti 3:1–7 Pol i talemaot wanem ol samting we wan bisop i sud gat. From wanem ol kwaliti ia oli impoten blong wan bisop?
- Wanem nao Pol i tijim insaed long Fas Timoti 5:8 abaot fasin blong stap lukaotem gud ol famle blong yumi? Long tingting blong yu, from wanem Pol i tok strong tumas agensem olgeta we oli no stap fulfilim responsabiliti ia?

**2. “Spirit ia we God i givim long yumi, hem i no blong mekem yumi fraet”
(Seken Timoti 1:7)**

Askem wan memba blong klas blong ridim Seken Timoti 1:7.

- Wanem nao sam long olgeta samting we ol pipol oli stap fraet long hem long wol tedei? Wanem promes Pol i givim long Timoti abaot “spirit blong stap fraet”? Olsem wanem yu save faenem se promes ia i tru tumas long stret laef blong yuwan?

3. Stap olsem ol gudfala wokman

Ridim mo toktok raon long Taetas 2:9–10.

- Olsem wanem Pol i bin givim kaonsel long ol wokman insaed long ol ves ia we i aplae tu i go long ol man we oli wok? Olsem wanem nao samtaem ol man we oli wok, oli stap stilim ol masta blong olgeta? (Ol ansa i save tekem tu fasin blong stil, tekem ol samting blong yu nomo yu yusum, o no stap givim wan ful dei wok.)
- Wanem nao Pol i talem blong yumi mekem bitim blong stap stil? (Soemaot “stret fasin,” o stap fetful mo ones.) Wanem risal nao yu bin luk blong stap soem “stret fasin” long ples blong wok?

Stamba Tingting Blong helpem ol memba blong klas oli andastanem ol fasin we yumi sud divelopem blong laef moa gud folem rilijin blong yumi.

Rere long Lesen

1. Ridim, tingting hevi, mo prea abaot ol skripja ia:
 - a. James 1:1–4; 5:10–11. James i tijim se yumi sud winim hadtaem wetem fasin blong save wet longtaem.
 - b. James 1:5–7; 4:8. James i tijim se yumi sud prea long God wetem fet.
 - c. James 1:19–20, 26; 3:2–18. James i tijim se yumi sud kontrolem ol tang blong yumi mo “no mas hariap blong kros.”
 - d. James 1:22–25, 27; 2:14–26; 4:17. James i tijim se yumi sud kam olsem “ol man we oli mekem samting folem toktok”, mo soemaot fet blong yumi tru long ol wok blong yumi.
2. Sam moa Riding: Bible Dictionary, “James,” 709; “James, Epistle of,” 709–10.
3. Wan tingting blong tij: “Tijim tru fasin blong komiunikesen blong wanwan man long mo wetem God. Helpem wanwan man o woman blong andastanem, olsem wanem blong prea wetem fasin we i klin mo i stret mo olsem wanem blong kasem mo harem save ol ansa we i kam long God” (Richard G. Scott, “Four Fundamentals for Those Who Teach and Inspire Youth,” insaed long *CES Old Testament Symposium Speeches, 1987* [1987], 3).

Wan Tingting blong Lesen

Aktiviti blong Pulum Tingting Olsem we i stret, yusum aktiviti ia o wan aktiviti blong yuwan blong statem lesen. Raetem *Wan klin rilijin* antap long blakbod, mo askem ol kwestin ia:

- Wanem nao toktok ia *klin* i stap minim? (Ol ansa i save tekem tu tru wan, stret wan, komplit, mo stret gud.) Wanem nao *rilijin* i stap minim? (Ol ansa i save tekem tu seves mo wosip long God, wan wei blong ol bilif mo praktis, mo wan komitmen o divosen blong wan stret wei blong laef.)
- Olsem wanem nao bae yumi save talemaot stret wan klin rilijin?

Askem wan memba blong klas blong ridim James 1:27. Eksplenem se lesen ia i toktok raon long hao nao yumi save yusum ol tijing blong James blong helpem yumi blong laef folem wan klin rilijin mo stap stret oltaem long fes God.

Yusum mo Toktok Raon long Skripja

Taem yu stap toktok raon long ol tijing insaed long buk blong James, listim olgeta antap long blakbod, andanit long hedding *Wan klin rilijin*. Toktok raon long olsem wanem, wanwan aedia we James i bin tijim i save helpem yumi laef folem wan klin rilijin.

Eksplenem se man we i raetem buk blong Jemes, hem i oltaem gat tingting se hem i brata blong Jisas Kraes. Afta we Jisas i bin laef bakegen, Jemes i bin sev olsem wan Aposol mo hem i wan impoten lida long eli Jos (Ol Wok 12:17; 15:13–20).

1. Yumi sud winim hadtaem wetem fasin blong save wet longtaem.

Ridim mo toktok raon long Jemes 1:1–4; 5:10–11.

- Wanem nao Jemes i tijim long saed blong stap fesem ol tes blong fet blong yumi? (Luk long Joseph Smith Translation blong James 1:2–3 we i soem se laen blong toktok ia *ol defdefren temptesen* i save givim *plante hadtaem*.) Olsem wanem ol tes i helpem yumi developem fasin blong save wet longtaem? Olsem wanem yumi kasem blesing taem yumi winim ol hadtaem wetem fasin blong save wet longtaem? (Luk long Jemes 1:4; Rom 5:3–5; Alma 36:3.)

Elda Orson F. Whitney i bin raetem: “I no gat wan soa we yumi stap harem nogud long hem, wan tes we yumi stap eksperiensem i go nomo olsem. Hem i stap givhan long edukesen blong yumi, long ol kaen developem blong ol kwaliti olsem fasin blong stap wet longtaem, fet, paoa blong fesem ol soa, fasin blong tingting i stap daon. Evri samting we yumi stap harem nogud long hem mo evri samting we yumi stap winim, espeseli taem yumi winim olgeta wetem fasin blong save wet longtaem, i stap bilbimap ol fasin blong yumi, mekem ol hat blong yumi i klin, openem ol sol blong yumi, mo mekem yumi gat moa sore mo gat jareti, mo moa klin blong oli save singaotem yumi, ol pikinini blong God” (oli karemaot toktok long Spencer W. Kimball, *Faith Precedes the Miracle* [1972], 98).

- Huia nao Jemes i tokbaot olsem ol gudfala eksampol blong fasin blong save wet longtaem long taem blong hadtaem? (Luk long Jemes 5:10–11.) Olsem wanem yu stap luk ol profet blong lata-dei ia oli stap soemaot fasin ia blong save wet longtaem? Olsem wanem ol eksampol blong olgeta i bin helpem yu?

2. Yumi sud prea long God wetem fet.

Ridim mo toktok raon long Jemes 1:5–7 mo 4:8.

- Wanem kaonsel nao Jemes i givim long olgeta we “oli no gat waes”? (Luk long Jemes 1:5–6.) Wanem Papa long Heven bae i mekem sapos yumi askem Hem wetem fet? Wanem eksperiens nao yu bin gat long taem yu stap kasem ol ansa blong prea blong yu?
- Olsem wanem nao kaonsel we i stap long Jemes 1:5, i lidim tingting blong Profet Josef Smit? (Luk long Joseph Smith—History 1:11–13.) Wanem yumi save lanem aot long eksperiens blong hem? Olsem wanem nao desisen blong Josef blong folem kaonsel insaed long Jemes 1:5 i afektem yumi? (Luk long Joseph Smith—History 1:14–20.)

Presiden Spencer W. Kimball i bin talem: “From boe blong fotin-yia ia we i bin goaot long ol wud blong prea, olsem we hem i ridim long ol skripja, . . . from se hem i folem ol revelesen we i kam long antap, yumi gat Jos blong Jisas Kraes blong Ol Lata-dei Sent. Yumi gat evri blesing we i save mekem yumi i kam ol pipol we oli save stap glad evritaem long wol, from nomo wan boe blong fotin yia we i bin goaot long ol wud blong prea” (insaed long Conference Report, Melbourne Australia Area Conference 1976, 23).

Sapos yu stap tijim yut, testifae se blong stap askem God wetem fet mo kasem waes oli no limitim long yia o long wan wei. Josef Smit i gat 14 yia taem hem i bin putum toktok blong Jemes long tes mo hem i bin kasem Fas Visen. Hem i gat 17 yia taem enjel Moronae i bin visitim hem mo talemaot weaples oli bin protektem ol gol plet long hem.

- Olsem wanem nao Jemes i talemaot olgeta we oli no stap prea wetem fet? (Luk long Jemes 1:6–7.) Wanem yumi save mekem blong mekem fet blong yumi i kam strong?
- Jemes i bin tijim, “Yufala i mas stap klosap long God, nao hem bambae i kam klosap long yufala” (Jemes 4:8). Olsem wanem wan tru prea i save tekem yumi i kam moa kolosap long God?

3. Yumi sud kontrolem ol tang blong yumi mo “no mas hariap blong kros.”

Toktok raon long Jemes 1:19–20, 26; 3:2–18. Invaetem ol memba blong klas blong ridim laod ol ves ia we yu bin jusum .

- Jemes i bin tijim se yumi “mas rere oltaem blong lisin, be yumi no mas hariap blong toktok” (Jemes 1:19). Wanem eksperiens long laef blong yu we i konfemen waes blong kaonsel ia? Olsem wanem yumi save kam ol gudfala man blong lisin mo ol moa gud man blong toktok?
- Jemes i bin tijim tu we yumi no sud stap “hariap blong kros” (Jemes 1:19). Wanem i sam risal blong stap toktok o mekem ol samting long kros? Wanem eksperiens long laef blong yu we i konfemem waes tingting blong kaonsel blong Jemes? Olsem wanem yumi save winim o kontrolem ol filing blong kros?
- Jemes i bin tijim se yumi sud kontrolem ol tang blong yumi (Jemes 1:26). Wanem i stamba tingting blong wan aean we oli stap putum long maot blong hos? (Hem i blong gaedem mo kontrolem hos.) Olsem wanem yumi save yusum kaonsel ia blong Jemes blong “kontrolem” ol tang blong yumi? (Luk long Jemes 4:11. Ol ansa i save tekem tu, blong stap longwe long fasin blong stap gosip, stap giaman, stap toktok nogud, stap swea, mo ol toktok blong kros. Nomata long hem, yumi sud yusum ol tang blong yumi blong talem ol toktok blong stap kaen, talem trutok, blong prea, mo blong mekem pis.)
- Ridim Jemes 3:3–5. Wanem nao Jemes i komperem tang wetem insaed long ol ves ia? (Bit blong aean we oli stap putum long maot blong hos mo wan wil blong wan sip. Yu save eksplenem se bit i wan pis blong aean we oli stap putum long maot blong hos.) Wanem yumi save lanem aot long fasin blong stap komperem samting ia? Olsem wanem nao blong stap lanem blong kontrolem ol toktok blong yumi i helpem yumi kontrolem ol narafala lukluk long laef blong yumi?
- Ridim Jemes 3:9–13. Wanem nao Jemes i tijim insaed long ol ves ia long saed blong stap kontrolem toktok blong yu? (Toktok raon long ol wei blong save yusum kaonsel ia wetem ol memba blong klas. Olsem eksampol, sapos eni memba blong klas oli ol pris, maet yu save toktok raon long impoten fasin blong kipim toktok blong olgeta i klin truaot long wik, blong mekem se olgeta oli save klin inaf blong blesem sakramen long Sandei. Semmak rikwes ia bae i save go tu long olgeta we oli stap tijim gospel.)

- Olsem wanem nao blong stap kontrolem ol tang blong yumi i helpem yumi blong gat pis? (Luk long Jemes 3:16–18.) From wanem blong stap kontrolem ol tang blong yumi i wan impoten pat blong wan klin rilijin?

4. Yumi sud kam olsem “ol man we oli mekem samting folem toktok”, mo soemaot fet blong yumi tru long ol wok blong yumi.

Ridim mo toktok raon long ol ves ia we yu bin jusum long Jemes 1:22–25, 27; 2:14–26; 4:17.

- Wanem i mining blong stap olsem man blong lisin long toktok nomo? (luk long Jemes 1:22). Long wanem wei nao blong stap olsem man blong lisin nomo i stap trikim olgetawan? (Luk long Jemes 1:22–25; 4:17.) Wanem i ol blesing blong “ol man we oli mekem samting folem toktok”?
- Wanem nao Jemes i tijim abaot rilisensip bitwin fet mo ol wok? (Luk long Jemes 2:14–26.) From wanem fet i ded nomo sapos i no gat ol wok? Olsem wanem ol gudfala wok i mekem fet blong yumi i strong long Jisas Kraes?
- Wanem nao Jemes i talemaot we yumi sud mekem blong stap laef long wan klin rilijin (Luk long Jemes 1:27 o helpem ol memba blong klas blong tingbaot aktiviti blong pulum tingting.) Long tingting blong yu, from wanem nao blong stap visitim mo helpem ol pipol we oli stap long nid i pat blong wan klin rilijin?
- Wanem nao yumi save mekem blong yumi stap klin oltaem, we bambae ol rabis fasin blong wol oli no spolem yumi? (luk long Jemes 1:27; luk long D&C 59:9). Olsem wanem nao blong stap atendem jos mo kakae sakramen evri wik i helpem yumi blong stap klin aot long wol?

Las Toktok

Testifae long trutok blong ol tijing blong Jemes. Talemaot se yumi save laef moa gud wetem klin fasin folem rilijin blong yumi taem yumi gat fasin blong save wet longtaem long ol hadtaem, prea long God wetem fet, lukaotem mo kea long yumiwan, mo stap mekem ol gudfala wok.

Sam Nara Aedia blong Tij

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Presentesen blong memba blong klas

Long wik bifo yu tijim lesen ia, askem faef memba blong klas blong olgeta wanwan i stadi long ol defdefren japta blong Jemes. Long stat blong klas (jes afta long aktiviti blong pulum tingting, sapos yu yusum), mekem olgeta pipol ia oli serem wanem we oli andastanem insaed long ol japta we oli bin stadi long hem.

2. Vidio presentesen

Ridim Jemes 1:27 mo afta soem “The Body Is a Temple,” wan sikis-minit pat blong vidio insaed long *New Testament Video Presentations* (53914). Toktok raon long wanem vidio presentesen ia i tijim abaot fasin blong stap kipim yumiwan i klin aot long wol.

3. Sam moa toktok raon long buk blong Jemes

- Insaed long Joseph Smith Translation blong James 1:12, toktok ia *endureth* hem i jenis i kam long *resisteth* (luk long footnote 12b). Wanem i defren bitwin blong stap winim temtesem mo stap longwe long temtesen? Wanem i ol promes blong olgeta we oli stap stap longwe long temtesen? (Luk long Jemes 1:12; 4:7.)
- Wanem nao Jemes i tijim long saed blong stap jajem ol naraman? (Luk long Jemes 2:1–9.) From wanem sam pipol oli stap jajem ol naraman tru long ol posisen blong olgeta blong wol o long ol samting blong wol blong olgeta? Olsem wanem yumi save lanem blong lukluk ova long aotsaed laef blong wan man mo go insaed long ol hat blong ol pipol, olsem we God i stap mekem? (Luk long Fas Samuel 16:7; D&C 38:24–27.)
- Wanem nao Jemes i tijim abaot ol wok blong fasin blong jalus mo fasin blong stap laekem samting blong naraman? (Luk long Jemes 3:16; 4:1–6.) Olsem wanem yumi save winim ol filing blong jalus o fasin blong stap laekem samting blong naraman? (Luk long Jemes 4:7–10.)
- Wanem Jemes i tijim long saed blong stap givhan long olgeta we oli sik? (Luk long Jemes 5:14–15.) Olsem wanem yu bin kasem blesing o luk ol naraman i bin kasem blesing tru long hiling paoa blong prishud?
- Jemes i bin talemaot gud impoten fasin blong helpem ol pipol we “oli gowe long trutok” (Jemes 5:19–20). Olsem wanem yumi save mekem samting ia?

“God i Jusumaot Yufala blong Yufala i Laen blong Hem”

Lesen
43

Fas mo Seken Pita; Jud

Stamba Tingting Blong helpem ol memba blong klas blong laef long holines mo stap olsem wan jeneresen we God i jusumaot.

- Rere long Lesen**
1. Ridim, tingting hevi, mo prea abaot ol skripja ia:
 - a. Fas Pita 1; 2:1–10. Pita i tijim se yumi mas gat fet mo laef long holines. Hem i tijim se Ol Sent oli wan jeneresen we oli jusumaot olgeta, oli bin kolem olgeta blong soemaot ol gudgudfala samting we Sevyia i mekem.
 - b. Fas Pita 2:19–24; 3:13–17; 4:12–19. Pita i tijim se yumi mas folem eksampol blong Sevyia blong winim ol tes mo fasin blong stap givim hadtaem.
 - c. Seken Pita 1. Pita i wonem yumi blong kasem ol presen we i kam antap mo lukaotem wetem strong tingting blong wokem gud ol koling blong yumi mo eleksen.
 - d. Seken Pita 2–3; Jud. Pita mo Jud i stap givim woning agensem ol giaman tija mo olgeta we oli stap tanembak long seken kaming. Tufala i wonem ol man we oli stap folem Kraes blong stap fetful.
 2. Sam moa riding: Fas Jon 3:2–3; 3 Nifae 12:48; Doctrine and Covenants 122:7–8.
 3. Wan tingting blong tij: Stadi gud long wanwan lesen we yu save tijim blong yu no save stap lukluk oltaem long lesen buk. Blong save ol tul blong yu i alaowem yu blong lukluk stret oltaem long ae blong ol memba blong klas long taem yu stap tij. Oltaem lukluk stret long ae i impruvum fasin blong stap tekpat blong ol memba blong klas’ mo olsem wanem oli ak mo i helpem yu serem lav mo wari blong yu long olgeta. (Luk long *Teaching—No Greater Call*, 107–8.)
-

Wan Tingting blong Lesen

Aktiviti blong Pulum Tingting

Olsem we i stret, yusum aktiviti ia o wan aktiviti blong yuwan blong statem lesen. Serem stori ia we Bisop Vaughn J. Featherstone i bin talem:

“Plante yia i pas, mi bin harem stori blong pikinini blong King Louis XVI(16) blong Franis. Oli bin tekemaot King Louis long trong blong hem mo sarem hem long kalabus. Olgeta we oli bin tekemaot king long trong blong hem, oli tekem tu yangfala boe blong hem we hem i prins. Oli bin gat tingting se nomata long hemia, pikinini blong king nao bae i kam nekis man blong stap long trong, mo sapos oli save spolem strong tingting blong hem, bae hem i neva save tingbaot bigfala stamba tingting ia se laef oli bin putum antap long hem.

“Olgeta oli bin tekem hem i go long wan komiuniti we i stap longwe, mo long ples ia oli talemaot long hem sam samting we oli nogud mo i rabis long yangfala boe ia, we laef i save givim. . . . Blong ova sikis manis, oli bin tritim hem olsem—be yangfala boe ia i no lusum nating strong tingting blong hem. Las samting, afta

long bigfala temtesen ia, olgeta oli bin askem ol kwestin long hem. From wanem hem i no askem olgeta samting ia—from wanem hem i no kakae? Ol samting ia, bae oli givim glad, givim long hem wanem i stap laekem, mo we oli naes tumas; evriwan i blong hem. Boe ia i bin talem, ‘mi no save mekem wanem we yufala i askem mi blong mekem from se mi bon blong kam wan king’ ” (“The King’s Son,” *New Era*, Nov. 1975, 35).

Bisop Featherstone i bin givim komen:

“Papa blong yumi i wan king, mo hem i olsem pikinini blong king we i bin aot long ol samting nogud mo ol giaman samting long laef ia, so bae yu tu yu mas aot long jeneresen blong yumi tedei we i gat rabis fasin mo i pua. Be yu . . . yu bon tu blong kam olsem ol king mo kwuin, ol pris mo ol woman pris” (*New Era*, Nov. 1975, 35).

- Olsem ol spirit pikinini blong Papa blong yumi long Heven, wanem i stamba tingting blong yumi? Olsem wanem save long saed blong stamba tingting blong yumi we i blong antap i givhan long yumi long wei we yumi laef?

Talemaot gud se olsem ol pikinini blong Papa blong yumi long Heven, yumi save kam olsem Hem mo gat evri samting we Hem i gat. Ol leta blong Pita mo Jud i givimaot ol impoten tijing blong helpem yumi blong laef long klin fasin olsem ol pikinini blong God.

Yusum mo Toktok
Raon long Skripja

Wetem prea, selektem ol toktok blong skripja, ol kwestin, mo ol nara lesen buk we bae i save mitim gud ol nid blong ol memba blong klas. Toktok raon long olsem wanem ol skripja ia oli aplae long laef evri dei. Leftemap tingting blong ol memba blong klas blong oli serem ol eksperiens we i go wetem ol prinsipol blong skripja.

1. Laef wetem fet mo holines olsem wan jeneresen we oli jusumaot.

Toktok raon long Fas Pita 1 mo 2:1–10. Invaetem ol memba blong klas blong ridim ol ves ia we yu bin jusum.

- Wanem nao Pita i tijim insaed long japta 1 abaot misin blong Jisas Kraes? (Luk long Fas Pita 1:3–4, 18–21.) Olsem wanem blong yumi sud save abaot misin mo sakrifaes blong Sevyia i stap afektem ol aksen blong yumi evri dei? (Luk long Fas Pita 1:8, 13–16, 22–23; 2:5. Yu save listim ol ansa blong ol memba blong klas antap long blakbod.)
- From wanem Fet i moa gud bitim gol, olsem we Pita i talem? (Luk long Fas Pita 1:7; Hibrus 11:6; 1 Nifae 7:12.) Yu ting se i minim wanem blong oli traem fet blong yu wetem faea? Wanem hem i bigfala stamba tingting blong fet blong yumi? (Luk long Fas Pita 1:5, 9.)
- Pita i bin tijim se ol profet we oli stap testifae long Jisas Kraes oli bin askem mo lukaotem samting wetem strong tingting (Fas Pita 1:10; luk long ves 11). Olsem wanem nao blong stap prea had mo stadi long skripja i save mekem ol testemoni blong yumi long Sevyia i kam strong moa?
- Huia nao i jeneresen we oli jusumaot we Pita i stap tokbaot? (Luk long Fas Pita 2:9–10 mo toktok we i stap daon.) Wanem i wok blong yumi olsem wan jeneresen we oli jusumaot? (Luk long Fas Pita 2:9.) Olsem wanem yumi save fulfilim wok ia? (Luk long Matiu 5:16.)

Elda Bruce R. McConkie i bin talemaot wan jeneresen we oli jusumaot olsem “i no olgeta we oli stap laef long eni taem o ej, be. . . haos blong Isrel, i tekem tu olgeta blong olfala taem, olgeta long taem blong Kraes, mo long ol lata-dei ia. . . . [Hem i tekem tu] ol fetful memba blong Jos we oli bin tekem antap long ol nem blong Kraes mo oli adoptem olgeta i kam long famle blong hem” (*Doctrinal New Testament Commentary*, long ol buk 3. [1966–73], 3:294).

2. Folem eksampol blong Sevyta blong winim ol tes mo fasin blong givim hadtaem.

Ridim mo toktok raon long Fas Pita 2:19–24; 3:13–17; 4:12–19.

- Pita i bin raetem se “Kraes, hem i harem nogud long bodi blong hem, blong sevem yufala, mo hem i soemaot fasin ya long yufala” (Fas Pita 2:21). Wanem nao yumi save mekem blong save folem eksampol blong Sevyta blong stap winim ol tes mo ol hadtaem we oli stap kam long yumi? (Luk long Fas Pita 2:19–23.) Wanem eksampol nao we yu bin luk long ol pipol we oli gat fasin olsem Kraes we oli stap winim ol tes long laef blong ol? Olsem wanem nao yumi kasem blesing taem yu stap folem eksampol blong Sevyta blong stap winim ol tes?
- Long wanem taem yu (o eni man we yu save) i bin fesem hadtaem from fasin blong stap mekem tingting blong Lod? Olsem wanem nao Pita i givim kaonsel long yumi blong ansa long ol kaen sitiuesen olsem? (Luk long Fas Pita 3:13–17; 4:12–19. Yu save listim daon ol ansa blong ol memba blong klas’ antap long blakbod.) Long wanem wei ol tes oli save givim yumi wan janis blong kam moa kolosap long Lod mo blong givim glori long Hem?

3. Gat ol samting we i blong antap mo traem blong wokem gud koling blong yu mo eleksen.

Ridim mo toktok raon long ol ves ia we yu bin jusum long Seken Pita 1.

- Wanem nao ol kaen fasin we Pita i talemaot olsem pat blong wan samting we i kam antap? (Luk long Seken Pita 1:4–7. Listim daon ol fasin ia antap long blakbod.) From wanem nao hem i impoten se yumi sud developem ol kwaliti ia? (Luk long Seken Pita 1:8.) Yu stap luk ol nara man oli soemaot ol fasin ia olsem wanem?
- Pita i wonem Ol Sent blong traehad blong wokem gud ol koling blong olgeta mo eleksen (luk long Seken Pita 1:10). Wanem nao mining blong wokem gud koling blong yu mo eleksen? (Blong kasem long Lod wan toktok o promes blong kam olsem God insaed long selestiel kingdom. Wan man o woman we i save mo mekemsua se koling mo eleksen blong hem i gud se hem i bin sil blong laef we i no save finis, tru long revelesen mo spirit blong profesi [luk long D&C 131:5]. Josef Smit i bin kasem promes ia we i kam long Lod, olsem we oli bin rekodem insaed long Doctrine and Covenants 132:49.)
- Wanem yumi mas mekem blong wokem koling mo eleksen blong yumi?

Profet Josef Smit i bin tijim: “Afta we wan man i gat fet long Kraes, i sakem ol sin blong hem, mo hem i baptaes blong hem i kam klin long ol sin mo hem i kasem Tabu Spirit (long fasin blong putum han antap long hed blong man),. . . nao letem hem i gohed blong hem i putum tingting blong hem i stap daon long fored blong God, mo i tosta mo hangre long stret mo gud fasin, mo laef folem

evri tok blong God, mo Lod be i talem long hem se, Pikinini blong mi, bambae yu save kam olsem wan God. Taem we Lod i pruvum hem, mo i faenem se man ia i gat strong tingting blong sevem Hem long eni samting, nao man ia bae i faenem se i tru, God i bin singaotem mo jusum hem” (*Teachings of the Prophet Joseph Smith*, sel. Joseph Fielding Smith [1976], 150).

4. Stanap strong agensem ol giaman tija mo olgeta we oli no stap bilif long Taem we Jisas i Kambak.

Ridim mo toktok raon long ol ves ia we yu bin jusum long Seken Pita 2–3 mo Jud. Eksplenem se Jud i boe blong Josef mo Meri mo hem i wan brata blong Jisas.

- Pita mo Jud i bin givim woning se bae i gat ol giaman tija long medel blong ol memba blong Jos. Wanem nao tufala i talem we i sam fasin blong ol giaman tija? (Luk long Seken Pita 2:1–3, 10, 12–19; Jud 1:4, 8, 10–13, 16, 18–19.) Olsem wanem blong yumi luksave ol giaman tija tedei?
- Wanem kaonsel nao Pita mo Jud i givim we i save helpem yumi blong stap longwe long ol giaman tijing mo stap fetful oltaem blong yumi stap mekem rere long Kambak Bakegen blong Kraes? (Luk long Seken Pita 3:11–14, 17–18; Jud 1:3, 20–21; luk tu long Moronae 7:12–17; D&C 45:57; 46:7–8.)

Las Toktok

Testifae abaot ol trutok we yufala i bin toktok raon long ol. Leftemap tingting blong ol memba blong klas blong folem ol tijing blong Pita mo Jud taem olgeta oli stap traem blong laef wetem fet mo holines.

Sam Nara Aedia blong Tij

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Sam moa toktok raon long Fas Pita

- Insaed long Fas Pita 1, wanem nao Pita i bin komperem bitwin wanem we i save nogud o save finis mo wanem we i no save nogud o no save finis? (Luk long Fas Pita 1:4, 7, 18–19, 23–25. Listim ol ansa blong ol memba blong klas' antap long blakbod andanit long tu heding: *Save nogud o Save finis* mo *i no save nogud o i no save finis*.) Wanem nao yumi save lanem aot long fasin blong komperem samting ia?
- Pita i bin tijim se “taem God i no mekem wol ia yet, hem i jusumaot Jisas finis” blong kam olsem Sevyia (Fas Pita 1:20; luk tu long Revelesen 13:8). From wanem trutok ia i impoten? Wanem nao ol skripja i rivilim long ol lata dei ia, we i sapotem save blong yumi abaot fasin ia we Sevyia oli bin odenem long laef bifo? (Luk long Moses 4:1–4; Abraham 3:27–28.)
- Wanem kaonsel nao Pita i givim abaot ol loa blong kantri? (Luk long Fas Pita 2:13–15.) Wanem kaonsel Lod i bin rivilim long ol lata dei ia abaot ol loa blong kantri? (Luk long D&C 58:21–22; 98:4–10; 134:5; Ol Toktok blong Bilif 1:12.)
- Wanem nao Pita i tijim abaot wok ia blong stap prijim gospel long olgeta we oli ded finis? (Luk long Fas Pita 3:18–20; 4:6.) Long wanem taem Jisas i go long spirit wol blong oganaesem wei ia blong prijim gospel long olgeta we oli ded finis? (Luk long D&C 138:27.) From wanem Hem i mekem samting ia?

(Luk long D&C 138:29–37.) Wanem wok blong Sevyia long spirit wol i soemaot abaot wok blong God? (Ol ansa i save tekem tu se, from stret jastis mo sore blong God, evri pipol we bae oli laef long wol bae oli gat wan janis blong akseptem gospel mo glad long ol gudfala blesing blong Hem.)

- Wanem kaonsel nao Pita i bin givim long ol lida blong Jos insaed long Fas Pita 5:1–4? Olsem wanem ol lida blong Jos “oli mas lukaotem gud ol sipsip blong God”? (Fas Pita 5:2; luk tu long Seken Pita 1:12–15; D&C 42:12–14). Olsem wanem yu bin kasem blesing tru long ol lida blong Jos we oli stap folem kaonsel ia?

2. I no gat wan skripja we oli save tanem toktok long fasin blong yuwan (luk long Seken Pita 1:20)

- Ridim Seken Pita 1:20–21. Wanem nao Pita i tijim long ves ia abaot stamba fasin blong ol skripja? Wanem nao Pita i tijim long saed blong stap tanem lanwis we i stap long skripja? Olsem wanem yumi save mekemsua se yumi stap tanem stret ol toktok we i stap insaed long ol skripja? (Ol ansa i save tekem tu, blong stap lukaotem ol save we i kam long ol lida blong Jos, long fasin blong tanem lanwis mo blong stap lukaotem gaedens blong Tabu Spirit.) Olsem wanem ol tijing blong ol lida blong Jos o gaedens blong Spirit i bin helpem yu blong andastanem wan stret skripja?

“God I Stamba blong Fasin Ya blong Lavem Man”

Fas, Seken, mo Nambatri Jon

Stamba Tingting Blong helpem ol memba blong klas blong andastanem, olsem wanem Papa mo Pikinini i soem lav blong Tufala long yumi mo olsem wanem yumi sud soem lav blong yumi long Tufala.

- Rere long Lesen**
1. Ridim, tingting hevi, mo prea abaot ol skripja ia:
 - a. Fas Jon 2:28–29; 3:1–2; 4:7–19; 5:1, 11–15. Jon i tijim se Papa long Heven i soem lav blong Hem long yumi tru taem Hem i givim wan wei long yumi blong kam olsem Hem mo kasem laef we i no save finis.
 - b. Fas Jon 1:7–9; 2:1–2; 3:5–8, 16; 5:11–13. Jon i tijim se Jisas i soemaot lav blong Hem long yumi tru long sakrifaes blong Hem blong pemaot sin, we i givim janis long yumi blong kam olsem Papa blong yumi long Heven.
 - c. Fas Jon 2:3–17; 3:9–24; 4:4–21; 5:1–10; Seken Jon; Nambatri Jon. Jon i tijim se yumi soem lav blong yumi long Papa long Heven mo Jisas Kraes long taem yumi obei mo long taem yumi lavem wanwan long yumi.
 2. Sam moa riding: Moronae 7:48; Doctrine and Covenants 45:3–5.
 3. Sapos yu yusum aktiviti blong pulum tingting, tekem wan foto blong famle o wan long olgeta pikja ia: Famle i Wok Tugeta (62313); Pleiplei blong Famle (62384); o Famle blong Oltaem (Gospel Art Pikja Kit 616).
 4. Wan tingting blong tij: “Lav, fasin blong kea, strong tingting blong wok, sakrifaesem yuwan, stadi long skripja, mo prea i givim wan fandesen long saed blong spirit long tijing blong yu. Putum ol samting ia tugeta taem yu stap priperem ol lesen blong yu, bae i helpem yu blong krietem ol lesen folem fasin blong spirit insaed long maen mo hat blong yu bifo yu tijim ol lesen long ol memba blong klas blong yu” (*Teaching—No Greater Call*, iii).
-

Wan Tingting blong Lesen

Aktiviti blong
Pulum Tingting

Olsem we i stret, yusum aktiviti ia o wan aktiviti blong yuwan blong statem lesen. Soem wan pikja blong wan famle.

- Wanem sam wei we ol papa mo mama oli soem lav blong olgeta long ol pikinini blong ol? Olsem wanem ol pikinini oli soem lav blong olgeta long ol papa mo mama blong ol, mo ol brata, mo ol sista blong ol?
- Long wanem wei nao, yumi evriwan i memba blong sem famle?

Helpem ol memba blong klas blong tingbaot se blong sapotem tingting ia blong stap olsem famle blong wol, wanwan long yumi i wan spirit pikinini boe mo gel blong Papa blong yumi long Heven, we i stap lavem yumi mo gat strong tingting blong blesem yumi. Long leta blong hem, Jon i talemaot bakegen, olsem wanem Papa mo Pikinini i soem lav blong Tufala long yumi mo olsem wanem yumi save soem lav blong yumi long Tufala.

Taem yu stap tijim ol skripja ia, tokbaot olsem wanem blong yusum long laef evri dei. Leftemap tingting blong ol memba blong klas blong oli serem ol eksperiens we i go wetem ol prinsipol blong skripja.

1. Ol fasin blong soemaot lav blong Papa blong yumi long Heven long yumi

Toktok raon long ol ves we oli listim i stap daon. Yu save talem sot toktok raon ia antap long blakbod blong stap raetem daon ol fasin blong soemaot lav blong God.

- Sapos yu stap yusum wan toktok blong talemaot gud Papa long Heven, wanem nao i toktok ia? Wanem toktok Jon i yusum blong talemaot gud Papa long Heven long Fas Jon 4:8, 16? From wanem hemia i wan stret toktok?
- Ridim Fas Jon 3:1–2. Wanem fasin blong soemaot lav blong God we Jon i tokbaot insaed long ol ves ia? (God bae i singaotem yumi ol pikinini blong Hem mo mekem yumi olsem Kraes—gat glori, stap antap, mo kasem ol gudgudfala samting blong Hem; luk tu long Rom 8:14–17.) Wanem yumi mas mekem blong oli singaotem yumi ol pikinini blong God (Luk long Jon 2:28–29; 4:7; 5:1; Galesia 3:26–27; Mosaea 5:5–9; Moronae 7:48. Eksplenem se taem yumi evriwan i spirit pikinini blong God, ol toktok ia “ol pikinini blong God” we oli yusum insaed long Fas Jon 3:1–2 i stap tokbaot olgeta we oli tekem nem blong Kraes antap long olgeta tru long baptaes mo gat ona long nem blong Hem tru long fet mo fasin blong stap stret mo gud.)
- Ridim Fas Jon 4:9–10. Wanem fasin blong soemaot lav blong God we Jon i tokbaot long ol ves ia? (Luk tu long Jon 3:16; 1 Jon 5:11; 2 Nifae 9:10). Olsem wanem nao i sendem pikinini blong Hem blong pemaot ol sin blong yumi i stap soemaot lav we Papa long Heven i gat long yumi?
- Ridim Fas Jon 4:13. Wanem fasin blong soemaot lav blong God we Jon i tokbaot insaed long ves ia? Olsem wanem Spirit hem i wan impoten presen insaed long laef blong yu?
- Jon i bin tijim se Papa long Heven bae i ansarem ol prea blong yumi sapos yumi askem folem tingting blong Hem (Fas Jon 5:14–15). Olsem wanem nao prea i bin helpem yu filim lav blong Papa long Heven?
- Jon i bin tijim se “yumi stap lavem [God] mo ol narafala man, from we God i lavem yumi fastaem” (Fas Jon 4:19). Wanem sam long ol wei we God i bin soem lav blong Hem we Hem i gat long yu? Olsem wanem yu stap filim taem yu stap tingting long ol wei we God i stap soem lav blong Hem long yu?

Presiden Thomas S. Monson i bin talem: “Plan blong Papa blong yumi long Heven i tekem plante kaen fasin blong tru lav. Evri samting we yumi laekem tumas –iven ol famle blong yumi, ol fren blong yumi, glad blong yumi, save blong yumi, ol testemoni blong yumi—bae oli go lus nomo sapos hem i no from Papa mo Pikinini blong Hem, Lod Jisas Kraes. . . . Wol i no bin witnesem kaen bigfala presen olsem ia,, we oli save olsem wan lav we i stap longtaem finis bitim eni nara samting” (insaed long Conference Report, Epr. 1993, 77; o *Ensign*, Mei 1993, 62–63).

2. Ol fasin blong soemaot lav blong Sevyia long yumi

Toktok raon long ol ves we oli listim i stap daon.

- Ridim Fas Jon 3:16. Wanem fasin blong soemaot lav blong Sevyia we Jon i tokbaot insaed long ves ia? Wanem ol blesing we yumi save kasem tru long

sakrifiaes blong pemaot sin blong Sevyia? (Luk long Fas Jon 1:7–9; 5:11–13; 2 Nifae 9:11–13; Alma 11:40–44. Yu save raetem daon ol ansa blong ol memba blong klas' antap long blakbod taem yufala i stap toktok raon long ol ves ia.)

- Ridim Fas Jon 2:1–2. Wanem fasin blong soemaot lav blong Sevyia we Jon i stap tokbaot insaed long ol ves ia? Wanem i wan sapota? (Wan man we i putum hemwan long ples blong narawan.) Wanem nao Jisas i we i olsem sapota blong yumi, i mekem blong yumi? (Luk long D&C 45:3–5.)
- Jon i tijim se Pikinini blong God i kam blong spolem gud ol wok we devel i stap mekem (Fas Jon 3:8). Olsem wanem laef blong Sevyia mo ol tijing blong Hem i spolem gud ol wok blong devel?

3. Soemaot lav blong yumi long Papa long Heven, Jisas Kraes, mo ol naraman

Toktok raon long ol ves we oli listim i stap daon. Yu save tokbaot smol toktok raon ia antap long blakbod blong stap raetem daon ol wei we yumi save soemaot lav long Papa long Heven mo Jisas Kraes.

- Ridim Fas Jon 2:3–6. Wanem yumi save lanem aot long ol ves ia abaot olsem wanem blong soemaot lav blong yumi long God? (Luk tu long Jon 14:15; Fas Jon 3:24; 5:3; Seken Jon 1:6.) Olsem wanem nao taem yumi obei i stap soemaot lav blong yumi long God?
- Ridim Seken Jon 1:4 mo Nambatri Jon 1:4. Olsem wanem taem yumi stap fetful i stap mekem Papa blong yumi long Heven i glad?
- Ridim Fas Jon 2:15–17. Wanem yumi save lanem aot long ol ves ia abaot olsem wanem blong soemaot lav blong yumi long God? Olsem wanem samtaem yumi stap soem lav long wol bitim we, blong soem long God? Hao nao i afektem yumi taem yumi stap soem lav long wol? Olsem wanem yumi save winim fasin blong stap lavem ol samting blong wol?
- Ridim Fas Jon 4:7–8, 11. Wanem yumi save lanem aot long ol ves ia abaot olsem wanem blong soemaot lav blong yumi long God? (Luk tu long Fas Jon 3:11, 23; 4:21.) Olsem wanem nao Jon i tokbaot olgeta we oli stap klemem se oli lavem God be oli no “lavem olgeta wanwan”? (Luk long Fas Jon 2:9, 11; 3:14–15, 17; 4:20.) From wanem lav blong yumi long ol naraman i semmak olsem we yumi lavem God? Olsem wanem yumi save kam blong filim mo soemaot bigfala lav long yumi wanwan? Olsem wanem yu bin kasem blesing tru taem wan naraman i lavem yu?

Sapos yu bin yusum aktiviti blong pulum tingting, soemaot pikja blong ol famle bakegen mo askem ol kwestin ia:

- Wanem i ol blesing blong laef insaed long wan famle we ol memba blong hem oli gat lav long olgeta wanwan mo lavem God? Olsem wanem yumi save helpem ol naraman i glad long ol sem blesing ia, olsem pat blong famle blong God?

Las Toktok

Testifae long bigfala lav we Papa long Heven mo Jisas Kraes i gat long yumi. Leftemap tingting blong ol memba blong klas blong tingbaot ol tijing blong Jon taem olgeta i stap traem blong soemaot lav blong olgeta long Papa long Heven mo Jisas Kraes mo long ol nara pipol.

Sam Nara Aedia blong Tij

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. “Wokbaot long delaet” (Fas Jon 1:7)

Ridim Fas Jon 1:6–7.

- Wanem mining blong “wokbaot long tudak”? Wanem mining blong “wokbaot long delaet”? (Olsem pat blong toktok raon blong yu long ol kwestin ia, yu save mekem ol memba blong klas blong singsing “Tijim mi blong folem laet ya blong God.” Luk long *Hymn*, no. 66, o *Children’s Songbook*, 177.)

2. Woning blong Jon agensem spirit blong go agensem Kraes

- Insaed long ol leta blong hem, Jon i bin wonem bakegen Ol Sent blong lukaot long ol giaman profet we oli stap go agensem Kraes. Wanem nao Jon i talem we ol giaman profet we oli stap go agensem Kraes bae oli traem blong mekem? (Luk long Fas Jon 2:22–23; 4:1–3; Seken Jon 1:7.) Long tingting blong yu, from wanem enemi i stap traem blong spolem ol testemoni blong yumi long Sevyas? Wanem yumi save mekem blong kipim ol testemoni blong yumi i stap strong?

Elda M. Russell Ballard i bin tijim: “Yumi wanwan mo testemoni blong yumiwan long trutok blong gospel, hemia blong laef we i blong antap mo misin blong Lod Jisas Kraes, hem i impoten tumas long laef we i no save finis blong yumi. . . . Laef we i no save finis i bes long yumi wanwan mo save blong yumiwan long saed blong Papa blong yumi long Heven mo long Tabu Pikinini blong Hem. Blong jes save nomo abaot Tufala, hem i no inaf. Yumi mas gat ol eksperiens blong yumiwan long saed blong spirit, blong save holemtaet yumi long ol testemoni blong yumi. Hemia i save kam tru taem yumi lukaotem olgeta long sem strong tingting mo wan maen we i wan nomo, olsem wan man we i hangre mo i stap lukaotem kakae” (insaed long Conference Report, Epr. 1996, 111; o *Ensign*, Mei 1996, 80).

3. “I no gat man we i luk God samtaem” (Fas Jon 4:12)

Sapos ol memba blong klas oli stap gat tingting long wanem Fas Jon 4:12 i minim, se wan man i no save luk God, soemaot long olgeta ves we i stap insaed long Joseph Smith Translation we i givim ansa long toktok ia, we i se i no gat wan man i save luk God long eni taem, be nomo olgeta we oli biliv (luk long Fas Jon 4:12). Poenemaot se plante profet oli bin luk God. Luk long Eksodas 33:9–11; Jon 6:46; Ol Wok 7:55–56; Doctrine and Covenants 67:10–12; Moses 1:1–2; Abraham 3:11; Joseph Smith—History 1:16–17.

4. Toktok raon blong Yut

Folemap long aktiviti blong pulum tingting wetem moa infomesen long toktok raon blong olsem wanem ol yut oli save soem moa lav long ol papa mo mama blong olgeta. Leftemap tingting blong ol memba blong klas blong folem samting wetem ol aedia blong olgeta, mo askem olgeta blong redi blong serem ol eksperiens blong olgeta long nekis wik.

5. Ol hym abaot lav

Jusum wan hym abaot lav. Arenjem blong gat wan smol grup blong ol memba blong klas blong singsing wan hym, o singsing wan hym olsem wan klas, ridim ol toktok blong hem, o pleiem wan we oli bin rekodem finis.

“Man We i Winim Faet blong Hem, I gat Promes blong Mi i Stap long Hem”

Revelesen 1–3; 12

Stamba Tingting Blong helpem ol memba blong klas oli andastanem sam long ol blesing we bae i kam long olgeta we oli winim ol tes blong wol ia tru long testemoni blong olgeta long saed blong Jisas Kraes.

- Rere long Lesen**
1. Ridim, tingting hevi, mo prea abaot ol skripja ia:
 - a. Revelesen 1:1–3, 9–20. Jon i kasem toksave blong rikodem revelesen we hem i stap kasem tru long wan enjel. Jon i luk long revelesen, samfala saen we i ripresentem ol pat blong Jos blong Jisas Kraes.
 - b. Revelesen 2–3. Tru long Jon, Lod i tijim ol seven branj blong Jos long Esia abaot ol bigfala blesing we oli stap we i blong kam long olgeta we oli winim ol tes mo ol temtesen blong wol ia.
 - c. Revelesen 12. Jon i luk long visen Wo long Heven mo fasin we i stil stap gohed long wol ia. Hem i lanem se Ol Sent oli winim Setan tru long Atonmen blong Sevyia mo long ol testemoni blong olgeta.
 2. Sam moa riding: Revelesen 21:7; Bible Dictionary, “Revelesen of Jon,” 762–63.
 3. Sapos yu yusum aktiviti blong pulum tingting, mekemrere blong yusum ol pikja (fasin blong eskplenem moa klia) long pej “00(191)”. Yu save droem ol pikja ia i moa bigwan antap long blakbod o long wan bigfala pis blong pepa, blong mekem se evri memba blong klas bae oli save gat janis blong luk olgeta.
 4. Wan tingting blong tij: Ol gudfala tija oli ol gudfala man o woman blong lisin. Blong lisin i no jes tekem nomo fasin blong harem, be traem blong andastanem wanem oli bin talem. Ol tija we oli stap lisin gud bifo oli toktok, i soem se olgeta oli andastanem mo respektem wanwan memba blong klas. (Luk long *Teaching—No Greater Call*, 168–70).
-

Wan Tingting blong Lesen

Aktiviti blong Pulum Tingting

- Olsem we i stret, yusum aktiviti ia o wan aktiviti blong yuwan blong statem lesen. Askem ol memba blong klas blong oli tingbaot ol saen we Lod i bin yusum insaed long tijing blong Hem long taem blong ministri blong Hem long wol. (Ol ansa i save tekem tu sol, wit mo rabis gras, bred, mo ol tri blong oliv.)
- From wanem oli stap yusum plante saen long taem oli tij? (Hem i save helpem man we i stap lan blong andastanem mo tingbaot, tru taem hem i stap komperem ol aedia we oli no semmak o ol samting we oli semmak gud; hem i save gat ol defdefren level blong mining; hem i save leftemap tingting blong wan we i stap lan blong tingting moa dip abaot wanem we oli bin stap tijim.)

Eksplenem se ol saen oli yusum insaed long ol skripja, be eseseli insaed long buk blong Revelesen. Soem ol pikja we i stap long pej “00(191)”, mo poenemaot se ol pikja ia i soem ol saen we oli stap tokbaot insaed long Revelesen japta 1. Wanwan long ol saen ia bae oli toktok raon long olgeta insaed long lesen ia.

Yu save eksplenem se Aposol Jon, man we i raetem buk blong Revelesen, i kam aot long wan kalja we oli stap yusum plante ol saen insaed long lanwis blong olgeta mo tu long fasin blong raet. Ol man blong rid tedei, oli oltaem gat hadtaem from ol saen long ol raeting blong Jon. Sapos yumi tokbaot ol imej ia long fasin blong raet, buk blong Revelesen bae oli save luk defren mo konfius. Sapos yumi tingbaot se plante long ol imej ia oli ol saen mo oli ripresentem ol pipol, ol samting, o sam samting we yumi save finis, bae yumi kam blong andastanem gud buk ia.

Yusum mo Toktok
Raon long Skripja

Wetem prea, tinghevi long ol wanem pasej blong skripja mo ol kwestin insaed long lesen ia bae i save mitim gud ol nid blong ol memba blong klas'. Spendem fulap taem blong klas blong stap toktok raon long ol toktok blong skripja mo ol kwestin ia. Helpem ol memba blong klas blong luk se buk blong Revelesen i impoten mo i blong yumi blong yusum tedei.

1. Jon luk sam saen we oli stap ripresentem ol pat blong Jos blong Jisas Kraes.

Ridim mo toktok raon long Revelesen 1:1–3, 9–20.

Luklukbak wetem klas long jeneral infomesen ia abaot buk blong Revelesen:

Jon i wan long ol niufala Aposol blong Sevyia. Gavman blong Rom i bin panisim hem long Patmos, wan smol aelan aotsaed long wes kos blong Teki long dei blong yumi tedei, from fasin blong stap serem testemoni long saed blong Jisas Kraes. Taem Jon i stap long ples ia, wan enjel i bin visitim hem mo givim long hem wan revelesen we hem i bin rekodem insaed long ol leta blong ol seven branj blong Jos long Esia (Revelesen 1:1, 9–11). Ol leta ia oli kam buk blong Revelesen.

Buk blong Revelesen oli raetem menli long fasin blong lanwis we i tokbaot ol saen. Tingting blong hem i se “bae i gat wan faenal viktri blong God long wol ia ova long devel; wan niufala viktri blong gud fasin ova long nogud, blong Ol Sent ova long ol man we oli stap givim hadtaem long olgeta, blong kingdom blong God ova long ol kingdom blong ol man mo blong Setan. . . . Ol infomesen abaot ol animol, ol wo, ol enjel, ol man, etk., i kontribiut long developmen blong aedia ia. Tru long smol stadi, aedia ia i save kam tru iven sapos oli no save gud evri infomesen ia” (Bible Dictionary, “Revelesen of Jon,” 762).

Ol tri fasfala japta blong buk i rekodem testemoni blong Jon abaot ful trutok blong revelesen, ol toksave blong Jon long Lod, kaonsel blong Jon abaot ol seven branj blong Jos long Esia. Japta 4 i rekodem visen blong Jon long saed blong Heven, mo japta 5 i go kasem 20 i rekodem visen blong hem long saed long viktri blong kingdom blong God long fuija. Visen ia i soem wo we i stap agensem kingdom blong Setan, taem we oli spolem gud kingdom blong Setan, mo las aksen insaed long histri blong wol. Afta hemia i wan visen blong ol niu heven mo niu wol—wol long selestiel stet blong hem (Revelesen 21:1–5). Buk blong Revelesen i klos wetem testemoni blong enjel mo sam moa kaonsel we i kam long Lod.

- Wanem i fas imej, o saen we Jon i bin luk insaed long Revelesen ia? (Luk long Revelesen 1:12.) Wanem ol aean blong putum kandel i ripresentem? (Luk long Revelesen 1:20.) From wanem ol aean blong putum kandel i wan stret saen blong ol branj blong Jos? (Luk long 3 Nifae 18:24 mo toktok we i stap daon.)

Olsem wanem ol wod mo ol branj tedei oli stap stap olsem ol aean blong putum kandel?

Elda Bruce R. McConkie i talem: “Ol aean blong putum kandel i stap karem laet; be olgeta oli no mekem laet. Wok blong olgeta i blong givim laet, be i no blong tekem i go long man. So blong yusum seven aean blong putum kandel i stap ripresentem seven Jos ia we Jon i stap givim kaonsel long hem naoia, Lod i stap soem se evri pipol blong Hem long Wol oli blong karem laet ia blong Hem i go long Wol” (*Doctrinal New Testament Commentary*, long ol buk 3. [1966–73], 3:442).

- Weaples nao Sevya i go wetem seven aean ia blong putum kandel? (Luk long Revelesen 1:13.) Olsem wanem Sevya i stap long medel blong Jos blong Hem tedei? From wanem hem i impoten long yumi blong save se Hem i stap stap long medel blong ol pipol blong Hem?
- Wanem nao Sevya i stap holem long raet han blong Hem taem Hem i stap stanap long medel blong ol seven aean blong putum kandel ia? (Luk long Revelesen 1:16.) Wanem ol seven sta oli ripresentem? (Luk long Revelesen 1:20; luk tu long Revelesen 2:1, mo Revelesen 3:1. Truaot long Translesen blong Josef Smit long Revelesen 1–3, toktok ia *ol enjel* i bin jenis i kam *ol wokman*, blong mekem i klia se ol sta oli ripresentem ol lida blong ol seven branj blong Jos.) Olsem wanem ol lida blong Jos oli olsem ol sta? (Ol ansa i save tekem tu se, olgeta oli strong mo oli save givim daareksen long olgeta we oli stap lukaotem olgeta.)
- Wanem nao i bin kamaot long maot blong Sevya long visen ia blong Jon? (Luk long Revelesen 1:16.) Wanem nao naef ia i ripresentem? (Luk long D&C 6:2.) Long wanem wei nao toktok blong Lod i olsem wan naef? (Luk long Hibrus 4:12; Hileman 3:29.)
- Wanem wan narafala saen we Lod i gat insaed long Revelesen? (Luk long Revelesen 1:18.) Wanem nao bae Sevya i mekem wetem ol ki ia? (Hem bae i sevem evri pipol long ded blong mit mo bun, mo Hem bae i sevem ol man o woman we oli stret mo gud long ded blong spirit. Luk long 2 Nifae 9:10–13.)

2. Lod i talem long seven branj blong Esia abaot ol blesing we oli promesem olgeta we bae oli stap strong.

Toktok raon long Revelesen 2–3. Invaetem ol memba blong klas blong ridim ol ves ia we yu bin jusum. Eksplenem se japta 2 mo 3 i gat insaed long hem ol toktok blong Lod i go long wanwan seven branj long Esia. Lod i bin luklukbak long sam long ol paoa mo sam samting we wanwan branj i no strong long hem mo wonem Ol Sent blong stretem ol samting we oli no strong long hem.

- Lod i bin presem mo korektem ol memba blong Jos long Esia, i semmak olsem we Hem i stap presem mo korektem yumi tu tedei. Wanem nao maet Lod i presem yumi from? Wanem nao Lod i bin talem long yumi blong korektem?

Eksplenem se insaed long ol toksave blong Hem i go long olgeta branj blong Jos long Esia, Lod i promesem tu olgeta we bae oli winim ol tes mo ol temtesen blong laef blong wol ia. Raetem antap long blakbod *Ol Promes blong Olgeta We Bae Oli Win*. Taem yufala i stap toktok raon long wanwan long ol promes ia, listim antap long blakbod andanit long hedding ia.

I go long Efesas (Revelesen 2:1–7)

- Lod i wonem ol pipol blong Efesas blong oli mas sakem sin blong olgeta, be Hem i bin promesem tu, “Man we i win long faet ya, mi bambae mi givim raet long hem blong kakae frut blong tri blong laef.” Wanem tri blong laef i ripresentem? (Luk long 1 Nifae 11:21–22.) From wanem hemia i wan long ol gudfala blesing bitim ol nara blesing?

I go long Smana (Revelesen 2:8–11)

- Lod i wonem Ol Sent long Smana se bae oli fesem ol hadtaem, be Hem i promesem tu, “Man we bambae i win long faet ya, taem ded i kam nambatu taem, bambae i no save kilim hem.” Wanem i seken ded? (Luk long Alma 12:16, 32; Hileman 14:18.) Olsem wanem promes blong Lod we i go long Ol Sent long Smana i givhan long yumi blong luksave ol hadtaem blong yumi long wan gudfala lukluk?

I go long Pegaman (Revelesen 2:12–17)

- Lod i bin tok strong long sam pipol long Pegaman long fasin blong stap folem doktrin blong Balam, wan profet blong Ol Testeman we i stap gat strong tingting long ol bigfala samting blong wol mo ol samting we wol i stap givim bitim we blong stap folem tingting blong Lod. Wanem ol bigfala samting blong wol mo ol samting we wol i stap givim maet yumi gat we i stap stopem yumi blong obei tingting blong Lod?
- Long Ol Sent long Pegaman, Lod i bin promes se, “Man we bambae i win long faet, mi bambae mi tekem kakae ya mana* we i stap haed yet, mi givim long hem blong i kakae.” (Toktok we i stap haed yet insaed long laen blong toktok ia i minim tabu, o i no save kam long evriwan.) Wanem nao mana we i stap haed yet i ripresentem? (Luk long Jon 6:35, 49–51.)

I go long Tuatira (Revelesen 2:18–29)

- Long ol toktok blong Hem i go long Ol Sent long Tuatira, wanem nao Lod i promesem olgeta we bae oli win long faet ia? (Luk long Revelesen 2:26–28. Eksplenem se ol promes ia i stap tekem i go long olgeta ol blesing blong oli kam olsem God mo laef we i no save finis, taem ol stret mo gud pipol oli rulum ol kingdom blong heven.) Wanem i rel blong aean we ol man we oli stret mo gud bae oli yusum blong kontrolem ol nesen? (Luk long 1 Nifae 11:25; Joseph Smith Translation, Revelation 2:27.) Olsem wanem yumi save yusum toktok blong God blong kontrolem laef blong yumiwan?
- Huia i moning sta we oli tokbaot insaed long Revelesen 2:28? (Luk long Revelesen 22:16.) Wanem nao maet i save minim blong oli givim wan moning sta? (Ol ansa i save tekem tu blong risivim Kraes insaed long laef blong yumi mo blong kasem ol blesing blong Atonmen blong Hem.)

I go long Sadis (Revelesen 3:1–6)

- Wanem ol blesing we Lod i promesem long Ol Sent blong Sadis? (Luk long Revelesen 3:5.) Olsem wanem fasin blong stap tekpat long ol tempol odinens i stap mekemrere yumi blong “stap warem ol waet klos” blong taem we i no save finis? Wanem i buk blong laef? (Luk long D&C 128:7; luk tu long Eksodas 32:33;

Alma 5:58; Bible Dictionary, “Book of Life,” 626–27.) Wanem nao bae i hapen long olgeta we nem blong olgeta oli raetem insaed long buk blong laef mo afta oli bin aotem from fasin nogud? (Luk long Revelesen 21:10, 23–27; Alma 5:58; D&C 88:2.)

I go long Filadelfia (Revelesen 3:7–13)

- Wanem Lod i talem se bae Hem i mekem blong Ol Sent long Filadelfia from se olgeta oli bin “kipim toktok blong [Hem], mo . . . oli no tanem baksaed blong olgeta long nem blong [Hem]”? (Luk long Revelesen 3:10.) Olsem wanem nao blong stap laef long wan stret mo gud laef i mekem i kam moa isi blong winim temtesen?
- Lod i bin promesem olgeta we bae oli win se, “Bambae mi mi raetem nem blong God blong mi, mo nem blong taon blong God blong mi, i stap long hem.” Wanem mining blong gat nem blong God mo nem blong taon blong Hem blong oli raetem long yumi? (Yumi kam olsem God mo kam ol stret man insaed long kingdom blong Hem we i no save finis.)

I go long Laodisia (Revelesen 3:14–22)

- Lod i bin jajem Ol Sent long Laodisia we oli “hafhaf nomo, olsem we oli no hot gud, o kol” (Revelesen 3:15–16). Olsem wanem nao maet samtaem yumi stap “hafhaf nomo” long saed blong spirit? Olsem wanem yumi save mekem komitmen blong yumi long saed blong gospel blong Jisas Kraes i kam antap?
- Lod i bin promesem ol pipol blong Laodisia se, “Mi mi win long faet blong mi finis, nao mi stap sidaon wetem Papa blong mi blong joen long Hem long hae nem blong Hem. Mo long sem fasin, bambae mi mi givim raet long man we bambae i win long faet, blong i kam sidaon wetem mi, blong joen long mi long hae nem blong mi” (Revelesen 3:21). Wanem blesing nao promes ia i stap mining blong sidaon wetem Lod long trong blong Hem? (Luk long Rom 8:16–17.)

Luklukbak long list blong ol promes antap long blakbod, mo eksplenem se taem yumi lukluk gud long evri promes ia, olgeta oli stap talemaot stamba fasin we i no save finis blong man we i stret mo gud. Mekem ol memba blong klas oli ridim Doctrine and Covenants 132:20 olsem wan sot toktok blong ol promes ia.

3. Jon i lanem se Ol Sent oli winim Setan tru long Atonmen blong Jisas Kraes mo long ol testimoni blong olgeta.

Ridim mo toktok raon long ol ves ia we yu bin jusum long Revelesen 12. Eksplenem se olsem pat blong revelesen blong hem, Jon i bin luk wan visen olsem wan saen blong Wo long Heven mo fasin we i stil stap gohed tedei long wol.

Eksplenem se woman we oli talemaot insaed long Revelesen 12:1–2, 5 i ripresentem Jos blong God. Pikinini we i tekem i kam, i ripresentem kingdom blong God—gavman we bae i stap long wol ia long taem we Jisas Kraes bae i rulum wol ia long milenium. (Luk long Joseph Smith Translation, Revelation 12:7; luk tu long Joseph Fielding Smith, *Doctrines of Salvation*, komp. Bruce R. McConkie, long ol buk 3. [1954–56], 1:229.)

- Bigfala algita ia i ripresentem huia insaed long Revelesen 12? (Luk long Revelesen 12:9.) Wanem i bin hapen long algita mo ol man blong hem long Wo ia long Heven? (Luk long Revelesen 12:3–4, 7–9.) Wanem nao algita i mekem long taem oli sakemaot hem? (Luk long Revelesen 12:17.) Hiua nao Setan i stap faet wetem tedei? (Luk long Revelesen 12:12.)

Presiden Wilford Woodruff i talem se: “I gat tu paoa long wol mo long medel blong ol pipol blong wol—paoa blong God mo paoa blong devel. . . .Taem i gat ol pipol blong Hem long wol, nomata long wanem ej, Lusifa, we i moning sta, mo milien blong ol spirit we oli bin foldaon hem, we oli sakemaot olgeta long heven, from oli bin mekem wo agensem God, agensem Kraes, agensem wok blong God, mo agensem ol pipol blong God. Mo olgeta oli sem blong mekem ol samting ia long dei blong yumi tedei mo long jeneresen ia. Taem we Lod i stap stretem han blong Hem blong mekem eni wok, olgeta paoa ia oli stap wokhad blong stopem” (insaed long *Deseret Evening News*, 17 Okt. 1896, 9; Gordon B. Hinckley i bin talemaot toktok ia, insaed long Conference Report, Okt. 1986, 56; o *Ensign*, Nov. 1986, 43).

- Olsem wanem bae Jos mo Kingdom blong God i kam blong winim Setan? (Luk long Revelesen 12:11.) Olsem wanem nao Atonmen blong Kraes mo ol testemoni blong yumi long Hem i save helpem yumi long ol wanwan hadtaem blong yumi agensem Setan?

Las Toktok

Testifae se olgeta we oli winim ol tentesen mo ol tes blong wol, bae oli kasem ol blesing blong laef we i no save finis. Helpem ol memba blong klas blong oli tingting abaot se Atonmen blong Sevyia i givim long yumi wan wei blong winim ol tentesen mo ol tes, sapos nomo yumi sakem sin mo stap fetful.





**Wan Nara Aedia
blong Tij**

Ol nara tul ia i kam helpem lesen aotlaen we i stap. Yu save yusum aedia ia olsem pat blong lesen.

“Yufala i luk. Mi stap stanap long doa” (Revelesen 3:20)

Soemaot pikja blong Jisas long Doa (62170; Gospel Art Pikja Kit 237).

- Wanem nao Revelesen 3:20 i tijim abaot Lod? (Luk tu long Revelesen 22:17.) Olsem wanem yu faenem samting ia se hem i tru?



“Hem Bambae I Stap Oltaem Wetem Olgeta, mo Olgeta Bambae Oli Man blong Hem”

Lesen
46

Revelesen 5–6; 19–22

Stamba Tingting Blong leftemap tingting blong ol memba blong klas blong fesem fiuja wetem hop se olgeta oli save se ol paoa blong Setan bambae i lus mo Sevyta bae i rul wetem glad.

- Rere long Lesen**
1. Ridim, tingting hevi, mo prea abaot ol skripja ia:
 - a. Revelesen 5:1–5; 6. Jon i luk tru long Revelesen, wan buk we i gat seven sil mo hem i luk sam long olgeta samting we i hapen long fas sikis sil, o long wan spes blong taem. Hem i luk se Setan i bin faet agensem ol man we oli stret mo gud long ful spes blong taem.
 - b. Revelesen 19:1–9; 20:1–11. Jon i luk se Setan bae oli fasemtaet hem mo Kraes bae i rulum wol wetem glad long taem blong milenium.
 - c. Revelesen 20:12–22:21. Jon i lanem se afta we las jajmen i tekem ples, ol man we oli stret mo gud bae oli go stap wetem God.
 2. Sam moa riding: Doctrine and Covenants 77; Bible Dictionary, “Revelation of John,” 762–63.
 3. Wan tingting blong tij: “Antap long evri samting ia, samting we i moa impoten long fasin blong mekemrere, hem i blong yuwan. Mekemrere blong mekem se yu gat save we i stap kam long Tabu Spirit” (Boyd K. Packer, *Teach Ye Diligently* [1975], 219). Wanwan long yumi i sud traem blong laef olsem Sevyta taem Hem i laef mo blong tij olsem we Hem i bin stap tij. Wetem prea, tinghevi se wanem nao yu save mekem, blong yu save gud se yu stap tij wetem save we i stap kam long Tabu Spirit. (Luk long *Teaching—No Greater Call*, 9, 13.)
-

Wan Tingting blong Lesen

**Aktiviti blong
Pulum Tingting**

Olsem we i stret, yusum aktiviti ia o wan aktiviti blong yuwan blong statem lesen.

Soemaot wan niuspepa we i jes pas, mo poenemaot tu o tri stori blong ol hadtaem, kaen olsem ol stori blong rabis fasin o ol naturel disasta(hariken o hedkwuek etk . . .).

- Wanem filing blong yu taem yu ridim abaot wan kaen samting olsem ia we i bin hapen? (Yu no mas toktok raon long ful infomesen blong wanwan samting olsem ia we i hapen long yuwan.)

Mekem wan memba blong klas i ridim Seken Timoti 3:1.

Poenemaot se yumi stap laef long las dei, long wan taem we Aposol Pol i talemaot olsem “laef ya bae i strong tumas.” Eksplenem se wan long ol jalens blong stap laef long las dei ia i blong lanem blong winim fraet mo fasin blong lusum hop, blong mekem se yumi save winim ol tes mo ol temtesen. Lesen ia bae i toktok raon long

olsem wanem yumi save faenem hop mo fasin blong no save fraet tru taem yumi andastanem ol iven we oli stap kam long ol las dei ia.

Yusum mo Toktok Raon long Skripja

Toktok raon long olsem wanem ol toktok blong skripja ia oli save helpem yumi blong gat hop long taem yumi stap fesem ol hadtaem blong las dei ia. Helpem ol memba blong klas blong andastanem se ol man we oli stret mo gud, oli no nid blong fraet long seken kaming.

1. Setan i stap faet agensem ol man we oli stret mo gud.

Toktok raon long Revelesen 5:1–5; 6. Invaetem ol memba blong klas blong oli ridim ol ves ia we yu bin jusum. Eksplenem se ol trifala japta blong buk blong Revelesen i stap tokbaot taem blong Jon (luk long lesen 45). Haf blong buk ia i stap dil wetem ol samting we bae i hapen afta long taem blong Jon, long taem we Apostasi i bin stat blong kamaot afta long ded blong Ol Aposol i go kasem taem blong kambak bakegen blong Jisas Kraes mo las jajmen.

Eksplenem se japta 5 mo 6 blong Revelesen i yusum saen blong wan buk we oli bin silim wetem seven sil (luk long Revelesen 5:1). Wanwan sil i stap ripresentem wan taosen yia blong wan taem we wol ia i save stap (D&C 77:6–7); yumi stap laef long spes we nambasikis sil i ripresentem. (Luk long nambatri Wan Nara Aedia blong Tij blong moa infomesen abaot ol seven sil ia.) Insaed long japta 6, Sipsip (Jisas Kraes) i openem faswan long ol sikisfala sil, mo soem sam long olgeta iven we i go wetem ol spes blong wanwan taem ia.

- Wan samting we yumi lanem insaed long japta 6, i se Setan i bin faet agensem ol stret pipol truaot long histri blong wol. Folem Revelesen 6:4–11, wanem sam long ol wei ia we hem i yusum blong mekem olsem? (Ol ansa i save tekem tu olgeta we oli listim olgeta i stap daon .)
 - a. Fasin blong kilim man mo wo (Revelesen 6:4, 8)
 - b. Hanggre mo fasin blong no gat kakae (Revelesen 6:5–6, 8. Eksplenem se peni blong ol man Rom i wan stret mane we wan man i save kasem long wan dei taem i wok mo wan bag blong wit i inaf blong wan man nomo i kakae long wan dei; ves 6 i stap talemaot se mane we man i stap kasem long wan dei bambae i save pem nomo kakae blong wan man long wan dei.)
 - c. Ol hadtaem (Revelesen 6:9–11)
- Wanem sam teknik we Setan i stap yusum tedei blong stap traem blong winim ol stret pipol?

Presiden Gordon B. Hinckley i bin talem:

“Wo ia, we i no gud, i bigwan, i bin gohed mo i neva stop. Hem i wo bitwin trutok mo rong, bitwin fridom blong jus mo fasin blong fos, bitwin olgeta man blong Kraes mo olgeta we oli tanem baksaed blong olgeta long Hem. Ol enemi blong Hem oli bin yusum evri kaen plan long rao ia. Oli bin spolem man wetem giaman toktok mo tingting we i no stret. Oli bin yusum mane mo ol rij samting. Oli trikim ol tingting blong ol man. Oli bin kilim ded man, mo oli bin stap praktisim eni samting we i rabis mo i no klin blong spolem wok blong Kraes . . .

“Plante man i filim [oposisen] long evri hadwok, tugeta wetem, insaed mo aotsaed long Jos, blong prapa spolem fet, blong daonem man, blong mekem

man i filim nogud, blong tokbaot samting we i no tru, blong temtem mo giaman mo switim ol pipol blong yumi blong oli folem samting we i no stret wetem ol tijing mo ol standet blong wok ia blong God. . . .

“Wo ia i stap gohed. Oli faet raon long wol, long ol poen olsem fridom blong jus mo fasin blong fos. Wan ami blong misinari i stap faet ova long ol poen blong trutok mo rong. Yumi faenem insaed long ol laef blong yumiwan, long dei mo naet, insaed long ol hom blong yumi, insaed long ol wokples blong yumi, insaed long ol skul asosiesen blong yumi; yumi faet ova long ol kwestin blong lav mo respek, blong fasin blong stap tru mo fetful, blong fasin blong obei mo stap tru mo ones. Yumi evriwan i stap insaed long hem” (insaed long Conference Report, Okt. 1986, 55–58; o *Ensign*, Nov. 1986, 42, 44–45).

- Afta we Presiden Hinckley i mekem toktok ia we i stap antap, hem i ademap, “Yumi stap winim [wo ia agensem Setan], mo long fiuja bae i neva saen olsem” (insaed long Conference Report, Okt. 1986, 58; o *Ensign*, Nov. 1986, 45). Olsem wanem yumi save holemtaet hop mo wan stret lukluk taem yumi stap faet long wo we i stap agensem Setan? Wanem risos yumi gat blong mekem yumi stap strong agensem paoa blong Setan mo ol man blong hem? (Ansa i save tekem tu ol skripja mo ol tijing blong ol profet we oli laef, prishud atoriti, ol tempol, mo taem yumi go wetem ol nara memba blong Jos.)

2. Bambae oli fasemtaet Setan, mo Kraes bae i rulum wol wetem glad long taem blong Milenium.

Ridim mo toktok raon long Revelesen 19:1–9 mo 20:1–11.

- Jon i bin save abaot plante rabis fasin, wo, mo ol jajmen we bambae oli kamtru bifo Kambak Bakegen blong Jisas Kraes (Revelesen 8–16). Mo afta long Revelesen 19, hem i talemaot gud kambak blong Lod, we i talemaot saen blong hem olsem kakae blong mared (Revelesen 19:7–9). Woman blong Smol Sipsip i stap ripresentem wanem? (Jos blong Jisas Kraes.) Wanem nao saen blong kakae blong mared i ripresentem, wetem Kraes olsem wan man we i kolosap blong mared mo Jos olsem wan woman we i kolosap blong mared, i stap givim tingting abaot rilisensip bitwin Lod mo Jos blong Hem?
- Wanem yumi mas mekem blong oli save invaetem yumi i go long kakae blong mared ia?

Elda Bruce R. McConkie i bin eskplenem: “Ol elda blong Isrel oli stap givimaot naoia ol invitesen blong kakae blong mared blong Lod; mo olgeta we oli biliv mo stap obei long gospel, long wei ia, olgeta oli stap akseptem invitesen ia mo bambae oli save stap long stret taem . . . long taem blong bigfala kakae blong mared ia” (*Doctrinal New Testament Commentary*, long ol buk 3. [1966–73], 3:563–64).

- Kambak Bakegen blong Jisas Kraes bae i stap long Milenium, wan taosen yia taem, taem Kraes Hemwan bae i rulum wol. Wanem nao bae i hapen long Setan long taem blong Milenium? (Luk long Revelesen 20:1–3.) Bae laef i kam olsem wanem taem bae oli fasemtaet Setan? (Luk long 1 Nifae 22:26; D&C 45:55, 58.) Olsem wanem yumi save limitim paoa blong Setan insaed long laef blong yumi naoia?
- Afta long Milenium, Setan bae i go fri blong wan smol taem, bae ol ami blong God mo ol ami blong Setan bae oli faet long wan las bigfala faet (Revelesen

20:7–8; D&C 88:111–13). Samtaem oli singaotem faet ia, faet blong Gog mo Magog. Wanem bae i kamaot long bigfala faet long en blong Milenium? (Luk long Revelesen 20:9–11; D&C 88:114–15.) From se yumi save finis wanem risal blong faet ia, wanem hem i responsibiliti blong yumi long saed blong viktri ia?

Presiden Ezra Taft Benson i bin talem: “Evri dei, ol paoa blong devel mo ol paoa blong mekem gud samting oli stap tekem ol niu man blong wok. Evri dei, wanwan long yumi i mekem ol tingting we i soem wanem yumi sapotem. Las ansa we i stap—se ol paoa blong stret mo gud fasin bae oli win. Be wanem i stap blong yumi luk, i blong luk *weapons* wanwan long yumi, naolia mo long fiuja, bae i stanap long hem long faet ia—mo sapos bae yumi *stanap strong* long hem o no. Bae yumi stap tru long ol las dei mo fulfilim ol misin blong yumi we oli putum bifo finis i stap?” (“In His Steps,” *Ensign*, Sept. 1988, 2).

3. Afta long las jajmen, ol man we oli stret mo gud bambae oli stap wetem God.

Ridim mo toktok raon long ol ves ia we yu bin jusum long Revelesen 20:12–22:21.

- Afta long bigfala las faet, faenal jajmen bambae i tekemples. Wanem yumi save lanem aot long Revelesen 20:12 abaot olsem wanem bambae oli jajem yumi? Wanem blesing nao bae i kam long olgeta we oli bin jajem olgeta se olgeta oli ol man we oli stret mo gud? (Luk long Revelesen 21:3–7. Listim ol ansa blong ol memba blong klas antap long blakbod. Ol ansa i save tekem tu olgeta we oli listim olgeta long nekis pej.)

Ol man we oli stret mo gud bambae:

- a. Oli stap wetem God long ples blong Hem (Revelesen 21:3).
 - b. Oli nomo save eksperiensem ded, sore, fasin blong stap krae, o soa (Revelesen 21:4).
 - c. Bae oli gat evri samting olsem ol pikinini boe mo gel blong God (Revelesen 21:7).
- Olsem wanem save abaot ol bigbigfala blesing ia i save helpem yumi long taem we yumi stap fesem ol hadtaem long laef blong wol ia?
 - Revelesen 21:10–22:5 i talemaot gud selestiel glori blong wol mo siti blong olgeta we bae oli kasem selestiel glori mo bambae oli stap long hem. From wanem i no gat tempol insaed long selestiel siti? (Luk long Revelesen 21:22. Stamba tingting blong tempol i blong tekem yumi i kam moa kolosap long God mo blong tijim yumi abaot plan blong Hem. Taem we bae yumi gobak mo stap wetem Hem bakegen, ol tempol bae oli nomo impoten.) Wanem nao Revelesen 22:14 i talem long yumi blong yumi mas mekem blong yumi save go insaed long ol get blong siti blong taem we i no save finis?

Presiden David O. McKay i bin talem abaot wan visen we long hem, hem i bin luk wan naesfala siti, plante pipol we oli warem ol waet klos, mo Sevya:

“Mi andasdanem se siti ia, hem i [Sevya]. Hem i Siti We I No Save Finis; mo ol pipol we i stap folem Hem, oli blong stap laef long ples ia long pis mo hapines we i no save finis.

“Be huia nao olgeta ia?”

“Olsem we Sevyia i ridim ol tingting blong mi, Hem i bin ansa mo poenem long fasin we i mekem haf raon long han blong Hem we i kamaot bitim evriwan, mo long hem oli bin raetem long ol toktok long gol: *Hemia hem i olgeta we oli winim fasin blong Wol—Olgeta We Oli Bon Bakegen wetem Tru Fasin!*” (*Cherished Experiences from the Writings of President David O. McKay*, komp. Clare Middlemiss [1976], 60).

Las Toktok

Poenemaot se Niu Testeman i en wetem wan mesej blong bigfala hop. Ol profet olsem Jon Reveleta i bin luk ol samting we bae oli kam mo hem i bin talemaot long yumi ol blesing we bae yumi kasem sapos yumi stap gohed blong stap stret mo gud, mo stap strong kasem en. Testifae se olgeta we oli stret mo gud bae oli win long en blong wol. Leftemap tingting blong ol memba blong klas blong gat strong tingting mo paoa mo hop long saed blong save ia taem oli stap stanap agensem ol rabis fasin mo blong oli lukaotem blong winim ol hadtaem blong laef ia.

**Sam Nara Aedia
blong Tij**

Ol nara tul ia i kam helpem lesen aotlaen we i stap. Yu save yusum wan o moa long wan long ol aedia ia olsem pat blong lesen.

1. Ol denja blong putum ol hat blong yumi long ol samting blong wol

- Revelesen 18:11–18 i stap tijim se ol rabis man oli stap krae from oli stap lusum ol samting blong wol blong olgeta, mo oli sapraes tumas se wan bigfala kingdom olsem i save lus evriwan long sot taem nomo. Long wanem taem yu bin luk evri samting blong yu we i blong wol ia i lus long sot taem nomo?
- Wanem ol denja blong putum ol hat blong yumi i stap long ol samting blong wol? Long wanem wei ol samting blong wol oli save pulum tingting blong yumi i go aot long ol samting blong spirit?

2. Fas Laef Bakegen

Mekem wan memba blong klas i ridim Revelesen 20:4–6. Blong helpem ol memba blong klas oli andastanem ol ves ia, serem ol infomesen ia (long nekis pej):

Fas Laef Bakegen, o laef bakegen blong ol stret man, bae i stat long taem we Sevyia i Kambak Bakegen. Olgeta we bae oli kasem wan ples long selestial o terestrial bae oli kam fastaem long laef bakegen ia (D&C 88:98–99). Seken Laef Bakegen, o laef bakegen blong olgeta we oli no stret, bae i stat nomo long en blong Milenium. Olgeta we bae oli kasem wan ples long telestial mo olgeta we bae oli lus blong oltaem, bae oli kamaot long laef bakegen ia. (D&C 88:100–102).

3. Ol seven sil insaed long buk blong Revelesen

Jat ia i givim sam moa infomesen abaot wanwan long ol seven sil ia. Yu save yusum jat ia tu blong andastanem strakja blong buk blong Revelesen.

Sil	OI Impoten Taem
Fas sil	Kriesen, mo taem Adam mo Iv oli foldaon long sin; ministri blong Inok mo taem taon blong hem i jenis i go long heven (Revelesen 6:1–2).
Seken sil	Noa mo Taem Wota i Kavremap Ples (Revelesen 6:3–4).
Nambatr i sil	OI ministri blong Ebrahim, Aesak, Jakob mo Josef (Revelesen 6:5–6).
Nambaf o sil	Ministri blong Moses; Eksodas; taem we ol jaj oli rul; taem we ol king oli rul; kingdom i seraot; faet blong ol kingdom (Revelesen 6:7–8).
Nambaf aef sil Taem	Jisas Kraes i bon, taem oli hangem Hem long kros, mo taem Hem i laef bakegen long ded; Jos blong Hem i stanap mo ministri blong OI Aposol; ded blong OI Aposol; Apostasi (Revelesen 6:9–11).
Nambas ikis sil	Apostasi i gohed; restoren blong gospel tru long Profet Josef Smit; ol saen blong ol taem oli kamaot (Revelesen 6:12–17; 7:1–8).
Nambas even sil	OI wo, ol bigfala sik, mo haremogud; Taem Lod i Kambak Bakegen (Revelesen 8:1–19:21). Milenium blong pis (Revelesen 20:1–6). Setan i fri blong smol taem, las bigfala faet, mo las jajmen (Revelesen 20:7–15).
Afta long namba-seven sil	Wol ia bae i kam selestial (Revelesen 21:1–22:6).

- Poenemaot se oli tokbaot ol fas faef sil insaed long 11 ves, oli tokbaot nambasikis sil long 14 ves, mo oli tokbaot nambaseven sil long 226 ves. Hemia i tijim wanem long yumi?

Poenemaot se Jon i lukluk plante long ol taem blong yumi mo hemia we bae i kam. Oli raetem buk blong Revelesen i blong dei blong yumi tedei, mo bae ol laef blong yumi bae oli gat blesing taem yumi stap stadi long hem mo stap rere long Taem we Sevya i Kambak Bakegen.

JOS BLONG
JISAS KRAES
BLONG
OL LATA-DEI SENT

BISLAMA

